

£ 750 40

1851


I
S
B

at the

3

41-7-D-35





Collegij Rom. lib. I. em. cat. Insc.

ANNVAE

41-7-D-35

LITTERAE
SOCIETATIS

IESV

ANNI. M. D. LXXXIV.

AD PATRES, ET FRATRES
eiusdem Societatis.

ex lib. Card. Rom. Tol.



ROMAE.

In Collegio eiusdem Societatis.

M. D. LXXXVI.

Cum facultate Superiorum.

1586

ANNALS
OF THE
SOCIETY

OF THE
HISTORY OF THE
CITY OF BOSTON

AND OF THE
COUNTY OF SUFFOLK

IN THE YEAR 1800



BOSTON

Printed by G. B. LEECH, at the
College of the Holy Cross

in the year 1800

For the Proprietors

3
ANNVAE LITTERAE
SOCIETATIS IESV

ANNI. M. D. LXXXIV.

PATRIBVS, FRATRIBVSQVE

Societatis IESV, gratia, & pax
Christi Domini, &c.



*V*M ex ijs, quæ vel alij persecuti
sunt litteris, vel quotidie manda-
mus ipsi, Societatis progressionem
atque incrementa contemplan, Pa-
tres Fratresq; Charissimi, non pos-
sum non vehementer perpetuam

huius vineæ admirari fecunditatem, quæ in omnes
partes sine ulla cessatione numeroso fœtu se fundit.
Nam ceteræ sterilitatem patiuntur aliquando, nec
vnoquoque anno semper æque respondent: ut enim
cetera, sic arua quietis & laboris vicissitudinem
amant, & tum vberiores efferre fruges solent, cum
anteceßit quies. Ceteræ etiam suam senectutem
& vetustatem sentiunt, nec est ulla tam frugifera vi-
tis, quæ non aliquando vim fecunditatis amittat. nã
quid ego de ijs dicam, quæ extrinsecus accidunt, quæ
sæpe spem vindemiæ totius extinguunt? At hæc no-
stra, quã dixi, vinea nulla tempestate sit segnior, nul-

la senectute gracilior, semper est sine cessatione fecunda, sine vicissitudine ferax. Sed quid mirū? quando ex ea stirpe progenita est, quæ, & veram vitem se esse perhibet, & cum se habere cultorem, in cuius est potestate, non modo vitem colere & imbribus cælestibus irrigare; sed etiam feracitatem & quotidianæ incrementa largiri? Non potest sempiternos non induere fructus palmes ille, qui ex generosa & fecunda & semper sui simili vite prorpserit. Dum is in vite manserit, dum cultorum diligentia non aberit, nunquam à materna stirpe degenerabit. Cū igitur tantæ sit feracitatis hæc vinea, suamque benignitatem perpetuo sætu quotannis ostendat; sapienter institutum mihi videtur, ut eius communes fructus cum charissimis fratribus in commune laborantibus per publicas litteras communicentur. Quos latiores hoc anno plenioresve fuisse mirum videri non debet, cum ex ijs, quæ ad euocandam vbertatem faciunt, nihil desiderarit. Hoc enim P. N. Generali propositum fuit: cum filios suos & publicis ad vniuersam Societatem literis, ut mox dicemus, & amplissimo Iubilæo à Pontifice Max. impetrato, ad renouandam augendamque pietatem inuitauit. Ut enim aliæ vineæ, nisi statis temporibus restituantur ac renouentur, à partu cessent frugibusque minus habiles fiant; ita hæc nisi recidendis ijs, quibus vis diuini spiritus in nostris pectoribus consopitur, suo tempore renocetur, necesse est aut funditus euanescat, aut largas fruges hebetata non ferat. Nunc ea animorum renouatione, quam dixi, tanquam annua putatione

8

confidimus fore, ut hæc vinea, id quod à suis filijs
amantissimus Pater exigit, cælestibus gravidata
muneribus, non modo fecunditatis perpetuitatem
teneat, sed vberiora indies incrementa suppeditet:
ut ex hoc ipso possit conijci, quo tandem ex genere
stirpeve originem trahat, cuius succo alimen-
tisque satiata, semper læta, semper onusta sæ-
tu consurgit. Sed qui tandem sint hi fructus, hic an-
nus ipse declaret. Additi sunt nobis fratres quadrin-
genti & octoginta sex. Vita decessere centum circi-
ter & triginta. Numerantur in Societate sex millia
ducenti ac fere quinquaginta, ut ex ijs litteris, quas
accepimus, summa subducitur, accepimus autem ab
omnibus Prouincijs litteras; sed à quibusdam adeo
diminutas, ut multa Collegia prætermittantur. Col-
legia adiuncta sunt tria. In Gallia cisalpina Mātua-
num, Bilbilitanum in Aragonia, Iprende in
Belgio, Domus vna Cracouiensis in Po-
lonia. Sed de rebus nostris ha-
tenus vniuerse. nunc,
ut consueuimus
singillatim.

PROVINCIA ROMANA.



Luit hoc anno Fratres, Romana Prouincia quindecim ac sexcentos. In Professorum Domo centum. In Romano Collegio ac Tusculana sede decem circiter ac ducentos. In Domo probationis octoginta. In Pœnitentiariorum Collegio duos & viginti. In Anglicano decem. In Germanico tredecim. In Romano Seminario quinque circiter & triginta. Tybure sexdecim, totidem Perusii. Senis quindecim, viginti Florentiæ. In Lauretano Collegio quatuor & quadraginta. Quinque tantum in Illyrico. In Recinetensi quatuordecim. Vno plus in Maceratenfi. Auctus est numerus ad quinquaginta: imminutus obitu vnde viginti.

PROFESSORVM ROMANA Domus.

Quanquam in hac Domo centum circiter de nostris agunt, hoc anno tamen, quo ex omnibus Prouincijs, atque adeo ex vtraque India, Procuratorum Patrum coactus est cœtus, tanto magis
nume-

numerus creuit. Amissi sunt tamen Sacerdotes insignes duo Federicus Manriquez, & Franciscus Turrianus: quorum alter quamuis esset infirmissima valetudine, ita tamen in excipiendis confessionum laboribus sedulus fuit, ut ne firmissimis quidē robustissimisque concederet. nec quisquam dubitat, quin eius interitu præclarum virtutis & sanctimonie exemplū interierit. Alter doctrina ac probitate etiam singulari, Christi Ecclesiam assiduo semper scribendi labore, etiam tum cum exacta esset ætate, ab hæreticorum improbitate defendit. Ex hoc hominum genere det Deus Societati quam plurimos, qui & proximorum charitate flagrent, & religionis tuendæ studio teneantur. Cæteri suis quisque muneribus cum laude præsent. nullus est in vrbe carcer nullum Nosochomium, quo non hebdomadis fere singulis nostrorum sint missa subsidia. Ex ijs, quos sua malefacta ad supplicium & mortem egerant, cum alijs multis, tum duobus exulum ducibus præsto nostri fuerunt. Ii quoniam in medijs hominum iniurijs, manus tamen abstinebant à nostris, quasi mercedis loco videntur diuinitus assecuti, ut quo paratiores proficiscerentur ad mortē, in nostrorum potissimū manus inciderēt. Iam vero ut eos, qui & a flagitiosis amoribus, & ab odijs capitalibus reuocati sunt, omittamus, quorum semper ingens est numerus; ea non exigua videri debet utilitas, quod cum multis Religiosæ vitæ monstratum est iter, tum ad Societatem perducti sunt decem. nec minus in adscribendis nouis Fratribus, quàm in confirmandis adscriptis

elaboratū est: frustra enim suscipiatur labor, si quorum opera diuino spiritu replendi sunt ceteri, eo ipsi funditus careant. Itaq; ad renouandam, vt dixi, vim sancti Spiritus, omnes in hac domo familiarium colloctionibus amputatis, ceterisque posthabitis curis, ad dies aliquot in suum se cubiculum abdiderunt: vt & cum Deo sermocinari inciperent, & Societatis more in contemplatione supernarum rerum atque cœlestium animum exercerēt. Hoc quasi pastu, nostrorum mens saturata, vix dici potest, quanto sit alacrior & vegetior effecta ad omnium officiorum munera rite & cumulate exsequenda. Atque hæc, quæ de hac Domo ceterarum omnium quasi parente dicimus, ea, ne in singulis sint iteranda locis, de vniuersa Societate intelligi volumus. Multum ad eam rem attulit adiumenti tum P. Nostri Generalis per litteras cohortatio ad vniuersam Societatem, tum Pontificium Iubilæum, quod idem Pater singulis, qui adhibita antea & vitæ confessione, in eam quam dixi, renouationem incumberent, impetrauit. Dum omni cura diuino cultui gloriæque seruitur, dum & propria & aliena salus curatur, Deo quoq; vicissim de nostris commodis curæ fuit. Quo tempore Procuratores Patres vna conuenerant, Gregorius xij. nostræ non ignarus inopiæ mille aureis numinis subsidio venit. quæ vero templo nostro priuatorum liberalitas detulit, ea mille amplius aureorum & quingentorum summam efficiunt. Matronæ porro tres nobilissimæ aureos item mille singulæ, ad ornandum in honorem Dei Matris sacellum

cellum elegans obtulerunt. Cardinalis vero Farne-
sius huius auctor extructorque Basilicæ, ne quem
annum suæ liberalitatis pateretur expertem, sex
amplius aureorum millia ad dissoluendum æs alie-
num, quod ædificij causa contractum erat, attribuit.
Ad exitum Aede sacra perducta, nec dum vſitatis
religionibus dedicata, certus Dedicationi dictus est
dies. ea septimo Kal. Octob. a Cardinali S. Seuerinæ
cum Episcopis quatuor, summa cum cæremonia, ob-
seruatis rebus omnibus, vt solennia ac iusta conse-
crationis postulanti, consecrata est. Enituit in ea re-
ligione, præclara tum Cardinalis, tum Episcoporum
pietas, quos affecta iam ætate viros, non magnitudo
laboris, non multiplex ac diuturna cæremonia, non
longa & præsentis & antecedentis diei defatigauit
inedia. à prima luce vsque ad tertiam post meridiē
horam in eo munere pie constanterque perseuera-
runt. Magno splendore, magno virorum mulierum-
que conuentu celebrata res est: duoque illa decora
sanctorum corporum Abundij & Abundantij, vt
sub aram maximam conderentur, instructa itē sup-
plicationis pompa, circumlata sunt. Idibus Augu-
sti, qui dies Assumptæ in cælum Virgini festus est,
rediit ad eum celebrandum colendumq; diem, quem-
admodum superiore anno fecerat, Summus Pont.
Qui hoc etiam magis nostra delectatus est æde, quod
& paulo iam erat ornatior, & præclara quadam
Eucharistiæ sede ac domicilio illustrabatur. est enim
multorum opus annorum, cum magnitudine nobile,
tum artis varietate distinctum: fulget auro, accen-
soque

foq, colore, plurimisq; sacrarum historiarum argumentis illuminatur: ut quocunque figas obtutus, nouo semper delecteris aspectu. itaque cum recens ad oculos hominum eius pulchritudo peruenit, magnam habuit celebritatem & plausum.

COLLEGIVM ROMANVM.

QUæ de Collegio Romano scribenda videbantur, ea quanquã in omnẽ Societatẽ, aut priuatissimis litteris, aut rumore nuncio perlata iã sunt: tamẽ quoniam ea cupidius à publicis fortasse litteris expectantur, non tam quod noui aliquid afferant, quã quod præteritæ memoriæ veritatem confirment: nos pauca quedã de noui instauratione Gymnasij, quæ litterarum commendationem desiderant, perstringemus. Gymnasium hoc Gregorij xiiij. liberalitate, biennio ante inchoatum, vbi in eam formam videbatur esse perductum, ut non modo veteres scholas, sed etiam multo maiorem auditorum multitudinem capere posset: nostri antequam initium docendi facerent, ad existimationem noui Gymnasij, cum eodem Summo Pontifice egerunt, ut quando tam præclari operis auctor esset, non alienum duceret dignitate sua, suo id aduentu cohonestare. Quorum postulationi cum benignus Pontifex annuisset, diemq; aduentus sui definiuisset; nostri quo maiore splendore apparatuque res gereretur, totos se pro suo quisque ingenio ac facultate, ad eum diem exornandum atque illustrandum contulerunt. Sed quo magis res
ob

ob oculos proponatur, tradenda est prius breuiter
edificij descriptio. Constat hoc Gymnasium scholis,
vt nunc quidem est, vndecim, si loca duo, quæ dua-
bus sodalitatibus Dei Matris, ad earum conuentus
seposita sunt, eximamus. Atque vt nihil de exter-
na Gymnasij facie loquar, quæ ad sui contemplatio-
nem viatores vel nolentes inuitat: nihil de amplitu-
dine ac dignitate patentis introitus, qui quantamuis
turbam facile admittit & reddit; nihil de nobili sca-
larum ascensu; nihil de cetera elegantia dicam, quæ
non modo nouos & peregrinos tenet oculos, sed etiã
assuetos: cingitur tum inferior, tum superior Gym-
nasij pars amplissimo peristyllo. in vtraque binæ à
latere excurrunt porticus, maxima laxitate, vbi oble-
stationis causa pererres. Superiores pilis ac para-
statis distinguuntur, egregijsq; menianis ad prospectũ
simul & venustatem. Inferiores excipit atrium per
amplum & iter ad domesticas ades. Est in superio-
re Gymnasio ad publicas litterarum exercitationes
aula perampla, quæ varijs ornata picturis omnium
oculos in se conuertit. Offert se primum ingredienti
Gregorius xiiij. aula in extrema: qui sublimi sedens
in folio cum Cardinalium corona comitatuq; quam-
plurimo porrecta dextera supplicibus benedicit. ac-
cidunt ad pedes supplices tum è Collegio nostro cõ-
plures, tum ex alijs ab eo institutis Collegijs lectissi-
mi adolescentes. Hinc, vbi ad aulæ latera conuer-
tis aspectum, pictos vndique cernis parietes pulcherri-
mis edificijs. ea sunt Gregoriana Collegia, quæ pius
Pontifex Religionis propagandæ studio in omni ter-

terrarum orbe cōstituit. Sex à dextra, septem visun-
 tur à læua. nam & in Lituania Vilnense, & Clau-
 diopolitanum in Transilvania, & Iaponica deinceps
 tria, cum Seminario Fuldensi à dextro latere cerni
 licet. A sinistro Viennense in Austria, Illyricum in
 Piceno, ac Romana deinceps quinque; nam ad ea, quæ
 Romæ constituta iam pridē erant, accesserunt Neo-
 phytorum Græcorumq; Seminaria, proximeq; Ma-
 ronitarum. Aulæ frons descriptionem refert Roma-
 ni Collegij maxima illa pictura, quam dicebamus,
 inclusi. id tanquam caput ceterorum, in capite quo-
 que sibi locum vendicat, multo ceteris ampliorem
 atque honestiorem. Huic è regione in ipso aulæ adi-
 tu respondent Collegia quinque, opere tamen & pi-
 ctura tenuiore: Mussipontanum in Lotharingia,
 Bräspergense in Prussia, Holcmucense in Morauia,
 Græcense in Stiria, Pragense denique in Bohemia.
 Atque hac varia multiplicique pictura, tanquam
 explicata veste, omnis vndique ornatur & distingui-
 tur aula. His, quæ dixi, Collegijs tanquam animus
 additum est perelegans carmen, vnius Poetæ opus;
 qui cum præcipuam in aulæ fronte picturam altero
 atque altero Epigrammate clausisset, singulis postea
 Seminarijs singula appinxit. Ex hoc fere genere re-
 liquus constabat ornatus. Erant ambulationes tum
 superiores tum inferiores, quasi fertis quibusdā car-
 minum redimitæ. Epigrammata genus quoddam
 poematis distinguebat, quod pictum argumentum cū
 Poesi coniungit. His emblematis ornabantur inter-
 columnia, ut non tam oculos picturæ varietas, quā
 ani-

animum argumenti utilitas oblectaret. His ita dispositis atque descriptis, V. Kal. Nouemb. qui dies SS. Apostolis Simoni & Iudæ festus & sacer est, in suum ipse Gymnasium Pontifex venit. Quod ut à multitudine animaduersum est, tãta cõfluxu vndiq; turba, ut quanquam eam per antecedentes satellites submoueres, subsistere tamen interdum Pontifex, & inter angustias cogeretur incedere. Inuisit aulã ita ornatam ut demonstrauius, ea significatione lætitiæ, ut vel eo tacente, quàm probaret omnia, ipsa oris hilaritas indicaret. Assedit in sella excelsa loco posita & apparata magnifice in ea aulæ parte, vnde suam ipse spectabat imaginem. Hic habita est ab vno de nostris oratio cū necessaria laudatione Pontificis, quæ tum beneficiorum commemorationem, tum gratiarum actionem contineret. Sed cum suis nequaquam laudibus singulari moderatione Pontifex caperetur, ut perorandi finis est factus, Deo, inquit, honor & gloria. Secundū hæc, scholas omnes inspexit formamq; è ligno, qua præcipitur, qualis sit futuri Collegij descriptio. Quæ omnia visus est mirifice comprobare. Post octauum diem, Nonis Nouëbris inchoata est varia & multiplex inter auditores nostros exercitatio. eaque in dies plures ita partita, ut primus dies altercationibus Theologicis, alter Declamationi cuidam de principatus contentione inter Romam veterem ac nouam: tertius disputationi de arbore vitæ, quam rerum omnium effector Deus iã inde ab orbe condito, in borto illo amœnissimo collocauit: quartus egregio carmini dicaretur; quo quære-

batur,

batur, quæ esset optima ratio tranquilla pacatæque vitæ. *Habitus est eo qui consequutus est die de studio trium linguarum Hebraicæ, Græcæ, & Latine Dialogus, Die vero sexto Philosophica concertatio. Atque hoc quasi sex dierum opus, clausit postremo die noster Orator, qui ad amorem sapientiæ iuvenes cohortatus, quasi fundamenta iecit ineuntis & consequentis anni. Sed quoniam primis scholis, omnes ferme Doctores solenni quadam consuetudine in sua quisque classe præstantur, inita est huiusmodi ratio, ut omnes ab omnibus audiri possint. Itaque in Theologiæ schola perampla ac magnifica, biduo duodecim, magno silentio, maiore cum assensu auditi sunt; terni matutini, terni item pomeridiani. quibus prolationibus primos sibi aditus ad consequentes scholas aperuerunt. Hac erant quæ de nouo Gymnasio mandanda litteris videbantur. Reliqua, quæ de animarum quaestu utilitateque dici solent, ut vna verbo complectar, ea fere sunt. Domi additi sunt ad Societatem ex minore Sodalitio adolescentes tres, totidem fere ex eo, quod è natu grandioribus constat. Foris autem strenua data opera est serendis colligendisq; fructibus. sed quoniam nihil est in hoc genere singulare, attingendum potius id breuiter fuit, quam pluribus persequendum.*

SEMINARIUM ANGLICANVM.

Nouum huic Collegio decus accessit ex Georgio Hadoco & Thoma Hemefordio pro religione

gione necatis in Anglia. Eorum alter dum palam de amplectenda religione cum hæreticis agit, comprehenditur, in carceremque conijcitur. Aetate erat ille quidem etiam tum adolescens, sed oris habitu videbatur adolescentior: atque hoc facilius sperabant eum hæretici à religione Catholica dimoueri posse. Itaque priusquam ad quæstiones & tormenta descendant, argumentis & rationibus agunt. Ex ijs quidam, ubi sensit, nihil se disputando proficere, ira incensus, ut accusationis ansa præberetur, quærere ex eo cæpit, an Regina esset Anglicanæ caput Ecclesiæ, cui Sacerdos, quo tandè iure id me rogas? An ignoras, quoniam ad hæc interrogata capitalis est responsio, in legibus cautum esse, ne Regine iniussu id rogarî quis possit? Si Christi famulus esses, inquit ille, næ tu libere te ipsum proderes, nec quo iure, quæve auctoritate te rogem interrogares. Hac commotus voce Sacerdos, Tu ne mihi, inquit, timorem obijcias? tali præsertim in causa? Vide, quam non reformidem, nego Reginam esse Anglicanæ caput Ecclesiæ, nego esse posse. Quis ergo caput? Romanus Pontifex. Hæc proditor, exclamat hæreticus, iccirco hæc audes, quia non adest testis idoneus, qui tuo te ex ore conuincat. Tum Sacerdos, scilicet is sum, qui testimonium hominis pertimescam, non ita est. Sed quoniam lacepsitus a te sum, libere ego quam religionem profiterer, aperui. Quin orationem, inquit, istam tuo chi rographo firmas? Quoniam per chartam, Sacerdos inquit, & atramentum non licet, scribam ut potero, arreptoque carbone, in summo sui cubiculi ostio ita scri-

scripsit. Gregorius xiiij. Anglicanæ & vniuersalis Ecclesiæ caput. Huius nutui atque imperio, necesse est tam ipsa Regina, si salua esse velit, quam mundus vniuersus obtemperet. Hæc Georgius illustribus litteris cum scripsisset, Minister abscessit: ille vero ex conscientia præclari facinoris quotidiana mortis expectatione suspensus seruabatur in carcere. ea tamen cum differretur, quidam è Catholicis persuadere homini conabantur, vt notas illas litterasque deleret, ne aduersarios irritare voluisse temere videretur, præsertim cum ex ea scriptura, planum iam omnibus esset factum, quã tandem profiteretur Ecclesiam. Ille vero, vel quod viri nõ putaret, id quod præclare factum esset, euertere; vel quod ea re offendi non mediocriter posset, quisquis eas litteras de Catholicis inspexisset, præsertim quod custodem carceris tam constanti confessione in suam sententiam pene perduxerat, amicorum consilijs ac monitis minime parendum existimauit. Ad extremum hæretici cum intelligerent, suas omnes artes, quas ad conuellendam Georgij constantiam admouerant, irritas esse; produci eum iubent ante tribunal, sociosque tam gloriosi certaminis illi adiungunt Thomam Hemefordium & Ioannẽ Mundingum huius Seminarij alumnos, & alios duos è Rhe mensi Collegio. Hic per summam seueritatem interrogati, constantissimi in religionis sententia reperiuntur. Ad Georgium autem conuersi iudices, miseratione commoti tam florentis ætatis, Quæ est isthæc, inquirunt, tua tanta temeritas, qui id ætatis, seniorũ consilia

consilia prudentiamque contemnas? Dede te, si sapi-
sis, & istius te adolescentiæ misereat, pigeat florem
istum perdere sine lucro. Tum Georgius nihil est,
inquit, quod mei miseratio vos teneat, aut quod hæc
ætas vlla vos ratione perturbet. sat matura Deo
est, sat tempestiva securibus: quæ quo citius suo
creatori redditur, eo illi est futura incundior. Equi-
dem in optima causa, soluo libenter quicquid ve-
stra non æquitas sed crudelitas exigit: scio cui cre-
didi & certus sum, quia potens est depositum meum
seruare in illum diem iustus iudex. Iudices cum fru-
stra Georgij tentari constantiam animaduenterent,
ad extremum sententiâ capitis ferunt, non in Geor-
gium modo, verum etiam in reliquos socios. quam
illi tanta non modo æquitate animi, sed etiam gau-
dio atque hilaritate susceperunt, vt in summis Dei
beneficij pœnam illam necemque reponerēt. Redu-
cuntur secundum iudicium in custodiam, vbi assiduus
precibus dies noctesque se comparabant ad mortem:
ad quam octauo post die iterum educuntur. Iuben-
tur supra crates ex instituto decumbere, & ad cau-
das alligati, equinas ad carnificinam vsque raptari.
ea ab vrbe abest passus circiter mille: quo vt ventum
est, Georgius ferali plaustro primus imponitur, erat
enim ministris in animo ad deterrendos ceteros no-
ua in eum crudelitatis edere documenta. itaque in
ipsis Sociorum oculis, hominem resle suspendunt, vt
ea repente præcisa, viuo adhuc atque incolumi pe-
ctus ferro discinderent, & cor cum intestinis auelle-
rent, ceteramq; de more feritatē expromerent. sed

vana fuerē consilia. nam qui laqueum debuit repen-
 tino ictu succidere, suaque celeritate interitum ca-
 dentis corporis anteuertere, tam oscitanter suas par-
 tes egit (id quod ijs plerunque contingit, quos præ-
 propera festinatio ad opus adigit) ut ante corporis
 casum, laqueiq; præcisionem, animā sacerdos effla-
 rit. Reliqui nihil huius nece commoti, quin confirma-
 ti potius (nouo quippe aucti deprecatore patronoq;
 apud Deum) plaustro ipsi quoque imponuntur ac
 suspenduntur. His carnifex ut negligentiam præte-
 ritam resarciret, tanta restem celeritate præcidit,
 ut viui illi stantesq; deciderint, conuersis ad sydera
 vultibus, oculisque ac nutibus, verbis ac vocibus Re-
 ligionem Catholicam profitentes. ea res immanita-
 tem carnificum sic exacuit, ut in rabiem efferati re-
 pente in ea corpora tanquam Molossi canes irrue-
 rint, ut ea viua adhuc calidaq; quam acerrimis tor-
 mentis excruciant. itaque non quidem celeriter,
 ut mos est, sed lentissime ac pedetentim aperire ven-
 trem atque abdomen incipiunt, cum illi interim cla-
 mabant identidem, Dominus meus & Deus meus.
 Quæ voces etiam tum à circumfusa multitudine
 exaudiebantur, cum cruentæ carnificum manus in
 ima viscera condebantur: ea totis auulsa viribus cō-
 iiciebantur in ignem. sequebatur totius pectoris fœ-
 da dissectio: quod quidem ne tam cito veniretur ad
 cor domicilium sedemque vitæ, tanta lentitudine
 scindebatur, ut ad id spectaculum omnis horreret
 aspectus. dempto corde vinisque prunis injecto, tū
 demum amputata sunt capita. hæc summis præfixa
 contis

contis ad ludibrium terroremq; Catholicorum in sublime sublata sunt. reliqua vero corpora in partes dissecta quatuor, urbanis turribus ac murorum pinnis affixa. Atque hac diuisione corporis ac descriptione membrorum Beatæ illæ mentes indissolubili se cum Deo vinculo coniunxerunt.

DOMVS PROBATIONIS & reliqua urbana Collegia.

Admisit Probationis Domus Nouitios vnum & quinquaginta, ijque de more ad omnem Societatis disciplinam erudiuntur. In suscipiendis Nouitiorum more peregrinationibus (vt hæc quoque minuta tangamus) quidam cum aberrassent à via, essentq; id quod necesse erat, maxima in egestate, obuiam sit eis vir primarius expeditus in curru cum familia & comitatu, qui cum suo veniret ex oppido, vt nostros aspexit, sciscitatus an essent ex Societate, molestum sibi esse dixit, quod ab ædibus longe abesset, aberat enim ab oppido passuum millia fere decem: sed tamen imperauit, vt eò nostri deducti victu ceterisq; rebus, quam liberalissime & commodissime haberentur. itaque ea nocte tanquam domini sunt excepti. nummos etiam obtulit & iumenta, eaque sine recusatione accipi voluit: vt intelligi possit, quanta sit diuinæ providentiæ in suos famulos cura, qui, quanto magis illi se deserunt, & in Deo sua ponunt omnia, tanto ijs prospicit affluentius. Sed non minus ille domesticorum, quam peregrinorum

subuenit inopia. Accessit enim septingentorum annorum pensio ad annum usque vigesimū. quam quidam de Societate cum Abbatiam, quam obtinebat in seculo, resignaret, Summo Pontifice approbante reliquit. Ex alterius item bonis, qui se Societati dicauit, aurei quotannis duceni quinquagenique sunt attributi.


IN Collegio Pœnitentiariorum complures, qui è varijs hæreticorum regionibus huc se contulerant, ad Ecclesiam reducti sunt. Vnus & idem Sacerdos quindecim interdum ex his absoluit, eosque tum ad detestandos errores, tum ad suscipiendam profitendamq; religionē adduxit. Aliqui etiam, qui, cœnobiorū religione deserta, vxores duxerant, liberosq; susceperant, relictis omnibus ad sua quisque cœnobio nostrorum monitis redierunt.

IN GERMANORŪ Collegio nihil est hoc anno præcipui. Quatuor ex his ad nostras vitæ rationes adiuncti sunt. reliqui ita se instituunt, vt ab ijs non tam hoc tempore postulandi sint fructus, quam vberrimi in posterum expectandi. ita præclarus eorum euentus, qui in suas dimissi sunt patrias sperare iubet: quorum tum virtute, tum in rebus gerendis industria, huius Collegij disciplina minifce commendatur: vt planius ex his ipsis litteris perspicui poterit.

Iam in Romano SEMINARIO non minor pietas, vt testatur vtilitas. Dedit Societati nostræ spectatæ indolis adulescentes vndecim. Ex ijs quidam tum oblata sibi a suis Abbatia, vt Societatis consilium abijceret, tentaretur, quod dicerent, cum tradendo
rudi-

rudibus Catechismo, non minus Christianæ Reipub. prodesse posse, quam si in nostro numero versaretur: is non modo in sententia repertus est constans, sed eam, quam dixi, Abbatiam suis sibi habere iussit. quæ res ita eius est probata patruo, ut ipsemet Societatis ineunda potestatem à Sabellio Cardinali, qui Seminarij patronus est, impetrarit, & Nouitiorum eum Magistro dicarit. Ex eodem numero adolescens cum Societatem haberet in votis, in grauem & periculosum morbum incidit. quocirca suum de Societate consilium parenti non dubitauit exponere. Pater, qui id ex alijs ante cognouerat, etsi præseruida ætati non satis credebat: tamē cum quotidie magis inflammari filij studium animaduerneret, spon- dit sese eum Deo, si cōualesceret, dicaturum, nullaq; interposita mora, filij causam apud Patrem Generalem vehementer egit. Interim adolescens ardore febris de potestate mentis exierat: sed ut ad eum Pater re impetrata reuertit, præ lætitia ad sese redijt. id quod illi in eo morbo non semel contigit, præsertim in extremo: cum enim deterius se haberet indies & aliena loqueretur, simulac Eucharistiæ viaticum allatum est, mens iterum redijt, tantaque constantia ac pietate Christi corpus accepit, ut nullum alienatæ mentis vestigium appareret. Sed quod longe admirabilius est, sibi ipse vaticinatus est mortem, nam inter initia morbi negauit, se ex eo lecto, ubi decumberet, surrecturum. nonnullisq; diem ipsum mortis, quibusdam etiam horam ante prædixit. nec vana cecinit, eodem enim die eademq; hora comper-

tum



sum est obſiſſe. Conditus eſt in templo noſtro tanquam vnus e noſtris: cuiusq; pater tam præclara morte plurimum recreatus, multo moderatius tulit vnicui iacturam filij.

TYBVRTINVM HETRVRIÆQ. Collegia.

TYbure adductus eſt ad Chriſtum non ignobilis Turca: inſtitutaq; e ciuibus magno pietatis incremento ſodalitas.

SENIſ autem adiuncti ſunt fratres duo. Nec deſunt viri nobiles, qui ad res gerendas Societatis opera vti velint, multiq; quanti nos faciant, ſubleuanda ſuis opibus inopia noſtra declarant. nam cum annuis fructibus vix, aut ne vix quidem, Collegij pars ſuſtentetur; tanta fuit priuatorum hominũ liberalitas, vt ea non modo neceſſarijs vitæ uſibus prolixè cumulateq; ſubuenierit, ſed etiam in ſacram ac domeſticam ſupelleſtilem redundarit. Noſtri quantum in ſe eſt, ſuam non patiuntur operam à quopiam deſiderari. ac dum de more ſæpe vocantur ad ægros, illud accidit non tacendum. Nobilis mulier cum filium haberet ægrum, plus diuinis, quam humanis artibus tribuens, Sacerdotem noſtrum accerſiit, iuſſitq; aliquid ex eo liquore, qui e Beati Andreæ corpore manat, ægro præberi: tanta eius fuit tum pietas tum fiducia, vt
quam-

quamvis in puero febrim paulo ante medicus deprehendisset; ea tamen diuino illo medicamento recesserit.

DE Florentino Collegio multis omisissis, hæc fere sunt, quæ litteris mandari possunt. Triginta amplius è publicis sunt educti custodijs: familijsque compluribus, quas à mendicando pudor ingenitus deterrebat, piorum liberalitate subuentum. Nec tamen his officijs ciuium vincuntur officia. nam ut nihil de veteri beneficentia, qua nobis templum ex ædificarunt, dicamus, multæ sunt præterea pecuniarum summæ huic tributæ Collegio. Quidam cum mutuum nobis dedisset argentum, diesque solutionis adesset, negauit se commissurum, ut quod ab argentarijs cælestibus sibi redditum iri consideret, id è terrestri trapezitarum mensa repeperet, atque ita debitum nobis ultro remisit. Matrona etiam nostri nominis studiosa, ut viua quicquid potuit è suis opibus ad nos transtulit (omne enim fere templi suppellectilem apparauit) ita in morte suarum fortunarum nos hæredes instituit; atque, ut ne tum quidem diuelleretur à nostris, in ade quoque nostra sepulturam sibi delegit. Nec vero discipulorum silenda benignitas est, qui cum Philosophiæ magistrum, reuersurum in patriam cognouissent, plenum ei marsupium ad subsidium itineris attulerunt. quod ille aurum cum è Societatis instituto respueret, nec ullo nomine, ut id acciperet, induci posset, ij marsupio in Gymnasio posito discesserunt. postero die cum eos Rector de Societatis legibus ac consuetudine docuisset, vix tandem persua-

fit, ut pecuniam, quam reliquerant, auferrent. Hanc civium erga nos voluntatem simili Deus liberalitate remuneret.

PERVSII ut d' cōmunibus abeamus, viginti circiter adolescentes Deo se in varijs religiosorum ordinibus deuouerunt. Mulieres præterea, quæ suis corporibus ad quæstum & libidines abutebantur, ad pudorem & sanctimoniam reuocatae sunt. In his quædam, cum è suis sordibus emerisset, multis comitata matronis in publicum prodijt tanquam in supplicationem, albis induta vestibus, caputque spineis redimita fertis, ac de ceruicibus fune suspensa: ita præeuntem Crucifixi imaginem sequebatur, tanta significatione doloris ex anteaactæ vitæ recordatione, ut ipse oris habitus commutati animi index esset. Ad templum ut ventum est, locum scandit excelsiorem, ad eam rem apparatus: ac dum concionator noster pro re nata verba facit, omni animi demissione ante signum Crucifixi proiecta tantos motus in omnium animis concitauit, ut nisi cœnobij locus excluderet, quod genus hoc mulierum sese recipit, meretrices in id multæ sese protinus inclusissent. Iam è placatis odijs insigniora sunt illa. Discipulorum contubernium mutuis odijs diuisum atque distractum in partes (nam eductis è vagina gladijs mutuam iam in eadem conspirauerant) sacerdos noster admonitus seducendis factionum ducibus pacatum reddidit ac tranquillum. Cuius, qui militarem profitebatur artem, ut studium pietatis occuleret, furtim ad conciones consuevit accedere. tulit suo tempore fructū
pietatis

pietatis suæ.nam ab inimicis grauitèr vulneratus cū inuiseretur à nostris, eorum hortatu, aduocata sua ipse parente cæterisq; propinquis, vehemèter ab eis contendit, ut abiecto vlciſcendi consilio, impunitatem percussoribus darent. atque hac animi affectione Eucharistiæ viaticum postulauit: quod cum initio negaretur, propterea quod nulla tum esset suspicio mortis, ille tamen postulandi contentione vicit, ut afferretur. quo accepto sacro etiam se oleo ad subeundum cum communi hoste certamen, deliniri iussit; nec ita multo post conuersus ad Patrē, Abeo, inquit, è vita Pater, abeuntem tuis precibus adiuua, & a peccatis absolue. Vix eum à noxis Pater absoluit, cum corpore solutus est animus, tum demum felix, tum demum beatus, cum vtrisque, vinculis exeditus toto impetu ferretur in cælum. Ad Societatem adiuncti sunt nouem. ex his quidam cum diu Rectorem ut reciperetur, vrgeret, Rectorque ea de re parentem admonendum existimasset, præ dolore parens obmutuit; deinde in furorem rabiemq; conuersus, vehemèter in nos exarsit. retulit iras domum, sed paucis diebus filij prudentia mitigatus, & eas posuit, & ad Rectorem veniæ caussa reuertit: excusataq; prima illa concitatione animi, quam sæpe regere in manu nostra non est, Societati filium, ne Deo vocanti resisteret, consecrauit. Hactenus de Hetruria. Nunc de Piceno perpanca.

L A V R E T A N V M E T

reliqua Collegia.



L Aurretani Collegij aëta à superiore anno fere non discrepant. Bavariæ Dux pro ea, qua est in Societatem benevolentia, ad Rectorem litteras dedit cum argenteo candelabro, quod ædi illi dicebat: iubebatq; ijs litteris alba ex cera candelas ad Dei Matris aram statis accèdi temporibus, simulq; Rectorem rogabat, ut sibi per litteras significaret, quantum aris videretur opus ad perpetuos in eam rem census constituendos: tantundem enim se curaturum. Steterat id candelabrum aureis mille ducentis, neque hac liberalitate contentus, alia insuper munera non ita multo post (datis item ad Rectorem litteris) misit. ea nos quoniam non multum ad rem nostram faciunt, præteriri facile patiemur.

HVIC Collegio Illyricum est adiunctum, cuius numerantur alumni fere triginta, ex coq; iam prodire Sacerdotes quatuor ad colendam Christi vineam satis instructi. Ut autem celerior studiorum futurus sit cursus, Magister alter explicandis Conscientiæ quæstionibus, quibus illi dant operam, adiectus est. Duo se Societati nostræ ex ijs adolescentibus dedicarunt, totidemq; missi sunt Romam in Seminarium.

Ma-

MACERATAE cū esset in more positū, ut ad tollendas ciuiles discordias tres quatuorve ē ciuium numero legerentur, hoc anno ē Societate lectus est vnus, ab eoque diuina ope perfectum, ut cum multis extinissent ante discordiæ, eæ fere sedatæ sint vniuersæ.

RECINETI vir primarius cum grauius ægrotaret, nec ullius suāsu posset, ut peccata confiteretur induci, nostrorū colloquijs destitit de sententia, expiatisque rite peccatis Societatem, a qua prius alieno erat animo amare cœpit. Filium, qui rei familiaris causa dissidebat à Patre, nec vlla ciuium aut propinquorum auctoritate reduci poterat ad concordiam, vnus ē nostris ope auxilioque diuino, & ad Patris reduxit obsequium, & ut contumaciæ veniam peteret, persuasit. Mutuæ præterea repressæ sunt cædes, præsertim duorum fratrum ē nobilitate præcipua, quorum alter alterum stricto gladio furens inuaserat, qui tamen nostrorum auctoritate, non modo se à cæde continuit, sed confecta pace, longo interuallo rite animum expiauit. Apud Samnites, principes inter viros pax item est conciliata grauissima. Quatuor autem & viginti in Vrbeueteri: qua re permota ciuitas de constituendo in ea vrbe Collegio per legatos agere cœpit: sed cum esset à P. Generali responsum, providendum sibi potius esse, ut vetera firmarentur, quam ut noua Collegia conderentur; postulauit, ut per eum saltem sibi liceret, concionatorem quem

quem de nostris habebat, diutius retinere. quod
facile impetrauit. Hæc de Piceno to-
taque Romana Provincia. nunc
pergamus ad reliqua.



29

P R O V I N C I A
MEDIOLANENSIS.



*Verunt in Mediolanensi Provin-
cia fere ducenti. In Professorum
domo 40. In Brerano Collegio 70.
In Genuensi duo ac triginta. In
Taurinensi 20. Vndecim Nouo-
comi, Vercellis septem, Arona
duo circiter ac viginti. Ex hoc numero tres è vita
migrarunt: Recepti sunt Societate viginti.*

D O M V S P R O F E S S A
Mediolanensis.

MEdiolanensis ager Sociorum labores ac stu-
dia magno factu remuneratur. Et vt à Pro-
fessorum Domo ordiamur, celebrant in eaiuge Chri-
sti conuiuium octauo quoque die circiter mille ex-
pantium vero peccata seu vetera seu recentia ma-
ior est numerus, quam vt iniri possit. Non hoc su-
scipiam, vt singula Societatis munera, in quibus &
fratrum virtus, & animorum fructus enituit, ora-
tione percurram. vt quid egregium in vnaquaque
re fuerit, ita à nobis commemorabitur. Ingens auri
vis, partim fraude partim inscitia iuris adempta, ad
suos dominos redijt. Negotiator vnus aureorum
mil-

millia quadraginta restituit: aliusq; tam multa, ut ex
ijs quotannis caperet aureorum duum millium ve-
tigal. Plurimi, qui diuturnas animi labeſ, aut nun-
quam confessione deterſerant, aut in ea taciti præ-
terierant, eas tandem eluere induxerunt in animum
& ſuam omnem turpitudinem aperire. Senex in his
quidam nunquam rite confeſſus, cum de inferorum
incendijs diſputantem energumenum audiſſet, metu
perterritus ad Sacerdotem accurrit, totumque pe-
ſtilentiæ virus enomuit. Verum ut urbana vitia;
quibuscum depugnatum eſt, & commoda, quæ ciui-
bus ſunt accerſita, mittamus; externa potius profe-
remus in medium, à quibus illa & pondere ſuperan-
tur, & copia. Ad Griſones ſeu Rhetios, Sacerdotes
deſtinati ſunt duo, quorū ubique opera, præcipueq;
Rogoreti tum concionibus habendis, tum explanan-
do catechiſmo conſumpta eſt. Et quoniam iniquas
ſænerationes in his regionibus lex prope nulla ve-
tabat, cautum crebris monitiſ eſt, & ne quid ſcno-
ri detur, & ut male parta reddantur. Sed dum in
ſanandis viiſ noſtrorum deſudat induſtria, inuidus
aduerſarius, ut omnia euerteret, ſerere diſcordia-
rum ſemina inter ipſos Griſones cœpit. Sunt autem
inter ſe Griſones, ut alijs litteriſ ſignificatum eſt,
trium quaſi Societatum ſœdere copulati, quarum
vna, ubi noſtri fuerunt, è Catholicis ſerme conſtat.
reliquæ è Zuinglianiſ Lutheraniſq; promiſcud, quæ
quidem Societatiſ Catholicæ magiſtratib; obiece-
runt, ab iſs dyſtaſtam alienigenam, & Ieſuitas
eſſe receptos, Ieſuitiſ enim in ea loca penetrare Gri-
sonum

sonum per edicta non licet, quod dicant id hominum genus nec Catholicis assentiri nec Lutheranis, sed æque omnibus fidem prodere, & quod minime ferendum est, novos fastos inducere, noua cudere calendaria. Responsum à magistratibus est, quod ad Principem alienigenam pertinet, Cardinalem Borromeum (de eo enim agebatur) illum quidem & Principem fuisse, & principatu dignissimum, sed tamen non modo ipsum nullo telorum genere, nullo numero militum, Grisonum esse fines ingressum: sed ne eius quidem famulis satis fuisse ferri ad diuidendos, quos conficerent, panes. cumque ea gens Catholicorum se partes sequi profiteatur, honorem habere Catholico Antistiti voluisse, & ei Antistiti, qui ut suos in Christo filios ad veræ religionis normam rationemq; dirigeret, id itineris suscepisset: quare id factum nec reprehensione videri dignum, nec contra fœdera pactionesq; Societatum. Quod vero spectat ad Iesuitas, an ij Iesuitæ vere sint, qui ad se venerint, exploratum sibi compertumq; non esse: Sacerdotes quidem esse certe, & ex eadem, qua sunt ipsi religione, sed eiusmodi tamen, qui non modo ab omni crimine longe absint, verum etiam partim exemplo vitæque integritate, partim erudienda iuuentute studeant prodesse quam plurimis. Cum in hanc sententiam responsa dedissent, communi omnium sententia decernitur, ut Episcopo Coirensi, cui Diocesis illa subiecta est, quamprimum se nostri sistant, interimq; concionandi & docendi munere superse-
dant. Id nostri non grauate fecerunt. Verum ut se-
datio-

datione fuere omnia, Magistratus in Concilium nostros aduocant, tum vt quid in eos statutum esset, exponerent, tum vt de nouo Calendario sententias exquirerent. Quod ad Calendarium attinet, ea fuit Consilij summa, nullo modo committendum esse, vt recens Calendarium semel acceptum ac confirmatum Summi Pont. auctoritate, in scio Episcopo, Cardinaliq; Borromeo, in cuius tutela ea vallis erat, antiquaretur. Populus, qua est in Romanum Pont. obseruantia, statuit quiduis potius perpeti, quam vel tantulum à Pontificio imperio nutuque discedere. Nostri tamen præteritis euentis edocti, ne quid sua apud Grifones commoratione, ijs quibus prodesse vellent, obessent; deliberare inter se cœperunt, præstaret ne desiderari tãtisper, quam in ijs turbis nulla cum vtilitate versari. Id subodorati discipuli ad suos quisque parentes cum lacrymis contenderunt, Patrum abitum lamentantes. cuius rei fama cum manaret latius, populum vehementer affecit. Postridie igitur, vniuersorum concilio simul cum patribus conuocato, edicitur, vt de nestrorum commoratione suam ferat quisque sententiam. mos est apud hos ferendi suffragij, vt quod quisque adiudicauerit ac probarit, id altera sublata manu significet. Vt igitur de re nostra rogatus est populus, complures non alteram tantum, sed vtramque manum sustulerunt. Nostri quando secundis comitijs aetas erat, pro secundis etiam euentibus, horarũ quadraginta supplicationem ad D. Mariæ, quam Lauretanam nominant, decreuerunt. Est id templum à
Sacer-

sacerdote quodam Dei Matris monitu quatuordecim annis ante constitutum, & ædi Lauretanæ, quæ est in Piceno amplitudine facile par, prodigijs item nobile frequentiq; conuentu. Vt igitur manendi copia facta est, tanto acrius se nostri ad sua munera cõtulerunt, quanto difficiliores initio aditus habuerũt. Nec vni tantum Oppido vtilitati fuere. Messaucum Rogoreto non procul abest, sunt in eo complures hæretici, sed ex ijs quindecim posita contumacia, suauissimo Ecclesiæ iugo ceruices suas nostrorum persuasionibus subiecerunt. atque huc nerui collati sunt omnes, vt cæca pectora diuinæ veritatis lumen admitterent; tanta est enim in plerisque caligo, vt discuti nisi à iustitiæ sole non possit: tanta autem animorum peruersitas, vt lucem oderint, noctem adament, nec dent ducibus dextram, qui extrahere eos conentur è tenebris. Fuit, qui rei veritate conuictus lapides de terra tolleret, vt se contra Sacerdotem nostrum, quoniam disputationis pugna non poterat, lapidatione defenderet. Neque tamen à confirmãdis in religione animis nostrorum charitas deterretur, præsertim quod ea cernitur in plerisque; constantia; vbi semel hauserint veritatem, vt optime apud eos collocari opera videatur. Rogoretum cum Calendarij caussa ex omni Grisonum tribu legati venissent, inspexissentq; quæ gererentur à nostris, visi sunt pijs ipsorum studijs mirifice delectari, placuitq; eorum concionibus interesse, interdumq; conuiuium illos excipere ceterisq; humanitatis officijs. Mos vsurpandi diuina mysteria, qui ante

nullus erat, tanta est omnium cum voluptate receptus, ut eam ob causam gratulandi Deo nullum finem faciant. Catechismus vulgo sic teritur, ut iam eius castissimo cantu personent uniuersa. Certe & puerulis discunt parentes, & quorum corpora & vitas alunt, ab his petunt pabulum animorum. Nec minus operæ in inferendis bonis, quàm in euellendis prauis moribus collocatur. Prodromi Domini natalitius, benedicebatur in sacris ædibus vino, idque populo magna cum superstitione propinabatur: ad sepulchra cantus lugubres edebantur, & (quasi id ad mortuorum animas aliquid pertineret) ploratus precibus miscebantur. Tam maledicta, execrationes, fœnora in minimis peccatis numerabantur: nam æscis vti præpinguibus, exceptis ab Ecclesia diebus, istuc quidem religioni vulgo non erat. Quæ tamen omnia, Deo fauente, aut funditus sublata sunt, aut magna ex parte repressa.

COLLEGIVM BRERANVM

Quæ res Societati nostræ propria est, ut rudi plebi teneræq; ætati lex Christiana tradatur, in ea huius Collegij fratres summa cum laude versati sunt. Inuitamento fuit ciuitas ipsa scholis Catechismi referta. quippe quæ centum ex ijs amplius numerat & viginti. Præest huic procurationi sodalitas quædam annum iam ante centesimum, in eaque sunt viri pietate ac religione præstantes, qui ad Catechismi munus has etiã officij partes adiungunt,

gunt, ut tetra in cœlites maledicta ac nefarias execrationes beneuola oratione castigent, suoque exemplo, qui cæteris obsunt, emendent. Huius sodalitatibus studia, quod natura fert in omnibus fere rebus, cum languidiora iam essent, alias cœpit operas aduocare, alia implorare subsidia. Dati sunt è nostris, in eam rem festis diebus duo de viginti, quorum labor utilis, ut superiore anno significatum est, longe lateque manauit. Forenses fructus fuerunt etiam vberiores: varijs enim in foris habita concio magnos animorum motus effecit. Res erat sane iucunda, cum ij ipsi, qui vel irridendi causa, vel curiosius cognoscendi, quid ageretur, accederent; saniores inde recederent. Vir nobilis ut propius accessit, & diuina verba admisit ad aures, domum celeriter aduolans, suos quoque liberos ad audiendum eduxit. Matrona nobilis concionem præterueta curru, ad aspectum concionatoris subsistere aurigam iussit: nec prius inde discessit, quam concionandi finis est factus; cumq. noster ille ad sacram ædem populum inuitasset, ipsa quoque de curru desiliens, præeuntem cum turba sequi non dubitauit. Mitto alias hominum cū hominibus, & hominum cum Deo reconciliationes; taceo pecuniarum restitutiones, impedimenta cædium, admirabiles animorum commutationes, & id genus alia complura, quæ hoc vno concionandi genere summa cum Cardinalis approbatione sunt facta. Ut autem auditores, quorum magnus semper numerus cogeatur, satis videbantur ad pietatem esse permoti, deducebantur non sine cæterorum admis-

ratione in ædem aliquam precabundi. res ad lætiti-
 am & voluptatem erat insignis, cum domum no-
 stri reuerſi ſuam quiſque prædam veſpertina per
 otia commemorabat. vnus ſexaginta ſe adduxiſſe di-
 cebat ad luenda peccata, alius ludos ſe diſſipaiſſe
 profanos, alij alias prædas quaſtusq. iactabant. &
 vero tanta vis erat eorum, qui confeſſionis cauſſa
 Sacerdotes requirerent, vt ei non modo Collegium,
 ſed ne Domus quidem vniuerſa ſufficeret. Redea-
 mus pauliſper domum, & de Sodalitijs Dei Matris
 Gymnaſioq. dicamus. E maiore minoreq. ſodalitio
 (duo enim ſunt, alterum è natu grandioribus, è mi-
 noribus alterum) religioſiſſimi quique ſelecti, ſex-
 ta quaque feria ſub veſperam vna conueniunt, effi-
 ciuntq. alterum quaſi priuatum cætum: cui propo-
 ſitum eſt curas omnes, tum in piam precationem, tū
 in edomandas prauas animi cupiditates intendere.
 nec alia lege tenentur, niſi qua diuinis octaua qua-
 que luce myſterijs, & qua ſilentio vt iubentur. Hi
 certum in locum vbi conuenerint, exactæ per diui-
 nas commentationes hebdomadæ rationem reddūt:
 deinde certatim quiſque abiectus in genua, pœnarū
 aliquid ſibi depoſcit. hic patefactis ſuis ipſe culpis
 acriter ſe obiurgat: ille ſe obiurgantes æquo animo
 audit: alius ad voluntaria verbera, nonnulli ad inſi-
 ma etiam pedum oscula omni ſummiſſione deſcen-
 dunt. atque hos fere Deus ad cœnobiorum discipli-
 nam ac perfectam rationem virtutis inſtituit. Soda-
 litium, quod è natu grandioribus conſtat, eſi ma-
 gnæ auctoritatis & ſapientiæ viros in ſuum nume-
 rum

rum legit: tamen tantum abest, ut id ætatis homines
 versari inter adolescentium ac discipulorum gregē
 pudeat, ut mirifice potius p̄s illorum sermonibus
 capiantur. Tanti vero apud eos sodalitas est, ut si
 forte tum adesse, cum suos illa conuentus habet, mi-
 nime liceat, per internuncium occupationes excu-
 sent: horum numerum speramus, Deo fauente, auctū
 iri quotidie: præsertim quod Terræ nouæ Dux, hu-
 ius Regiæ ditionis administrator, singulari pruden-
 tia vir ac pietate non minore, vnus ipse de sodalibus
 esse voluit: qui quanquam ingenti negotiorum mole
 tenetur, imperat tamen suis ipse occupationibus
 quantum potest, ut quam sæpiissime cum sodalibus
 vna versetur. Gymnasij pietas nibilo inferior, &
 quanquam in eo de sodalitate sunt multi: tamē laus
 ferme eadem ceterorum. Hanc suscitauit frequens
 peccatorum à prima ætate confessio, ad eamq. rem
 acris cohortatio inuitatioq. Doct̄orum. quare tan-
 tus inter auditores extitit ardor, ut iam cænobium
 triginta amplius meditentur. In Societatem præ-
 ter eos, qui ad domesticam procurationem admissi
 sunt, recepti sunt tres præclaris naturæ animiq. in-
 structi muneribus. Hac auditorum pietate mirifice
 captus est Borromeus, eosque, cum ad nos venisset,
 pabulo cælesti refecit, & ad eorum, totiusque Gym-
 nasij opportunitatem, curaturum se recepit peram-
 plam ad litterarias altercationes aulam extruen-
 dā, sed optima eius consilia mors diremit. Nec leue
 fuit eiusdem in nos amoris indicium, quod Collegij
 causam Pontifici Max. per litteras commendauit,

nec vnas tantum scripsit, sed alias, quæ Romam post eius obitum peruenerunt, quarum vi pius Pontifex Præposituram Collegio quandam, quæ Mediolano non longe abest, attribuit: sed ita, vt cum sese dedisset occasio, maiora deferret: id significauit ipse procuratoribus Italiæ Patribus, cū à sanctissimo pedis osculo in suas Prouincias remigrarent: nam cum ei pro accepto beneficio eius Prouinciæ procurator gratularetur; Pauca, inquit, ista sunt; plura, si facultas tulerit, adiungemus.

COLLEGIVM GENVENSE.

Genuæ quoque animarum saluti præcipua cura fideq; consulitur, siue apud ciues, siue apud paganos. In ciuitate plurima nobis lucra parantur ex sodalitatum tum varietate tum copia. eæ nouem circiter numerantur in varijs vrbis locis, & à Societate reguntur omnes. Cum his omnibus illud est commune, vt peccatorum labes vitent, & octauo quoque die mysterijs sese cælestibus expient. crebra in ijs de re diuina colloquia, crebra commentatio tractatioque cælestium rerum. Cætus quidam est eorum, qui expoliendis Catechismo pueris, rudiq; plebi præpositi sunt, interdumque nostris adiuncti ad triremes excurrunt, vt illa quoque contempta capita & remis addicta mancipia, christianis præceptis instituant. Horum exemplo permoti non pauci suos etiam liberos imbui volūt, eosq; ad Catechismi scholas (his plerumq; creditas) vltro deducunt. Soda-
lium

lium in hoc catu numerus fere centum. Est & ſodalitas quædam, quæ à Noſocomio vocabulũ ſumpſit ex adoleſcentibus ſexaginta, quorum partes ſunt, præter frequentem Sacramentorum uſurpationem, quam cum omnibus diximus eſſe communẽ, & Catechiſmi tradendi curam, pijs quotidie commentationibus ad vnius horæ ſpatium vacare. meditationem comitatur actio exercitatioq. virtutis. agris in valetudinario miniſtratur, tiremis carcerque conuiſitur, & alia huiusmodi officiorum munera obeuntur. Ex hoc Oratorio fluxit aliud, cui ſacra ædes angelicæ ſalutationi dicata nomen dedit. Conſtat id è ſodalibus fere centum, atque ita pendet à proximo, vt ab eo leges & moderatores accipiat, ſitq. veluti ſeminarium quoddam, vnde progrediente tempore migretur in illud. Adhibetur ad domandum corpus verberum diſciplina ſemel atque iterũ in hebdomada, ſæpeq. ſæpius, vt fere in omnibus fræno ſit opus. itaque complures de cœnobio iam cogitant, & diuitiarum prementes faſtum ad Chriſti paupertatem, humilitatemq. deſcendunt. Cœtus ille, quem Oratorium nominant S. Siri, totidem fere ſodalibus continetur, ſed his minimum decimoquinto die Sacramentorum indieta lex eſt. reliqua à ceteris ſodalitijs cœtibusq. non diſcrepant. Ex hoc ipſo numero ſodales ferme triginta, alios habet priuatos ſecretosq. conuentus, vbi agitatſ inter ſeſe varijs de pietate colloquijs, ad ſemihoram precationi ſe dedũt: tũ verberibus in ſuum ipſi corpus animaduertunt, & crebro pœnas à moderatoribus ſibi

deposcunt, quæ vel corpus vrant, vel personam ac dignitatem. ita sit, vt ex his quoque plurimi fugaciũ rerum cura contẽpta cœnobîa se in arcta concludât.

Sunt & Sodalitates quædam vel Oratoria, quæ, præter cetera pietatis studia superioribus consimilia, corrogandis pecuniarum subsidijs ægrorum inopiæ, & eorum quos nobilitatis pudor à quærenda stipe deterret, opitulantur. Hæc præcipua laus est tum Oratorij B. Martini, tum eius maxime, quod à Sudario nomen inuenit. hoc & nobilitate floret & numero: publicis in tẽplis stipem Sodales corrogant, quod quia sudario faciũt velut in marsupium complicato, ad excipiẽdam continendamq. pecuniam; iccirco à sudario ipso Sodalitas nominatur. Habent præterea nostri ad alium cætum ex hominibus octoginta cohortationem, hi nobiles togatiq. sunt omnes, suosq. conuentus habent non tam ad priuatum propriumq. commodum, quã ad publicum & commune, neque tam de virtutibus agunt, quas cura omni studioq. sectentur, quam de vitiorum fuga & corruptæ ciuitatis moribus, quos sanandos curandosq. suscipiant. Nam cum auctori- tate præstent, vltro ipsi ad Senatũ vel Episcopũ deferunt, si quid in ciuitate corrigendum sanandumq. sit. ita multis malis occurritur, multa vitatur incõmoda. Atque hic in vrbe campus Sociorũ sese laboribus explicat. nec tamen in tâta Sodalitiorum procuratione, ceteræ ciuitatis salus commodumq. negligitur. sæpe oboriuntur occasiones siue leniendi odia, siue nefaria lucra prauasq. consuetudines rescindẽ-
di,

di, quæ & auide arripiuntur à nostris & studiose. Quidam cum aureos nongentos vt redderet (nam minuta multa mittuntur) induci ne viginti quidem annorum spatio potuisset, impetratum tandem ab eo est, vt quæ contra religionem, contra officium vsurpauerat, restitueret. E fæminis, quæ pudicitiam suâ fæde vulgauerant, duodecim ex eo probro ac dedecore sunt ereptæ. Nec minore studio virilium libidinum extinctæ faces. Sed quotidianis rebus omnis migremus ex vrbe. Sæua inter externos est finita cōtentio, quæ cum indies cresceret, seminarium erat plurimæ cædis. ea extiterat inter eos, qui varijs dominis herisque parebant: & in utramque partem centum circiter cum ferro secesserant, in iisque exulum duces è diuersis eiekti sedibus: eò autem deducta res erat (plurima iâ facta cæde) vt magnâ pacis desperationem afferret: tamen quoniâ ab eo expectabatur medicina, cuius clementia ac misericordia pari prædita est potestate; Nostri ea nixi fiducia aggressi sunt pro viribus vniuersa componere: euocât ad colloquium tum dominos tum subiectos, dissidiū atque discordiæ docent incommoda, si quid esset litium, hortantur potius iure quam ferro decernant, denique in omnem partem sese versant, vt tã atrox dirimant periculosumq. certamen. haud irriti fuere conatus: dedit Deus, qui sperabatur, euentum, seditioq. omnis placatis animis conquieuit. Sacerdos alius cum comite dum finitima peragrat, tantum è suis concionibus fructum cepit, vt consentium multitudinē oppressus, quatuor quinqueue Sacerdotum labo-

labores sustinere unus suis humeris cogeretur. Leniuit quorundam odia fratrum, qui ex fraterna cæde in percussorem incensi octauum iam annum Sacramentis omnibus abstinebant. Aegrum etiam, qui non procul aberat à sepulchro, in eoq. pertinaciter stabat, ut ei, unde accepisset iniuriã, non condonaret, ita perpulit, ut non prius Pater ex eo loco, quam æger ex ea mente discesserit. Nec minus utilis quædam alibi conciliata pax est. Sodalitas quædam vel Oratorium in pago quodam est ex hominibus fere quingentis: in quo Magistratuũ Præfectorumq. mutatio, propter occultas in comitijs fraudes, magnarũ sæpe fuit seges & origo turbarum. Incolæ ut sunt ad cædem proni, etiam cum telo ad Oratorium accedebant, & qui locus erat à maioribus pietati ac religioni consecratus, is omni gladiatorum impunitate violabatur. Hoc cum ad Patris aures peruenisset, cætus moderatores euocat, eosque longa admonet oratione, quantam conciperent maculam, qui eas tali in loco rixas turbasq. paterentur: rationem etiã qua discordiarum semina tolli, quaque gigni concordia posset, ostendit. qua illi oratione permoti nihil antiquius habuerunt, quam ut remedijs vterentur acceptis. quibus adhibitis lætissimum postea otium & tranquillitatem vniuersæ sodalitati pepererunt.

ARONENSIS DOMVS, ET

Comense, ac Vercellense

Collegia.

Qui è Nouitiorum disciplina vitam fingunt siue recentissimi siue veterani, tantum procedunt

dunt ad virtutis aditum, ut non exiguae sint suis Re-
 storibus voluptati. Pudor eorum facit, quominus
 multa de eorum virtute dicamus. Gallus adolescens
 tum genere nobilis tum apud Regem graciosus, è do-
 mestica pugna non ignobilem victoriam reportauit,
 nam cum propinqui statim aduolassent è Gallia, ut
 adolescentis mentem vel minis auerterent, vel blan-
 ditijs, factaque ijs potestas esset, ut adolescentem si
 sequi vellet, abducerent; is sua firmitate eos ita debi-
 litauit ac fregit, ut ij re penitus desperata satius du-
 cerent inanes redire domum, quam diuturna atque
 inutuli pugna suum dedecus augere. Desperationem
 auxit, adolescentis epistola ad amicum, quem arden-
 ti cohortatione in suscepta Societatis sententia con-
 firmabat. quam illi epistolam cum resignassent, ex-
 plorassentq. quam frustra in eius commouenda con-
 stantia desudarent, qui ad id ipsum ceteros inflam-
 maret: ad extremum dedere manus. tametsi impro-
 ba eorum mēs impunita non fuit; quippe ex ijs vnus
 prae ceteris insolentior vix domum redijt, cum re-
 pentino iugulatus est morbo: nec ita multo post fra-
 ter in lacu periijt, ut doceretur imprudēs pater, suos
 ei filios non grauate concedere, cuius sceptro atque
 imperio liberorum vitæ atque mortes obtemperant.
 Quod ad communem animarum vtilitatem pertinet,
 etsi sedes hæc excolendis Nouitiorum moribus est
 dicata, non tamen, si quando incidit eiusmodi tem-
 pus, deferuntur externi. Itaque & familia vniuer-
 sa, nostrorum industria à diuturnis dissensionibus
 conquieuit, & duo è prima ciuitate germani fra-
 tres,

tres, qui ab inusitata rabie sexennio fere toto mutuis sese aspectibus ac sermonibus fraudabant, iungere dextras.

COMENSE Collegium suis quoque fructibus gaudet, suis letatur incrementis. Auctus est Gymnasii numerus Clericis Seminarij, & ex cetera nobilitate noua fit semper accessio. Nec minus belle Catechismi, quam litterarum scholæ procedunt. eæ multæ sunt, & Societate nituntur omnes, nec desunt viri sæminæq. primariæ, qui præmiorum illecebris instituta promoueant. habentur ea de re ab ætate puerili non sine principum conuentu, mutuae alterationes, & disputationum spectacula non iniucunda, quibus à profanis sæpe ludis inania studia multitudinis auocantur. Et quoniam Præsbyteri mensuros conuentus habent agitandis ijs, quæ ad cuiusque officium vitamq. pertinent: nostri quoque ad eos se conferunt, ut si quid difficultatis inciderit, ut plerunque euenit, id expediant. per eamq. opportunitatem, habetur sæpe tum ad clericos tum ad populum cohortatio, cū utilitate mirifica. E reliquis studijs muneribusq. Societatis, fructus etiam legiuntur non exigui. Ciuium in nos studium, ut alijs litteris est perspectum, indies magis declaratur. Quidam quinque aureorum millia Societati legauit, modo sine prole legitima decedat nepos.

VERCELLENSIS ciuitatis officia quotidie in nos extant illustrius. Obierat modico dierum intervallo vnus è nostris, cui, cum de more curandū esset, funus, Sacerdotes ipsi maximi templi, vnâ cum Se-
mina-

minarij clericis, funebri psalmodia parentarunt: pri-
masq; Archipræsbyter egit. Nobiles autem viri sæ-
minæq; ut subsidijs ac muneribus ægrum, ita mor-
tuum sua præsentia ac lacrymis decorarunt. Initiũ
præterea cepit in hac vrbe, nostris auctoribus, Ora-
torium, in quo statis diebus piorum conuentus ha-
betur: cumq; huc negotiorum caussa tres eodem tẽ-
pore Cardinales, Borromeus, Vercellensis, & Mon-
tis regalis venissent, eorum aliqui ad Oratoriũ pro-
fecti, Sodales tum Sanctitatis exemplo, tum oratio-
nis gravitate in proposito confirmarunt.

TAVRINENSE COLLEGIVM.

Taurinensis ager eam suis cultoribus gratiam
retulit, ut non queri possint quod sibi non be-
nigne responderit. Nam siue externa spectentur si-
ue domestica, omnia læta reperientur. Ordior à do-
mesticis priusquam ad externa progrediar. Aucti-
sumus domi fratribus quinque, orbatu vno. Is fuit
Ioannes Leonius Sacerdos, anno ab inita Societate
quarto circiter & trigesimo, cuius spectata virtus
iudicium Patris nostri commendabat Ignatii, à quo
in hunc numerum lectus est. tria religionis vota ri-
te edidit nouissimo vitæ suæ anno, ea vi lacryma-
rum, ut quantum de ætate deperderet, tantum de
pietate videretur acquirere. Et quoniam non apud
domesticos tantum, sed etiam apud externos bene au-
diit, mors eius communi omnium luctu publicisq; la-
crymis cohonestata est. Nec desunt vinorum stu-
dia,

dia, qui præclaris mortuorum vestigijs insistant. studet sedulo pro se quisque animarum commodis ac saluti. Sacerdos dum in excipiendis confessionibus tenuissimo cuique dat operam, tanta est diuinæ dulcedinis xbertate completus, ut nunquam se meminerit expertum esse maiorem. voluit nimirum Dominus in hoc homine declarare, quantum ijs Sacerdotibus delectetur, qui in eo obeūdo munere pannosos homines æque ac diuites amplectuntur. nam inter olentes paganorum animas, padoremq. agrestis amictus, suauitatem quandam admirabilis iucunditatis sensit: idque cum in templo nostro non semel, tum multo illustrius in Nosocomio quodā, cum agrū tractaret insanabilem atque vlceribus deformatū, quò qui accederet propter intolerabilis odoris fæditatem erat nemo. Ad eum ille non sine egregia horrentis naturæ victoria ingressus, ubi agere cum agro cæpit, & os ad os propius admouere, tantum abest, ut nullo amplius perfunderetur horrore, ut omnes odorum suauitates admoueri sibi ad nares opinaretur: eas vero intimis sensibus dulcedines hauriret, ut ab agri complexu diuelli postea non posset. Nec vero ita studetur domesticæ sanctitati, ut in communem animorum salutem nihil otij deriuetur.

Est Oratorium quoddam à nostris ædibus non longe positum è doctōribus discipulisq. permultis, nostræ item fidei curaq. commissum: in eo de rebus diuinis præcipueq. de virtutum studio vitiorumque fuga perutiliter disputatur. principem in eo grege locum obtinet Sfondratus Abbas Cremonensis, Cardina-

dinalis fratris filius, qui his iam communibus publicisq. sermonibus non contentus, habet insuper cum literatis adolescentibus, modo in suis, modo in nostris ædibus priuatos quosdam: eaq. re non ipse modo quotidie progreditur ad virtutem, sed in eo quoque totus est, ut ad imitationem sui ceteros trahat. Et quidem res illi cedit ex sententia, multos enim ad Sacramenta perducit, multos ad expiandas superioris vitæ noxas inuitat, qui simulac parere cæperunt, sensim ad innocentiam pietatemq; se transferunt.

Tradita est commentandi ratio de rebus diuinis, viris feminisq. primarijs. ea res sanctioris vitæ cupiditatem multis iniecit, compluresq. feminae per castimoniam vota, contemptis voluptatibus humani coniugij, cum caelesti sponso se coniunxere. Ex ijs partim se cœnobijs virginum deuouerunt, partim nullam cœnobiorum sequuntæ disciplinam in castitatis tamen proposito perseuerant. Ex hoc genere multæ cum essent, egerentq. ad sua tutanda corpora diligenti custodia, nostri excitandum censuerunt in honorem B. Virginis Sodalitium, quò deuota earum Virginum corpora, quibus aut facultas aut voluntas asperioris ineundæ vitæ non suppeteret, congregarentur. Huius sodalitatis opportunitas, quò latius pateat, viduas quoque in eam recipiendas Societas censuit, numeranturq. in ea fere viginti, quarum procuratio à primarijs est suscepta matronis. hæ Sacramentorū causa in adẽ nostram vniuersæ conueniunt, tantusq. cernitur in quibusdā ardor, ut iam

nunc ex eo cœtu, quanta ad animos reditura sint commoda sentiat. Publicæ curæ (quæ concionum fere munere continetur) priuatis laboribus nihil cedunt. Concionatorem de nostris Dux Allobrogum postulauit; eumq. cum impetrasset, eius concionibus, quas in præcipua vrbis æde habere voluit, fere semper interfuit: cum Duce autem ciuitas vniuersa itaque vberes ex eare fructus. Quadragesimæ tempore, vt Xenodochium quoddam nostris auctoribus inchoatum perduceretur ad exitum, placuit Duci rem non minus honorificam, quā necessariam (multi enim egeni hospites, per hyemem præsertim, quò se reciperent non habebant) pietati studioq. populi commendari. Et quoniam suam ipse auctoritatē Dux interposuit, partemq. spocondit opimam, tantum pecuniarum ex auditoribus corrogatum est, vt ad quatuor aureorum millia & quingentos summa perueniret. Hac tam proluxa munificaq. stips magnifice circumlata per vrbem cereis accensis, nobiliq. frequentia Xenodochio ipsi, quod hospitium virtutis appellare placuit, reddita est. Ducis autem in nos humanitas (quando huc delapsus est sermo,) semper est illustrior, nunquam aliquid petentibus denegauit, imo ne petentibus quidem vltro detulit. Et quoniam biennio ante, cum ægrotauit, vouerat Dei Matri, si valetudinem recuperasset, eius ædi Lauretanæ statuam auream se daturum: noluit eam nisi nostris manibus fideiq. committi, duosq. è nostris ad eadē illam largo cum viatico destinauit. Eadem in nos studia fuere Cardinalium duorum, Vercellensis & Montis

Montis Regalis, quorum alter ut accepit Cardinalatus insignia, non alio prius purpureo illo processit ornatu, quam in eadem nostram Deum veniret salutat. Nec silenda est Episcopi Sartinensis humanitas, qui cum sedis Apostolicæ nomine hanc Diocesim inspiceret, inspexissetq. templum nostrum cum instrumento, eas de Societate laudes in acta retulit, ut Archiepiscopus postea illas coram Provinciali Rectoreq. Collegij, non sine summo utriusque rubore perlegerit. Restat, ut priusquam de domesticis abeamus, religiosam Beatorum corporum, Solutoris, Aduentoris, Octauæq. translationem in eadem nostram recens extructam, iisque Martyribus dedicatam, paucis commemoremus. Ac præclare quidē nobiscū actū putamus, quibus non modo Beatorum nomina, sed ipsa quoque tributa sunt corpora. Ad tres illos Beatos accessere Sanctorum tu Iulianæ hospitiæ, tu Gufelini corpora. Et quoniam veteri è sacello in eadem nouam migrandum fuit, transferendus una fuit hic Reliquiarum thesaurus non sine pompa apparatusq. solēni. Dicta est translationi dies Dominica illa, quæ præcurrit Christi Natalem; in eamq. feriam impetrata est à Sum. Pontifice Ducis opera ac rogatu, amplissima peccatorum indulgentia. Collegij porticus, pulcherrima peripetasmata vestiebant, iisdemq. ornabantur publicæ viæ, qua traducenda fuit pompa. Vestis autem explicatæ varietatem ornabat adhuc & distinguebat varietas carminis. id metro continebatur heroico, heroumq. cælestium egregia facinora commendabat. Carmen cingebatur emble-

matis alijsq. ingeniorum Musarumque muneribus;
 mirifica cum oblectatione legentium. Iam beata cor-
 pora condebantur in arca ex odrilitio, calato per-
 pulchre: eaque imposita feretro Attalica veste con-
 tecto. hæc ad aram maximam sacelli veteris, custo-
 diebant Sacerdotes quatuor splendida cum veste or-
 natuq. sacrificantium. astabant linteis induti tuni-
 cis Acolyti totidem, ad pietatem ora compositi. In-
 terea supplicantium agmen instruebatur, & ad ex-
 cipienda sacra pignora procedebant. Vt autem Ec-
 clesia Metropolitana comparuit, Archiepiscopusq.
 mitratus cum infulis ceterisq. insignibus pontificijs,
 ecce tibi subidem tempus cū familia vniuersa Dux
 ipse: & mox etiam par illud purpuratorum Patrū,
 Montis Regalis ac Vercellensis. ij vna omnes Sacel-
 lum Martyrum successerunt. Cumq. canentium cho-
 rus intonuisset duplicata alternantiq. symphonia,
 Sacerdotes nostri eo amicti splendore, quem dixi, in
 humeros arcam tollunt: comitabantur reliqui lin-
 teati, faces præferentes in manibus: Archiepiscopus
 sequebatur à tergo, feretrum manu sustentans, et ex
 utroque latere Cardinales, manibus pariter admo-
 tis ad arcam, atque in hunc modum proditum est è
 Sacello. Præsto erat pro foribus umbella perelegās,
 quæ honoris causa Beatos illos exceptos ad suam
 sedem domiciliumq. deferret. ea gestabatur à Duce
 ceteraq. nobilitate. Iam Pompa ad eadem vsq; per-
 ducta, sacra illa corpora, increbrescente symphonia
 & ferientibus æthera uocibus, in ara maxima collo-
 cata sunt. Supplicationem vespertinae preces; has
 breuis

brevis quidam Archiepiscopi subsequutus est sermo. Atque id honoris à mortalibus habitum eorū virtuti, quibus Deus Opt. Max. in amplissimis calispatijs, domicilium immortalitatis exstruxit. De urbanis hactenus; sequitur deinceps ut de rebus dicamus externis.

MISSIO IN PADANAM SEV

Lucernam Vallem.

Est Padana vallis in Gallia Trāspadana non longe ab Augusta Taurinorum, à Pado flumine sic appellata, ea nunc ab oppido Lucerna in ea condito, Lucernæ nomen accepit. Ingressi offeri se ab oriente Sole Mambrinum: in extrema vero valle ab occidente Crux est lapidea præaltā, unde Italia à Gallie Delphinatu seiungitur. Est autē Mambrinum pagus vnus è decem, quibus tota hæc regio distinguitur: qui vnus auitam religionem retinet incorruptā, ceteros autē omnino, aut magna ex parte hæresum pestilentia sædauit. Septem sunt hæreticorum ministri, qui zizania dies noctesq. disseminant, octauum nonnulli addunt, non apertum illū quidem, sed inter Catholicos in Bibiano pago delitescentem. Hos, quæ est hominum corruptela atque peruersitas, plerique sequuntur; Catholicis vero, è quinque & viginti hominum millibus, quinque millia duntaxat adhærent. Verum in tanta Catholicorum paucitate primarij quique numerantur, & is ipse, qui vallis obtinet gubernacula, tum nostri ordi-

nis studiosus, tum de hæreticorum salute sollicitus. Ad incitandam Catholicorum pietatem noua quædam ratio excogitatur à nostris. Pagi aliquot cum suis quique Sodalitatibus vna coguntur, vt religiosam aliquam in ædem deducantur, vbi Sacramentorum muneribus confirmati, auditaq. tum concione tum liturgia, domum postea diuino repleti spiritu reuertantur. Sæpe id factum est, sed non sine incredibili antiqui hostis inuidia, qui per suos satellites nunquam non conatur euertere, quæ pulchre viderit inchoata. Itaque cum in eo totus esset Sacerdos noster, vt pagos ad supplicationes huiusmodi conuocaret, propius factum est nihil, quam vt quodam ab hæretico, lapidis coniectu contereretur. Sed nihil hæc eos deterrent, qui diuinæ fiduciæ scuto se protegunt. Postero die congregatis Lucernæ triumq. pagorum sodalitatibus, supplicantium agmen Pater instruxit ad ædem quandam B. Virginis in leni cliuo. Ibi peracto sacro ceterisq. ex instituto muneribus, cum vires reficiendi iam tempus esset, nec satis cibarium æque ab omnibus esset allatum, paucis panibus in commune collatis, vnde quatuor vix homines expleri poterant, saturati sunt amplius viginti. In reditu antequam sodalitatum turba dimitteretur, quoniam ea peregrinatio omnium animos mirifice cepit, iterum conuentus indicitur ad ædem B. Bernardi proximo in monte, proximamq. in lucē Dominicam. In itinere, commodum obuiam facti sunt Vgonotte, qui ad Catholicos repente conuersi, An non sentitis, inquirunt, in vestro comitatu Dia-

bo-

bolum esse? Sacerdotem videlicet nostrum descri-
bebant, ductorē Catholici gregis. Sed ubi dicta dies
illuxit, sodalitates vna præsto fuerunt, ad easque
quintus etiam pagus accessit, quem Balneolum in-
colarum vulgus appellat. spectaculum erat plenif-
simum voluptatis, montem contemplari vndiq̃ scan-
dentium turba refertum, hymnis & canticis perso-
nantem, cereisq̃. facibus collucentem. augebant iu-
cunditatem aspectus, pendentia ex cuiusq̃. manu
Rosaria, & ex intervallis præalta redemptionis no-
stræ vexilla. increbrescebat hominum multitudo tan-
ta, ut cum tam multos ædes sacra non caperet, sa-
crificandum sub dio fuerit in ara subductili; eo-
demq̃. loco concionandum. Rebus omnibus de more
peractis, antequam sodalitatum catus dissolueret-
ur, facta est inuitatio ad alterum pagum (Campi-
lionem nominant) in diem festum Ioanni Baptista.
Quo cum ex condito ventum esset, sextus adiunctus
est pagus & frequentia hominum multo maior. Eo
die inter horæ nonæ psalmodiam, mulieres duas co-
mitialis quidā morbus inuasit, qui pro loci natura,
quos corripit, ad extremam adigit saltationem. id
incolæ interpretati sunt, populi accidisse pietate ad-
uersus eū Beatū; longo nimirum usu ac consuetudine
docti, quod qui in ea diei celebritate tale aliquid
perpetiatur, is reliquo anni tēpore ab eo morbo va-
cuus & liber sit. Tota igitur valle celebrata res est
ingenti tum Catholicorum voluptate; tum hæretico-
rum stomacho: quī. quantum in ipsis est, subsidia cæ-
lestium, scelerato animo funditus tollunt: Catholici

autem ad eos excolendos tanto ardentius incensi, solēnem iterum pompam in ferias B. Margaritæ proximās instruunt, cuius templum in media hæreticorum colluione situm est. Tam decem duodecimue pagi conuenerant, cum Vgonottæ re cognita partim metu, partim suspitione suspensi, ne noster ille, qui tantam vim hominum in interiorem vallem ductabat, religionis simulatione aut rerum potiri vellet, aut ipsorum loca vastare; exploratores subito mittunt, qui Patris subodorati consilia mature omnia ad sese deferant. Et quanquam certiores à suis facti sunt, nihil esse, quod sibi à Catholicis, Patreue metuerent; tamen in omnem euentum, sicariorum inter eos Princeps sexcentos coegit hæreticos, qui à templo, quod Catholici venerāt nunquam abessent. Ac ne consulto in eos viderentur armati, dum illi suæ pietatis munera rite persoluunt, collimare ipsi telum aliquod simularent. Aliæ ad alia templa supplicationes habitæ sunt, magno sodalitatum tum comitatu tum fructu: quæ consuetudo vt Catholicis est probata vehementer, ita maximo fuit hæreticis odio: nam nec res vlla magis reprimat hæreticorum ingentes spiritus, nec vlla magis hominum cætus inter se conciliat: dies porro festi nulla re traducuntur vtilius: peccatorum tolluntur ansæ: laudes Deo diuisq. dicuntur: multæq. aliæ oportunitates hinc oriuntur. Præter has publicas solennesq. pompas instituuntur priuatæ quædam minorisq. apparatus, in singulis pagis. Vbi matutina concio habita est, traditaq. pomeridianis ferme temporibus catechesis, ad certam
adēm

ædem conuentus indicitur, Eucharistiæ salutandæ
 gratia: eaq. in ara summa multis collocata lumini-
 bus, vario hymnorû carmine ac precationibus ado-
 ratur. Hos cantus excipit ad extremum cohorta-
 tio breuis, ad crebram vsurpationem tanti mysterij:
 ita suo quasi pasta cibo multitudo dimittitur. In re-
 ditu quid Sacerdoti nostro contigerit, non silebitur.
 Reducebat ille domum puerorum agmen Catechis-
 mum publice concinentium, prælata de more Christi
 cruce: cui cum vidisset ab Vgonottis, nihil honoris
 cultusq. deferri, continere se non potuit, quin è tu-
 midis verticibus, suis ipse manibus decuteret pileos.
 Ea re Vgonottæ vehementer incensi, minitari vicis-
 sim acriter, si eum cursum habituræ res essent, se
 quoque ad manus atque ad arma venturos: nec de-
 fuit ex eis, qui Patri transmittenti pontem occurre-
 ret, vt eum in Pelicem fluium præcipitaret, ac nisi
 à saniore homine insanus ille reuocaretur, confecta
 res esset. Vespero cum ad Patrem vir Catholicus de-
 tulisset, hæreticos fere quinquaginta vna coactos,
 Catholicorû studia figere maledictis, nec modo im-
 pudenter in discipulos inuehi, sed in magistros etiam
 & auctores; is ad eos se contulit, cum vsq. certamen
 ingressus, sacrarum litterarum auctoritate docuit,
 quam studia illa non modo honesta, sed omni essent
 commendatione digna. Dedit Deus eam vim dispu-
 tationibus Patris, vt qui ætate ceteris anteibat, vi-
 ctus cum reliquis socijs, Patrem ex eo tempore
 amare cœperit, quem odisset, & cum etiamnum, quo-
 tie obuiam occurrerit, nudato capite persalutet.

hunc imitantur reliqui pedetentim, ut præter omnem consuetudinem caput aperiant. Quin Dei benignitate eò deducta res est, ut non modo suam ipsi operam Patri deferant, sed oblatam Pater propter Catholicorum penuriam sæpe non respuat. Et quanquam, ut significauimus, in ea sunt hæresi, ut Christi cruci nullos tribuant honores, eam tamen suadente Patre pijs etiam osculis venerantur, ut tantum non Catholicorum partes sequantur. aiuntque si huius sæculi mores, quales in presbyteris cernunt, dissimiles antiquorum moribus non essent, nunquam futurum fuisse, ut in tot ipsi errores atque hæreses laberentur: nunc presbyterorum disciplina corrupta, sensim esse reliquos eadem quasi contagione corruptos. Sed ut ad Catholicos redeam, quoties dies festus appetit, Pagum comes Patris obambulans, vnumquemque ad expiandos Sacramentis animos cohortatur: ita ingens multitudo concurrit. quæ res eo est admirabilior, quod in his locis crebræ confessionis nullum erat exemplum: quin etiam annuæ confessionis lex ipsa, leui oborta causa negligebatur. Habetur et præcipua iuuentutis ratio. Profestis diebus ad sacrificium Missæ, discipulorum cætus adducitur: eoque peracto iubet eos Sacerdotis comes Catechismum reddere, quem acceperint, eaq. exercitatione pomeridianum quoque tempus absumitur. vespertinum precationi dicatur: hanc vel quinquagesimi psalmi cantus excipit, vel modulatum Litaniarum carmen, quibus vel Sanctorum omnium, vel Sanctorum Regine suffragationes exposcimus: ad extremum bre-

nis habetur à Patre sermo de eius vita moribusque Beati, qui in eum diem anniuersaria Ecclesiæ commemoratione recurrit: ut & iisdem vestigijs tenera puerorum ætas insistat; & hæreticorum damnetur impietas, qui iustos honores caelestibus negant.

Venit in has oras Apostolicæ Sedis legatus rem Catholicam inspecturus, cui cum obuiam procederet Pater, mirifice ei gratulatus est legatus, quod ex ea familia esset, quæ suos alumnos animarum causa in omnes terrarum tractus orasque dimitteret. Is ut Lucernam attigit, hæreticum traduxit ad Christum, eumque Patris curæ fideique commisit. Diuersorium nostrum cum inspexisset, domesticam admiratus tenuitatem, nostris rebus consulturum se recepit. Pater eum, qui legato est à consilijs, deduxit in Angroniam, ut si forte Ministrum nactus esset non repugnantem, data fide publica, ad Legatum ipsum deduceret. commodum in itinere factus est obuiam vnus, qui cum ad salutandum legatum, fide inuitaretur oblata, nihil in præsentia decreuit, sicut ne Minister quidem Angroniæ. Pater cum eo disputationis pugna commissa, perstringere interdum hominem in angustumque concludere, ac demum efficere disputando, ut intelligeret, quanta ipsum vrgeret necessitas penitentiae (erat enim Sacerdos & sponsam fovebat in sinu) Non tulit homo præferuidus monentis vocem, Patremque verbis grauissimis primo reiecit, postea ut furor ille deferbuit, veniam deprecatus errati, temerariam illam concitationem animi, quam consilio regere in potestate sæpe nostra non est, excusa.

cusauit. *Ad Angroniæ Ministrum non facilis pa-*
tuit aditus, propterea quod in quadam Ministrorum
synodo pœnas sibi diceret irrogatas, quod Patrem
blandis gratulationibus excepisset: eo enim se factò
non obscure significasse, animum se à suis ad Catho-
licos transtulisse. Sane si quis è Ministrorum grege
conuersionis spem ullam præbet, is est vnus. nam nec
cœnobita fuit, nec presbyter est, vt ex hæreticis mul-
ti; quorum est desperatissima plerunque curatio;
sed est natura commodus, in omni sermone comis, do-
cilis præterea, & quem rationum momentis facile
flectas. Verum intentà Dæmonis vigilantia, qui hos
animos hæresum laqueis semel irretijt, ea vinctos
constrictosq. tenet, ne vinculis se expediant. Sed si
patri nostrorum vigilantia Christo duce vincatur,
tum demum spes est fore, vt ruptis vinculis in liber-
tatem Catholicam vindicentur. Neque vero his tan-
tum agris, Sacerdos ille semen diuini verbi manda-
uit, sed in extremam missus Italiam, quæ Galliæ fi-
nes attingit, alibi quoque sementem fecit. Ac dum
in reuocandam Catholicæ fidei sinceritatē totus in-
cumbit, prodigijs interdū Deus, eius videtur studia
conatusq. iuuisse. Narrat enim ipsemet Pater, quo-
dam in oppido se è suis ædibus euocatum ad feren-
dam misero opem, qui raptabatur à Dæmone, vt
præcepti ageretur in profluentem: cumq. ad fluuium
tam immitis carnifex aduentaret, exaudito strepitu
accurrisse, qui miserum illum incredibili conatu re-
traherent, sed eos tamen agre sua tueri capita ab
eius laniatibus potuisse: eum enim tanquam in ra-
biem

biem efferatum in obuium quemque subito irruiſſe; ut peteret morſibus, quem cepiſſet: addebatq̃. Pater, cum ſalutari illum Crucis ſigno muniret, iuſſiſſetq̃. ſecum Dominicam Angelicamq̃. precationem effari, impoſito cereo agno ceruicibus, quicuiſſe: mox cum lacrymis ſe amplexatum confirmari, ſubito ſuo aduentu, fugatum eſſe atrum quendam horribilemq̃. gigante, qui ſe ex hominum conſpectu abripiſſet, ut præcipiti ruina ceruices frangeret: tum iuſſum à ſe hominē rite expiare peccata, pavidumq̃. pectus aduerſus hoſtium impotentiam Eucharitiæ præſidio confirmare: quod cum feciſſet, ita demum ex auidiſſimis lupi faucibus euafiſſe.

PROFECTIO AD VALLEM Perofam aliasque Valles.

Peroſa Vallis, qua Galliam reſpicit, paſſuum circiter quinque millia complectitur, dupliciq̃. inde valle dirimitur. à dextra, ubi paululum proceſſeris, Galliæ Delphinatum ingrederis; à læua peranguſta vallis occurrit, cui à B. Martino nomen eſt. patet hæc paſſuum millibus fere tribus, poſteaq̃. à ſe ipſa multiplici varioq̃. tractu ſeiungitur. Regio ferme omnis, in humanis, Allobrogum Duci; in diuinis, Abbatie cuidam Pinarolenſi ſubjicitur. Ut à Peroſa capiatur initium; ſunt in ea Curie ſex. quarum tres Caluinianis, reliquæ partim hæreticis, partim Catholicis continentur. In ea quam Portas nominant, ſuperiores numero ſunt Catholici. in altera,
cui

cui nomen Dobio, superat Vgonottæ. In horum possessionem templum recidit: in eoque homines impurissimi, euerso per impietatem sacello maximo, abra-
 saq. vndique sacra pictura, suas habent statis temporibus conciones. Catholici, qui centum circiter ac triginta censentur, in angustum se recepere tugurium, vbi quæ possunt sedulitate, maxima æquitate animi, aliquot iam annos diuina procurant. Tertia est curia, quæ proprio vocabulo Perosa dicitur, paucis item referta Catholicis, quæque duo templa cum habeat, alterum vrbani, alterum suburbanum; illud tantum Catholicis relictum est, hoc quod Metropolitanum erat, sibi vendicant Vgonottæ: eiusque procurationi præpositus est Minister quidam, cui non tam curæ diuina res est, quam pingue vestigal. Ad huius conciones præter eiusdem Decuriæ Vgonottas, Villaretani quoque populi vicini, se conferunt. Porro quo longius in hac regione processeris, qua ad B. Martini vallem flectitur, eò deteriora sunt omnia. occurrunt Paræciæ quinque, quarum vna tantum Catholicorum est, quæ capita triginta vix numerat. reliquæ hæreticis constant omnes, tribus cum Ministris imperitissimis. In hac igitur valle B. Martini, Sacerdos noster, Cardinalis Vercellensis rogatu, cuius fidei Ecclesia illa credita erat, in obeundis Societatis partibus, iuuandisque ijs, qui non curauerunt genua sua ante Baal, spatium fere bimestre consumpsit. Ac primo quidem significatum est ab hæreticis, sibi in animo esse non modo concionem Sacerdoti nostro, in sua ipsorum æde permittere, sed

re, sed ei quoque operam dare. postea agitatissimè inter se rebus, mutauere sententiam, nostrosq. non inhonestis nominibus repulerunt. Verum quanquā præclaros ad salutem suam sibi aditus præcluserunt; placuit tamen diuinæ clementiæ duos ad lucem ex ijs tenebris euocare, qui & cōfiteri peccata, id quod nunquā ante fecerāt, & Eucharistiæ mysteria capere non dubitarunt. Hi coniuges ambo cum sint & prole gemina præditi, eo locupletior & dulcior visa est præda. Exactis illis, quos dixi, diebus, Pater in alteram vallem, quæ Peroſa dicitur, se demisit. in ea magnus è puerili Catechesi perceptus est fructus. nam cum ad eum initio vigeni fere pueri conuenirent, centeni sunt sequuti deinceps. Inter eas Paræcias, quas hæresis funditus inquinauit, vna quam Pramolensem dicunt, sanitatem vehementer expetit: sed quominus sana esse possit, vndique obsidetur ab hostibus. adiacet vni lateri plena hæreticorum vallis Angronia: ex altero ad radices montis oppidum est quoddam S. Germani, pestilentissimo item cum Ministro: nec longe abest hostis alius non minus acer; qui assidue minas terroresq. iactat, ne diuinum verbum nostri disseminent. ita omnis ad eas animas aditus intercluditur. In id oppidū, quod S. Germani vulgo dicitur, cum aliquando se nostri contulissent, offenderunt omnes suo Ministro operam dantes. Et quoniam inopinato nostrorum ingressu apparuit, hæreticos illos grauiter esse commotos: præsertim quod eorum ante synagogam, ijs inscientibus, transiissent; Catholici, qui sese nostris adiun-

adiunxerant, blandis eos sermonibus permulserūt, nihil se aliud velle testati, nisi vt Pater, quem haberent in comitatu, cum eorum Ministro congregaretur. Hæretici vt eis morem gererent, vbi finem Minister imposuit, Patrem ad hominem intromittunt, nam quo minus ipse prodiret, metus forsitan retardabat. Offendit illum Pater inter Ministrorum greges, qui honoris causa ad eum audiendum conuenerant, Stupidum ac velut mutum aliquod simulacrum. totius oppidi fit repente concursus, sed egregius doctor disputationis reformidans euentum, ægre adductus est ad certamen. nec vanus fuit ille metus, quippe in ea disputatione paucis argumentationibus irretitus sic obmutuit, vt suis miserandus, nostris irridendus videretur. Excusabant discipuli, præclari magistri metum, quod dicerent tam subito nostrorum congressu exanimato, minus ex sententia euentum certaminis contigisse. Sed hoc hæreticorum proprium est, vt ante discrimen feroces, in discrimine ipso sint pauidi atque imbelles.

PROFECTIO IN DRONERVVM oppidum & Vallem variatam.

DRoneri, quod in his locis præcipua sedes hæresum est, nonnullos Sacerdos noster ad Catholicæ Religionis cultum, alios autem ad expiandas præteritæ vitæ noxas per Sacramentum Confessionis adduxit. Deinde Natalitijs Domini ferijs, in Valgraniam excurrrens, conciones habuit apud frequen-
tem

tem populum è Catholicis hæreticisq. permistum.
 Eget id oppidum idoneis in primis operis, plurima
 enim in eo quoque hæresis, apostatæq. perniciosi
 non pauci, non à Catholica Religione modo, sed à cœ
 nobitica quoque disciplina. Ex his quidam magna
 apud omnes existimatione doctrinæ, Sacerdotem no
 strum concionantem cum audisset, eum postridie se
 cundum concionem in medio itinere remoratur: illa
 toq. de iustificatione sermone, cum multitudo con
 curreret Latini sermonis ignara, Pater, disputatio
 ne posthabita, orationem cōueriit ad populum, eoq.
 præsentè obsecrare hæreticum cœpit, & exemplis
 hortari recētibus, ut perspectæ veritati concederet.
 præstat enim sæpe cum hoc hominum genere acutis
 disputationibus abstinere (populo inspectante præ
 ferim, cui illi inferiores se videri nolunt) & plus
 ponderis habet, ubi specimen aliquod modestiæ, do
 ctinæue semel editum est, aliqua popularis indu
 ctio, quam docta & pertinax altercatio. Quocirca
 cum ad eiusdem concionem postridie hæreticus ille
 rediisset, etsi ad excitandam cælestium veneratio
 nem ea tota referebatur; tamen & in ipsa concione
 perpetuis nutibus, & secundum concionem diser
 tis verbis assentiri se ijs, quæ dicta essent, osten
 dit. Regionis ac loci dominus, eximiam volunta
 tem præse fert aduersus Catholicam Religionem,
 vicissimque tetra in hæreticos odia. Is Patri no
 stro narrauit admirabile quiddam ac plane diui
 num. non longe à Valgrania ægram Calvinistæ fuisse
 filiam, annos natam non plus duodecim: quam cum
 uis

vis morbi penitus extinxisset, nullusq. iam resideret in corpore sensus, mox cunctis stupentibus surrexisse, euocatisq. Calvinistis parētibus, qui funeris curādi causa non longe abierant, ita dixisse, Genitores mei, legem isthanc deserite (sectam dicebat hæreticorum, sic enim loquuntur illi) nam qui ei parent Sathanæ mancipia sunt & ignis pabulum sempiterni. Quæ cum dixisset, statim recubuisse: parentes vero tali prodigio admonitos legem patriam deseruisse, Catholicam suscepisse, ex eaq. pie etiamnum Catholiceq. vivere. Quæ res quo exploratior ac certior esset, omnisq. dubitandi locus adimeretur, addebat ille, se cū eo ipso, cui hæc contigerunt colloqui voluisse, ab eoq. sic accepisse, ut à nobis exposita sunt.

E Dronero in aliud oppidum, quod S. Petri dicitur, iter est factum, complures sunt in eo hæreticorum familiae, fluctuansq. vulgi religio propter pestilentissimas Ministrorum conciones. Nostri de superiore loco docere conati sunt, ubi tandem domicilium suum Christi haberet Ecclesia, nec dubitarunt ad confirmandos Catholicorum animos, de Confessionis atque Eucharistiae Sacramentis publice verba facere. eoq. præsidio trecenti circiter ex ijs, quorum religio vacillabat, omnem dubitationem abiecerunt. Hæretici, qui de sacrosancto altaris mysterio concionem audierant, ingenti pudore perfusi quid ad ea objicerent, non habebant: nonnulliq. ad Catholicos accesserunt. Quæ autem de peccatorum confessione habita concio est, ea ad confessionem ipsam cētum amplius & viginti perduxit. Non huius oppidi
finibus

finibus nostrorū opera se cōtinuit, alias etiā regio-
nes finitimas peragrauit, nec sine certo lucro atque
cōpendio. concurrebatur vndiq. ad cōciones, & quos
vel calamitas vel angor aliquis premeret, ij nun-
quam à Patris latere discedebant. Adolescens ne
nocte quidem à congressu Patris diuelli poterat:
certumq. erat vel in vltimas terras prosequi abeun-
tem: iter à Patre dimissus, iter repetito itinere re-
dijt, dum ad extremum effusus in lacrymas, sese ad
querelas & lamenta conuertit, quod eum desidera-
turum se diceret in perpetuum, quem discedentem
prosequi non liceret. Hic est ille adolescens, qui bel-
li tempore (vt consentiens regionis est fama) ad Mi-
nistrum perductus hæreticum, in concionantis bu-
mero tetrum vidit insidere Busonem, qui posteriorē
Ministri togam tolleret: ad populumq. conuersus ex
ore oculisq. ardentes flammās euomeret. aiunt ado-
lescentem spectro perterritum corruisse, sublatumq.
pro mortuo, inter suorum manus, paulo post reuixisse,
sibiq. redditum, & ita vsq; adeo sensisse fauces, vt
complures dies ardor ille remanserit.

Verculum (id oppidi nomen est) ne hac
quidem hæresum scabie caret, quin regio nulla,
magis perfidos & obstinatos hæreticos tulit: sudan-
dum vehementer vt sit, si quempiam ad finitatem
reuocare studeas. Nonnulli tamen ad conciones acce-
dunt, & in his Præfectus oppidi, vir ille quidem na-
tura bonus & ad Catholicam veritatem propensus,
sed qui tamen rumusculos metuit & sermones impe-
ratorum. Proprium huic hæreticorum generi est, vt

cenobitarum vitam moresq. perstringant, in eoque
 uehementer exultant, si quando ad id idoneam sunt
 nacti materiam. nec sibi defuerunt, quo minus in Pa-
 ris nostri vitam diligenter inquirerent, ab eoque
 apud quem diuersabatur, curiose sciscitarentur, quæ
 esset eius viuendi ratio, quæ disciplina. quibus cum
 præclarum de eius virtute testimonium, contra quã
 opinabantur, datum esset; vereri cœperunt, quem cri-
 minari non poterant, & in admirationem odia con-
 uerterunt: facile ut intelligas, quanto plus sit ad ani-
 morum conuersionem in integritate vitæ; quam in
 doctrinæ varietate momenti. Actum est tamen cum
 hæreticis sæpe, tum publice tum priuatim; nec ma-
 gni negotij fuit vincere non eruditos, tales enim se
 profitebantur: nam cum ex pugna victi discederent,
 causabantur aliena studia, quod alijs se oblectassent
 in rebus, doctrinarum vero studia non attigissent:
 quæ res tanto magis in sententia Catholicos confir-
 mabat. Iam conciones ipsis quoque probari sunt cœ-
 ptæ. Quidam manantibus lacrymis. quam vellem,
 inquit, aliam nullam religionem nosse? Alius autē,
 quid est quod huius concionibus obijci possit? Qui-
 dam vero, ecquid tandem dici verius aut excogita-
 ri potest? Ita permoti non pauci, ut à suis cum digni-
 tate discederent, auide expectabant quotidie, dum
 ab ijs aliquid decerneretur, qui rerum summam ad-
 ministrabant. Abeamus hinc in Regalem montem,
 quo Vincentius Laurus Cardinalis, eius loci Episco-
 pus, aliquos de nostris accersit.

Hic illi omne ferme tempus in excolendam Ca-
 techismo

tebismo plebem contulerunt. Explanabatur enim in æde maxima ingenti concursu, perpetuoq. Canon-
nicorum par aderat, quorum modo hic, modo ille has
docendi partes obibat. ea autem inita est tradendæ
doctrinæ ratio, ut non minus corroborata, quam im-
becilla ætas alliceretur. Præter Catechismum inue-
cta est quotidianæ precationis consuetudo, tam fla-
grantibus hominum studiis, ut ea nec calor, quos
tempus anni ferebat, nec negotiorum, quæ sæpe inci-
dunt, magnitudo, restinxerit. cumq. de ea intermit-
tenda exercitatione, aut certis duntaxat diebus re-
tinenda, quæ mox ardentiore studio repeteretur,
actum esset: intermittere passus est nemo. Vespertinis
temporibus, antequam ad orandum Deum se quisq.
conferret, Pater præcipua quædam ad commentan-
dum capita proponebat, quibus explanandis eadem
opera aut in hominum vitia inuehebatur, aut eos ad
obeunda. Et crebro Et cum utilitate sacramenta
cohortabatur. Cum ille aberat, agebat has partes &
Canonicis alter. ac dum populus cogeatur, repo-
scebatur à multitudine Catechismus. His præsidis
ea quoque consecuta sunt commoda. Primum ut li-
beri patresque familias, Christianæ fidei rudimenta
perdiscant. Deinde ne diei festi sanctitas violetur,
dum partim concionibus audiendis, partim pia sup-
plicatione traducitur. Tum, quod maximum est, ut
armorum seditionumq. pericula depellantur: nam
cum vesperi ultro citroq. clandestinæ commearent
epistolæ, fomes segesq. malorum, nunc precationis
beneficio, quæ primis se intendentibus tenebris in-

choatur, his incommodis obuiam itur. Aegrotis & subsidia pecuniarum allata sunt, & orationis solatia: lustratiq; eorum animi sacramentis; ex quibus affirmare nonnulli, sibi à confessione melius esse cœpisse, cum tamen ante grauiter ægrotarent. Complures hanc sibi quasi legem indicunt, ut singulis semensibus expient. itaque tertia cuiusque mensis Dominica die, per pusillum quasi Pascha peragitur; tanto studio ad Sacramenta concurritur. Hisce rebus excitata est memoria amissi Collegij, idq; nunc iam multi desiderant, ut nihil nisi querelas exaudias in auctores nostri discessus: ita vero probatus est omnibus noster aduentus, ut negarint maius vnquam à Cardinali beneficium in se profectum. Porro institutum est, ut qui confessiones excēpturi sunt, statos conuentus habeant, ut quæ ad id munus rite exsequendum; quæq; ad officij rationem pertinent, agissent inter sese. Iactaq; sunt sodalitatis fundamenta è lectissimis viris, qui statis diebus inter hebdomadam, mutuis sese colloctionibus ad pietatem exsuscitent. quæ res quantum allatura sit commodi, apparent iam nunc documenta non leuia. Optandum modo à Deo est, ut quæ tam præclare instituta sunt, eodem semper cursu ac felicitate ad suos exitus pronebantur.

P R O V I N C I A V E N E T A.



*Continet Prouincia Veneta socios du-
centos ac nonaginta septem. Vene-
tijs in Domo Professa tres & qua-
draginta. Patauij quinquaginta.
Duodeuiginti Ferrariae. Viginii
quinque Bononiae. Brixiae quadra-
ginta. In Foro Liuij sexdecim. Mutinae decem. Par-
mae viginti. Duo & viginti Verona. In Domo Pro-
bationis Nouellariae quatuor & triginta. Placen-
tiae nouem. Mantuae decem. Mortui sunt quattuor.
In Societatem recepti quindecim.*

D O M V S P R O F E S S O R V M

& alia quaedam Collegia.

VEnetijs praeter ea, quae quotidiana sunt, heretici ad sanitatem reducti sunt decem (confluunt enim mercaturae causa peregrini complures) ad eamq. rem saepe nostri, ut ad alia multa, quae grauiorem deliberationem desiderant, adhibentur. Aedificata praeterea domus est piorum hominum subsidijs sane commoda, aureorum millibus fere quinque. Patauij triginta circiter e nostris festo quoque die Catechismum pueris tradunt: eodemq. studio viri

E 3 nobi-

nobiles excitati, huius muneris partē sibi deponunt: atque hoc ardentius res ipsa suscipitur, quod eam pro concione alij quoque concionatores summis laudibus extulerunt. nec desunt corroborata iam aetate viri, qui tantum nomine, & baptismo Christiani, elementis Christianæ disciplinæ sunt imbuendi. Nobilium adolescentium Collegium ab Episcopo institutum, & numero augetur & fructu. inchoatumque ē puerorum grege, Dei matris nomine sodalitium.

BRIXIÆ fuit hic annus potius animis, quam corporibus salutaris. Quindecim ē nostris eodem pene morbi genere laborarunt, cum interim eodem quoque tentarentur externi. E nostris desiderati sunt duo: reliqui diuina clementia conualuerunt. Multa hic in rem animorum gesta sunt, sed quoniā ad memoriam nihil habent insigne, mittuntur omnia. Femina in primis nobilis, cum multis iam mensibus assiduus febribus vreretur, ut eam Sacerdos noster inuēsit, liberam se continuo sensit. quæ res cum paulatim in vulgus emanaret, nostri ne gloria, quæ Deo vni debetur, ad imbecillos homines transferretur, perpetuum femina ea de re silentium indixerunt. Duo in hac vrbe instituta sunt Oratoria: alterum in Episcopi sedibus, alterum domesticum ac secretum: & utriusque par est utilitas.

VERONÆ animarum quanta sit præda vel eorum multitudo declarat, qui Canobiorum seueritatem liberæ vitæ commodis anteponunt. complures in alias, octo in nostram se dicauere familiam. Multi sunt à cæde, à flagitijs item multi retracti.

Habet autem & hic suos Societas nostra beneficos. Vir primarius domum cum hortis Collegio donauit: pretij summa aurei mille trecenti. nec desunt pij religiosiq. viri, quibus inopia nostra sit cordi.

FERRARIAE hæretici tres è sua caligine ac tenebris, in lucem Catholicæ veritatis eruti sunt. Iudæi etiam quinque ad Baptismum eruditi. eademque opera, instituta ab Episcopo earum virginum sodalitas, quæ in paternis ædibus vitam degunt. quæ ex numero multæ iam antea Deo sua corpora animasq. deuouerant. Haberi præterea statis diebus hominum conuentus est cæptus, qui de pijs inter se rebus sane quam vtiliter colloquantur.

BONONIAE, duo viri nobiles in disciplinâ Societatis adsciti sunt.

PARMAE, meretrices sexdecim cum ad ædē nostram concionis caussa se contulissent, turpitudinis suæ ipsæ pertasæ, ad honestatem pudoremq. se retulerunt.

en

am

COLLEGIVM MANTVANVM.

Accessit hoc anno ad reliqua huius Prouinciæ Collegia Mantuanum; Serenissima Ducis coniuge flagitante, Leonora Austria, Imperatoris Maximiliani sorore, & huius, qui nunc est, amita, lectissima & pietissima femina, simillimaq. ceterarum sororum. Dedit enim his Deus feminis, ut præcipua

quidam religione præstarent. Ea igitur cum Collegium Societatis optaret, idq. à Deo multis ac diuturnis precibus flagitasset, egit ad extremum ea de re cum viro, ad omnem pariter humanitatem pietatemq. propenso; ita inter se vterque de aduocanda Societate consensit. Egit postea Dux ipse cum nostris: & ut de dando accipiendog. Collegio deliberatum est, aream decreuit ad ædificium, haberiq. voluit loci delectum, mutariq. semel atque iterum sedes, ut quam opportunissimo loco essent. Neque ipse modo in eam rem multa liberaliter contulit, sed etiam ædium dominos beneficjs sibi deuinxit, quo minoris sua quisque diuenderet. Sæpe cum Rectore longos ac familiaves sermones habuit plenos spei, plenos humanitatis, multisq. documentis, quanti nos faciat, ostendit. Non dum Collegium suos redditus exigebat, cū ille tamē, ut Societas deduceretur, vrgebat: cumq. negaret Pater, id fieri satis commode posse, nulla adhuc parata suppellectili instrumentoq. domestico, respondit, id sibi curæ fore: æquum enim esse, ut cum tam multa in alias fabricas erogaret, in opus tantæ pietatis, quantæ intelligeret esse Societatis Collegium, multo liberalius suam pecuniam impenderet. Ad alias significationes amoris, non modo crebro nostras ad Deum preces, sed benefactorū etiam communicationem Societatis nostræ, & sibi & coniugi postulauit. quam quidem P. N. Generalis perlibenter dedit, suamq. voluntatem binis litteris testatam voluit, rem vtrique gratissimam. Coniugis vero charitas sic enituit, ut nulla mater tam vnice suos

suos filios diligere videatur, quam illa Collegium. Pia femina ut Collegij fortunas annuo vestigali vel mediocriter stabiliret, pecuniā in suis vestibus gemmisq. redegit, eo animo ut progrediente tempore vestigal ipsum amplificaret: id quod facillime, si vita suppetit, consequetur. Nam d suis ciuibus sic amatur, ut inter eos sit futura contentio, quinam Collegio plus afferat ornamenti. Sane initia fuere præclara, nondum exigi, ut dixi, cæperant annui fructus, cum huc pedem Societas intulit, & tamen præstanti religione femina tantum undique ad suos alendos Patres (sic enim pro sua pietate nos vocat) pecuniæ conquisiuit, ut domum nostram non modo necessaria supellestili instruxerit, sed ijs etiam rebus ornarit, quæ ad annuū victum cultumq. pertineant. Difficile dictu est, de rebus nostris quanta sit illi curæ, in eoque quanta cum voluptate & pietate versetur: ita ut cum de nobis incidit sermo, sæpe lacrymæ subsequantur. Sæpe nos muneribus donat, sæpe mittit ad Collegium plenis manibus pueros, cumq. aliquando P. Prouincialis puero, qui munus attulerat, diceret sibi videri, nihil aliud Serenissimā Dominam, nisi ut quemadmodum Societati benigne faceret, cogitare: At, ille inquit, multo ei arbitror esse suauius, quod huc mittit, quam quod ei paratur in escam. Quid? quod omnem quoque lineam vestis non modo corporum, sed ipsis quoque culinæ vsibus necessariam (quæ est eius singularis humilitas, ac religio) suis ipsa manibus consuit: habetq. pedisse-
quas in ea re nobiles adiutrices cumq. morbo impe-
dita

dita biduo triduoque cessare ab opere cogeretur, nihil tam dolebat, quam quod cū ceteris feminis acum ducere non liceret. Hæc pietas & si in Dei famulos est præcipua, non tamen nostris duntaxat adibus definitur. patet lasius, & per omne genus hominum peruagatur: ut iam Mater pauperum vulgo habeatur. Nullum tempus opitulandi miseris prætermittit: publica Nosocomia, priuatorumq. ades, in quibus agros esse compererit, interuisit: idq. tanto studio atque alacritate, ut nemo vnquam vel tenuissimus eius optarit officium, cui non illa perbenigne contulerit. Sæpe nocte intempesta de cubili surrexit, ut agris duntaxat adesset, sæpe cum ijs triduum quatrimumue traduxit. ingenueq. confessa est aliquando P. Prouinciali, cum ille forte prodeunti feras, interueniret, se quidem auræ captandæ gratia simulare exitum, re tamen vera ad feminam se prodire grauitè affectam. Quæ quoniam, inquit, in me secundum Deum spes suas habet, bonæq. ut audio, existimationis est mulier, faciendum mihi est, ut eam hodie conuifam. Multa præterea ad agros domo mittit, quæ in eorum vsus suis ipsa manibus apparauit. nam & bellariorum, & aquarum, & olei complura genera agrorum causa domi conficit: sæpeq. fit ut longos abigat morbos, agrosq. diuturna medicorum arte delusos, domesticis tantum præsidijs ac curationibus ad pristinam reuocet firmitatem.

Iam Scholæ, ut nunc quidem, apertæ sunt. duæ. Ad has honorarios ex sua familia pueros Dux mit-

sit, eosq. non modo Gymnasij legibus, sed alijs quo-
 que domesticis vult astringi, quas eius postu-
 latu condidit Rector. Atque hic oritur
 Mantuani Collegij, cuius par pro-
 gressus sperari debet, hi-
 sce patronis ac fau-
 oribus.

••

3

AMATIMORIAN

PRO-

76
P R O V I N C I A
S I C I L I A E.



Omplectitur hæc Prouincia de no-
stris septem ac trecentos . In Pro-
fessorū Domo Panormi vndequin-
quaginta. In Collegio duodecimin-
ta. Messinæ octoginta. Syracusis
septemdecim. Catanæ vndeviginti,
totidem Calataieronæ . In Collegio Montis regalis
vndecim. In Biuonensi sedecim. in Drepanitano to-
tidem . Rhegiij quindecim . In Probationis Domo
Messanensi septem & viginti. Vita sancti sunt se-
ptem. adscripti vndeviginti .

DOMVS PROFESSA PANORMITANA
& alia quædam Collegia.

IN Panormitana Professorum Domo, maximis
cum incrementis diuina res agitur. Sacramento-
rum præsidio multis animorum morbis occurritur.
Ciuis fædis captus amoribus, amicæ speciem auro
in sculptam, tanquam sanctum aliquid de collo su-
spenderat: is vt ad expianda rite peccata perductus
est, suæ pertæsus amentię, id idolum coram sacerdo-
te nostro comminuit, restinctisq. insanæ mentis ar-
doribus, crebra per sacramēta ijs seruire cæpit amo-
ribus,

ribus, qui vni & sine libertatis iactura & sine turpitudinis nota suscipiuntur. Feminarum vero libido vsque eo coercita est, vt sacerdos duntaxat vnus nullum prætermiserit fere mensem, quin aliquot ex eo genere mulierculas ad pudicitiae decus ab impuritate illa cænoq. traduxerit. Sed hæc iam toties decantata dissimulemus sane silentio, neque de reconciliatis hominum voluntatibus, quæ nec pauca fuerent nec leues, neque de propulsatis animorum periculis, neque de egenorum inopia per pios homines subleuata dicamus. illud indicasse sit satis, Domum hanc superiore anno institutam tam letos iam habere progressus, vt haud sciam an quisquam tantos sperare sit ausus. Nec desunt gratuita pecuniarum subsidia, quibus non modo sociorum numerus, qui nunc est, sed longe maior, ali commode possit. Augeat celeste numen, quæ tam clementer orditur, nec sinat, quæ à se tam pulchre instituta sunt, nostra incuria nostrisq. culpis euerti.

MESSANENSE Collegium Societati peperit septem circiter & viginti, aliosq. habet ferme quadraginta, qui id ipsum vebementer efflagitant. Verum in tantis lucris duorum est facta iactura. Sacerdotes erant ambo, eorumque alter annos tres & quadraginta in Societate consumpserat. is fuit Philippus Cassinus, qui semestri morbo acerbissime confectatus perseuerantiæ gloriam, patientiæ meritis cumulauit. Iam quæ de Professorum Domo Panormitana diximus, eadem in hoc Collegium cadunt omnia. Sed inter gratiarum reconciliaciones ea fuit insignis.

signis. Nobiles inter se familiæ ijs ardebant odijs, ut ad conditiones pacis nullis precibus flecti possent. quartumdecimum iam annum implacabiles nutriebant inimicitias, cum è discordibus vnus, in quo maximum ad compositionem videbatur esse momentum, morbo corripitur. Is cum suis rebus valde metueret, confessionis causa Sacerdotem accersit è nostris, qui ut confitenti operam dedit, sensitq. tum demum oblatum esse tempus, finem tantis imponendi discordijs, ægrum animat ad concordiam. facile in animo iam parato insedit oratio. aduocat æger fratrem, cum eoque de reconciliandis sibi inimicorum animis enixe contendit: tantumq. valuit de contemnendis iniurijs ægotantis oratio, ut facilem Patri concilianda pacis aditum aperuerit. cumq. in ædem nostram Patris consilio, discordes homines conuenissent, fufis coram Eucharistia precibus, mutua collacrymatione atque complexu firmata pax est. Sed quanquam in animorum causa sociorum versatus est labor, tamē ne causam quidem corporum, vbi opus fuit, eorum pietas pratermisit. Pridie Kal. Iunij tantum est incendium, nescio qua incuria, in proximis ædibus excitatum, ut nisi suæ clementiæ Dominus meminisset longe lateq. peruagaturum fuisse videatur. Editio, quod solet, signo, ad restringenda nata recens incendia, tota pene ciuitas excitata est. Nostri non cunctā dum rati, vbi salus agitur proximorum, statim aduolant, & in crebris flammarum minis, alij aquas ad extinguendum offerunt, alij ab incendio domesticam supellectilem prohibent, quidam marorem miseris,

con-

consolando leuant, alij obuium quemq. ad mitigandos ignes hortantur. horum studium pia Rectoris charitas incitabat. is laborantibus vt adesset, ignium contagia non horrens, in eam se partem, vbi maxime populabatur ignis, iniecit. Sed cum mali velocitas remedia anteiret humana; Pater ad diuina confugiens, agnos è cera fictos rite consecrata, iaculatur in ignem: statimque quasi quibusdam imbris debilitata primum flamma & compressa mox est.

SYRACVSIS quoque sociorum pietas nocturnum extinxit incendium: id cum officinam quandam nostris ædibus continentem comprehendisset, vnusque è nostris ad nocturnos flammarum crepitus hominumq. turbas euigilasset, extemplo se lecto proripit: cæterosq. excitos è somno, ad defendendos ædiū dominos & fortunas hortatur. Grassabatur toto impetu ignis, nactusq. pabulum, quo se aleret, vires acquirerebat eundo. prorsus vt coniuncta quoque ædificia, nisi celeriter occurreretur, in fauillam cineresq. redigeret. Nostri de aliena non minus, quam de sua salute solliciti, strenue certare cum flammis, morari impetum aquis, nec prius cobibendi finem facere, quam penitus deuictus est ignis. Restincta sunt etiam Syracusis contentionum incendia, eaque & acerbissima & crebra, præsertim quæ ex odijs Principum orta erant, quæ tamen vt alienæ dignitati parcam, sileri facile patiar.

Catana virginum pudori consultum est, et qua
virginitatis thesaurum à rapaci hominum li-
bidine prohibere non poterant, in tuto honestoq. lo-
co collocatae sunt. Sex ea fuerunt præter alias, quæ
industria ac labore nostrorum, è vario dedecore
emerferunt. Virgo quædam è præsentis necis erepta
periculo, in sacrarum virginum cætum, velut in tu-
tissimam arcem inclusæ est. Ac ne Catanae quidem
veteres resarciendi gratias occasio defuit. Vir no-
bilis, qui ad deponenda arma nullis vnquam induci
precibus poterat, ex colloctione Sacerdotis no-
stri adhortantis ad pacem, testatus est, se vim quan-
dam sensisse diuinam, cui resistere diutius odio reti-
nendo non posset: atque iccirco æquo animo iniurias
se missas facere. Conditum est hoc anno Dei Ma-
tris nomine sodalitium è sodalibus quinquaginta,
non adolescentulis modo, sed confirmata iam ætate
viris, ijsque partim Philosophis ac Theologis, par-
tim iuris legumq. magistris. Voluit in eum quoque
numerum Vicarius Generalis adscribi, isq. Christia-
næ demissionis exemplo & singulari quodam pieta-
tis ardore calcar est ceteris.

BIVONAE tam acerba iracundiae flamma
inter fratres exarserat, vt ex ijs vnus, quo suas in-
iurias punire posset impuni, cum latronum se gre-
ge coniunxerit. is postea, fide publica accepta, do-
mumq. reuersus mortifero correptus est morbo, ac-
citusq.

citoq. Sacerdote nostro, rite culpas absterfit. cuius sacramenti tanta vis fuit, cohortatione Patris adiuncta, ut suis fortunis egenorum diuisis inopia, sanctissime è vita migrarit. Alijs etiã unde acceptæ erant, iniuriæ, data impunitas est. Vir nobilis cum semina amoribus æstuarer, ad explendas suas libidines cædem parauerat viro, iamq. sicarios occulte præmiserat, qui trucidarent incautum, cum ecce tibi rem subodoratus vnus è nostris, properantes ad cædem homines reprehendit, tantoq. ardore apud eos verba fecit, ut à meditato scelere temperarint. Nec minus concionibus, quam priuatis congressibus ad officium virtutemq. proficitur. Acri ciuitas fatigabatur annona, cū concionator noster, ut egenis oportune consuleret, eos grauius accusauit, qui maiori spe questus frumenta comprimerent. ansam accusandi præbuit ea sapientis oratio, **QVI** abscondit frumenta maledicetur in populis. quibus ita permotus est diues quidã, ut patefactis continuo horreis frumenta protulerit, multisq. qui soluendo non erant, gratuita subsidia tribuerit.

RHEGII adiuncta sodalitas est non quidem ex auditorum, sed è ceterorum ciuium genere, qui pijs excitati colloquijs crebrisq. confessionibus delictorum, mentem, quoad fieri potest, immunem ab omni labe conseruent. Nec defuere in hac ciuitate discordes, nostris conciliandi laboribus, præsertim qui iam ingentes ex odij acerbitate clades acceperant.

CALATAIERONE ut leuiores mittamus, puella quædam cum cogeretur à suis matrimonium

inire cum eo, a quo ipsa maxime abhorrebat, sola voce assensum præbuit. ea res perpetuas fouit inter utrumq. discordias, nec prius odijs coniugalibus factus est finis, quam se cum immortali Deo, expiatis apud nos animis, coniunxerunt: tum demum & ore & animo matrimonij sancitum est fœdus.

Et quoniam huc sermo frequenter incidit, ut condonata memorentur offensæ, alienum non erit afferre exemplum mulieris singulare, cui DREPANI necatus est filius: quæ quoniam ne iras quidem aduersus percussorem odiumq. suscepit, nulla scilicet cohortatione placanda fuit. Erat huic vnigena filius, sine quo vitam acerbam atque iniucundam putabat: sed non potuit hac frui iucunditate diutius. misere enim ille ab inimicis interijt; illatumq. exanime corpus in maternas ædes, recētū cruore oblitum, fœdis uulneribus deformatum. spectaculū sane atrox, quod lacrymas non modo ei, quæ genuit, sed ipsis etiā barbaris extorsisset. illa tamen tam diro aspectu laceffita, nullis eiulatibus angoribusq. se dedit; neque imitata est plangores inuiles. seminarum: naturam fortiter vicit, & præstantissimum vltionis genus rata, iniurias beneficijs remunerari, pro eo qui filium abstulerat, Deum supplex orauit. Non implorauit iudicium subsellia, non conquiri auctorem facinoris voluit: ad vnum omnium æquissimum iudicem adiit, qui iniuriosorum vindictā sibi reservat. non quidem ut auctorem cadis ad pœnam suppliciumq. deposceret, sed ut impunitatem ei precaretur & veniam. postea ad eadē nostram se contulit,

vite.

vitaq. noxis confessione deletis, Christi corpus ac-
 cepit. Et quoniam semel in Christum liberalis esse
 cepit, viribus quoque ab eo est aucta maioribus, ut
 quam maximos ad perfectam virtutem progressus
 habeat: & quæ non frequentissime sacramentis ani-
 mum expiabat, nunc expiet per frequenter. Colitur
 etiam à ceteris ædes nostra, seu viris seu feminis
 satis multis: & quanquam non ita pridem humani
 generis hostis, per homines nequissimos eam nobis
 notam conatus est inurere, vnde omnis animarum
 salus retardaretur: tamen tantum abest, ut in
 dubium venerit viris bonis Societatis in-
 tegrity, aut templi sit imminuta
 celebritas, ut potius iniquis-
 simis improborum cri-
 minationibus il-
 lustratis, & vniuersis
 existimationem, quam de no-
 stris habebant non
 mediocriter au-
 xerint.

PROVINCIA NEAPOLITANA.



Ocū sunt Neapolitanæ Prouinciæ ducenti fere ac septuaginta. In Professorum domo Neapolitana vnus & quinquaginta. In Neapolitano Collegio centum circiter ac duodecim. Nolæ quadraginta. Catanzorū viginti. Quattuor amplius Aletij. Barij septemdecim. Ciriniolæ tres. Mortui sunt nouem. recepti septem ac triginta.

DOMVS PROFESSA.

Professorum domus, quoniam in ea parte vrbs sita erat, quæ ad obeunda Societatis munera minus commoda videbatur, dum de transferendis suis sedibus aliò cogitat, ecce tibi præter spem præterq. expectationem, egregium Salernitani Principis palatiū venale proscribitur. Id cum ad nostros usus videretur aptissimum, nostri tam præclaram occasionē minime dimittendam rati, de emendis ædibus sine mora deliberant, nec prius à re suscepta desistūt, quam celeriter est confecta. Est hoc palatium apertio celebrique loco, tanta amplitudine vt laxissimum intra se templum abdat. extructum est extrinsecus

secus quadrato lapide cuspidatim, adamantis instar exciso, opere magnifico ac regio. Venijt aureorum millibus quadraginta sex: in eoq. emendo multum nobis attulit adiumenti Osunæ Ducis auctoritas, huius Regni Proregis. Is cum semper fautorē in ea re nobis sese præbuit, tum nulla interposita mora, duodecim aureorum millia Regio ex arario, quæ nobis Vespasianus Gonzaga donauerat, numeranda curauit. reliquam pecuniam partim venditæ priores ædes, partim liberalis hominum pietas suppeditauit. Sed quoniam futuri templi descriptio omnem amplitudinem ædium uidebatur absumere, ad reliquā nostrorum habitationem, proximæ coemptæ sunt ædes aureorum millibus fere decem. Migrarunt ed nostri extremo Iulio, templumq. subito opere excitarunt, dum splendidius magnificentiusq. condatur. eius fundamenta, Decembri mense fodi sunt cæpta: primusque à Prorege iactus est lapis, huiusce modi cum inscriptione. VIRGINIS Conceptæ templo extruendo Societas IESV Professa deiecit XV. III. Kal. Ian. M. D. LXXXIV. Nam cum ipsis conceptæ Virginis octauis, caperentur initia, iure factum videtur, ut eidem conceptæ Virgini dicaretur.

COLLEGIVM NEAPOLITANVM.

Non minoribus incrementis Collegij Neapolitani aucta res est. Cum enim & habitatio- nis & æris alieni premeretur angustijs; hanc Deus

Robertæ Carasæ lectissimæ feminae, ac Mataluni Ducis coniugi mentem dedit, ut & æs alienum aureorum millium sex & triginta dissolueret, & in Collegij ædificationem aureos ducenos in annos singulos attribueret. Pro tam singulari beneficio Patre Generali mandante, Fundatricis ei nomen delatum est. Ea postea impetrata à Summo Pontifice potestate, nobilibus comitata Matronis Collegium inuisit, eiusq. aduentum nostri pro suo quisque ingenio ac facultate, vario emblematum versuumque genere celebrarunt. His præsidjs sociorum amplificatus est numerus, & ad superiores Magistros tum in Philosophia Doctor alter adiectus, tum in explicandis conscientie rationibus alter. Instituta quoque intra domesticos parietes Humanitatis est schola, quæ futura sit veluti quoddam Magistrorum in vniuersa Prouincia seminarium. Pietatis par cura fuit: quatuor ad nos è nostris auditoribus transierunt. E duobus Dei Matris cœtibus eadem fructuum vbertas. Ac præter cetera benefacta, sunt qui virginum pudicitie studiose succurrant: unusq. virginem, cuius periclitabatur integritas, magno emptâ, in tuto honestoque loco collocauit. Complures etiâ castitatis amore sua ipsi corpora, perpetua sponsione voti Deo consecrant: ex eoque numero triginta circiter in varia se recepere cœnobîa. Duo coniuges castimoniam Deo cum vouissent, tres ipsos annos, saluo incolumique voto, in eodem simul lecto cubarunt: sed ne quid loci humani generis hosti relinqueretur, qui dies noctesque pernigilat, ut aliquando

nec

nec opinantes inuadat, coniugio rite dirempto, ad custodiam tanti thesauri in cœnobiorum claustra persugerunt.

Doctrinæ Christianæ schola superiore anno inchoata, maiora quotidie capit incrementa. Ea in classes diuisa nouem (nam ut quisque plura ex Catechesi didicerit, ita deinceps ad superiorem classem ascendit) auditores numerat septingentos. hi omnes octauo, summum decimo quinto quoque die mysteria diuina percipiunt, precationi student in primis, voluntarias pœnas ultro suscipiunt, peregrinationes sanctas instituunt, à flagitijs homines retrahunt, nec de sua tantum, sed de proximorum quoque salute laborant. Itaque Dei beneficio, vnde hæc incrementa proueniunt, eo deducta res est, ut plurimi cœobia meditentur, ad eaq. se viginti contulerint. Sed ut à sodalitatibus abeamus, accessit ad reliquas utilitates, insignis Turcæ baptismus, qui, dum in patria superstitione pertinacius hæret, omniaq. salutis monita respuit, rogatus à nostris, ut priusquam certi aliquid constitueret, certam sibi lucem ab immortali Deo accuratis precibus imploraret: fecit, quod rogabatur, ac de mum cœlestem lucem, quam velut nubes quædam, obstinatio animi occultabat, aspexit. ergo redit ad nostros, baptismumq. quam primum flagitat: adeptusq., doloribus etiam, quibus ad eum diē urebatur acerbis, releuari subito cœpit: ut intelligeret, quam salutaris esset animis aqua baptismi, quæ sic affectis corporibus mederetur. Non ita multo post conseruus eius, qui hominem à baptismo pessimi

me oderat, nocturnis tenebris experrectus, admirabili quadam luce totum vidit collucere cubiculum : senemq. sibi ut Christianus fieret, imperantem . deductus ad nostros Catechismo præparatur ad fontē; ut vnde odium exarserat in conseruum, inde charitas oriretur . Claudet hoc Collegium Gulielmi Elphinstoni obitus, cui consulto reseruamus extrema , quò de eo plura narremus. quanquam, ut in ceteris, pauca de multis . Is fuit Scotus ex nobili illustrique Elphinstoniorum familia, Regium sanguinem affinitate contingens . qui cum heresim vna cum nutricis lacte suxisset, qua ipsi quoq. parentes vna cū Scotia vniuersa, quasi communibus quibusdam tenebris tenebatur, ut adoleuit, studiorū causa secessit in Galliam. vbi inusitata quadā luce diuinitus illustratus , è multis varijsq. periculis in portum Catholicæ veritatis euasit. Inde Romam venit , ingressusq. Seminarium conuictorum, cui nostri præsunt , ita se ad omnem pietatem ac disciplinam excoluit, ut breui tempore Societatis mentem cogitationemq. suscepit . Sed cum in morbum eiusmodi cecidisset, vnde releuari sine mutatione loci vix posset, visum est amicis, ut Neapolitani cæli, quod paulo clementius habetur, periculum faceret. Sed ut Neapolim attigit, exceptusq. perhumaniter est a nostris, dum ei hospitium curatur idoneum , eo ipso die correptus est febris : abierant iam dies aliquot , nec tamen pertinax febris ullis curationibus recedebat. Placuit diuinæ sapientiæ nouum adolescentis exemplum, qui nondum religiosus sese astrinxerat institutis, proponere nostris

stris ad imitandum. prodidit enim morbus ipse, quan-
 ta lateret in occulto virtus, & quam nihil cederet
 tot deuotis capitibus liber adhuc & sui iuris tiro. ni-
 hil est difficilius, si rem actione, non mentis tantum
 agitatione perpendas, quam voluntatis humanæ cū
 diuina sempiterna concordia. hac ille virtute sic præ-
 stitit, vt nihil ei fuisse videretur antiquius. In eo mor-
 bo, cum rogaretur, vt solet, vti valeret, illud semper
 respondebat vnū, Vt Deo placet, Vt videtur Deo. sa-
 nari ne vellet; Qui possum (inquit) id velle, quando
 meus ipse non sum. atque hoc ei erat semper in ore,
 vt quoties ex eo aliquid eiusmodi quæreretur, Dei
 se esse diceret: nihil sibi reliquum esse libertatis, in
 eius se transisse ius & arbitrium, in eoq. omnia sua
 sibi esse. In tam graui molestiaq. morbo nihil vnquā
 vltro petijt, nihil oblatum recusauit. Verum cum
 medici eius vitæ salutiq. diffiderent, suis ille ratio-
 nibus consultum volens, Deo Opt. Max. vouit, se non
 defuturum, cum primum licisset, quo minus in no-
 strum numerum gregemq. veniret. Non ita multo
 post, accersito Prouinciali, suum illi consilium. & vo-
 luntatem exponit, enixeq. rogat, vt se voti compo-
 tem faciat. causa erat eiusmodi, vt pater non sine cō-
 lesti impulsu, neque negandum, neque differendum
 existimaret. eius itaque postulationi concessit: pa-
 stridieq. sacra Eucharistia ad lectum delata, astan-
 te, toto ferme Collegio, denuo ex concepta formula,
 Religionis vota non sine incredibili quadam diuinæ
 voluptatis dulcedine nuncupauit. Ab eo tempore vt
 de Saule scribitur, inter Prophetas, sic in eum simul

ac aggregatus est inter socios, visus est spiritus Domini multo copiosior atque vberior insiluisse, ut non tironem diceret, sed qui in religiosa disciplina egisset etate. Paupertatem subito sic adamauit, ut non modo Rectoris arbitrio omnia, quæ secum aduexerat, quæq. Romæ reliquerat, sponte permiserit, sed ne minutissima quidem sibi ipse reseruaret: iniimam tunicam, quæ gestabat, ne quid omnino è profanis vestibus relineret, abiecit, alterâq. poposcit è nostris. Iam studio patiendi pro Christo (quæ potissimum nota, eos qui cœlesti ardent amore à ceteris segregat ac seiungit) tam incenso flagrabat, ut non modo febris æstum & reliqua morbi incommoda æquissimo animo toleraret, sed etiam hoc ipso non modocriter angeretur, quod nihil vnquam, ut ipse aiebat, aduersi Dei nomine pertulisset. Quæ res tanti erat apud eum, ut rogatus, adhibiturusne preces esset pro præcipuis quibusdam amicis, ut se sequerentur in cælum, responderit oraturum potius, ut in hac vita, Christi causa, multa indigna atque acerba perferrent. Accessit aliquando ad febriû ardores molestissimus cordis angor, tantumq. abest, ut aliquid ingemisceret, ut in eam ipsam partem, quæ maxime torquebatur incumberet: rogatusq. cur ita faceret, confessus ingenue sit, quo magis vim doloris amplificaret. Aiunt etiam inuisenti se Patri cuidam mane, visum exposuisse: astitisse sibi per quietem custodem angelum, quæsisseq. si daretur optio, virum tandem optaret, ad semihoramne post mortem igne purgante torqueri, an dies in hac vita triginta, febrium ardore

dore iactari: se uero respondisse, proximum, & cur id eligeret, attulisse, quia dum uita suppeteret cum ualendis patiētiæ meritis locus esset. Porro nihil in eo sic enituit ut religiosi amor obsequij. prorsus ut cadauer, quod tractantibus non resistit, in omnē partē versari & circumagi se sinebat: nec uero quisquam medicorum nutibus obsequentior. quantum hi ad escam uictumq. præscriberent, tantum ille uel cum nausea molestiaq. capiebat: vicissimq. in sedanda siti, qua maxime æstuabat, nunquam ne guttam quidem aquæ, ultra præscriptum uel hausit uel postulauit. Cumq. ex eo, ut solet, nūquid appeteret, quæreretur, nunquam respondebat aliud, nisi quod medicis visum esset: ita ut omnem interrogandi cupiditatem adimeret similitudo responsi. Maximæ admirationi fuit in tam uiridi ætate, tum cum uel maxime dulcedo uitæ delectat, mortis amor atq. contemptio. Nam cum supremam sumeret medicinam, in qua aliquid uidebatur esse fiduciæ, Quam uellem inquit nihil mihi prodesset: illud tamen dolebat & querebatur assidue, quod per morbum uiriumq. languorem, non liceret pro uoto sese ad mortem sedulo comparare. Inuentus est aliquando plorans, causamq. non reddidit aliā, nisi quia summa imbecillitas uirium, intentionem Deo uacantis animi retardaret. quod ipsum tamen extremo illo morbo, cum vires corporis exhaustæ iam essent, consequutum se non obscure significauit. Plurima erat de Deo mentio, plurima de rebus superis cogitatio. in eaq. re nulla erat defatigatio, nulla cessatio, imo voluptas nulla.

la maior, nulla iucundior. Cum ad mortem accederet propius, qua fuit animi submissione, à Patre Prouinciali contendit, ut vniuersis, quorum expertus esset officia, suo ipse nomine gratias ageret, rogaretq. sibi ut ignoscerent, si quid apud eos esset offensum: iuberetq. in cubiculum congregatos suis adesse precibus morienti: magnum enim se ex eorū præsentiā fructum esse laturum. Quos ut conseritim introeuntes aspexit (placuit enim æquissimæ postulationi concedere,) elatis præ lætitiā vocibus, Quam gloriosus, inquit, obitus tot Angelorum constipatus agminibus? Sed in perpetua quadam lætitiæ voluptate, qua eius animus mulcebatur, recreabat ea maxime cogitatio; quod in Societate diem vltimum clauderet. Mitto, quam religiosos sermones cum Deo Deique Matre vna conferret: quam arte Christi complecteretur effigiem, quam pia vulneribus oscula figeret; ut eos etiam, qui spectarent audirentue, quasi quibusdam facibus inflammaret. Cum ei fratres, Crucifixi signum amouere conati, requiem aliquam suaderent, nunquam sibi illud extorqueri passus est; quod diceret, tum ad Deum abeundi, non quiescendi tempus esse. tamen illorum perseuerantia victus, signum quidem pendentis IESV dimisit è manu, sed continuo proximā Dei Matris arripuit imaginem, alteramq. nostri Ducis ac parentis Ignatii, quem in eo morbo præcipua quadam religione dilexit. Tum repentino quodam exorto gaudio atque inusitato, Non videtis, inquit, Angelos, non videtis? mox mussitando Angelum suum

suum saepe compellans, quædam cum eo dicitur collocutus, quæ nequaquam satis accepta sunt auribus, præter admodum pauca; quæ paulo intentior vox reddidit: quibus denunciaſſe ſibi Angelum ſuum ſignificabat, fore quidem ut per Purgatoriꝝ tranſiret incendia, ſed breui tamen iſs ignibus liberandum, & ad Para-diſi gaudia perducendum. ibi obuiam ei futurum Ignatium, qui eum coram ſanctiſſima ſiſteteret Trinitate. Hoc viſo maiore quædam lætitia, quã ut eam animus capere poſſet, elatus, exultabat in Deum viuum, totoque corpore, quanquam infirmiſſimo, ſuper lectulum exiliebat. Atq. hæc inter gaudia, hæc inter preces, crebraſq. Dei Matris appellationes, quaſi ſomno placidiſſimo conſopitus exceſſit è vita. Poſtero die celebri non domeſticorum modo, verum etiam externorum conuentu, ad quos neſcio quomodo aſſarat hic rumor, curatum eſt funus, nec ſatiari multitudo poterat adoleſcentis aſpectu: qui in ipſo feretro, religioſo collocatus ornatu, ut erat oris habitu nec gracili nec exhauſto, ſed læto ac renidẽti, Angeli potius cuiuſdam, quam mortui ſpeciẽ præſeferebat. Fertur vnus è noſtris qui decedenti non affuit, dum id temporis pro Gulielmi ſalute preces ſunderet, repente interiore quodam lumine colluſtratus, quaſi voce quædam eſſe præmonitus, exceſſiſſe Gulielmum: ac veluti re explorata minimeq. dubia, mutato precationis argumẽto, orare ardenti ſtudio capiſſe pro eius anima, è Purgatoriꝝ cruciatibus liberanda, ſi ea forte regione detineretur: qua in precatione cum aliquantiſper hæſiſſet,

ab-

absterfa subito triftitia illa, quam de morte conceperat, admirabilis quædam effe in eius animo hilaritas confeçuta, & lux oborta clariffima, quæ perfpicue ac fine errore doceret, Gulielmum, in fuperas illas Beatorum regiones ex infernis illis ignibus euafiffe.

ALETINVM ET RELIQA Collegia.

ANnus hic Aletij multis morbis obnoxius, noua fuit noftris facultas & materia pietatis. Dum autem corporum faluti commodisq. feruitur, animis quoque confultum eft. Ac per eam occafionem æs ingens ad fuos dominos redijt; flagitia multa repreffa, inopum fufientata tenuitas, & alia huiusmodi cum laude geffa. Societati hoc anno dicatus eft vnus: & ad reliqua fodalitia conditum Oratorium. ex opificibus ferme trecentis, vnde magna fe fpes vtilitatis oftendit. Quod ad rem familiarem attinet; nobilis mulier quingentorum aureorum cenfum Collegio attribuit: aliaq. extant in nos ciuium beneuolentiæ documenta non pauca.

CATAZORII grauib. interdum fimultatibus eft occurfum. Erat inter principes duos graue certamen, vter alterum officiofa falutatione auerteret, nec fine cura ingentiq. metu ciuitas erat, quorfum tandem eruptura res effet. Deo duce, tacitis controuerfiis noftrorum colloçutione fedatis, reconciliatio gratiæ facta eft: quod vt fieri poffe ciui-

tas nullo modo suspicabatur, ita cum accidit ingenti approbatione suscepit. Illud quoque pie religioseq; curatum est, ut adis maximæ cæmeterium, quod maceria nulla circumdabat, ad arcendas ferarum iniurias, murorū præsidio cingeretur. Itaque cum ea de re à concionatore nostro commonesactus est populus, tantus ardor animis est iniectus, ut lapides, honesti viri complures præeunte concionatore ipso, à passibus quingentis suis humeris comportarent.

BARI sodalitates Dei Matris, institutæ sunt duæ, altera discipulorum, ex qua ad Societatem iam transit vnus, altera nobilium grauiumq; virorum: in qua ipsi quoq. Prorex & Archiepiscopus numerantur. Sodalis vix septendecim natus annos, cum à muliere domestica & sanguinis communionem coniuncta, instigaretur ad facinus, ut se tanto liberaret incendio (diu enim muliebri libidini iam resisterat) de nostrorum sententia, simulare cæpit se ad Capuccinos velle discedere. rogatus à parente, unde tam repentina voluntas, iureiurando accepto, ne quid cuiquam indicaret, omnem ei rem uti se habebat exposuit. ea re cognita parens nihil prius habuit, quam ut à se amandata muliere, integritati filij pudoriq; consuleret. Ad hæc duo sodalitia, rusticorum adiunctum est tertium. Hi Dominica quaq. luce, confessionis & Eucharistiæ mysteria apud nos obeunt: redeunt à prandio ad explanationem Christianæ doctrinæ: sociorum peccata corrigunt, ad eaq. rite expianda cohortantur. quibus sane rebus menstruo spatium, sodales amplius quinquaginta ad suum numerum aggre-

aggregarunt. Ex his unus vigesimum circiter annū agens, quoniam apud nos, quanta animi provisione fugienda essent peccata, didicerat, cum à femina primaria modios aliquot tritici coemisset, & ab ancilla, quæ ei triticum sola soli dabat, procaciter pelliceretur ad stuprum, continuo relictis saccis triticoque, profugit. Nostri dum suum quisque munus sedulus administrat, non modo à morte animos, sed interdū etiam corpora defenderunt. Neci duo erant additi, parataque iam iuga bouum, unde raptarentur ad crucem: nostri ergo conueniendis ijs, penes quos necis & uitæ ius erat, persece, ut tantisper differretur supplicium, dum se damnati defenderent. Quid multa? alter repertus est insons, dictaque causa ex iniquitate se mortis eripuit: acre iudicibus documentum, quam non in reorum capita sit præcipitanda sententia.

CIRINOLANVM rude est adhuc informeque Collegium, dum id perficitur habitatur à paucis. res tamen ab absolute non abest. hoc anno demum incoli cœpit, cum antea nostri in conductis ædibus habitarent. In ædificationem templi, Collegij Fundatrix cum aureos se trecentos daturam in annos singulos recepisset, primam soluit hoc anno pensionem. Sed de hac Provincia, sat multa. Nunc ex Italia in Lusitaniam Indiamque migremus.

97

P R O V I N C I A

L V S I T A N A .



*V*nt in hac Prouincia de nostris de-
cē amplius, & quingenti. In Olyssi-
ponensi Domo quattuor & quin-
quaginta. In Collegio vnus & quin-
quaginta. In Eborensi centum &
viginti duo. In Conimbricensi cen-
tum ac septuaginta octo. In Portuensi quindecim.
In Bracharensi triginta. In Brigantino viginti quin-
que. In Funchalensi tredecim. In Angrensi sex.
In Angolana Residentia septem. Sex diem obierūt.
Societati annumerati sunt quadraginta.

D O M V S O L Y S S I P O N E N S I S .

Quatuor hoc anno profecti sunt in Angolam:
in Indiam autem sunt missi decem: ex eaque
duo huc Sacerdotes, cum primis illis Iaponia Eccle-
sia fructibus appulere. Res externa belle procedit.
Auctæ sunt à Rege menstruæ pecuniæ, quas eleemo-
synæ nomine tribuebat, aurei mille quotannis. toti-
demq. in ædificationem templi decreti. Superiorum
vero Regum, munifica aromatum largitione & pio-
rum liberalitate virorum, non solum aes alienum,
quo pene oppressa Domus erat, magna ex parte dis-
solu-

solutum est, sed etiam templi continuata constructio. ac si tantum id, quod impensum est in opifices ad calculos reuocetur, trium millium septingentorum ac sexaginta aureorum summa reperietur. Tā animarum fructus, operarum laboribus nihil impares. Unus è nostris cum quodam in templo concionaretur, in quo, pro cuiusdam sodalitatis instituto, tres orbe puellæ in matrimonio collocandæ erant, plurimæq. supplici libello, ut in eam sortem admitti possent efflagitassent, Noster ille populum pro concione commonuit, minime decere, ut tot indotatæ relinquerentur, addendamq. ad eum puellarum numerum esse quartam. Cum perorasset, tantum pecuniæ corrogatum est, quantum etiam ad conficiendā quartæ dotem satis superq. videretur.

Alius cum aureos mille quingentos exigere à debitore non posset, carceri eum & vinclis addixit; sed audita concione, non modo illum mittendum curauit, sed pecunias ei creditas condonauit. Catechismus in maximo puerorum virorumq. grege, non in templis tantum sed in vicis triuissque traditur: quanta cum utilitate, vel puerorum educatio testatur. Ex his unus cum audisset virum iam ætate prouectum, iusiurandum temere usurpantem, propere accurrit, flexisq. genibus, Per Deum, inquit, ne posthac iurato: nec enim isthuc leue peccatum est. vir rubore suffusus abeuntem reuocat puerum, & quod ei nomen esset, & quibus natus parentibus sciscitatus, cum ea puer nihil referre dixisset, Næ tu (inquit) minime puer es, sed Dei Angelus, qui tam salutare dedisti

dedisti consilium: atqui sic habeto, me non commissurum in posterum, ut mihi excidat iusiurandum. E confessionibus par est utilitas consequuta. Euocatus est ad nobilem feminam agrotantem Sacerdos, quam callidus hostis in eam fraudem conabatur inducere, ut quoniam commissum ab ea facinus emanarat, voluntaria nece turpitudinem vitaret infamiae: esse enim apud inferos quoque nobilium turbam, esse Reges dynastasq. complures. Cumq. Pater, conaretur illam de ea mente deducere, demon abeunte Patre, cogitationes improbißimas suggererat. Iam inducæta erat in fraudem, iam cultrum in tempesta nocte quærebat, quo sibi vitam eriperet, cum ecce tibi horribilis culter, pallido squallentiq. manubrio iacebat humi: mulier exterrita viso, defixisq. in Christum oculis, cuius in eo loco proposita erat imago, si hæc (inquit) propter meum facinus Christe permittis, luo protinus, quod admisi. ita cum sese postridie rite expiaturam esse polliceretur, statim fæda illa species evanuit. Postero die accito Sacerdote, confessione maculas eluit, atque ex eo tempore valetudini reddita, apud nos diuina mysteria frequentat.

Publicis custodijs non exiguum emolumentum allatum est. nam cum aquæ laborarent inopia, quidam è nostris, adiuncto comite, urnas aquæ plenas suis impositas humeris ferre cæpit, eoq. exëplo excitauit ex omni ætate & conditione complures, ut aquas in carcerem ipsi quoque conueberent: cumq. aliquando Patre duce, magnum agmen portantium

vrnas incederet, vir nobilis obuiam factus in equo,
 ex eoq. desiliens suam quoque operam offerre cæ-
 pit: sed ei Pater, Tuum erit (inquit) panes suppedi-
 tare, nostrum aquas. quod cum libenter ille facturū
 se recepisset, postero die magnum frumenti numerū
 cum ære submitit. Quoniam vero pleriq. vel leui cri-
 mine, vel quod ære alieno oppressi soluēdo non sunt,
 diuturno carcere fatigantur, curant nostri collatis
 à nobilitate pecunijs, vt ij vel debito, vel multa so-
 luta è vinculis eximantur. ad eam rem Archiepisco-
 pus aureos quinquagenos in menses singulos dono-
 dat, alijq. alia; quorum præsidijs captiui prope du-
 centi è publicis sunt dimissi custodijs. Nec vero in
 rebus bene gestis illud est postremum, quod cū mul-
 ti ex Africa Saraceni fidem professuri Christianam,
 ad nos venirent; nec tamen Christianis possent legi-
 bus satis institui: nostri Cathecumenorum domum,
 quod diu ante tentarant, extruendam in hac vrbe
 curarūt. Xeriphij olim Africæ Regis filius, non pro-
 cul ab vrbe aberat, cum ex eius comitatu Mauri no-
 biles ad nos venerunt, etiam atque etiam rogantes,
 vt Christianis sacris initiarentur. nostri conductis
 prope templum ædibus piorum liberalitate adiuti,
 ijsq. quæ ad usus uitæ necessarios pertinent, compa-
 ratis, Catechismo eos orsi sunt erudire: dumq. in ea
 cura uersantur, à Cardinali Roberto Regni modera-
 tore, necessarios simul impetrare sumptus ad usi-
 tatam baptismi celebritatem. Interim actum est cū
 eo uehementer de Cathecumenorum domo conden-
 da. Cardinalis (re cum ijs qui à consilijs sunt agita-
 ta)

ta) litteras ad Regem dedit; Rex ut est propagandæ religionis studiosus, postulationibus annuit: statutaq. condendi ius munusq., delegatum est Domus nostræ Præposito: sed quò commodius instituendis Catechumenis opera detur, placuit prope templum nostrum, eorum, ut dixi, ædes exstruere. Ac præter id, quod ad domesticam supellectilem Cardinalis dedit argenti, in singula capita vnoquoque mense octonæ circiter decreti sunt aurei; & in apparatus pompæq. baptismi, unicuique triginta. Tres iam summa cum ceremonia maximoq. hominum cœtu suscipere baptismum; quo peractò vecti equo cum Regni proceribus, qui eos de sacro fonte susceperant, Cardinalem salutatum iuerunt: qui non exigua eos amoris & beneuolentiæ significatione complexus est. Iam in pagis, ut à domesticis abeamus, curatum est, ut qui ad inimicorum cædem accensis animis properabant, iniuriam suam Christo dimitterent. Fuerunt in eo numero viri primarij, qui in duas diuisi factiones, similitates inter se veteres exercebāt, quarum nullus alius ostendebatur exitus, nisi certissimus multorum interitus: adeo insitum atque inuictū erat inimicorum animis odium. Sacerdos alter à Brigantino Duce vocatus, quotidianis concionibus, non leues ipse quoque oblitterauit iniurias. Vnus, cui manus est in rixa præcisa, ne percussori parcere cogeretur, Patris sermonem congressumq. visabat: verum cum resistere diuinæ voci animique permotioni non posset, ad nostros vel inuitus accessit: ibi coram Dei Matris effigie inimicos amice complexus, præ

gaudio lacrymas, & ipsis & alijs qui presentes aderant, excitauit. Hic ipse Sacerdos cum sexta quaque feria apud eum, quem dixi, Ducem, de asperimis Christi cruciatibus disputaret, ad extremum cū perorasset, plurimi se flagris ex ipsa Ducis aula oppidanisq. mulctarūt: cumq. ab ea re pueri propter ætatem excluderentur, rationem inierunt eiusmodi, ut gregatim se per oppidi uicos non sine sanguinis effusione diuerberarent.

OLYSSIPONENSE ET CONIMBRICENSE Collegia.

Ad institutum Collegij opus pertexendū, ades nobis quasdam & vicina pradia, quæ sui iuris erant, libera Senatus reliquit; idq. publicis tabulis testatum voluit. In Gymnasio & ad sapientiam & ad virtutem pari cursu contenditur. E nostris auditoribus, septem ac sexaginta in varia sunt annumerati cænobia. Nec minor fructus è templo capitur. Quidam cum à flagitiosa vita, ne diuinis quidem monitis animo frequenter illapsis, deterrevi posset; nocturno viso perterritus, ac de cubili deiectus, statuit diuinis monitis obtemperare; postridieq. cum Sacerdotem conuenisset è nostris, scelerum maculas confessione deleuit, deq. eius sententia nouum vitæ genus instituit. Alius cum superioris vitæ tempus sanctissime traduxisset, sensim pietatis intermittens officia, pari turpitudine innocētiā præteritam obscurauit. ijs enim vitiorum illecebris se irreuerat,

ut iam familiariter malo demone vteretur . Demum post aliquot annos hominem Diabolus pro amicitia rogat, ut suam sibi vitam & corpus imolet : cum ille annuisset, & in secretiore locum, ut laqueo vitam clauderet, secessisset: ecce tibi lux repente de cælo . pristina virtus redit in memoriam, & benefacta præterita, & votiue peregrinationes, Dei matris & Sanctorum causa susceptæ. quæ dum secum ipse reputat, priusquam collum in laqueum inserat, proximam concedit in ædem, ipsi Dei matri dicatâ, quam præcipua quadam religione coluerat. ab hac alium subito mutatur in virum, & ad nostros longo itinerum intervallo contendit. Vis lachrymarum & doloris plena confessio facile declaravit, quam præsens illi fuerit Beatissimæ Virginis auxilium, quæ neminem vnquam deserit pie ac suppliciter implorata. E Conimbricensi Gymnasio, quod auditoribus constat mille nongentis, quinque in Societate, aliq. in alias se contulere familias. Ad reliqua vero huius anni benefacta utilitatesq. perceptas, quatuor ex ijs, qui perfidiæ causa plectendi erant, ad sanitatem reuocati sunt. In pagis locisq. finitimis, ubi maximo hominum conuentu conciones habitæ sunt, capitales interdum repressæ sunt inimiciæ, effectumq. ut factionum Duces, vna cum suis convenientes in templum, venia vltro citroq. data ac petita, in mutuam gratiâ concordiamq. redierint . Alibi ad euellendam temerarij iurisiurandi consuetudinem, erecta sodalitas est. quo præsidio procliuissimus quisq. facile à iureiurando se continet. nec defuit puer, qui

iurantem argueret patrem, nulla non modo cum offensione parentis, verum etiam cum voluptate: ita ut pater pro referenda gratia noua eum veste donarit. Pagani quidam cum à templo distarent; eamq. ob causam sacris plerunque carerent: egerunt nostri de erigendo in eorum oppido templo, ad eamq. rem pacti sunt incolæ annua pecuniarum præsidia. Hæc & his similia dum geruntur à nostris, Episcopus quidam, cum de vili eorum opera industriaq. (in ipsius præsertim agro colendo) rescisset, summas eis, & coram & per litteras, gratias egit, eorumq. in animas curam studiumq. maxime commendauit.

EBORENSE COLLEGIVM.

EX Academia, quam in Eborensi Collegio Rex Henricus exstruxit, pares fructus laboribus re sponderunt. Ea enim est pietas iuuentutis, ut non modo Nosocomia frequenter adeat, lectos sternat, foueat & consoletur ægrotos: verum etiam sublatis in humeros urnis, aquæ subsidia ad carcerem deferat, sæpe pœnas à sese exigat, nec voluntariam verberum acerbicatem, aut ciliciorum horrorem reformidet. Trecenti amplius per Quadragesimam octauo quoque die, ad publicam diuerberationem conueniebant: nec Academici modo auditoresq. Gymnastii, sed illustres quoq. viri, aliq. qui cum explorandi causa ventitaissent, subito tamen aliorum imitabantur exemplum. Itaque è discipulis, sese cœnobijs deu-

deuouere complures : Societati non minus octo. Iam iratorum animi hic quoque conciliati non pauci. Inter duas familias in primis nobiles, tam acerba existere dissidia, vt magnum vtrinq. metueretur exitium. & quanquam perturbatissimus rerum status, desperationem pacis videbatur afferre : tantum tamen Deo duce perfectum est, vt oblitteratis penitus offensionibus, redintegrata sit amicitia. Capiunt diuina mysteria permulti, vnusq. Domini Natalitjs caeleste iniere conuiuium, tria amplius hominum milia. Nec vero è pagis fructus capiuntur exiles. Quodam in oppido duo erant non minus sanguinis, quàm scelerum coniunctione deuincti. sed eorum alter cū sanus esse cœpisset, nec tamen auderet facinus suum eius loc. Sacerdotibus confiteri, ex dolore ac desperatione necem sibi moliebatur inedia. quam cum iā diu tulisset, audissetque vicinum in pagum Sacerdotem è Societate venisse, confestim ad eum tanquam ad opem sibi diuinitus missam sese confert, apertaq. vulneris fœditate, & ipse & consors scelestis, à nefaria se consuetudine seiunxerunt. Alibi etiam (præcipue in Brigintini Ducis oppido, quod à Principe Catharina vocati sunt nostri) magnus extitit è concionibus ceterisq. Societatis nostræ muneribus fructus. Sane in eo, quod dixi oppido, ea fuit morum mutatio, & animorum motus, vt Franciscanæ familiæ Patres affirmarent, si quotquot ad religiosam vitam admitti vellent, ijs omnibus mos gereretur, exuendum fuisse oppidum flore iuuentutis.

Iaponēses, quos supra nominavi, cū hac iter habere

rēt Olyssipone profecti, maxima omnium ordinū tū
 frequētia tum gratulatione excepti sunt. Enituit hic
 Archiepiscopi comitas ac liberalitas, qui non modo
 d'omi suā perhonorifice veniētes excepit, sed largo
 munificoq. viatico prosequutus est abeūtes. Hinc ve
 ro digressis, Brigantinus Dux currum suum scite &
 eleganter ornatum, honestosq. longo intervallo equi
 tes obuiam misit. Vbi autem eos aduentare cogno
 uit, ipse quoque obuiam magna nobilium cum coro
 na processit. domi vero deductos ad matrem, eorum
 aduentum auidissime præstolantem, regio apparatu
 conuiuioq. suscepit. Non hic auro argentoq. instru
 ctos abacos, non pretiosis peristromatis ornata cu
 bicula, non pulcherrime stratos lectos, non ceteram
 Ducis elegantiam splendoremque commemorabo:
 quæ eximium eius in regios adolescentes animum
 declararunt. Dux item in vastam eos & per
 amenam syluam, vna cum fratribus equitibusq. tre
 centis venatum duxit, abeuntesq. item multo auro
 argentoq. donauit.

P O R T V E N S E E T B R A - charense.

CAtechismus in Portuensi Collegio maxima
 Catatum omnium frequentia, pueris explana
 tur. Episcopo interdum ac Senatoribus Regiis Præ
 sideq. præsentibus. Inter pueros, qui Christianæ le
 gis scientia cæteris palmam præripit, is publicis de
 coratur honoribus, nec deest honestorum virorum
 beni-

benificencia, in suppeditandis ad hæc dona pecunijs. Interdum etiam pueri, vecti scaphis in oppidum è regione positum traducuntur, hymnos medio amne vt d nostris docti fuerint, concinentes, non sine incolarum tum admiratione tum gaudio. Confessiones sunt omnino multæ, non modo ciuium ac domesticorum, sed etiam aduenarum, è locis valde disiunctis. Quidam cum se nefario quodam scelere astrinxisset, vt id tegeret ac supprimeret, multas alias turpitudines maculasq. suscepit: cumq. ed hominem sua scelera prouexissent, vt sibi ipse moliretur exitium, templum nostrum ingreditur, primòq. introitu diuinitus immutatus, vitam expiare totam sine mora constituit. ea res & vitæ fuit honestioris initium & turbulenti animi medicina. Vni dum se malus dæmon in lucis angelum transfigurat, & modo huius, modo illius se Beati specie conspiciendum obijcit, sensimeas illi struxit insidias, vt ad amentiam prope redegerit. sed cum per sacram confessionem Deū sibi reconciliasset, diuinam lucem aspexit, & ad saniores mentem reductus, factus est in posterum cauior.

E BRACHARENST Collegio in domesticā disciplinam adsciti sunt tres. & ad incitandū pietatis ardorem, in honorē Dei matris est erecta sodalitas. ea iam lectissimis constat adolescentibus, eorumque exemplo non pauci de primarijs, vt in eundem numerum adlegantur, efflagitant. In vicinis pagis tum inter coniuges, tum inter alios grauissime dissidentes, constituta pax est. Clericus mortifera accepta
plaga,

plaga, cum esset Sacerdoti nostro peccata confessus, publicis testatus est tabulis, veniam se percussori tribuere. Magistratus autem domesticosq. rogauit, ne hominem homicidij reum agerent: quem ipse, si adesset, antiquissimum vt amicum amplecteretur. Occursum est etiam militaribus iris atq. flagitijs. ple-rique cum mulieribus implicati, vt ab earum consue- tudine se diuellerent, interposita auctoritate Præ- fecti, curatum est. Inter præsidarios autem milites & oppidanos, cum sepe rixæ ac contentiones, (no- cturnæ præsertim) excitarentur, ex usq. alij male mulctati, alij vulnerati discederent, quidam etiam exanimis auferrentur; Tribunus militaris, vt tam- fædæ rei medicinam adhiberet, de Patris nostri sen- tentia, graui cavit edicto, ne quis miles post prima lumina domo pedem efferret. ita ingens malorum est subtrahæta materia. In obeunda cum Archiepi- scopo Diæcesi, plurimi sunt ab erroribus liberati, sinceraq. imbuti religione. Arma etiam ab ijs qui mutuas gerebant inimicitias adempta. Inter quos vnus, ab inimico medio foro pulsatus, percussorem postulat de iniuria: mulctatur exilio reus, relictis in maxima inopia coniuge tribusq. liberis, & quod grauissimum est, relicto etiam dissensionum in poste- rum seminario. Sacerdos noster vt vna opera tot incommodis obuiam iret, ita, Deo duce, rem omnem administrauit, vt & reo daretur impunitas, & qui læsus esset obliuisceretur iniuriæ.

Brigantino Collegio quotidianum est, ut contentiones & discordias, quæ hic frequenter exoriuntur, extinguat. Filius parenti litem intenderat non sine graui ciuitatis offensione. cumq. secundum Patrem iudicatum esset, ad Regiam Curiam appellauit, pecuniamq. seposuit, ut causam vel largitionibus obtineret. postea à Sacerdote nostro communitus, misertus est patris, suo iure cessit, & quicquid ei erat, patris permisit arbitrio. Alius cum filia & genero similitates gerebat antiquas. appropinquante morte, en tibi filia confestim ad patrem, ut extremum spiritum morientis exciperet. Sed eam ne tum quidem pater admisit, imo pessimo exemplo & summa cum offensione ciuitatis abegit. nostri hominem & anima & corpore ægrum, cum inuisissent, docuissentq. quantam in excludenda filia suo nomini notam inureret, vicerunt tandem, ut filiam reuocaret, in gratiamq. reciperet. Inter duos nobiles Magistratus, grauis erat coorta dissensio: sed eius fama cum ad aures Catharinæ Principis peruenisset, Rectori Collegij confestim mandat, ut in Collegium euocatus ad concordiam pacemq. reducat: quod cum ab eo factum esset, publica lætitia consequuta est. erat enim periculum, ne cum vterque publicum munus administraret, in duas factiones distracta ciuitas, graue caperet detrimentum. Adolescens cum puellæ cuiusdam nuptias quibus se obligauerat repudiaret,
puellæ

puellæ patruus longo itineris interuallo Brigantiam venit, ut adolescentem nisi officio satisfacisset, occideret. ea res (quoniam ex amplis erat uterque familijs) cædes minitabatur acerbæ, sed nostrorum arbitrio ac disceptatione composita, exitus habuit opinione feliciores.

FVNCHALENSI Collegio, quo laxior sit habitatio, proxima quædam adiunctæ sunt ades. Habentur autem in hac vrbe magnis cum animorû com-
modis conciones. Quidam coram Beatissimæ Virginis simulacro, assidue graue facinus deplorabat, ratus eam confessionem ad expiandum facinus esse satis. non passa est misericordiæ mater, tanto eum in errore versari, mentem illi iniecit eiusmodi, ut concionatorem nostrum audiret, quo audito nihil habuit prius, quam ut Sacramento confessionis suum deleret erratum. Atque est etiam cum Magistratibus, de veneficorum coercenda licentia, quæ eo progressa iam erat, ut ad imam aram, in qua corpus Christi reponitur, veneficia teterrima sint reperta. Duo autem, qui ad obeundum facinus, bullas quasdam artificijs veneficorû plenas, velut sacras quasdam reliquias de cervice gestabant, admoniti eas protinus abiecerunt.

COLLEGIVM ANGRENSE.

ANgrea duo de nostris, sine bellis imposito, remanserunt: ij, cum propter assiduas calamitates & direptiones attritæ res essent, miserorum
ino-

inopiæ, quorum ingens fuit numerus, subuenerunt. ijdemq. à Magistratibus impetrarunt, ut qui vinculis tenebantur, aut illiso soluerentur, aut in laxioribus haberentur. Eadem opera captiui vel pretio redempti, vel missi gratuito. Reis etiam non nunquam vita atque impunitas data. Quæ quidem nostrorum officia tanto admirabilia vulgo sunt visa, quanto illi pluribus antea conuicijs & maledictis exagitati sunt: ut merito aliqui dubitare se dicerent, præstaretne nostros beneficijs; an contumelijs afficere: quando non minoribus officijs improbos ac maleficos, quàm probos ac beneficos prosequerentur. Non ita multo post, cum quatuor è Societate ad portum appulissent: ciues, tum ij, quorum erga nos beneuolentia turbidis in rebus perspecta iam erat, tum ij, qui nobis videbantur aduersi, summam ex aduentu nostro lætitiā præse tulerunt: illi, quod nostri, qui non sine illorum lacrymis ac mæore disceßerant, omnium votis expetiti redirent; hi ut præterita maleficia officijs præsentibus resarcirent. Itaque in nostrorum reditu; portus, muri, propugnacula, viæ denique totæ gratulantium & occurrentium multitudine complebantur. Senatores præcipui nostros è naui receptos in scapham, ad portum perhonorifice deduxerunt. Præsidi quoque Præfectus, Tribuniq. militares cum primarijs ciuibus, præsto fuerunt ad litus, ut cum honore exciperent exeuntes. Inde ad Collegium inter omnium gratulationes, densissimo & latissimo occurrentium agmine processerunt. Atque in hunc modum nostrorum celebratus est reditus

ditus. Nostri autem, quantum in se fuit elaborarūt, ut tantæ hominum beneuolentiæ expectationiq. responderent. Itaque & in templo maximo & in alijs sacris ædibus conciones instituerunt, tanto animorū motu, ut interdum è populo effusa comploratio & eiulatus erumperent. Quibus aliquando clamoribus, præsidarij milites excitati, veriti ne qua templi ruina multitudinem oppressisset, ad ferendam opem protinus accurrerunt. Seditiones porro aliquot militares compressæ sunt, ducumq. ac primariorum iræ placata. Et quoniam in hac insula cohortes aliquot militares præsidij causa relictæ sunt, datur opera, Duce ipso iuuante, qui nobis est in intimis, ut in officio contineantur, nec solum à maleficijs & rapinis temperent, sed etiam dominica quaque luce cohortationibus pomeridianis intersint, quibus pijs de diuinis rebus colloquijs ad pietatem sic inflammātur, ut & diuina mysteria frequenter usurpent, & peculiari quodam studio erga Dei matrem afficiantur. Quidam abiectō religionis ornatu sumpserat militarem: alij vota, quibus se obligauerant non soluebant: alij flagitijs tenebantur impliciti, alij denique alijs vitiorum morbis agitabantur, quibus cum actum est, ut & suo quisque voto officioq. faceret satis, & abigendis amandandisq. mulierculis, flagitiorum præci deretur occasio. Institutum & hic est B.Virginis sodalitiū, cui dedere nomina è nobilitate complures. Huius sodalitiij ea mēs est, ea ratio, ut miserorū subleuet egestates, ut ueste, frumēto, pecuniaq. iuuet, ut ægros foueat, eisq. medicis pharmacisq. subueniat.

ANGOLANA SEDES.

IN Angola multis etiam de principibus, christiana fidei splendor illuxit. sed quamuis multi ex ijs ad baptismum parati videantur, ne doctorem penuria ad patrios ritus ac turpitudines reuoluantur, in aliud tempus eorū baptisma rejicitur. Nā tres, qui in ea provincia de Societate versantur, vix Lusitanis, ne dum Aethiopibus adesse possunt. mille tamen abluti sunt, quibus ipsa loci vicinitas est adiumento. Inter eos nobilissimus Angolæ Princeps, cuius in ditione Prætoris Lusitani sunt castra. Is christianæ religionis instituta iam nouerat, & cuncta memoriter hauserat, cum oppressus repente morbo in vltimum putabatur venisse discrimen. Mittunt ad eum Sacerdos noster ac Prætor, qui quæreret, velle; ne priusquam vita excederet, christiana sacra suscipere. Ea res tantum attulit ægro lætitiæ, vt de morbo subito recreatus nuntio dederit euangelia. Postea suis euersis & cōminutis Idolis sese ad Christi cultum vna cum amicis, liberis, coniugibusq. conuertit: vxorumq. multitudine repudiata, quas patriæ superstitionis licentia concedebat, vnā duntaxat è christianæ legis sanctitate retinuit. Incidit Baptismi celebritas, in diem ipsum Dei Matris Natalem. aderat Catechumenorum candidus ordo, serico indutus ornatu, manibusq. præferens palmas. eaq. pompa processit ad fontem. Cumulauit rei gaudium Lusitanorum aduentus, tertium iam mensem

H belli-

bellica in expeditione versantium, hoc etiam magis, quod Dei Matris effigiem non sine miraculo receptam ab hoste referebant. Voluit hanc Prætor imaginem, quo Neophytis ethnicisq. planum fieret, quanta cum veneratione colenda sit Dei Mater, effusa obuiam multitudine, ingenti gratulatione excipi, apparatuq. quàm maximo. Quibus peractis placuit etiam Prætori Lusitanisq. eius diei lætitiā, qui tam multis natalis esset, noua cum prole, quam de fonte susceperant, festis apud nos epulis celebrari. Vt huius baptismi fama percrebuit, ceteri pio quodam studio æmulationis incensi, multa cum Patribus questi sunt. quod ipsi quoq. sua baptismata tam diuturnis expetita votis non impetrassent. Nostri vt eorum quoq. studijs obsequerentur, in eorum pagos sacerdote dimisso, voluerunt omnia prius Idolorum signa cremari, incolasq. christianis legibus erudiri, quam eorum quisquam Ecclesiæ limen attingeret. Sequitur res admirationis & lætitiæ plena, digna, quæ non modo nostris, sed omnium litteris monumentisq. mandetur. Prætor cum Mocumba, vbi alterum iam annum habebat castra, mouisset; & in Cambabam, quæ regio est argenti fodinis nobilis, peruenisset, locum cepit muniendis castris idoneum. ea re cognita Rex Angolanus, vt Lusitanos inuaderet, ingentem confluxit exercitum. censa ab eo dicuntur capita duodecies centena millia. cuius rei fama exterritus atq. exanimatus Aethiops, Lusitanorum paucitate despecta, ad inimicorum castra transfugit. Nemo auxilij causa Prætori aderat,

rat, uno excepto Paulo clarissimo Angolæ Principe, qui non ita multo ante se ad christianos adiunxerat. Sed diuina bonitas (quemadmodum desperatis solet in rebus) sui numinis præsentiam declarauit: ac die illo qui suæ Matris Purificationi sacer est, tantæ nimirum meritis Virginis, longe aliter vertit omnia. Nam, quod pene fidem excedit, centum & quinquaginta Lusitani, pauciq. Æthiopes, quos Paulus in prima acie ducebat, innumerablem illam, quam dixi, multitudinem profligarunt; nec in tanta hostium strage è Lusitanis desiderari plus septem; quos ipsos cecidisse tum constat, cum Sacerdos noster à placando diuino numine conueniit. Nam cum ille se primo certamine, ut pro victoria Deo immortalis supplicaret, in interius cubiculum abdidisset, dum assidue precationi dat operam, certa victoriæ inclinatio ad Lusitanos fiebat, sine nostrorum sanguine, sine cade. Ut à præte discessit ratus finem esse certaminis, subito conuersis signis in Lusitanum hostis incurrit, ex ijsque septem, ut diximus, interemit. Pater ad Deum, unde abierat, sine cunctatione reuertit, nec prius ipse finem precibus, quam pugne miles imposuit; ut planum omnibus fieret, non humanis, sed diuinis opibus partam esse victoriam. id quod ipsi quoque testabantur hostes, aiebant enim de cælo secum fuisse pugnatum, maioremque sibi vim ab ipso aere, quam ferro à Lusitanis illatam. Tantus autem pavor ac trepidatio hostiles animos occupauit, ut præcipitem in fugam auersi, profun-

damque lapsi voraginem, eam ipsam sola corporum strage complerint, & velut aquato itinere per strata cadauera, hærentibus à tergo Lusitanis, transitus præberetur. Videbitur fortasse res, si humanis viribus æstimetur, omni fide superior: sed si in diuinam potestatem referas, meminerisq. quanta barbarorum examina perexiguis olim copiis Israelitæ fugarint, nulla erit causa, cur hæc afflicta videri debeant. Ergo tam illustris beneficii memoriam, ut Lusitani grata animi significatione recoleant, supplicationem publice decreuerunt. Sed hoc tam admirabile prodigium, alia non minus admiranda subsecuta res est. Lusitani nouem, à Castris longe disuncti sub occasum solis se vidisse perhibent, ingentem Crucem admirabili splendore ac pulchritudine Angolæ verticibus imminentem. Id ipsum eodem modo eodemq. tempore alij longe positi conspexerunt. eaq. de causa Lusitani Crucis monimentum quam amplissimum faciendum locandumq. curarunt, quod extet ad memoriam posteritatis sempiternam. Verum quod allicere ad reditum Aethiopes debuit, magis à Lusitano deterruit. Nam qui, iniecta periculosi belli formidine, ad potentiorē hostem descuerant, postea cum præter spem ad Lusitanos victoria recidisset, perfidia supplicium veriti, esse cum victis, quàm cum victoribus maluerunt. Quo circa faciendum Prætori fuit, ut in locum natura munitum geminoq. amne circumdatum se reciperet, dum è Lusitania supplementum, quo extrema belli conficeret, euocaret. Sed eum barbari colle-

collectis viribus vndique circumfusi, iam dudum ob-
sident. ac ne Lusitanis vltro citroq. commẽandi po-
testas sit, omnes vsque in Oloandam Insulam, quæ
Lusitanarum nauium est statio, viarum aditus in-
tercludunt. E nostris Sacerdos vnus Lusitanis ad-
est, qui eorum animas curet, & ad pietatem incen-
dat. Alter in Oloanda cum comite laico degit: cu-
ius eadem pietatis officia cum in Lusitanos milites
extant, tum in mercatores & nautas, qui è Lusita-
nia Brasiliaq. confluxerint. Sæpe is in Angolæ Con-
giq. prouincias excurrit, ibiq. plurima demolitur
idola, quotidieq. multos ad Christum per baptis-
mũ adiungit. Sed quoniam tam multis vnus satis esse
non potest, solos infantes, & qui Christianæ legis
summam teneant, ad sacrum fontem admittit. Adij-
etiam negotij caussa ad insulam, quam appellant
Apostoli Thomæ: atq. inter nauigandum, ecce tibi
obuiam Lusitana classis Olyssipone profecta, qua
quatuor vehebantur è nostris. Quod si classis (vo-
speratur) aduentu, Angolana prouincia subigatur,
magnus in ea campus nostrorum aperietur indu-
striæ. Tota Angola regnaq. finitima ab hac vna vi-
ctoria pendent. quam si Deus dederit, vt spes est,
animo iam nunc cernimus, quanta animarum futu-
ra sit seges. Interim excolendis barbarorum mo-
ribus opera datur: nec ea quidem inutilis: qui enim
religionem sunt professi Christianã, ij pristinis exu-
ti moribus ita viuunt, vt in sui admirationem Lusi-
tanorum mentes oculosq. conuertant. Ex ijs com-
plures matrimonio rite coniuncti (id quod in ho-

minibus natura barbaris est mirandum) expiatis
confessione peccatis, non semel è Sacerdotis
nostri manu, veneranda Eucharistiæ
mysteria susceperunt.



PROVINCIA

INDIAE ORIENTALIS.



Recenti & quinquaginta de nostris in sedes plurimas dispersiti, Indicū hoc exercuere nouale. Non equidem faciam, ut sedes numerē vniuersas, ne nimis enucleata enumeratio molesta sit. Sunt præcipue triginta amplius. professorum & nouitiorum Goanæ domus, Goanū Collegium & Cochinese, Bazainen- se, Salsetanum & Malacense. In Iaponia vero Funaiense, & probationis domus Vsuiquensis. Vnde- cim præterea sedes Indicæ è potioribus, quas nihil attinet recensere. Accedunt Seminaria puerorum in India quatuor, Goanum & Salsetanum, Bazai- nense & Coulanense: Iaponica duo, Arimense & Anzichumense. His tum Funaiense, quod Gregorij xiiij. liberalitate condi iam cæpit, adiungitur; tum al- terū in nouo illo Christianorū oppido, quod à B. Tho- ma nomen habet, Philippi Regis iussu sumptuq. in- stituendum. constat id non tam externorum adole- scentium numero, quam nostrorum. Nostri enim etsi in Vaipicota superioribus annis sedem habebant, ex- currebantq. nonnunquam pro rei necessitate varias in vrbes ac regiones: tamen & necessario vitæ cultu carebant, & spe præcipui fructus, qui ex instituenda

Christianis legibus iuuentute percipitur . nunc noui
 institutione Collegij, vtriq; incommodo obuiam itur.
 In his omnibus , quos dixi , locis eò potissimum no-
 strorum vigilia referuntur , vt & nouellas Christi
 plantas salutaris doctrinæ imbribus irrigent, & eo-
 rum tenebras , qui verum Deum adhuc ignorant ,
 Euangelij luce discutiant . Ad sacrum fontem nume-
 rata sunt hoc anno , si Iaponiorum baptismos exi-
 mas, hominum fere tria millia , & quingenti . E sex
 nauibus, quæ Olyssipone soluerunt, vbi decem vehe-
 bantur è nostris , portum Goensem diuino beneficio
 duæ, Cochinentem tres incolumes tenuerunt : sexta
 Malacam nauigans appulit Moxambiqui: creditur-
 que ipsa quoque in optatum Malacæ portum inue-
 cta . Hæc de vniuersa Prouincia. quæ fratribus est
 aucta tribus atq; triginta : quatuor autem obitu di-
 minuta. Nunc singillatim de præcipuis sedibus colle-
 gijsq; dicamus.

PROFESSORVM AC NOVITIO- rum Goanæ domus.

Quod diu iam optabatur in hac Prouincia , vt
 in ipsis Collegij sedibus, R. Patre Generali
 approbante Professorum Domus statueretur, hoc an-
 no demum perfectum est. Nam cum intra amplissi-
 mos Collegij fines, & maiestate operis & populi fre-
 quentia vnum omnium celeberrimum templum sit,
 visum est, ne cum offensione aliqua cinium, qui pro-
 xime sibi ædes extruxerāt, deferri videretur, Profes-
 sorum

forum Domum intra hæc ipsa spatia cancellosq. concludere: ita tamen ut non modo sit ab ipso Collegio ac discipulorum habitatione, verum etiam a Nouitiorum Domo seiuncta. Acta res est duodecimo Kal. Octob. quem diem frequens populi conuentus in templo nostro, omnesq. Magistratum ordines celebrarunt. Habita est ab Archiepiscopo Goano de hac ædium partitione, deq. Societatis instituto ac graduū varietate præclara concio: multitudini autem, cui res nostræ non satis cognita perspectæq. sunt, opportuna. Ut autem ad expiationem peccatorum homines facilius allicerentur, reliquit in mandatis Pater Provincialis, ut perpetuo Sacerdotes aliqui pœnitentium causa versentur in templo: ac quamdiu nullus apparet, in sua quisque sede aut fundendis Deo precibus, aut lectitandis de pietate libellis sese distineat. Quā rem ciuitas ut valde suspexit, ita minime dubitat, quin vberes paritura sit fructus. Degunt autem in hac Domo Patres fratresq. circiter quadraginta, quorum vnus & viginti sunt Sacerdotes, atq; ijs omnibus, quod ad victum cultumq. pertinet, ciuiū benignitas satis large suppeditat. Vix erant de nouis ædibus agitata consilia, cum lychnum pensilem ex argento, qui ad Dei Matris aram iugiter ardeat, Matrona donauit. steterat ei aureis amplius quingentis, oleiq. ad vsus luminum, quod satis esset, adiunxit. In Nouitiorum domo, tertius tirocinij institutus est annus ex ijs, qui post diuturnam litterarum occupationem, ad Nouitiorum disciplinam sese iterum cudant: eoq. euocati sunt aliquot litterarijs iam

iam functi curis. Numerat Domus hæc Nouitios omnino sex & quadraginta, quorum virtutis pietatisque Studium vel id vnum satis declarat, quod cum huc è Lusitania naues agris refertæ corporibus appulissent; nostri suo præeunte Magistro prodierunt in portum, ægrosque fere trecentos, in Nosocomium suis exceptos vlnis humerisque portarunt: ibi eos aquis primo tepentibus odorumque suauitate respersis, Studiosè fouerunt, deinde ad dies aliquot opportunis obsequijs officijsque iuuerunt. Qua re permoti complures ad Societatem animum adiecerunt, ex ijsque partim admissi, partim in aliud tempus reseruati: quorum aliqui in eo vitæ genere deligendo, præsens sensere cæleste numen. Miles cum diu vocanti Deo pertinaci mente resisteret, ob eamque causam magnis conscientie stimulis agigaretur, stratus ante venerandam Dei Matris imaginem, externa quadam circumfusus luce, quam simul aspexere complures, usque eo animatus est ad parendum, ut statim abiectio peccatorum onere per confessionem, illustriorem diuinæ voluntatis significationem non expectarit: testis insuper factus, quâvis è tenebris sese expediat, quisquis ad candidissimam Deiparæ lucem propius accesserit. Alius item miles cum Societatis studio flagraret, nec tamen per ducem suum liceret esse compotem voti, de naui furtiue natationi se dedit, ad vnumque peruenit e nostris, quo duce e turbulentis huius vitæ fluctibus, in tutissimum Religionis portum se recepit.

COLLEGIVM GOANVM.

A Luit Goanum Collegium toto ferme anno fratres centum ac viginti: at post separationem illam Professorum à reliquis sexaginta. R. I. Ian. qui dies Augustissimo IESV nomini sacer est, Archiepiscopus e familia B. Dominici, ut quo loco apud se sit Societas, declararet; primam concionem suam, posthabito suæ familiae templo quamvis amplo, quamvis egregio, in æde nostra habere voluit: eaq. pro concione de nostrarum in curandis animis sedulitate dixit, ut onus potius quoddam nobis putemus impositum, quemadmodum tãti Præsulis estimationi respondeamus: quam ut earum laudum partem in nobis aliquam agnoscamus. Et quoniam cibum etiam capere nobiscum voluit, non defuit inter epulas linguarum splendor, si non is, quem in Romano Collegio saepe vidimus, certe is, qui ad eum proxime accederet. E sedecim linguis omnis erat conflata varietas. Nam Canarina, Tamulana, Maleama, Malaia, Persica, & id genus aliæ nobis fuere pro ijs, quas Romano Collegio varia & multiplex Europa suppeditat. Probata res est vehementer optimo Antistiti: placuitque secundum epulas vniuersam lustrare domum, sacellumque illud, ubi castissimum Xaverij corpus vna cum alijs multis Beatorum ossibus ac cineribus asseruatur. nec vero prius à nobis abiit, quam diem totum nobiscum obduxit. Baptismata summa cum cere-

monia

monia apparatuq. magnifico celebrata sunt bis: semel hominum nongentorum, in quibus Brachmanes multi dignitate ac nobilitate præstantes: iterum trecentorum amplius ac triginta: Archiepiscopo ac Prorege præsentibus, qui & eos de sacro fonte susceperunt. Præter hos quotidie aliqui, ut suadet necessitas, baptizantur. Ethnica mulier filium suum, quod in horam minus felicem incidisse partum augurabatur, stulte abiicit ex ædibus. Christiana mulier puerum inuentum ad nos attulit baptizandum: quem ut salutaris aqua tetigit, quasi tempestiua mors esset, & matura cælo pueri anima, protinus expirauit. Eadem sors obigit Ethnica femina, quæ annum iam quadragesimum Lusitano domino ancillata, dum cuiusdam celebritati baptismatis interest, mentem subito de Christiana religione suscepit: lustrataq. baptismo, postridie mortalem hanc vitam cum æterna illa commutauit. Catechumenis separatæ delatæ sunt ædes ab homine religioso, nullo precio, nulla mercede, & quod opportunissimum est, nostris tectis auxilijsq. propinqua. Hic quoque reconciliata sunt discordes hominum voluntates, deterrentiq. diuinitus, qui nostrorum monita precesq. contempserant. Sacerdos noster, cum propinquos hostili inter se animo confligentes placare non posset, diuina eis ira denunciata, discessit. tertio die ex ijs vnus infecto acerboq. casu, pertinaciæ suæ merito pœnas dedit. alter contumeliosa ab inimicis accepta plaga, naui etiam opulenta spoliatus à Turcis est. His comonefacti verberibus agnouerunt erratum, Sacer-

do-

dotemq. nostrum, qui sibi diuinas iras denunciauerat, vna conueniunt, animisq. concordibus sua demum omnia eius arbitrio ac disceptationi permittunt. Iam studia alienæ salutis honorisq. diuini, interdum etiã nonnulla vitæ comoda comitantur. Vir non minus nobilitate, quam diuitiarum copia florens, appropinquantem morte, quoniam multæ dubitationes agebant animum, Sacerdotem nostrum, qui sibi eos scrupulos eximeret, aduocauit. Docuit Pater sua cuiq. reddenda esse, si & viuere pacate vellet, & tuto mori. persuadere officium morituro non fuit difficile, hominemq. eo deduxit, ut pardaos mille triginta (is est aureus fere nummus) deponeret apud aliquem, vnde nomina omnia dissolueret, expiatisq. rite peccatis, multa legauit pios in vsus: nec sua nos voluit liberalitate carere, quibus aureos fere mille in Professorum Domum nondum erectam impendit. Discessurus Prorex in Lusitaniam, cum hoc Collegium perhumaniter inuississet, certiorq. factus esset de inopia ac tenuitate nostra, non modo præsentis nobis subuenit argento, sed etiam suo diplomate iussit mille & octingentos pardaos, quorum iam desperabatur recuperatio (ij enim debebantur à Rege) sine mora dissolui: & quoniam suis ipse oculis, quanta in egestate nostræ res essent, aspexerat, spopondit causam se nostram apud Hispaniarum Regem sedulo ac diligenter acturum. Hæc in vrbe. Ex vrbe vero in castellum quoddam Lusitanorum, cui Barcalor nomen est, exijt Archiepiscopi rogatu, cum ministro Sacerdos: nullus enim ibi Sacerdos, nullus qui vel sa-

cramentis homines expiaret, vel moribundis adesset. ergo à nostris nullum officij genus, siue quod p̃i religiosisq. viri, siue quod boni Sacerdotis esset pratermissum est. Vnum missum non faciam, tantam in eis hominibus repertam esse fiduciam atque pietatem, vt quidam piacularibus donati granis, hostili postea petiti ferro, integri inuolatiq. reperti sint. vulnerare siquidem vestem ferrum potuit, carnes omnino non potuit.

COLLEGIVM SALSETANVM.

A Best Salsetanum Collegium à Goano nouem circiter passuum millia, vndecim in eo fratres adiungendis ad Christum Ethnicis instituendisque neophytis occupantur. Ii sedibus distincti quinque alias quoque colunt Ecclesias: numerantur enim vā r̃is locis Christianorum fere quindecim millia, quotidieq. nouæ fiunt accessiones, vt iam oculis penè cernatur, quantum apud Deū ponderis habeat, profusus ille nostrorum sanguis, quorum honesti gloriosiq. triumpho proximis commendati sunt litteris. Ab eorum quippe cæde, accesserunt ad Christum mille insuper & quingenti, vt iam prope confecta cuiusdam ex ijs vaticinatio videatur: qui tum demū propagandam Christi sobolem vaticinatus est, cū quasi fundamenta primæ religionis, sui sanguinis effusione iecissent, Prorex, vt est Societatis amantissimus, sed multo magis æquitatis & iuris, occisorum vltionem non diu distulit. exædificauit sibi inter barbaros

baros propugnaculum, idque praesidijs copiisque referfit. Tum, eorum regione ferro flammisque vastata, tutum peregrinantibus iter praeiuit. Dux vero Lusitanus parricidarum insolentiam ita repressit, ut praecipuis factionis ducibus interfectis, reliquos coegerit pacem suppliciter implorare. quam tamen impetrare non potuerunt. Nostreis vero haec una satis est ultio, ut quamplurimos ad aeternam salutem alliciant: & a quibus morte affecti sunt sui fratres, eis ad immortalitatem iter ostendant. Aegrotabat non sine magno discrimine neophytus quidam, ad quem ubi Sacerdos noster accessit, deq. expiando animo verba fecit, hominem sui iuris sententiaeque valde pertinacem offendit: negabat infelix & cecitate mentis ictus, ullis se astringi peccatis: & tamen habebatur vulgo veneficus daemoniq; deuotus: nec raro cum eo consilia sermonesq. miscuerat. Sed quoniam ut quisque pessimus est, ita minime seipsum dispicit, sibi innocens videbatur, sudandumq. vehementer fuit, ut de sententia decederet. Biduo post rediit Pater ad agrum, non abijciendum ratus, a quo erat ante repulsus, vicitq. constans charitas spiritus pertinaces. hominem è superiore cohortatione reperit immutatum, confitentemq. peccata non minore sua cum voluptate, quam cum dolore poenitentis excepit. Ea enim vis fuit contritionis, ut idolum proferri iusserit, pristinosq. sit conatus honores praesentibus ignominijs sputorumq. ludibrijs obliterare: postea petita tum a Deo demisse, tum a conscijs tanti facinoris venia, biduo post decessit è vita. Habet interdum

dum non mediocrem vim ad euellendas idolorum superstitutiones excitandamq. Christi fidem morborum repentina curatio. In oppido quodam, quoniam communis quidam morbus multa subito prostravit armenta, Christianus cui multum pecoris erat, templū ingressus, oleū hausit e lychno, qui ante aras pendet, ut medicinam pecori faceret. Ea vis fuit hominis in Deum fiducia, ut de suis gregibus nihil amiserit. quæ res peruulgata quantum roborauit Christianos, tantum Ethnicos infirmauit. Senex è nobili Brachmanorum familia Idolis ad amētiā addictus, et crebris, eorum causa se macerabat inedijs, et multa secum quocunque pergeret, simulacra gestabat. placuit diuinæ bonitati ad Christi cultum studium senile conuertere, susceptioq. baptismo, vna cum animi morbis triplicem agrotationem corporis depulit. Quod ille tantum et tam singulare Dei munus, et agnoscit ut debet et prædicat: certus nihil esse Christiana religione præstantius, qua corporum æque ac animorum vitia curantur.

COLLEGIVM BAZAINENSE.

SEx et viginti de nostris toto suo ambitu completur Bazainense Collegium. In collegio enim ipso quatuordecim, reliqui in sex diuersis sedibus commorantur, quanto cum regionis bono, tum frequens Sacramentorum consuetudo declarat, tum Mahometanorum multa conuersio. Ex his complures in publicis asseruati custodijs, per nostros, quo se libentius

iis ad Christianos adiungerent, exempti sunt. Mahometanus nobilis ac locuples, baptismum una cum filia incredibili quadam voluptate suscepit. munierat sibi ad eum viam pristinis benefactis. erat illi solenne Christianorum templa lustrare, præcipueq. Archangelo Michaeli dicatam ædem, ipsq. de suis opibus impertire. atque hæc ipse quoque suæ salutis agnoscit initia. Sane quotidianus confirmat usus & magistra ratio nos docet, auxilia ei non negari diuina, qui naturam ducem sequutus integrum se à vitijs castumq. conseruat. Ecce tibi alius inter Christianos Mahometanus proximo non dissimilis, qui licet patriam occuleret vanitatem, à Christianorum tamē non abhorrebat officijs. obibat illorū templa frequenter, publicisq. precibus & sacrificijs intererat, libros etiam Christianos & monumenta terebat, nec aliquid d. suis moribus alienum putabat, quod in Christianis moribus inspexisset. Bonorum consuetudo & illa ipsa simulata religio hominem incunde fefellit. affici ad ea cœpit, quæ duntaxat specie consuevit obire, & amplecti penitus animo, quod externis modo amplectebatur officijs: tanta vis est Christianæ pietatis, tanta in vtrunque partem consuetudinis efficacia. nostri tamen partim vt eius studium exacuerēt, partim vt ex eo constantiæ specimen caperent, in aliud tempus differendum baptismum existimarunt, dum ad eum fieret quotidie paratior. Iam Christianorum in nos beneuolentia donis ac muneribus declaratur. Matrona nobilis sacrum vnius virginis caput, è nobili illo B. Vrsule co-

mitatu auro argentoq. inclusit, pectusq. simili opere ornatuq. contextit. res est visenda plausuq. digna. Alij ad vestiendas aras vestem auro argentoq. intextā dono dederūt, aliaq. ab alijs non minore quotidie liberalitatis, quā religionis studio deferuntur.

In Residentia B. THOMÆ, quæ passuum abest à Collegio duo circiter millia, id contigit ad memoriam insigne. vrgebatur æger insanabili morbo ac plane desperato, cum Sacerdos ab eo noster euocatus Sacrosanctum Evangelium pie religioseq. recitavit. eaque lectione, ægrum repente leuauit, ita ut paulo post ingenti Ethnicorum admiratione, medico præsertim stupente, de cubili surrexerit.

In TANNENSI sede, centum ac triginta amplius baptizati sunt. Mahometanus quidam cum ab insita feritate suam ipse coniugem ferentem ventrē vna cum filia iugulasset, alijsq. tribus liberis adhuc tenellis insanabiles plagas imposuisset: Pater, ne tot fieret animarum iactura, præpropere cursu paruulorum mortes anteuertit. vix ex ijs vnum baptismo resperfit, cum ille extremum spiritum edidit. Ne alter quidem diu fuit à baptismo superstes. Tertia vero femina ætate iam grandiore baptismum ipsa poposcit, eademq. nunc incolumis, Deo Patribusq. gratias agit ingentes.

BANDORA, oppidum è tribus quatuorue capitū fere millibus, habet è nostris non amplius tres, sed qui tamen multorum exæquant industriam. Nulla sunt iam Ethnicorum in hac ora vestigia, præter vicum quēdam Mahometanorum, omnes se iam

Chri-

Christo dedere, baptizatiq. sunt hoc anno trecenti, inter quos, quoniam multi auctoritate præstant, Ma hometanorum animi conciderunt, dum se deserere quotidie vident, Christianos vero latissime propagari: curaturq. perstudiose ut nostræ Religionis rudimentis puerorum grex imbuatur, eiusq. rei causa conueniunt pueri ferme quadringenti: spectaculum non minus viile, quam iucundum.

In DAMANENSI sede, quæ sex constat à nostris, eodē incrementō Christiana res crescit, renatiq. sunt ex aqua & sancto spiritu sexaginta. Nec desideratur Regij benignitas Ducis, qui Christiana promoueat, is Odeum in templo nostro tam eximio opere artificioq. faciendum curauit, ut incolæ tale aliquid in India conspici negent.

COCHINENSE COLLEGIVM.

Cochinense Collegium duas alias habet adiunctas sedes, habitantq. in his omnibus quinque circiter & viginti. Obijt ex ijs Sacerdos vnus Ludovicus Goueanus, incertum valetudine an veneno. sane ingens suspicio fuit, ab Ethnicis veneno sublatū, nullum illi acriorem nouerant aduersarium, quique plures è suis ad Christum abduceret. Propius etiā factum est nihil, quam ut cruētis barbarorū gladijs occumberet alius. Magna enim extiterat inter Christianos aliquos, Ethnicosq. contentio: Christiani dignitates quasdam ab antiquis regibus acceptas, sibiq. vnij regia potestate delatas vsurpari etiam ab

Ethnicis mercatoribus non ferebant, idq. armorum
 initium fuit. rem subodoratus sacerdos noster, ab
 Ethnorum Rege de pacis compositione contendit.
 iussit Rex reuerti posterius, interimq. redeunti col-
 locantur insidie, nondum ad regem die insequenti
 peruenerat, cum armata in eum manus inuadit, mul-
 tiq. cōfossus vulneribus pro occiso relinquit. Pater
 ut circumuētum se uidit ab hoste, ratus eo sibi leitho
 sine dubitatione pereundum, nixus genibus suum ip-
 se spiritum suo credidit creatori: cum vero aliquan-
 diu in suo sanguine iacuisset exanimatus ac vulneri-
 bus prope confectus, postea paululum respirauit,
 collectoq. animo, quantum conniti fracto ac debili-
 tato corpore potuit, ægre ad ædes se Reginae tradu-
 xit. ab ea benigne susceptus (quippe viro dissimili)
 obligatisq. vicunque vulneribus ad Collegium va-
 lētium humeris deportatur. Accersuntur continuo
 medici chirurgiq., qui ut fractum contritumq. cor-
 pus aspiciunt, desperant penitus curationem. erat ca-
 put in tres quatuorue partes fæde dissectum, dextri
 brachij disiuncta, & comminuta ossa miserandum in
 modum, terga vulnerata tam alte, ut posterioris dor-
 si plagæ anteriori pectori responderent, mortuo de-
 nique quam uiuo propior. Tamen præter omnium
 spem expectationemq., non sine recondito occul-
 toq. Dei consilio, præsentissimum discrimen effugit.
 manent etiam num plagarū vestigia, manus utriusq.
 debilitas, ut quoties eas ad mouere velit ad opus, to-
 ties ei diuini beneficij veniat in mentem. Sunt enim
 hæc dona Dei, quibus in hac vita plerunque suorum
 bene-

Ecclesia nostra ritus & ceremonias contemplan-
tur, facile sibi persuadent, quanto in errore versen-
tur ipsi, qui non rerum omnium opifici, ut nos, sed lignis
ac lapidibus diuinos habeant honores. unum eos ad
suscipienda fide retardat, consequens bonorum, &
fortunarum amissio, quæ Ethnicæ Regis decreto ad
baptismo sunt relinquendæ. hac fortunarum despe-
ratione sublata Christianorum numerus increbre-
sceret. non desunt tamen, qui humana omnia poste-
riora sua salute ducant, Christumq. multis partibus
sequi malint, quam breui amittenda vitæ bona. Dux
inter suos nobilissimus, qui trecentos milites sui cor-
poris custodes quotidianis alebat impensis, ubi ad
Christianam Religionem semel appulit mentem, nul-
lis postea Regis neque pollicitationibus neque pre-
cibus ad suscepta sententia dimoueri potuit. huic Rex
libera concessit omnia: nec commissurum se dixit,
ut, quod ad fortunas pertinet, fraudi ei esset Chri-
stiana religio. postea ad Patrem Regio comitatu di-
misit, ad quo post Catechesim, baptismum laetus
accepit.

C O V L A N A D O M V S,

& ora Trauancoris.

IN Coulana Domo totaq. ora Trauancoris, ubi
nouem è nostris duabus disiuncti sedibus commo-
rantur, magna patientiæ facultas & materia prabe-
tur. mira enim hic rerum omnium penuria, mira
caritas, intolerabilis legum iniquitas Ethnicorum

Re-

Regum, immitia barbarorum ingenia, qui minima videantur occasione contenti, ut Christianos lacefsant iniurijs. Miserat Rex Trauancoris maleuolorum sermonibus pene compulsus, armatorum militum manum in oppidum Coleche, qui P. Nicolaum Spinulam comprehēderent vinculisq. confringerēt. ac nisi mendacium esset mature comperitum, male cum Patre ageretur, si tamen malum est pro Christo quæuis indigna perpeti, ac non potius summa felicitas. Alius inter suos dynasta, amplitudine & dignitate nostris Ducibus prope par, cum copijs & elephantis Patris Domum obsidione cinxerat, atroces intentās minas, operasq. tantum non admouens ad disturbandas ædes, sed plus valuit lenitas & māsfuetudo Patris, quam barbari Ducis immanitas: qua victus mutauit subito mentem, & ex inimico factus est amicissimus.

In oppido Muta, rixa inter Christianos Ethnicosq. coorta: Ethnici templorum valuas obfirmatas pessulis euerterunt, aliaq. multa in Christianos ignominie plena ac dedecoris admiserunt. His illi commoti rebus ab Ethnicis se seiungunt, Mutamq; & Careopatam deserunt, testati se non prius ad ea colenda oppida redituros, quam templū ereptiq. Deo honores restituantur: his enim minis valde permouentur Ethnici Reges. itaque coactus est Rex Trauancoris, ne ab incolis defereretur, materiem nouis extruendis templis, certamq. nummorum summam suppeditare. Alio in oppido Mauri Mahometo fa-num exedificauerant, quæ res quoniam ingens erat

Christianis offensio, dederunt operam nostri, ut san-
 num illud euerterent. Mauri resistere acriter, Re-
 gem sibi conciliare donis, custodias ac vigilias, ne sa-
 num illud violaretur, intendere, arcere ab eius adi-
 tu & propulsare Christianos. Christiani nostrorum
 nutu oppidum continuo deserunt, nec ante reuertun-
 tur, quam Regio diplomate sit potestas templi im-
 purissimi complanandi. eam rem adeo grauius Ma-
 hometani tulerunt, ut Patri eius rei auctori perni-
 ciem atque interitum molirentur. Sed tamen, Deo
 suum famulum protegente, conatus omnes ad nihilū
 reciderunt. Hæc & alia pericula nostrorum capi-
 tibus quotidie imminet: quæ tamen illi præ animarū
 salute contemnunt, certi ibi ampliora esse præmia,
 ubi sunt discrimina duriora. Posita sunt hoc anno
 CHRISTO IESV, & quidem inuitis hostibus, tem-
 pla duo: & quanquam, ut dixi, molestiæ non desunt
 hostiles, tamen eodem Christo duce obuia quæque
 vincuntur, & nouo semper Christianorum sætu mi-
 tigantur aduersa. Multi enim & ex Ethnicis & ex
 Mahometanis traducuntur ad Christum, multi item
 instituuntur ad fidem, defiguntur passim venerandæ
 Crucis insignia, eaque non a Christianis modo, sed
 ab ipsis quoque barbaris honorantur. In Coulano
 superiore cum sine Regia potestate excitata crux
 esset, id Ethnicis periniquo ferentes animo ad eam
 euerendam cum Elephantibus aduolarunt. ut in
 Crucis venere conspectum, ingenti pauore præterri-
 ti pedem illico referunt, tum demum sentientes, Cru-
 cis quanta vis esset, quæ æreas inferorū portas con-
 fregit,

per~

fregit, & omnes Diaboli copias tyrannidemq. deleuit. Coulanensium autem Christianorū singularis in nos est pietas. ij templum nostrum amplificare cum vellent, & angustias laxare sacelli, collatis in commune pecunijs, ingentes acervos lapidum congesse-
runt. Auriq. satis multum ad lychnum pensilem ex argento dederunt.

MALACENSE COLLEGIVM ET ora Piscariæ ceteræq. sedes.

Malacensi Collegio, ubi octo de Societate ver-
santur, consimilis tributus est lychnus, sed
dissimili pondere. quippe aureorum circiter octin-
gentorum.

Ex ora Piscariæ & insula Manar, quas de no-
stris excolunt quindecim, septem disiuncti locis, non
exiguæ animarū capiuntur vilitates. Comorinenses
certe, ut ceteros taceam, studio pietatis palmam se-
runt, id quod aiunt solitum nostrum perbibere Xa-
uerium, non enim ipsi modo admirabiles habent in
Religione processus, sed calcaria ceteris admovent,
ut in eodem curriculo pari cum laude versentur.
itaque sunt quasi quidam administri adiutoresque
Societatis. Sacrarum confessionum studia tanta sunt
in his locis, ut non multum otij ad res ceteras no-
stris Sacerdotibus relinquatur. totos sæpe dies ex-
piandis animis occupantur, totoq. fere anno eius rei
caussa

cauſſa diuerſa loca percurrunt: nec tamen omnium ſtudijs obſequi poſſunt: ita impar eſt operarũ numero numero pœnitentiũ. Et quoniã multi, quæ ad inſtituendam confeſſionem pertinent ægre percipiunt, ideo horum confeſſionibus commodiora tempora reſeruantur. ex hoc genere fere ſunt ſemina iam ætate prouecta, quæ tamen ipſæ moræ impatientes gemitibus lacrymiſq. ſe dedunt, ſi eorum confeſſio procraftinetur. Conuenerunt aliquando in ædem noſtram contentis Deũ vocibus obteſtantes, rem indignam videri, quod, cum ipſæ pro viribus laborarent, tanto tamen ſalutis præſidio fraudarentur. Earum vna cum ſacris adeſſet, quo tempore Sacerdos ſalutarem hoſtiam, elatam inter manus, populo adorandam oſtendit, magnis à Deo clamoribus implorabat vim opemq. rite pœnitendi. quod cum ſæpius non vno tantum die, ſed pluribus iteraret, ad extremum ſublatis in cœlum manibus, oculiſq. defixis in aram, lacrymarum remiſit habenas, totaq. in ſuſpiria gemituſq. ſoluta, Patrẽ denique flexit, vt ſibi copiam eius faceret ſacramenti. quo impetrato & ipſa & Pater inuſitatã quandã lætitiæ voluptatem perceperunt. Sanctiſſimũ Chriſti corpus Chriſtiani illi tanto animi candore ſuſcipiunt, vt Chriſtiani Europæis ſuum teporẽ exprobrent. Præſcripſerat vni Pater, vt ad Euchariftiam in diem poſterum ſe pararet. is mane prima luce templum ingreditur, obuiamq. fit Patri, quærentiſq. Patri quo pergeret, tremebundus & illacrymans, Ad Chriſti, inquit, te imperante, conuiuium.

In AETHIOPIA duo tantum è Societate su-
persunt, ūq. magnis in laboribus annonæq. difficul-
tatibus, & rerum omnium inopia vitam tolerant.
quæ tamen incommoda leuat interdum animarum
nonnulla conuersio. Verum Lusitani Ducis interi-
tus, qui nostris erat ad tuendam Christi fidem singu-
lare præsidium, omnium animos debilitauit ac fre-
git: tametsi ea, quæ in Deo debet esse fiducia,

nihil est imminuta. cum id diuinæ cle-
mentiae & sapiëntiae sit proprium,

ut cum res in extremum

sunt adductæ di-
scrimen, tum

ijs

peropportune sub-
ueniat.

..

P R O V I N C I A

B R A S I L I A .



Verunt hoc anno de nostris in Brasilia Prouincia centum & quadraginta duo. In Collegio Bayacensi duo & sexaginta. In Ilhearum sede non plus quinque; In Portu securo quatuor. In Collegio Fluminis Ianuarij quinque circiter & viginti. In Præfectura Spiritus sancti octo. In S. Vincentij residentia septem. Piratiningæ quatuor. In Collegio Pernambucensi viginti duo. Vita cessere duo, sex Societate recepti.

COLLEGIVM BAYACENSE.

NE Brasiliæ quidem sua fecunditas defuit. Quinque millia amplius & septingentos hic annus habuit, qui in Bayacensi Collegio diuina mysteria frequentarunt. Concionum eadem est, quæ solet utilitas. sed non necesse habemus in quotidianis & visitatis hære. Certant fructus domestici cum externis, eiusq. rei gratia P. Visitator instituit, ut toto ferme anni curriculo Sacerdotes duo vicina prædia pagosq. concurrerent, ut animorum egestati, quacunque possint ope, succurrant. Quibus in itineribus

ribus quam multos quotidie exorbeant terra mariq.
labores, sibi ipsi sunt testes; sed tamen eos tam ala-
criter subeunt, ut prosecutiones illas existiment in-
suaves, quæ non his asperitatibus condiantur. Cogun-
tur vnum in locum Aethiopes simul & Indi, ijque
vel Christianis legibus erudiuntur, vel Baptismate
aut Confessionibus expiantur. baptizati sunt autem
in his prosecutionibus mille trecenti & sexaginta: au-
diti quinque millia amplius & quadringenti.

Tria Indorum oppida, quæ nostrorum fidei cu-
raeq. credita sunt, nihil habent hoc anno dissimile
proximorum. multa in his quoque Confessio, multa
communicatio corporis Christi: baptizatiq. sunt cen-
tum & triginta quatuor. Inda quædam adhuc Ethni-
ca, cum ex grauissimo morbo properaret ad mor-
tem, baptismum summa contentione poposcit. ut im-
petrauit, momento reddita est sanitati: tantas habet
vires seu accesa in Deum fiducia, seu salutaris aqua
baptismi. Sed vim suam Deus in sacramentis non se-
mel ostendit. Indus brachio altero vulneratus præ-
sentissimum discrimen adibat. tam alte enim inse-
derat telum, ut cæsa vena sanguinem sine modo pro-
funderet. nihil erat quod eum supprimeret, proflu-
uio vincebantur omnia, crebra defectio animi, cre-
bra deliquia sequebantur: cumq. humanæ defecis-
sent artes post breuem peccatorum expiationem,
sumpto augustissimo Christi corpore, sanguis subito
conquieuit. Ne illud quidem leue indicium est diui-
næ fiduciæ. nuper cum pluuias aquas negaret cælum,
magnoq. in metu esset difficultas annonæ, decreta
est

est publice supplicatio ad euocanda cœlestium subsidia, circumlatumq. per urbem vnus virginis Cranium ex Vrsulæ comitatu: tanta hominum pietate ac comploratione, vt eadem nocte obducto nubibus cœlo suæ liberalitatis fontes Dominus aperuerit, & quidem ea largitate ac copia, vt summa vilitas speraretur.

E Gymnasio sua quoque ad Ecclesiam vtilitas rediit. Adollescentes non pauci virtutis pulchritudine capiti contempta vitæ vanitate intra cœnobîa se receperunt. multa autem ad eorum pietatem incitandam excogitantur, institutaq. nuper sodalitas est in honorem vndecim millium, quas dixi, virginum, non ex auditoribus tantum nostris, sed & cæteris quoque ciuib. quos auditores ipsi suo excitant exemplo. nec ab re fuit huius sodalitatis in honorem earum virginum institutio. nam cum tria apud nos Crania ex eo choro virginum asseruentur, iure videntur præcipuum quendam honoris cultum & venerationem exigere. Sodalitatis initium spectacula decorarunt. Instructa est supplicationis pompa: in eaq. Nauis artificiosa prodibat ligneis acta rotis adeo latenter, vt humanus falleretur aspectus, Hac B. Vrsula cum comitatu reliquo vehebatur. cui de cœlo Angelus affuit manu præferens palmam, & ad martyrii gloriam virgineum agmen accendens. Tum virginibus oculis hibarissimis accepto nuncio coniunctis vocibus exclamarunt, se ad effundendum pro sponso sanguinem paratissimas. quibus sermonibus vltro citroq. habitus ad vltimam cœlestis nunciij vocem suum nauis

uis cursum prosequuta est, vexillis rubris elatis editisq. festiuo tormentorum strepitu lati triumphisignificationibus. His ac simulibus spectaculis editis exhibitus est vesperi dialogus peruenustus, qui sanctarum virginum cædem, sanguinem, funerisq. curâ, quæ ab ipsis Angelis iucunde canentibus est suscepta, usque adeo representabat, ut nec spectatores cohibere possent lacrymas nec actores. His inuitamentis vix dici potest, quanti fieri cœperint ad nos concursus, ac per eam occasionem, quam consentium numerus auctus sit.

COLLEGIVM FLVMINIS IAN- nuarij & reliqua.

IN Collegio Fluminis Ianuarij induerunt ex Eibnicis Christum centum & sexaginta. Sed quod genus Indorum hoc sit & quam vehementer ad pietatem incensum, cum multa documento esse possunt, tum illud, quod cum ex altero oppido migraretur (sunt autem in hoc Fluvio Indorum oppida duo) & locus quæreretur aptior, constituisentq. nostri, ut antequam migratio illa fieret, domos sibi Indi construerent, negarunt illi, se commissuros, ut prius sibi rectum, quam Deo templum erigerent: itaque precibus contenderunt, ut liceret sibi templi curam rebus ceteris anteferre, eaq. impetrata continuo ad inchoandum opus vniuersi se contulerunt. Dñ foditur fundamentum, dum paries ducitur, ecce tibi primarius senex, quem trimus sequebatur infans plenis gle-

glebarum manibus, quas ferebat in ædificium. Hic parens conuersus ad filium, Defer huc, inquit, nate & adiunge parieti: tibi enim sit hoc templum, quem Deus ad hæc tempora reseruauit, ne ferinos maiorū tuorum mores barbarosq. ritus aspiceres.

PIRATININGÆ baptismo lustrati sunt cōtum ac septuaginta quinque. Centum vero in Præfectura S. Vincentij: sæpeq. ex hoc oppido in peregrinos pagos excurritur, quorum fides nisi crebris nostrorum sermonibus foueatur, vix seipsa sustentet: tanta est paucitas operarum.

In PERNAMBVCENSI Collegio res accidit omni commiseratione digna, & quæ nostris fratribus tristitiæ plurimum attulit. Frater vnus à prandio cum valens atque integer esset, ad signum saluationis Angelicæ ante omnium oculos exanimis corruit, sublatusq. inter aliorum manus & collocatus in lecto, nullum amplius motum aut vitæ signum edidit; vt intelligamus tandem, quam incerta sit vita nostra, qui vel proposita ante oculos morte longiora nobis spatia tacitis cogitationibus pollicemur. sed quanquam, vt dixi, ipsum mortis genus valde percussit vniuersos, solatio tamen fuit acta cum virtute vita, erat enim virtutis exemplum, & propter suauitatem morum non minus externis, quam domesticis charus, Iubilum recens acceperat, ac demum ita animo videbatur affectus, vt gratulandum potius illi sit, quā eius causa dolendū, quē mors paratissimū sine lectuli tedio, sine morborū cruciamentis, sine angore illo, qui ex mortis expectatione suscipitur, ex
his

his ærumnis ac laboribus in illam quietem ac regionem Beatorum momento transtulerit.

Ad SACCARI torcularia ubi ingens est vis Aethiopum, de nostris frequenter mittuntur, speraturq. ex his profectionibus vberior semper utilitas. accessit subsidium cuiusdam adolescentis, sermonis bene periti, qui se nuper in nostrum numerum aggregavit, acri ingenio, & ad dicendum natus,

ut omnia de eo sperari iam liceat. Ex-

piati sunt in his peregrinationibus

centum & nonaginta ba-

ptismo : confessione

vero quinq. am-

plius mil-

lia.

P R O V I N C I A P O L O N I A E.



Vndecim numerantur in hac Prouincia Collegia. Residentiæ quinque. Socij amplius trecenti. In Collegio Bransbergenſi, quod Probationis Domum habet adiunctam ſex & quinquaginta. In Pulſtouienſi duodeciginta. In Vilnenſi quinque & quinquaginta. In Poſnanienſi vndeciginta. Iaſoſlauij ſeptem ac viginti. Claudiopoli triginta. In Polocenſi Collegio ſeptem. Sex in Lublinenſi. Vndecim Rigæ. In Caliſienſi nouem. In Nieſuiſienſi ſeptem. Cracouiæ in duabus ſedibus totidem. Albæ Iuliæ octo. In Torpatenſi Reſidentia decem. In Suecia vero & Varadinenſi in ſingulis bini. Qui vero huc atque illuc de more mittuntur fere decem. Duos ex vniuerſa Polonia mors abſtulit: reddidit Dominus ad triginta.

B R A N S B E R G E N S E, P V L T O.
uienſe, & Vilnenſe Collegia.

Bransbergenſi Collegio ſubiecta ſunt alia quatuor. Seminarium tum Summi Pontificis, tum Episcopii, Contubernium conuictorum, & Nouitiorum Domus. Tradita ſunt Societatis meditationes nonnul-

nonnullis externis, eiusq. rei causa Sacerdos quinquaginta millia passuum ad nos contendit. Exteris suis quoq. impartitus est labor. Nemburgum, oppidum non multis ante annis hæreticorum, paucos putabatur habere Catholicos, sed eo nostri cum venissent sexcētos amplius, quorū confessiones exciperēt, inuenerūt, Ecclesiæq. restituerūt duos circiter & triginta. Fert & suos fructus sōdalitas Dei Matris, cuius sōdalitatis fama permotus Sueciæ Regis filius pius ac Catholicus adolescens quamuis parente natus hæretico, litteras ad eam dedit, ut sibi in sōdaliū numero liceret esse; quod ut rarū admodū est; ita ad exēplū maxime profuit. Seminariū Pontificium alijs coemptis adibus vsq; eo laxatū est, ut centū circiter alūnos capiat. Auctū est etiā Collegiū peram.æno ac fertili prædio vna piorū liberalitate ac beneficiētia.

PVLTOVIAE hæretici Scismaticiq. duodecim Religionem Catholicam susceperunt. Quidam cum trigesimum iam annum confessionis sacramento careret, agrotauit ad mortem, iamq. omni vi sentiendū desitutus, terrores in extrema illa pugna experiebatur acerrimos. sed cum de eluendis rite maculis subiisset animum cogitatio, easq. apud Sacerdotem nostrum, qui moribundo aderat, eluisset, non ita multo post præter omnium spem expectationemq. leuatus est morbo. Sed Sacramentorum beneficio non semel tantum curata sunt corpora. quendam perditæ impuræq. vitæ hominem cum comitialis morbus vrgeret, non ante morbo, quam peccatorum leuatus est onere. Matrona nobilis dum primo vere

concretum frigore fluvii quadriga pertrāsit, fracta glacie in flumen ipsum delapsa est. sed cum ex eo rursus apparuisset Deiq. ope evasisset incolumis, affirmavit, ideo se vim fluminis effugisse, quod eo die sanctissimam apud nos sumpsisset Eucharistiam.

VILNÆ ad Societatem aggregati sunt octo: ad Ecclesiam autem, si eos, quorum religio lababat, excipias, quinque circiter & octoginta. Virgo nobilissima Ducis cuiusdam soror parentibus nata Ruthenis, educatq. in hæreticorum gremio, cum de religione Catholica à nostris esset admonita, initio diu multumq. restitit, postea oborta de cælo luce, manus dedit; cumque concioni de acerbissimis Christi cruciatibus interesset, animo sic exarsit, ut non modo crucis insignia pijs osculis venerari, verum etiam in omnium oculis confiteri peccata, & suam ipsa detestari hæresim non dubitavit. Nec vero apud Ruthenos prædarum minus est factum, ex ijs enim ad Catholicos partim Vilnæ, partim alibi cætum & duodecim discesserūt. Ex Lotavis quoq; apud quos nullius certæ religionis est cultus, Ecclesiam Catholicā agnovere nonnulli. Atque horum omnium ea est animi firmitas atque constantia, ut quidvis perpeti malint, quam ut à suscepta religione deficiant. Ruthena quædam, ubi Catholicorum institutum semel arripuit, ne verberum quidem asperitate, aut munerum amplitudine deijci de mente potuit. Alia itē, ne ad suos redire cogeretur, magna pecuniarum vi repudiata, quæ sibi ultro offerebatur à suis, vitam inopem cunctis commodis anteposuit. Data est ope-
ra ex-

ra expiandis multorum animis, auditiq. sunt octoginta amplius & quadringenti, qui confessionem à primis annis exorsi, expiauerunt peccata. Quidam verecundia impeditus diu occultauerat in confessione facinora; sed tantis cœpit conscientie stimulis agitari, sibiq. adeo displicere, vt mortem sibi meditaretur inferre. Censitochouiam subito cessit (locus is est Dei Matris prodigijs miraculisq. percelebris) ibi vim numenq. tantæ Virginis reformidans, in sylvarum latebras sese abdidit, & qui ferarum immanitatem induerat, inter ipsas feras trium circiter mensium interuallo delituit. postea cœnobio sese inclusit. sed cum animus, qui vbiq. semper est idem, ne tum quidem conquiesceret, consiliū cepit agendi cū Patribus, quibus omnis ætatis peccata confessus, tandem conscientie sedauit angores. Alius cui fidē male seruauerat coniux, cum id ei vicinus per dedecus exprobraret, amens ira vicinum ipsum grauer vulnerauit. vbi feruor iræ resedit, agnouit erratum, verensq. ne ei, quem percusserat, attulisset interitū, vt erat natura & disciplina vir bonus, tristiores ^{incoe} pit animo esse, eoq. est dolendo progressus, vt ^{qui} ab aliena vita non temperauit, ne suæ quidem ^{pe} pepercerit: ferro accepto conclaue solus ingreditur, ibiq. horrendum in modum sibi pectus aperit. exterriti rei nouitate domestici, continuo nostrum accersunt, qui hominem iam spirantem aggressi, suis sermonibus perfecerunt, vt antequam reliquum effunderet spiritum, spe concepta salutis, & a peccatis animum expiaret & veniam ab eo, quem læse-

rat, postularet. Habemus in his locis, id quod necesse est, acerrimos aduersarios, sed ex altera parte non minus strenuos patronos: in his Cardinales duos Radiuilum, & qui non ita multo ante obiit, Bolognettum: his Rex cum pileos atque insignia Cardinalatus imponeret, habita est ab vno de nostris concio de amplitudine totoq. munere Cardinalatus: ij deinde paucis post diebus ad nos venerunt, & pradium iniere nobiscum. A Rege autem, ne ab v'sitata sua liberalitate discedat, multa etiam in nos collata sunt commoda. proximeq. pretiosis peripetasmatis nos donauit, tum ad eadem sacram, tum ad Gymnasij aditus exornandos. Stanislaus Radiuilus Dux in Olica Cardinalis frater, relaxadis nostrorum animis locum non incommodum ciuitati, nostris autem peropportunum attribuit. Foras ad animarum lucra sunt profecti tam multi, vt si omnium plena utilitatis itinera numerentur, nullus dicendi sit modus. hoc vniuerse dici potest, permultos & ab hæresi, & a Schismate recessisse: multiis item impertita esse diuina mysteria: vitiosas consuetudines, quæ sensim insperant, aut repressas, aut omnino sublatas, rudes populos diuinis legibus institutos, ceteraq. id genus acta permulta. Nostras porro meditationes obiere complures, earumq. utilitas tanti est apud omnes, vt cum cænobium suum Franciscanæ familiæ Visitator inspiceret, in mandatis Moderatori reliquerit, suos vt cænobitas his curaret meditationibus excolendos, id quod in Collegio nostro sedulo ac diligenter est factum.

POSNANIENSE, IAROSLA-
uiense, & Polocense Collegia.

A Vctum est Posnaniense Collegium tum novis
ædificijs, tum prædio quodam, Archiepiscopi
Gnesnensis opibus comparato. E ciuibus non exigui
percepti sunt fructus. Ad Ecclesiam rediere novem
& nonaginta, & quidem è nobilitate complures.
adeoq. multi sua huc voluntate propendent, vt mi-
nus iam litum nobis sit cum hæreticis. idem pene è
finitimis locis consecutus est fructus.

IAROSLAVII editis spectaculis de Rege
Nabuchodonosor, aucta est mirum in modũ schola-
rum frequentia. quare vel de longinquis locis nobi-
lissimi ad nos mittuntur adolescentes. Par hominũ
concurfus ad templum, ac præter eos, quibus solem-
ne est diuina vsurpare mysteria, expiarunt antece-
dentis vitæ peccata fere quingenti. Hæretici autem
triginta, schismatici vero quindecim cum Catholicis
conspirarunt, duoq. adolescentes Iudæi in exteris
locis baptizati sunt.

POLOCENSE Collegium quotidie magis à Re-
ge prouehitur. nam & ei pagos aliquot, quos pleri-
que hæretici varijs nominibus occupabant, adiun-
xit; & templum varia supellectili auro argentoque
fulgente locupletauit. Nostri vero nulla vnquam
benemerendi de proximis occasio deest. Eorum con-
silio quidam Lutheranorum minister ad Catholicos
se recepit, redditiq. sunt Ecclesiæ circiter quindec-

cim, qui numerus, si & Ruthenorum naturam spectes, & quam sit adhuc in his locis Societatis ignobile nomen, exiguus profecto videri non debet. Ruthenorum liberi etsi eos habent parentes, qui à Latinis vehementer abhorrent, Ruthenicæ tamen litteras ita docentur, ut Latinorum & litteris assuescant & ritibus; nonnulliq. adeo sunt in religione constantes, ut à scholis nostris abducti, certis tamen temporibus sibi non desint, quominus ad usurpanda Sacramenta conueniant.

LVBLINENSE ET NESVISIENSE.

Pares propemodum è Lublinensi Collegio capiuntur vilitates. Nobilis in primis vir opibusq. refertus, cum quartum & vigesimum annum versaretur in hæresi, eam tandem abiicit, varijsque locis decem duodecimve ad sanam sunt reuocati doctrinam. Inter Anabaptistas & Ebionitas, ex alijsque sectis hæreticos, qui passim ad disputationem Catholicos prouocabant, mirum, Deo fauente, silentium: ita eorum audaciam nostrorum repressit oratio. Collegij res optimo & pientissimo Regi magnæ curæ sunt. Dum templum exstruitur certam pecuniâ ad quinquennium quotannis assignat. Matrona etiâ nobilis florenorum duo millia, hoc est ducatos mille quingentos dono dedit, aliq. alia, pro suis quisque opibus ac pietate.

NIESVISIENSIS Residentia hoc anno primû Collegij nomen accepit. Auctor operis, Nicolaus
Cbri-

Christophorus fuit, Dux in Olica, & Romani Princeps Imperij, eorum quorum paulo ante mentionem fecimus, frater natus maximus. Is suæ ditionis tuendæ studio, contra hæresum pestem, quæ finitimas regiones varia ac multiplex occupauit, Collegium aliquod magna contentione poposcit, & quanquā, (ab eo Hierosolymitana peregrinatione suscepta) in eius reditum reiecta res est: duo tamen quasi loco pignoris dati sunt, qui, dum eius morantur aduentum, viâ sibi ad euellendas hæreses patefaciant, quo faciliora postea ac solutiora sint omnia Collegio iam nato. Patrem autem Prouincialem admissi Collegij nuntium afferentem Dux ipse quam lætus exceperit, dici vix potest. In fundando firmandoq. Collegio tam liberaliter humaniterq. se gessit, vt quicquid de nostrorū sententia necessarium ad eam rem visum est, id ratum fixumq. voluerit. Ad Collegij fabricam præter amplam aream, præterq. ædificationem templi, quæ sibi ipse reseruauit, octo florenorum millia, id est ducatorum fere sex millia toto triennio persoluenda curauit. Iam vero primo huius Collegij ortu, ea est ad Catholicos hæreticorum facta conuersio, vt fructus operis iam nunc constet. Quinque autem & octoginta partim hæretici, partim schismatici Catholicorū numerum auxerunt. In his nobilis adolescens, quem parens præcipuo hæreticorum duci in disciplinam tradiderat, is quanti Catholicam religionem faceret, occulta primum Sacramentorum usurpatione, deinde etiam aperta (vt qui paternas minas pro nihilo iam ducebat) ostendit. Alter cum obsessus a ma
lo

lo dæmone teneretur, expertus Poporum seu Sacerdotum Ruthenorum perfugia, vana esse ac plane nulla, propterea quod Popi ipsi multo magis vim dæmonis formidabāt, ad nos confugit. nostri cum hominem docuissent ad abigendos malos dæmones nihil esse præsentius, quam cū pietate, sacra obire mysteria; statim, expiatis rite peccatis, Christi corpus accepit, atque ea ratione breui se sensit incolumem. Alius multos iam annos peccatorum expiatione neglecta, è graui morbo in quem cecidit, amisit aspectum. at, confessione communioneq. recepta, lux illico redijt. Varia autem nostrorum profectione, viginti amplius ex hæresum tenebris ad lucem veritatis euocati sunt, multiq. rite animi expiati, & ad bonestam laudabilemque vitam à turpi & flagitiosa conuersi.

COLLEGIVM RIGENSE ET Torpatensis Residencia.

EX itinere Liuonico, quod Cardinalis Radiuilus tum ad propagationem Catholicæ religionis, tum ad optimam rei politicæ administrationem suscepit, multa ad animos commoda redierunt. Adiunxit toto hoc itinere vir in primis pius Sacerdotē sibi de nostris, cuius opera, tum ad instituendos Catechismo rudes, tum ad Ecclesiæ Sacramenta præbenda, reliquaq. huiusmodi obeunda munera vteretur. Quibus rebus cum plurimū Cardinali ipsi existimationis apud omnes accessit, tum Societati non parū.

Apud

Apud schismaticos Moschos ea erat de virtute Cardinalis opinio, ut negarent suum Archiepiscopum dignum esse, qui vel tanti viri oscularetur ipsa pedum vestigia, tantus autem sese ubique comitatus adiungebat officij gratia, ut ab Estonibus tanquam alter Pontifex Max. haberetur. Ea res ad coercendam hæreticorum insolentiam plurimum valuit. Quodā in oppido cum multos ad se Estones concionator hæreticus allexisset, Cardinalis iussit omnes e templo, atque ex ipsa concione discedere, edixitq. hæreticorum Senatui, ne quid tale in posterum suis Ministris impune permetteret. A nostris præterea varia in oppida frequenter excurritur, & quidem magno cum quæstu compendioq. animarum; & quoniam eorum, qui linguas regionum teneant, laboratur inopia, Sacerdotes etiam adhibentur externi; unde fere idem atque e nostris utilitatis fructus accipitur. Eorum unus vno die centum ac sexaginta homines baptismo lustravit. alius ad Eucharistiæ mysteria tam multos quotidie cogit, ut iam inter Catholicos, non inter hæreticos versari videamur. His alijsq. præsidijs repressa est paulisper hæreticorum insolentia: contra vero auctus civium in nos amor atque observantia; ita ut qui contemnere præ se Catholicos videbantur, nunc vel quia studia in nos Senatus animadvertunt, vel quia ipsorum Ministri publicum disputationis certamen abnuunt, quodammodo vcreantur. Etenim Senatus in nos benevolentia nemini est obscura. is in eos, qui nobis negotium exhibent, animadvertit; is loca quædam in vrbe unde vestigal

annuum

annuū capi posset, attribuit, is & munerum dignitate Prouincialis nostri excepit aduentum, & cum instruxisset celeberrimum in Curia conuiuium, Prouincialem ipsum Collegiumq. totum per viros principes inuitauit.

Nec minus sedulo TORPATI, quā Rigæ in animarum caussa nostri versantur. Quoniā autē triplici hominum genere, vt alijs litteris demonstratum est, continetur hæc regio Estonibus, Germanis, Polonis, iccirco ne quod prætereatur expers vtilitatis, varijs sæpe linguis, ternæ, quaternæue conciones habentur. Iam finitima Linoniæ loca tam frequenter obita sunt, vt par prope fructus labores itinerum compensarit. Ac fere omnes, quoquot à nostris instituti sunt, in Catholica religione sic perstant, vt omni asseueratione confirment, animam se potius, quam veritatem semel agnitam relicturos. Tempia omnia, egregia illa quidem atque ampla, sed cæli iniurijs, vetustateq. pene collapsa nostrorum monitis instaurantur. Expiati sunt hoc anno baptismo domi forisq. nongenti, ac septuaginta: alijs autem, qui ab hæreticis nulla adhibita ceremonia accepere baptismum, ea sunt, quæ desiderabantur, adiuncta. Sacræ confessionis non modo nullus apud hos homines vsus erat, sed ne satis quidem explicata uox ipsa: nunc tam salutari consuetudine instituta, eius rei caussa uenerunt ad nos amplius Poloni & Estonες quadringenti. Hæretici Schismaticiq. etsi antea alieni erant à nobis, nunc tamen à nostris congressibus non abhorrent. sæpe nos euocant, sæpe conferunt de religio-

ligione sermones: nec defunt, qui nostrorum collo-
quijs ex longo quasi errore vitiorum atque hære-
sum ad directum salutis iter sanæq. doctrinæ se re-
uocent. Alij vt in suis templis vel conciones habeā-
tur, vel Catholico ritu sacrificetur, efflagitant; quo-
rum studijs ea conditione mos geritur, ne quis id
temporis ad sacras ædes ex ipsorum Ministris acce-
dat. In celebri pompa ac supplicatione corporis
Christi, nobilis Lutheranus venerabundus nudoq.
capite augustissimum Christi corpus comitatus gra-
ui suos oratione, vt Deum ibi præsentem agnosce-
rent, cohortatus est, qua cohortatione sic excitatus
est alius quidā, vt in confertissima multitudine cla-
more sublato, Deo immortalī gratias egerit, quod
sua in eo mysterio præsentia, mortale genus homi-
num dignaretur. Ea vox virum præterea nobilem
impulit, vt in suam ditionem sacerdotes Catholicos
euocaret. Sed in iuuandis curandisq. animis non mi-
nimam partem sibi vendicat corporum diuina cu-
ratio. Aegri tam multi è longinquis etiam remo-
tisq. locis deferebantur, vt si in potestate nostra eo-
rum salus, & valetudo fuisset. Constat asperisionem
aquæ lustralis, caelestesq. agnos è ceris consecratis,
non modo Catholicis, verum etiam hæreticis fuisse
præsidio. Sacerdos è nostris dum finitimis oppidis
lucra quæritat animarum, ecce tibi hæretici prima-
rii filia è regione longinqua, vt delirantem venesi-
ficijs & cantionibus fratrem menti pristina restitue-
ret. datum est ei tum ex ea, quam dixi, cera non ni-
hil, quod de cervice suspenderet; tum lustralis aqua
cum

cum sale, quibus epulas mensamq. perspergeret. fecit illa imperata fidēter, & mens illico fratri rediit. Puellam Torpatēsem varijs spectris ad insaniam redactam, ut ad mentem rationemq. reduceret, parens nihil intentatum reliquerat: at ubi præsidia humana fallebant, ad diuina confugit: venit ad nostros supplex medicinæ gratia, iussusq. eas, quas dixi, curationes admouere, filiam mentis compotem sanamq. reddidit. Eodem modo & a febrī mulier alia, & ab apoplexia deflitutus iam pene sensibus famulus, & alij ab alijs morbis ægrotationibusq. curati. Spectrū etiam defuncti viri, qui nocturnis horis in eo ipso loco, ubi vita excesserat, comparebat, exorcismorum vis precesq. fugarunt. Quibus rebus diuina ope perfectis, mirum est, quam apud hos homines Societatis opinio creuerit, id quod nostri in obeundis concursandisq. pagis experiuntur quotidie. Quocunq. enim peruenerint, tam gratis animis accipiuntur, nihil ut eis vspiciam desideretur ad victum. mittunt hospites ad suos quisque vicinos, ut eis significant regios Sacerdotes adesse (sic enim pro sua pietate nos vocāt) confestimq. familiæ conuolant vniuersæ, etiam ipsa de nocte, nec modicis itinerum intervalis, ut vel panibus rite benedicatur, vel baptismo lustrentur infantes. Alij autem ut suū in nos amorem studiumq. testentur, aurum, & quicquid necessarium est vitæ vspibus, large deferunt: quæ tamen cum recusantur a nostris, nullum faciunt admirādi finem, laudandiq. tā inusitatā in suis regionibus abstinentiā, suis quippe assueti ministris, quos paratiores ad accipiendum

inue-

inueniunt quam largiendum.

Dom̃i festo quoque die in plateis Christiana lex traditur: habetur per eam occasionem ad populum cohortatio. prodit Sacerdos noster in forum, ubi frequentissimos hominum cœtus animaduertit: tum clara voce precem orditur aliquam, vt rei nouitate plebs excita concurrat. ea ratione sæpe ducenti trecentiq. interdum etiam quingenti nudis capitibus, intentisq. ad precem palmis Sacerdotem præeuntē voce sequuntur. persolutis ea ratione precibus, succedit vel de matutina Euangelij lectione, vel alia pia de re perutilis disputatio. ea peracta ducitur auditorum agmen ad templum, atque ita cœtu vno dimisso, ad similes deinde cœtus, conuentusq. disceditur. Hisce rebus improba Lutheri soboles plane disrumpitur, & maledictis pro concione nos onerat: sed Ministrorum concionibus semper aliqui de nostris interfunt, id quod eos maxime punit, propterea quod non ignorant, illos eo consilio ac mēte summitti, vt sua mendacia & maledicta redarguant. Non deest Cardinalis optimi vigilantia, quo minus eorum petulantiam insolentiamq. coerceat. Concionatorem Estonicum, quod in Estonos simplices, qui nostrum templum adibant, petulantior esset, concione priuauit. hic de publicis vijs properantes ad templum Estonos infami baculo abigebat: at illi alijs ad nos viarum flexibus ac diuerticulis euadebant. Denique spes est magna, si his principijs reliqua consentiant, fore vt aliquando Regio hæc vniuersa ab errorum labe purgetur. alit hanc spem tum frequens

quens in templo nostro. concio, tum flagrantissimum
 Cardinalis studium, qui in affectas Christianæ Rei-
 pub. partes omni ope sanandas incumbit.

C R A C O V I E N S E E T C L A V -
 diopolitanum,

E St Cracovia princeps Poloniae vrbs & totius
 Regni sedes ac domicilium. In eam hoc anno
 nostrorum ac præcipue Posseuini opera (id quod ve-
 hementer expetebatur) admissa Societas est. quæ
 res eo accidit gravior, quo fuerat ante ad impetran-
 dum difficilior. Obstabat enim Academia, quæ ex
 futuro, ut suspicabatur, Gymnasio, ne quid de sua au-
 thoritate atque existimatione perderet, metue-
 bat: obstabat ciuitas, quæ in D. Barbaræ templi,
 quod nostris procurabatur, redditus ius habebat: ob-
 stabant Sacerdotes ipsi, qui sua in eo templo munera
 administrabant: Concionator quoq; Germanus ad-
 uersabatur, qui stipendium ibidem & cathedrâ ob-
 tinebat. Denique hæreticorum sex vniuersa, & ex
 Catholicis etiam primarij nobilesq. uiri. Quare
 Antonius re Deo precibus commendata primû ex
 Rege quærit, an si rem attentaret, saluo eam alio-
 rum iure, saluo quoq. Societatis instituto perducî
 placeret ad exitû. Rex cum fidem dedisset præstitis-
 setq., omnem ille rem mira felicitate transegit. Aca-
 demici autem ueriti, ne quid ea res Academiæ iura
 minueret, ad Apostolicum Legatum Bolognettum
 adcunt, is qua fuit semper in nostros beneuolentia,
 sua

sua oratione & diligentia perfecit, vt ad extremū manus darent. Nimirum elucet admirabilis in Societatem diuini numinis prouidentia, quam tum hac, quæ dixi, declarant, tum quod frementibus aduersarijs, repente eius Academiae Rector extitit vir probitate ac litteris præstans, qui rem secum ipse perpendens per schedam moneret Antoniū, sibi vt rationes suggereret, quibus eos, qui Societatem minus norāt, euinceret: cui per Epistolā satis cumulateq. factū est ab Antonio. Per idem tēpus Thomas Plaza B. Stephani Parochus, qui quadriēnium pene totum nostros apud se retinuerat, epistolam scripsit Antonio, qua suæ illi Paræciæ templum vna cum ædibus deferabat, quod diceret nescire se quemadmodum melius in posterum suis esset ouibus consulturus, quam si eas Societatis auxilijs præsidijq. committeret. Rex quoque quo facilius res perduceretur ad exitum, schedulis identidem monebat Antonium, quid eam vel proueheret vel moraretur. Itaq. superatis diuina ope difficultatibus, inita est à nostris possessio templi, quam sex è præcipuis Senatoribus vna cum Vicario Episcopi tradiderunt, coemptisq. paulo post ædibus, in horreum Domini lata iam tū messis inferebatur. His rebus gestis in Transyluaniam properabat Antonius ad negotia Pontificia, & vt Societatis fratres eadem opera saluaret. Vbi propius ad Transyluaniam accessit, ecce tibi obuī à Transyluanie Principe Senatores cum plurima nobilitate, ab his ille perhonorifice exceptus, octo circiter millia passuum ad Principem Albam Iuliam

deducitur. Hic cum ad Collegium eo die diuertisset, postridie ad conuiuium Principis inuitatur. Huius autem Principis ea est maiestas, ut ei præter Transylvania præfectos, quingenti perpetuo milites corporis custodes adsint. Hic igitur è suis ipse descendens ædibus venientem excepit Antonium, eumque vel reluctantem sistere conatus ad dextram (scilicet ob Pont. Max. nomen a quo mittebatur) in cubiculum suum adduxit. Egregium sane spectaculum, puerum videre decennem tanta maturitate & gravitate sese gerentem, cum vel Pontificiæ litteræ redderentur, vel summi Pont. nomine frequenti nobilitate loqueretur Antonius. Hic Antonius Greg. xij. erga eam Prouinciam ac nobilissimam Batoreorum familiam charitatem commemorat, hic p̃j Pontificis voluntatem exponit de vltima Christianarum Prouinciarum arce tuenda, hic eiusdem operam ad rem Christianam sartam rectam tuendam liberaliter offert. Hæretici, qui aderant siue Lutherani siue Calviniani, siue etiam Arriani, quorum pleriq. ministrorum maledictis sunt assueti, cum de Romano Pont. cernerent omnino diuersa atq. antea audierant, mutuo se ipsi respicere, & Antonium mox prosequendo vereri. Valuit ea res plurimum tum ad reprimendos eos, qui aduersus nostros licētius debacchari consueverant, tum ad commendationem Societatis nostræ, cuius sciebant opera effectū esse, ut bellum Moscho-uiticum ad optatum exitum perduceretur. Ad prandium ubi ventum est, Princeps ipse eo die, qui erat

erat illi natalis primam à Romano Pontifi. legationem suscepit, atq. in Antonij accumbentis aurem insufurrans, Quam doleo, inquit, istos quos hic vides accumbere, hæreticos esse : Senatores videlicet describebat. Cumque identidem in conuiuium fercula inferrentur, nonnullaque incocta butyro; ad Antonium conuersus Princeps, licetne, inquit, Pater his Quadragesimæ diebus ista comesse : Nisi Christus, inquit Antonius, vt nobis esset exemplo, simile ieiunium seruasset, eiusq. auctor & institutor fuisset, quidni liceret ? Nunc quando exemplar vitæ nostræ se præbuit, & hoc ipsum ieiunium Euangelio contestatum esse voluit, ipsiq. Apostoli & Ecclesia eius vniuersa integerrime semper coluit, quis dubitat, nisi valetudinis ratio secus exigat, Quadragesimam esse seruandam ? Est omnino, quod de tanto Principe Catholicæ gratulemur Ecclesiæ, erga quam sic est animatus, vt omnia nobis præclara polliceri de eo merito debeamus. Is cum apud Antonium parantem reditum, quasdam sanctorum reliquias & Crucem vidisset argenteam, equidem, inquit, Pater nihil mihi ipse cupio, sed quando nihil istorum nobis hæretici reliquerunt, crucem hanc quæso, non mihi sed Catholicorum Ecclesiæ concede. Antonius & hanc & alia pia munera per libenter concessit. atque ita Claudiopolim redijt. Hic data est opera vehementer, vt Arriana labe contaminata Ciuitas, nostrisque mirifice insensa, domicilium Seminario excitando tribueret. Conferunt in eam rem & Pontifex & Rex annuas vter-

que pensiones. Antonius itaque conducta domo,
sexcentisque aureis à Summo Pontifi. toti-
demq. à Rege relictis, & præfectum Se-
minarij constituit; & libros ad
pietatem suscitandam sa-
tis multos reli-
quit.

P R O V I N C I A A V S T R I A .



*A*ustriae Provinciae socij in quinque distributi Collegia fuerunt hoc anno quatuordecim & duceti. Viennæ septem & quadraginta. Pragæ quatuor & triginta. Totidem Brunnæ. Olomucij duodequingenta. Gracij vndequadraginta. In peregrinationibus obeūdisq. pagis duodecim serè versantur. Octo in nostrum ordinem ingressi sunt: sexdecim obierunt.

VIENNENSE COLLEGIVM.

*V*iennæ sæda pestilentia laboratum est. Ea fuit causa cur inferiores scholarum ordines, quibus tenera ætas plerunque dat operam, tantisper occluderentur, dum incolumitas vrbis rediret. Superiores vero nihil de docendi constantia ac consuetudine remiserunt. Nec tamen periculorum nostri fuerunt expertes. Nam cum quendam repentina lues de conuictoribus inuasisset, sensim manauit ad nostros; de quibus cum tres quatuorue magno cum periculo laborassent, vi morbi diuino munere superata, ad sua quisque officiorum munera reuenterunt. Itaque præter illum adolescentem, vnde mali fons exiit,

desideratus est nemo, id quod in miraculis numeramus. nam cum in ijs, quos infecerat pestilentia tum solandis tum expiandis nostri versarentur assidue, ab ea tamen intacti redierunt. Nec vero in tantis malis animarum causa deserta est. Hæresim centum amplius ac triginta nostrorum monitis abiecerunt. in his vir quidam pereruditus repentinò morbo percussus, vix ut biduum sibi polliceretur ad vitam, confitendis rite culpis eiurandaq. hæresi, quicquid erat morbi, facile propulsauit. Vir quidam non multis ille quidem litteris eruditus, sed ingenij plenus, & linguarum varietate locuples, à Catholicis ad Lutheranos, ab his ad Calvinistas, atque inde ad Anabaptistas inconstantissime se conuertit: Anabaptistæ autem, qui proxime vagum hominem dubiumq. receperant, ingenij celeritate perspecta ornamentisq. linguarum, magnam in spem venerant, breui se eum habituros esse suæ sectæ magistrum. itaque suis illi sacris initiant, eiq. uxorem de more tradunt. At ubi in disputando quæstiones eius solidiores, quam quibus respondere possent animaduertunt, nec ille tamē nisi explicatis rebus solutisq. quiesceret, hominem è Synagoga pulsum uxore priuant. Is cum ad suos redisset Viennamq. postea venisset, agnitus est à multis, & pro hæretico habitus. Placuit immensæ bonitatis Dei, ut simul ac agere nobiscum cepit, sensim nostrorum consuetudine delinitus, quāto in errore versaretur, agnosceret. itaq; patefactis confessione peccatis, non sine acri dolore gemituq. hæresum multitudinem eiurauit. nunc eam orsus est vitam, ut quo-

ties sibi antea acti temporis venit in mentem, lacrymas non cōtineat. Quidam etiam, qui syngrapha suo conscripta sanguine malo Dæmoni se deuouerat, vna confessione culparum à tam crudeli tyrannide se redemit. Alius quem conscientia scelerum stimula labant, spectrorumq. monstra terrebant, tandē ante actæ vitæ confessione & spectrorū fœditates abegit, & turbatum animum tranquillauit. Iam qui foras animarum caussa discesserant, ne ij quidem redierūt inanes. Finitimo in oppido restituerunt Ecclesiæ septem & viginti. In alio item oppido septuaginta, aliosq. in alijs, vbi confitentium ea vis fuit, vt bene apud eos collocata opera videatur.

Data est hoc anno Tragicomædia quædam B. Martyris Eustachij, quæ quoniam varios & ancipites vitæ casus tēporumq. vicissitudines continebat, nihilq. constans esse docebat in rebus, nisi quod esset cum immortalitate coniunctum: magno scilicet adiumento fuit honestissimæ celeberrimæq. coronæ. spectaculū honestarum lectissimi principes, præcipueq. Carolus Archidux, & ex omni nobilitate primarij.

PRAGENSE COLLEGIVM.

AB hæresi ad Catholicam religionem sex sunt hoc anno & quinquaginta conuersi. Illustris femina quanquam inter hæreticos educata, mortis tamen aduentante periculo, ardenti Sacramētorum studio Sacerdotem accersit, sed cum per parentes & amicos Sacerdotis copia non fieret, schedulam ad eā

ipse Sacerdos dedit, quam sibi recitari cum iussisset, breui conualuit. quare voto facto venit ad eadem nostram, ibi Catholicorum moribus instituta, animiq. maculis per confessionem abstersis, palam suos ipsa errores hæresesq. damnavit. Anglus etiam iam ætate prouectus, litteris nobilis doctrinaq. præstanti, è patrijs sedibus huc profectus, obtestari nos per Deum cepit, ut sibi liceret verum effici Christi membrum; itaque peccata rite confessus, & de more hæresim detestatus, inter Ecclesiæ membra connumeratus est. Alius ære alieno contracto diu in vlculis habebatur: is cum ad sui missionem nihil vnquam a suis exorare potuisset, à Catholicis autem potuisset, argumentatus ex eo est, quantum demum Catholici cæteris antecellerent, qui calamitosi subsidio venirent. ergo sine mora nostros accersit, eiq. se religioni, quam tantopere probasset, addicit. Sed præcipuo studio ijs est adhibita consolatio, quos infecuta calamitas est. Augustissimi Christi corporis ferijs dum de more ad supplicationem populus coit, acerbum excitatur incendium. eo incendio ædes prope quadraginta cum æde sacra funesto spectaculo conflagrârunt. Missus est ad eos solatiij causa Sacerdos, qui paucis diebus omnium animos sic crexit ac confirmavit, ut non modo nihil de pristino Eucharistiæ studio cultuq. remiserint, sed eius nomine præcipuè quandam sodalitatem instituerint. Domus ad leuandam quorundam discipulorum inopiam, annis instituta præteritis, & alumnorum numero, & fortunis est aucta. Cum enim antea duccenos dumtaxat au-

reos quotannis Summus Pontifex assignaret, hoc anno adiunxit se superstite quadringentos. Nec desunt alij viri nobiles, qui huic domui tum benigne faciant, tum de perpetuo firmanda vestigali laborent. Admissi sunt in hunc numerum heretici duodeviginti, omnesq. ad vnum euasere Catholici. Ad Societatem autem vni tantum aditus patuit. Magna est Dei beneficio apud nobiles Societatis existimatio, id quod indicant eleemosynarum crebra subsidia. Hoc anno impetratum est demum, vt in summo ac pleno totius regni concilio, ipso quoque Imperatore consentiente, confirmatio priuilegiorum Collegij nostri, maiore cum amplificatione perpetuaque donatione pradij, in Boemix regni tabulas adscriberetur. id quanquam saepe nostri tentarunt, nunquam tamen a Collegia condito, hoc est ab anno ferme trigesimo impetrare potuerunt. ita vt tanto maior Deo habenda sit gratia; quanto difficilior res fuit ad impetrandum. E concursandis obeundisque pagis non parua ad animas utilitas redijt. Oppidum est, Praga non longe distans, vbi mira erat rerum diuinarum inscitia: complures iam septuagenarij ne dominicam quidem precationem tenebant. quibus tamen, propositis pœnis, ita consultum est, vt breui quæ necessaria viderentur ediscerent. Dederunt ex eo numero in Ecclesiam nomina amplius sex & viginti: in alio vero oppido circiter octingenti. cunctusq. Senatus cum alijs octoginta, Sacramentum confessionis obijt.

OLOMVCENSE COLLEGIVM.

Olomucij dum morte multandos nostri confirmant, octo induxerunt hæreticos, ut hæresim quoque cum vita ponerent. Quidam autem ex ijs, quos carcer tenebat, postquam sacra confessione, quæ annis viginti cælauerat, patefecit, non sine Dei ope nutuq. cui vota fecerat, publicas custodias euasit: & quidem extremo supplicio scelerum socijs affectis, quos improbitate longo intervallo superabat. Ad eos, qui morti proximi sunt, supremū Christi viaticum, si quando opus est, studiose deferretur. Femina pietate præstans animi maculis rite detersis, dum Eucharistiæ viaticum suscipit, animam feliciter egit. Ciuis vero attritis diuturno morbo viribus (nouem enim ipsos annos perpetuo agrotauerat) Sacramentis rite perceptis remissoq. hæresi nuntio, & corpori medicinam fecit & animo. Hæc, quæ diuinis non humanis opibus perficiuntur, ciues frequenter impellunt, ut ad nos suis quisque temporibus, vel consilij vel medicinæ causa confugiant. Nonnulli suas ædes nostrorum opibus ac remedijs, demonibus infestas domesticis expiarūt. ex ijs vnus qui coctis lateribus obuium quemque petebat, lustrali aqua sacrisq. carminibus aufugit. Ab hæresibus varijsq. erroribus, ad Ecclesiam Catholicam amplius quadraginta animum adiecerunt. Foris etiam varijs locis diuini verbi semen mādaturum est, effectumq. quadam in vrbe, ut cantus Boemicus &

Missa

Missæ citra consecrationem siue Hussitica tolleretur. Institutumq. ut matrimonium ac nuptias, confessionis & communionis sacramenta præcurrerēt: hæreticorum porro erepta volumina: eorundem antiquata baptismata, & alia alibi perutiliter acta.

DOMVS BRVNENSIS
& Græcense Collegium.


PEstis contagionem, quæ extremo anno proximo serpere leuiter ac remisse cæperat, æstate ineunte inusitata consecuta sunt febres. has vicissim excepit noua contagio: agrorum plena erant omnia. & primo quidem absumpti de nostris morbo sunt tres: sed ut fœdioris stragis causæ remouerentur, alijs alio ad salubriora loca dimissis, per paucis duntaxat, ij. q. necessarij relictæ sunt domi. Octobri ineunte ex hoc paucio numero, Collegij minister dum animarum vindemias colligit, quæ quidem id temporis erant vberiores, eadem contagione morbi contumitur. Hic triduo ante de obitu suo Rectorem admonuit, quem leni risu cum Rector exciperet, confirmauit ille, duobus ante mensibus sibi significatum esse de morte. itaque noxis animi rite deletis, primo & altero die religiose sacrificauit, biduoq. post, intētis in cælum oculis, dum oraret, extremum spiritum Deo reddidit. Videlicet bonitate præstabat, qui tali exitu vitam clausit, erat Deo valde coniunctus, mirum eius in Superiores obsequium, mira legum custodia, flagrans & in Deum & in proximos cari-

caritas, vt iam omnia tēpestiua illi essent ad mortē. Hunc biduo triduoue consecuti sunt alij duo: nec ita multo post ipse quoque Boemica & Germanica linguae concionator: ita vt in unum Rēctorem totum rerum gerendarum pondus incumberet. Interim uis morbi alios atque alios deinceps grauit̃er uulnerabat, omninoq. undecim interemit. Nunquam tamen pestilentia grassante diuinus intermissus est cultus. Præter reliquas conciones, quæ festo quoque die tribus fere locis habitæ sunt, concionati sunt nostri diuersis etiam in pagis. Summa autem tum animarum necessitas, tum principum uirorum contentio fecit, ut multa oppida lustrarentur. nam & infantes sine baptismo, & ægri sine pænitentia sineq. uiatico decedebant; itaque ea fuit animarum seges, ut nouitij quoque non pauci, quantum eorum disciplina patitur, plenos manipulos reportarint. Interim Deus Opt. Max. mercedis loco suos uoluit famulos uarijs calamitatibus exerceri. Fremebant hæretici, quod à nostris Catechismū homines non Catholicī docerentur, & tanquam in insidijs, qua transeundum erat se collocabant, minasq. intentabant atroces, si ad se iterum reuertissent. Non nunquam uero aduersata est eis hyems, coactiq. sunt sæuiente frigore nudis pedibus, aut collectas à crebris inundationibus aquas, aut altas paludes uado transmittere. Longum esset ea persequi, quæ Dei causa domi forisq. superata sunt. cum alij fundos nostros inuaderent, alij mendacijs atq. calumnijs famæ nostræ tenebras conarentur offundere. Verum, qui
potis-

potissimum calamitatis est fructus, semper ad nos plus commodi, quàm incommodi redundauit.

GRÆCII coniunxere se Catholica cum Ecclesia non pauci. Nobilis adolescens cum ex cæde penam capitis incurrisset, antequam plecteretur, significauerat nostris uelle se ritu Catholico animi labes abluere, postea suorum fraude deceptus consilium mutauit. aiebat, in qua religione natus esset, in ea se uelle mori, sibi que exploratam iam esse salutem: & cum decessisset, affore Christum qui prehensa dextra, se in beatorum loca perduceret. Præcipuus hæreticorum minister laqueos adolescenti tetēderat: is ut in errore perseueraret, effecerat: sed pertinaciæ medicinam fecit extremi supplicij metus, ut enim mittendus fuit ad mortem, statim ad deliberandum supplicij moram flagitauit, quam cum impetrasset, postea confessus est & communicauit. Alius è prima nobilitate adolescens, quod contra parentum uoluntatem ad Catholicos abiisset, fortunis omnibus spoliatus, ita tulit hoc uulnus, ut in summa rerum inopia parem animi magnitudinem ac moderationem præferret.

P R O V I N C I A
G E R M A N I A E.
Superioris.



Vius prouinciæ socij in nouē disper-
titi sedes ducenti fere sunt ac duo-
decim . Ingolstadij quatuor &
quingenta . Dilingæ quatuor
& viginti . Monachij sex & vigin-
ti . Oeniponti quatuordecim . To-
tidem Friburgi. Vno minus Halæ, Lucernæ sexde-
cim. Augustæ viginti . Landspergæ triginta. E vita
migravit vnus . Recepti Societate quatuor & vi-
ginti.

I N G O L S T A D I E N S E, E T
Dilinganum.

I Ngolstadiense Collegium adsciuuit in Societatem
quatuor . Societatis vero meditationes ex ex-
ternis obiere primarij, & in his Abbas nobilis, &
Concionator, qui hoc consilio venerat Ingolstadium.
Confitentium & communicantium numerus pro re-
gione sat magnus . Ab hæresi quinque & triginta
sunt absoluti, veniuntq. certis anni temporibus ex
hæreticorum regionibus, qui catholico more se ex-
pient. quo in numero quidam non sine singulari di-
uinæ

uinæ misericordiæ munere è dæmonis faucibus est ereptus. Erat huic magicus liber, in quo cum alia multa tum conficiendæ pecuniæ ratio continebatur: id ubi rescivit concionator, cuperetq. (ut est insatiabilis hæreticorum auaritia) rem suam augere, huius uxorem clam conuenit, persolutoq. precio libellum aufert. tamē vim potestatemq. libelli primus periclitari non ausus, accepto à rusticis duobus argento, copiam eis libelli facit ad tempus. rustici diuersorium ingressi, dum ea de re inter sese colloquuntur artis ignari, ecce tibi humana specie dæmon artem profitetur se facile traditurum, modo se sequantur in syluam. sequuntur quo imperatur, & ex condito venit in syluam; ibi membranam dæmon porrigit, iubetq. eos suo sanguine suum in ea nomen inscribere. cum alter paruisset, dæmon ea quasi præda contentus nusquam amplius apparuit. Concionator de re certior factus, metu perterritus fugam cepit. is vero, apud quem diximus artificiosum fuisse libellum, ad nos se contulit, peccataq. cum dolore confessus veneficis suas artes sibi habere iussit. Sodalitium Dei matris & pietate viget & numero. Plurimi per eos dies, qui anniuersariæ Christi neci dicati sunt, sese ante eius sepulchrum verberibus cecidere: & id ipsum ad diuersa vrbis templa ac sepulchra, suo quisque induti cucullo, fecere nonnulli. Septembri mense factum est scholarum initium, in recenti pulcherrimoq. gymnasio, quod nobis pro sua egregia liberalitate Gulielmus Bauariæ dux excitauit: Rhetoricesq. explanatio, quæ ante desiderabatur, adiun-

Ha. exhibita etiam de Absalone tragædia nobili spectante corona, cum humanitatis causa gymnasium resens inuiferet,

DILINGÆ Societate donati sunt quindecim, in iisq. nonnulli nobiles, quos ipsi propinqui Societati dicarunt, Ab hæresi sunt absoluti complures. ex eo numero mulier tū ab extremo periculo non procul abesse putaretur, Catholicis instituta præceptis, postridie & ab hæresi, & à morbo simul est expedita. quæ res vehementer tum ipsam, tum eius virum, qui à pueritia hæresim hauserat, confirmavit. Alius Catholica à nobis religione suscepta, in patriam reuersus maluit de bonis patrijs, quàm de sententia decedere, Septem virgines, quæ luere apud nos peccata confessione sueuerant, in sacrarum virginum collegia cooptatæ sunt: Nec defuerunt. qui confessionis præsidio sese & ab animi & à corporis periculis vindicarint.

MONACHII suus quoque labor datur hæreticis. Marchio quidā clarus genere & Anabaptista, cū diu iam in perfidia obstinata mente perstaret, etsi contumeliose initio, qui de religione secum agerent, repellebat; postea tamen nostrorum delinitus obsequijs ac patientia, Catholicam religionem magna omnium admiratione suscepit. Duo Iudæi patrijs bonis vxoribusq. contemptis, in aula gymnasij nostri baptizati sunt. Ablutus est etiam Rhodius quidam in nobili illa apud Echinadas victoria captus, celeberrimo nobilitatis conuentu. Illustrissimus Bauariæ dux rem nostram promouere non intermisiuit. Parentem filius

filius natu maximus imitatur. is cum è sodalitate sit Dei Matris, in eaq. reliquis sodalibus sit præfectus, fratrem suum Ratisbonensem Episcopum in eandem sodalitatem adlegit.

OENIPONTANVM, LVCERNENSE, & Friburgense.

OEniponti complures per Confessionis Sacramentum alij à morbis, alij à perspicuis periculis, alij etiam ab infernis monstris, spectrisq. liberati sunt. Hic quoque multos ab hæresi ad Catholicam religionem nostri traducunt. Erat in eo numero Sacerdos, magna apud quosdam hæreticorum duces auctoritate. hic etiam tum cum in hæresi versabatur, eximio quodam pietatis studio erga Beatam Virginem tenebatur, ut minime mirum videri debeat si è fœcibus demum emerfit, qui tantæ patrocinio Virginis nitebatur. is postea grati animi causa ad eadem Lauretanam, nullo viatico nullo itineris subsidio profectus est. Oenipontani ciues valde propensi videntur in nos, quantum ex oblatis templo muneribus tum crebris tum copiosis conijci licet.

LVCERNÆ hæresim eiurarunt duodetringenta. Sacramentorum consuetudo ut in tali ciuitate sat frequens. Confessionis autem consilijq. causa de longinquis etiam locis, multi concurrunt. Vir quidam, cum deformi dæmonum vexaretur aspectu,

M repe-

repetitis à prima etate peccatis, ipso confessionis sacramento sese & à scelerum seruitute, & à molestia demonum vindicauit. Alium item cum desperatione uehemens ipsum iam triennium vrgeret, eadē se medicina ad æquitatem animi reuocauit. Atque ex hoc genere plures fuere, quàm vt enumerandi videantur omnes. Aegra mulier eiusdem sacramenti vi, eodem die in integram valetudinem restituta est, postridieq. omnium cum admiratione, Christi corpus accepit. Vitiosa præterea consuetudines ademptæ sunt. nam cum ipso quoque Quadragesimæ tempore personati homines baccharentur, interposita Senatus auctoritate perfectum est, vt mos ille barbarus tolleretur. Idem Senatus, vt qua in Societatem sit beneuolentia testetur, cum de nostris falsos quosdam spargi rumores accepisset, auctorem illico comprehendi iussit, eumq. præter pecuniariam multam, frequenti concione coegit, quæ temere de nostris effuderat reuocare, ac nisi nostrorum intercederet deprecatio, multo peius cum maledico actū esset. Lustrata sunt cœnobia non sine magna utilitatis spe: & in eorum vno, cœnobitarum est excepta confessio, idemq. in tribus cœnobijs mulierum factitatum. Verberationum ciliciorumq. vsus in earum mores inuectus, tantumq. in re illa perfectum, vt in multis fræno sit opus: inuenta est enim, quæ semestri spatio singulis se noctibus verberaret, nam quæ octauo quoque die in seipsas animaduertant, ferè sunt omnes. Hæc & alia in Christi gratiam Lucernæ sunt acta.

FRIBVRGI præter Gallicas Germanicasq. conciones, tribus in vrbe locis traditur Catechismus. Atque vt intelligatur, quàm plenus hic futurus sit ager; intermiserat certis de caussis conciones vnus è nostris, quod cum populus cognouisset, ratus id accidisse, quod sæpe de confessione communioneq. appellatus non paruiſſet, mittit illico, qui concionatorem roget, à suscepto concionandi munere ne desistat. nam obsequentem si minus ante se præbuiſſet, fore vt in poſterum errata corrigeret. Quinque circiter & triginta, hæresum soluti sunt nexu. Aucta est pænitenibus sacra ædes, eiusq. rei caussa vel ex hæreticorum regionibus huc contendunt. Ea est autem aliquorum pietas aduersus religionem Catholicam, vt quidam Magistratui hæreticò mille libras annuas, hoc est aureos amplius 200. vt per eum sibi liceret festo quoque die sacris adesse, spoponderit. Reuocata est etiã longo interuallo consuetudo quædam salutaris, vt sub initiũ quadragesimæ, fidei professio ex instituta concilij formula non à ciuib. modo, verum etiam ab aduenis exigatur. id quod Senatus auctoritate perfectum est.

Auctum est Gymnasium humanitatis schola, numeranturq. inter Auditores religiosi complures, id quod in his locis perrarum perq. mirum est.

AVGVSTANVM COLLEGIVM.

O Bijt in Augustano Collegio Sacerdos, & susceptis pro Christo laboribus, & Societatis

antiquitate præcipuus. is fuit Theodorus Peltanus, qui annos duos & triginta in hac familia transegit, in eaq. partim docendo partim scribendo, nullum tempus à laboribus vacuum habuit. Templum plurima amicorum liberalitate nitet. id vsquequaque absolutum, summa cum cerimonia consecratum est: in eodemq. nostro Collegio datum à Fuggherorum familia illustrioribus ciuibus epulum, habitaq. à nostris pro agendis tum eidem meritiſſimæ de nobis familie gratijs; tum reliquis Societatis patronis, oratio. Iam pænitentium celebritas pro ciuitatis amplitudine. & celebritati par fructus. Vir quidam affectu ætate, cum Augusta quatridui itinere peregrinaretur, febriumq. absumeretur ardoribus, hoc dolebat vnum, quod procul à patria, procul ab vxore carisq. liberis moreretur; in ea cogitatione versanti, ex occulto missa vox dicitur, qua monebatur, si saluus esse vellet, ut Augustam vsque contenderet, peccataq. sua apud Iesuitas noua quadam in æde confiteretur. sed cum id visum pro nihilo duxisset, propterea quod nec templum illud nouum vidisset vnquam, nec quod genus hominum essent Iesuitæ cognosceret, iterum ac tertio vox eadem extitisse, addidisseq. non defuturos, qui ei Iesuitarum templum indicarent. tum voci fides ab ægro habita, conceptoque voto sanus illico surrexisse, & magna sua cum voluptate apud nos animum expiasse. Nec illud miraculo vacat. Nobili adolescenti cum sanguinis cursus è naribus, nulla medicorum arte reprimi posset, ob eamq. rem certum putaretur adire discrimen,
 statim

statim à peccatorum confessione constitit sanguis. Duo & viginti patrias hæreses prauasq. opiniones, cum vera & constanti Catholicorum disciplina commutarunt; confirmatiq. sunt multi, quorum non constabat in religione sententia. Duobus re domestica laborantibus, cum recentes atq. asperos nummos diabolus obtulisset, pluraq. si sibi parere vellent, copiose promitteret, ab eo sese vterque non sine nostrorum ope liberauit. Venio ad ea quæ Gregoriani Calendarij causa Societas indigne pertulit. Erat enim hæc vulgo de nostris opinio, eos ad restituendum Calendarium non modo Romanum Pontificem induxisse, sed ad amplectendum, ipsum quoque Senatum permouisse. Anno itaque M. D. LXXXIII. Calendarium Summi Pontificis auctoritate correctum ac castigatum, simul ac à Senatu non sine Imperatorio decreto promulgatum est, ingens fuit armorum materia. Initio quidem incitata est ab hæreticis concionatoribus multitudo, sic, ut nullum de nouo Calendario verbum fieri pateretur. Ex eo tempore magnus in ciuitate tumultus, magna seditio. Priuati suis in ædibus armorum præsidia contra vim ac manum comparabant: Senatus milites conscribebat: Ciuēs Senatui, nisi nostros ciuitate pelleret, ades disturbaret, decretumq. de Calendario retractaret, extrema quæque minitabantur. denique perturbata erant omnia, omnia plena periculi, plena formidinum. Anno, qui consecutus est, etsi iam non nihil prudentissimi Senatus vigilantia furor populi deserbuerat; Quadragesima tamen ineunte, noui

lanij excitarunt incendium . ij hæretici sunt fere omnes , numero amplius ducenti . Tota igitur quadragesima , ne quis Calendario nouo pareret , contra leges , contra consuetudinem , carnes de macello vendere , Paschate vero , quod ad restituti anni rationem peragebatur , tabernas occludere non dubitarunt . Alebatur laniorum audacia concionatorum improbitate , modo vt viriliter se gererent cohortante , modo minis atrocibus territante . Sed nimirum egregias suæ contumaciæ dedere pœnas : tantum enim abest , vt improbissimis consilijs Senatui bonisq. omnibus quicquam obsuerint , vt cum Senatus ad celebrandum colendumq. Pascha aliunde sibi de carnibus prospexisset , rigidam ipsi quadragesimam agere sint coacti . Nam nec à suis carnes id temporis vendebantur , nec ex alijs , quas Catholici aduexerant , hoc est ex Iesuiticis (vt ipsi loquebantur) audebant attingere . erat autem hæreticis id solemne , vt quicquid ex nouo Calendario faciendum omittendumue præscriberetur , id Iesuiticum appellarent . Non hic turbarum exitus fuit . Quinto Calendas Iunij iubet Senatus pro Curia foribus edictum de Calendario proponi , præconisq. voce propalam denunciari , hanc ipsius esse sententiam . Vti Calendarium nouum à Summo Pontifice restitutum in posterum tempus adhibeatur . Hæreticorum Ministri vbi rem serio agi animaduertunt , suos quoque conatus & artes admovent : concione coacta , Senatus damnant edictum , populoq. vt Calendarij lex abrogetur , omni ope & contentione suadent .

dent. Senatus ad id tempus mitior, tam proiectam
 effrenatamque audaciam diutius non ferens, de
 communi sententia decernit, ut Ministrorum dux,
 turbarum omnium seges ac fomes, extrudatur ex
 vrbe. Id cum fieret, vociferantibus è suis tectis hæ-
 reticis, ingens illico è plateis armatorum manus
 accurrit. Strictis gladijs equorum præciduntur
 habenæ: Minister, inuito Senatu, de curru detrahi-
 tur, in proximasque ædes abripitur. ibi custoditus
 à suis postero die muliebri veste (ut fama fuit) ne
 agnosceretur indutus, ciuitate denique cessit. Au-
 xit in præsentia tumultum concionatoris exilium.
 Clauduntur portæ: militum præsidia cum ducibus
 instruuntur: curia intus forisque munitur: plateæ
 complentur armatis: ac ne cocant, ut in periculis
 fieri consuevit, cratibus ferreis demissis, partes op-
 pidi secluduntur. Ita nostri, qui intra mœnia qui-
 dem, sed tamen in vrbe veteri, quam appellant, ha-
 bitant, omni Senatus auxilio, omni bonorum ope
 destituti, nunquam maius adiere discrimen. Ecce
 tibi conferta hæreticorum turba, furore amens, no-
 stram cogitur ante plateam. Nos obfirmatis occlu-
 sisque foribus, quoniam nulla erant humana præ-
 sidia, in Deo vno spes nostras figimus ac locamus.
 Hæretici domum nostram speculari vndique, adi-
 tus omnes curiose lustrare. quidam per fene-
 stras gladios hastasue torquere, alij per summam
 licentiam contumelias & maledicta iacere, nonnul-
 li ignem ædificijs continentibus admouere, ut eo-
 dem nostrum conflagraret incendio. Accesserunt

postremo qui contignationes diruerent, vt eadem
ruinæ nostros opprimerent. Sed tamen aggressos
deterruit vetula quædam, quod diceret milites se
vidisse quingentos, à Bauarico duce missos in cu-
stodiam præsidiumque nostrorum. Et sane tota
Augusta peruagatus est hic rumor, trecentos mi-
lites apud nos esse. quæ suspicio fortasse hæretico-
rum furorem à nostrorum vitis tectisque conti-
nuit. Res in miraculis est habenda, homines qui to-
to anno nihil aliud agitauerant, nihilque aliud in
conuentibus circulisque iactarant, nisi quemad-
modum male perderent Iesuitas; eo die non mo-
do quenguame eorum non spoliassent vita, sed ne aspe-
rius quidem lædere ausos esse. Subductis denuo
cratibus, ad insequentem vsque diem, vrbs præse-
cti alijque ad nos patroni miserunt, qui vicem no-
stram dolentes tum nos officiose consolarentur,
tum studiose perquirerent, an aliquid nobis gra-
uius ab improbis accidisset. Longum esset enume-
rare, quæ consequentibus octo diebus experti
sunt nostri, tum cum obseratis semper foribus ex-
trema omnia in horas singulas expectabant; cum
infames spargebantur tota ciuitate libelli, cum mul-
ta de ipsis ad imperatorios ministros falso defere-
bantur. Et tamen in tantis fluctibus non sine tum
hæreticorum admiratione, tum Catholicorum so-
latio nunquam intermiserunt, vel sacra perage-
re, vel de more confessiones excipere; vt qui spem
sux defensionis ac patrocini non in hominibus sed
in vno Deo tutissimo innocentie persugio colloca-
rant.

GERMAN. SUPERIOR. 185
rant . Eoque duce ac defensore eundem semper
cursum tenuere, eodemque studio ac volun-
tate, etiam nunc in animarum
caussa versantur.



PRO.

P R O V I N C I A R H E N I.



*Amplectitur Rhenus domicilijs vn-
decim socios amplius trecentos ,
Coloniensi Collegio triginta. Tre-
uerensi quatuor & sexaginta .
Moguntino duos & quinquagin-
ta. Herbipolensi duos & quadra-
ginta. Spirensi septendecim. Fuldensi duodeviginti.
Heiligenstadiens quatuordecim, Molsheimensi tri-
ginta. Confluentino denique sexdecim . Accedunt,
qui in Paderbornensi & Luxemburgensi sedibus
cōmorantur , quarū hęc tres, sex illa complectitur.
Ad Societatem vocauit Dominus septem & vigin-
ti: sex autem, vt speramus, in cœlum.*

COLONIENSE COLLEGIVM.

E Coloniensi gymnasio quinque se adolescentes
in familiam nostram dicarunt, Educat autem
sodalitas Dei Matris ad omnem disciplinam ac re-
ligionem adolescentes. sunt inter eos, qui noctes to-
tas in assidua precatione traducant : alij egenorum
misericordia capti, vel vestes ijs diuidunt, vel argen-
tum: inueniuntque sunt adolescentes, qui quoniam per
eta-

ætatem nondum ad paternas capfas admittebantur,
 nec tractare nummos suo arbitratu poterant, vesti-
 menta sibi ipsi detraherent, quibus pauperum nuda
 membra contererent. Nonnulli ut famelicos pasce-
 rent, suo se pabulo fraudarunt. Atque ut omittam,
 quam acriter in suum ipsi corpus quidam animad-
 uertant, multo maior laus videri debet, eos qui in tā-
 ta heresum colluione sunt alii, contra hæreticos ta-
 men tanta concipere odia, ut ea non modo in illos, sed
 in eorum quoque libros effundant. quotquot enim
 huius generis nacti sunt libros, eos ad nos afferunt
 exurendos. Adolescens complura Lutheri Erasmiq.
 volumina, quæ postea nobis traderet concremanda,
 ab hæreticorum Ministro coemit. Alij in aliorum
 salutem non minus curæ studiique, quam si de no-
 stris essent, impendunt. Ex eadem sodalitate Sacer-
 dos profectus in Holandiam, breui tempore ad sode-
 lium numerum quinque & triginta, partim nobili-
 tate partim eruditione præstantes viros adiunxit.
 erant inter eos Parochi Sacerdotesq. nonnulli, quo-
 rum vnus rustico indutus ornatu, quo hæreticos sal-
 leret, in Holandiæ parte quadam, vbi præcipua hæ-
 reticorum est sedes, modico temporis interuallo, pue-
 ros ferme centum salutis aqua respersit. Ac de hoc
 ipso Sacerdote, ut de ijs, quos dixi, sodalibus, & plu-
 ra scribi possent & varia, nisi me res gestæ nostrorū,
 quo potissimum referuntur hæ litteræ, ad se voca-
 rent. Ad salutarē animorum expiationem non pau-
 cos sæuientis pestilentiae lues adegit. Inuaserunt no-
 stri corpore & animo laborantes, ac ne decedenti-
 bus

bus quidem, ubi eiusmodi tempus incidit, absuerunt. Vir nobilis, cuius iam salus vocabatur in dubium, expiatis rite peccatis, paulo post emerfit è morbo. Nec minora ex hæreticis facta sunt lucra. Nobilis hæreticorum Minister, Geneuam disciplinæ causa profectus, propter excellentiam ingenij, ad summam Calvinianæ sectæ cognitionem breui peruenit. itaq; eius opera expetebatur à Ducibus ac Magistris. Auxit famam nominis concionum præsidium: præsertim apud Electorem Palatinum, eiusq. filium Casimirum. Sed quo latius Calvinistarum deliramenta diffunderet, in varias Germaniæ Belgijq. destinatus est vrbes, adhibitusq. sæpe à principibus viris, tum ad conciones quotidianas tum ad honorificas legationes. Verum cum & ex Principum consuetudine, viuendiq. ratione, & alijs argumentis quamplurimis explorasset, quæ essent omnia plena fraudibus apud egregias Caluini discipulos, nec alio tanti magistri spectare doctrinam, nisi ut per summam insipientiam, ex hominum mentibus veri Dei cultum & religionem eripiat; Ministrorum & synodorum scripta reuoluit, eaq. accurate & diligenter expendit. Quæ cum a prisca illa religione longissime recedere animaduerteteret, & quam dissimilia ijs essent, quæ in Catholicorum litteris è regione perlegeret, abiecta omni cunctatione, statuit sibi de religione longe aliter sentiendum. ex eoq. tempore eam orsus est vitam, ut facile in suspicionem suis venerit desertæ proditæq. sectæ. Ad extremum eius rei causa, ultimis prope defunctus periculis, Coloniam venit. ubi via sibi ad integrã

castamq. religionem occultis cum Sacerdote nostro sermonibus patefacta, tanto est animi dolore confessus, ut paratum se diceret, si ita videretur, vel publice pœnitere. Antequam autem ad Eucharistiæ mensam admitteretur, coram Sacerdote sacrificaturo, mista lacrymis oratione se ipse graviter accusavit: idq. præsentē nobilitate præcipua: mox in genua prostratus, fidem ex formula concepta professus, sacramento se religionis obstrinxit. Dies ille maximè & ei, & ceteris qui adfuerunt, lætitiæ fructum attulit. Cumq. is, multos iam annos quodam morbi genere laboraret, eo primum die liberum immunemque se sensit: ut intelligeret, quantum importatum esset animo commodi, quod etiam in corpus redundavit. Mulier Anabaptistis nata parentibus, cum à patrijs institutis ad Catholica discessisset, morborum cæpit agitari molestijs: statimq. subijt animum cogitatio, sibi nondum ad Ecclesiam patuisse aditum per baptismum. quæ cogitatio coniecturis nixa vehementibus, confirmabatur in dies. Itaque, replicatis exactæ vitæ cursibus & rebus diligenter inspectis, cum vere mulier fraudata baptismo videretur, solenni ritu ac ceremonia baptizata est: vix muliebri caput salutaris aqua tetigit, cum corporis morbum una cum hereditaria illa animi lue ceteraq. peccatorum contagione discussit. Alia ex eadem colluione mulier silentio prætereunda non est, cuius aduersus Deum impietas, diuinam in ea seruanda pietatem mirifice commendauit. Ausa est, per summū nefas, sacrosancta Eucharistiæ mysteria impurissimis digitis atre-

sta.

stare, eaq. in cistam pyxidemve coniecta, foras ad Anabaptistas, quibus se tradiderat, deportare. Hospes, apud quem diuersata primum est femina, nocturno strepitu excitatus, cum vltro citroq. trahi cistam totis adibus audisset, ex muliere quærit, quid cista illa contineat: respondet mulier non minus audacter, quam impudenter, panis in ea contineri fragmentum, quem pro Deo Papistæ colerent. Re apud Anabaptistas peruulgata, illico vniuersi conueniunt. profertur è muliebri cista candidissimus panis, & cum impuro hæreticorum pane coniungitur. deinde vtroque in arcam condito in diem posterum, Videbitur, inquit, vter altero sit diuinior. Cum dies insequens illuxisset, ad arculam redeunt. nostrumq. cælestem panem, integrum vsquequaque incorruptumque reperiunt; suum vero in busonem teterrimum deformatum. Eo aspectu cunctos terror inuasit; sed ij, qui suorum scelerum cumulo, ne prodigijs quidē ac miraculis mouebantur, exclamant, fraude id fieri Papistici panis (sic enim per contumeliam Angelorum panem appellant) qui ne tum quidem vel à suis absens, a fascinandis oculis abstineret. Porro buso sæpe coniectus in ignes, semper inde visus est resiliere. dum ad extremum olla conclusum, scrõbibus alte defossis, in ima terra sepeliunt; ac ne quo tanta pestis afflaret, diligenter operiunt: Eucharistiam vero petulanter arreptam, in eundem ignem contumeliose coniiciunt: ea vero pulcherrimæ lucis radios, suæ diuinitatis testes emittens, lente consumpta est. Eo prodigio exterrita mulier, relicta illico Anabap-
pti-

ptistarum perfidia, ad Ecclesiæ pascua caulafq. reuertit. Ea postea, duo apud Anabaptistas se vidisse narrabat. alterum, ad eos se contulisse virginē quandam, incertum qua caussa, quoque impulsu: cui, cum ex eorum disciplina ad secundum baptismum adigeretur inuita, neque enim ignorabat, quantam maculam in se susciperet, si primam illam originis maculam vno iam baptismo deletam, nouis iterum aquis delere conaretur, tātus impactus est colaphus, vt vestigia ipsa ad multos dies impressa fidem facerent, plagam non humanam fuisse. Narrabat etiam, feminam quandam nactam ex eadem sæce maritum; cū iniquo pateretur animo, quotidianis hæreticorum conuentibus sedes domesticas inquinari, illis esse sedibus imprecata, vt quotquot celebrari capitibus consueissent, tot dæmonijs redderentur infestæ: habuisseq. subitum tam diras preces euentum. Ex eo enim tempore, tanquam accepta possessione traditi domicilij, tantam ibi malorum dæmonum turbam debacchari solitam, vt adiū domini pauore perterriti, cedere nouis dominis sint coacti.

TREVERENSE COLLEGIVM & Luxemburgensis Residencia.

TReueri cum ex alijs officiorum muneribus multiplex utilitatis fructus, tum ex erudenda iuuentute colligitur. Imbecilla ætate puer ex hæreticis procreatus, quoniam Catholico ritu vivebat, du-

durius à parentibus si qua in re forte offenderet, tractabatur. eo patria asperitas progressa erat, ut vitæ tædio, puer multa à Deo prece contenderit, ut si ei commodum videretur, se ex ijs ærumnis in illam vitam molestiæ omnis expertem, quo duæ quoque sorores propter suam pietatem, ut sperabat, paucis diebus ante concesserant, euocaret. Interim ipse furtim ac dissimulante confessionis atque Eucharistiæ mysterijs animum expiat, & quasi exploratum sibi esset preces irritas non futuras, ad diem obeundum alacriter sese comparat. Vix à cælesti mensa redierat, cum subito correptus est pestilentia. sed tam fœda lues, quæ humanæ pulchritudinis florem infringit, non modo nihil ei de pristina oris dignitate detraxit, verum etiam auxit. tanta enim iacenti venustas accessit, ut pater vehementer admirans rei causam requireret: cui semina Catholica, quæ agro ministrabat, Nil mirum, inquit est, hodie enim sacrosancta altaris mysteria puer accepit, quorum ea vis est, ut non modo animum suaviter afficiat, sed interdum etiam redundet in corpus. Morbo ingrauescente, nihil æque dolebat puer, ac parentum in hæresi pertinaciâ, matremq. pluribus obsecrabat, ut si se æquo animo mori vellet, daret hoc postulationibus filij, ut se iterum cum Ecclesia Catholica, vnde se seiunxerat, copularet. Cumq. propius abesset à morte, postulavit iterum sacramenta, & quanquam ad eam rem obsurduerat parens, vicit tamen diuturna contentione filius, ut eo conniunte & expiaret iterum rite noxas, & supremo illo diuinoq. viatico se muni-

ret

ret. Fratris exemplo infirmissima etate soror, nondum annum egressa nonum confessionibus vti cepit occultis: furtiuisq. precibus, quando palam non audet. B. Virginem compellare, eamq. Catholico ritu verbis Angelicis salutare. Alij porro complures, qui Catholica religione neglecta, patria dogmata sectabantur, Ecclesiæ legibus & institutis obtemperant. Sacramentorum mysteria non minore celebrantur hominum conuentu, quam fructu. Vnum missum non faciam, quod ad commendationē sacræ Confessionis plurimum valet. nullis enim telis humani generis hostis ita cōfigitur, vt accusandis apud Sacerdotem prodendisq. peccatis. Vir erat pietatis studijs in primis deditus, qui & Sacramenta capiebat assidue, & lectitabat libros de pietate conscriptos, & vestem cilicinam ad reprimendam contumaciam corporis induebat, & exemplar deniq. propositum erat ad imitandum. Hic igitur dum in eo totus est, vt d. susceptis maculis accurata se confessione perpurget, non tulit id callidus & inuidiæ plenus. insidiator, persona viri grauis inducta hortatur hominem, vt mentem illam aut in aliud tempus reijciat, aut omnino deponat, & in alias terras vbi viuat hilarius (ciuitates dicebat hæreticas) demigret: neque Iesuitis ita se credat, vt ab eis diuelli non possit, eos esse homines callidissimos, qui perniciem ac laqueos adumbrata quadam religione prætexant. Non fuit difficile versutissimo oratori, ea persuadere homini simplici, quæ tam artificiose astuteq. composuit. impulit hominem, vt non modo tam salutare

N animi

animi expiandi consilium abijceret, sed etiam, ut & libros, qui pietatem accenderent, & vestes cilicinas, quæ nuda membra comprimerent, concremaret. Desudandum Patri nostro fuit, qui à confessionibus ei erat, ut hominem inductum in fraudem, de errore deduceret. illustravit insignis veteratoris fraudem, qui personas non modo arripiat humanas, ut fucum animis faciat, sed interdum etiam Angelicas: patefecit dolos & artes, quibus capere optimū quemque solitus sit: erudit imbellem & confirmavit ad pugnam, ut si denuo esset cum hoste pugnandum, hostiles impetus & conatus eluderet. Non fuerunt ab re neque alieno tempore adhibita magistri præcepta. redit mendacij pater ementitus iterum formam, & quoniam discipulum alienis consilijs sentit abductum, elaborat quantum potest, ut si minus sacramentum confessionis obire nolit, certe ne tam frequenter obeat. rem damnare ut supervacaneam instituit, minimeq. necessariam, nec parva docet carere culpa, defletas semel culpas deplorare iterum, & quasi divinæ misericordiæ diffidas confessionum lacrymas renouare. Sed cum ea re tiro paulo iam ad certamen esset instructior, facileq. sentiret laqueos sibi atque insidias ab hoste prætendi; alias hostis adhibet artes, alias admouet machinas ad oppugnandum. Nihil tale dissuadet amplius, concedit illi tam salutare præsidium, quo cum Deo reditur in gratiam: conatur tamen efficere, ut ad eā rem Iesuitarum opera non utatur, nec enim alios alibi Sacerdotes deesse, & quidem eruditos & probos

bos, apud quos peccata ponantur. Cum ne hæc quidem artificia procederent, instituit hominem non ex insidijs ac cuniculis oppugnare, sed petere aperte, ac persona posita. varijs eum terroribus ac visis exagitat, iniurijs onerat, minas intentat: & ut ab omni salutis spe fiduciaq. deiciat, confessiones præteritas exprobrat, easq. ad veniam negat quicquam habere momenti, peccata etiam, quæ illi exciderant obijcit, certissimosq. denunciat apud inferos cruciatus: denique nihil missum facit, quo hominem in summam desperationem adducat. Verum quo magis eos hostis noster oppugnat, quos in suorum numerum Deus adlegit, eo magis sentit suos conatus ac labores ad nihilum cadere. nondum enim expugnare potuit, quem multos iam menses oppugnat, vim intulit eius uitæ, obtortaq. gula ceruices conatus est frangere, ita ut is complures dies nullam in partem caput flectere ac torquere posset. Obijcit ei sese etiam num ad terrorem singulis hebdomadis sæpius: quam voces iam mittit nullas, tot victorijs debilitatus & fractus: speraturque, quoniam & terrores quoq. diminuti sunt, fore ut accerrimis fidei telis conficiatur & concidat.

Habuit initium LVXEMburgensis Residentia, ut superiores litteræ docuerunt, anno superiore, in eaq. munera Societatis exsequitur par Sacerdotum, cum laico vno: quorum aduentu obeuntium diuina mysteria numerus non mediocriter auctus est. Et quoniam diebus Sabbathi per id tempus, quod inter Christi Domini Natalitia, & Dei Matris Pu-

rificationem est interiectum, vesci carnibus religioni non erat, ereptus est hic error & pro concione obiecta religio: actumq. apud Magistratum, ut & diebus festis Reipub. curæ ac negotia fraudi non sint, & qui eorum dierum sanctitatem ac religionem opere aliquo violarint, coerceantur. Ecclesiastici institutio Seminarj à Pont. Max. comprobata, vehementer expetitur, in eamq. rē Prioratus quatuor quasi loco pignoris decernuntur, ex ijsq. vnus iam nobis est attributus, non sine opera atq. humanitate Archiepiscopi Treuerensis. Atque hæc initia, lætiores Deo propitio pollicentur euentus.

M O G V N T I N V M E T Herbi polense Collegia.

IN Moguntino Collegio fratres nobis adiuncti sunt tres. Quinque autem & viginti ab hæresum pestilentia ad Catholicos reuocati, & in pagos proximos summa omniū cū voluntate vtilitateq. Catechesis inducta, Gymnasium nobilitat frequens & delecta iuuentus. quotidieq. multi quantos apud nos processus efficiant, & publicis testantur disputationibus, & speciosis Doctorum titulis consequendis. Auxit disciplinæ decus spectaculorum celebritas. Nam & rerum quæ exhibebantur dignitas ac religio, & admirabilis Actorum venustas cum ex omni hominum ordine tum è nobilitate complures allexit. Excitati sunt à mortuis longo iam seculorum

rum intervallo Hester & Isaac: quos egregia inueniunt pietas sic expressit, vix ut veritati concederet imitatio. Sumptus tum Saxonici Ducis, tum Treuerensis Archiepiscopi liberalitas suppeditauit. Atque hæc in hoc Collegio præcipua.

HERBIPOLI in Societatem lecti sunt quatuor. Alium quendam vocauerat Deus, sed dum is diem ex die trahit, & Dei vocem procrastinando contemnit, mortifero correptus est morbo, ut strato fusoque corpore, vigeret animus qui læguebat. itaque reputare secum attente cœpit, quanto tutius tum ageretur, si nostrorum liceret inter amplexus supremæ illius horæ molestijs angoribusque defungi. quæ cogitatio cum penitus insedisset in animo, statuit pugnare pro viribus, ut quamprimum sibi in Societatem aditus patefieret. rebus igitur cum Rectore transactis, ut voti compos est factus, releuari morbo subito cœpit: facile ut appareret vim illam fuisse diuinam, quæ ijs omnibus est parata, qui malunt plagis quam vocibus admoneri. Habet & suos Dei Matris sodalitas fructus, ijs non dissimiles, quos de Coloniensi sodalitate narrauimus. Quidam ex sodalibus cum in egentem & pannosum hominem incidisset, miseratione commotus pallium sibi ipse detraxit, ut Christi fratrem indueret: alijque alijs non modo nummis, sed varia quoque veste succurrunt. Atque in hac tanta in egenos humanitate, retinent tamē in se ipsi seueritatē. Fuit qui sex ipsas hebdomadas horrida cilicia ad nudas carnes apprimeret. nec defuerunt pueri delicatuli, qui a parentibus pretium afferrēt,

Unde sibi cilicium aliquod emeretur. Quidam ad perpetuam Christi Crucis memoriam, simul & præsentem doloris sensum, accepto ferro notam sibi Crucis inussit, eamque insculptam gerebat in pectore, quam multo magis in animo iam insculpserat. Ita fit, ut cum ad omnem pietatem mutuo se sodales exa- cuant, facile eos reducant ad frugem, qui vel ab hone- stis declinant officiis, vel à Catholica veritate de- sciscunt. Constat enim eorum opera, aliquot iam hæ- reticos aduersus Romanam Ecclesiam sensus suos mentesque flexisse. Triginta amplius numerantur, qui ad Catholicorum se partes adiunxerunt. In his senex, pestilentie cathedram apud Lutheranos, an- nos duodeciginta tenuerat: sed ut ad sanitatem rediit, omnes in æde nostra detestatus est hæreses. Adhibiti sunt præterea nostri ab Herbipolensi Epi- scopo ad eius diocesim ditionemque lustrandam. Is, ut est egregie ad tollendas hæreses animatus, cum diocesim suam, cuius non in diuinis modo do- minus est, sed etiam in humanis, hæresibus occupa- tam animaduertit; dudum eam cœpit inspicere, edixitque pœna proposita (id quod ei per statuta li- cet Imperij) ut qui Catholici esse nolint, intra præ- scriptam diem facessant illico, alioque sedes transfe- rant. Magistratus porro aduocat de præcipuis, dein- de populum, omnesque quantum licet & paternè mo- net & rogat, interdumque minas addit peropportu- nas, ut ad sanitatem vnumquemque reducat. Ad- bibet & Sacerdotem ad eam rem nostrum, & pres- byterum alium ex Germanici Collegij disciplina, vi-
rum

rum optimum ac familiarem. his negotium dat, ut
 & publice cum vniuersis, & cum singulis priuatim
 agant: eosq. ad pagos oppidaq. dimittit, ut populos
 ad auitam pietatem fidemq. Catholicam vel ample-
 ctendam vel retinendam, suis concionibus adhorten-
 tur. Itaque partim tanti Principis auctoritate ac
 diligentia, partim nostri Patris opera, & eius, quem
 diximus, Alumni Collegij Germanici, complures
 ad Ecclesiæ Catholicæ gremium se receperunt.

SPIRENSE ET FVLDENSE.

IN Spirensi Collegio, incommoda pene omnes vsi
 sunt valetudine, sed vnus tantum desideratus est
 Rector, exemplum sanctitatis & disciplinae. Gym-
 nasij celebritati inueteratus morbus non nihil ob-
 fuit: auditores tamen remanent fere ducenti, quos
 spectaculis excitandos, nostri sibi putarunt, quorum
 utilitas ad sanāda etiam in spectatoribus vitia per-
 tineret. Hæresim eiurauere septendecim, in eoque
 numero Spirensis Episcopi mater, quæ mariti perfidi-
 dia de religione deiecta, ad septuagesimum & quar-
 tum annum secura viuebat, nihil de animi salute, ni-
 hil de violata Christi fide laborans: sæpe cum ea de
 repetenda religione filius, sæpe alij complures ege-
 rant; sed cum semper frustra sudassent, tandem ve-
 tula in morbum lapsa, quo tentata vix vnquam erat,
 post multas filij cohortationes admisit vnum è no-
 stris, cuius sermonibus atque argumentis euicta,
 ad Catholicam reuertit Ecclesiam, diuinisque

communita mysterijs tuto migravit è vita. Ad cetèram liberalitatem, quam Societatis studiosi nonnulli, in locupletando varia veste templo, augendaque re domestica declararunt, accessit alia pergrata benignitas è venerandis sanctorum corporum, Nicolai & Laurentij reliquijs. ex altero bona pars Cranijs, ex altero iustæ magnitudinis os datum est, ignis etiã num vestigijs inustum. Hæc cœnobio cuidam iam inde a Dagoberto tradita, postea ne in sacrilegas hæreticorum manus inciderent, pij homines adseruabant: nunc ad nos delata non sine religiosa pompa concentuque symphonie, habentur scilicet in thesauris.

Ager quoque FULDENSIS non exiguo fœtus nostrorum remuneratur impensas. Hæretici amplius quinquaginta in Catholicorum partes diuinitus inclinarunt. Quoniam autem à Germaniæ nobilitate, reliquorum ad Ecclesiam reditus pendet, faciendum sibi putauit Gregorius xij. vt ex equestri ordine nobiliue loco natos adolescentes, quorum postea late pateret industria, suis sumptibus aleret. Huius Seminarij administrationem penes Societatem nostram voluit esse, in eoq. ali minimũ quadraginta, cum ex omni Germania tum è Septentrione potissimum. Hæc Gregoriana munificentia incredibile est, quam secundis animis sit accepta: testantur procerum litteræ, Principumque commendationes tum ad Collegij nostri Rectorem, tum ad Teutonicum clarissimum Principem, qui Fuldæ præest. Hæc iuuentutis nobilitas varijs est
 distin-

distincta nationibus: numerantur in ea Vesta-
 phali, Saxones, Hefsij, Buchonij, Sueui, Rhenen-
 ses, multorumq. Principum necessarij. & quanquam
 maximam partem Lutheranis sint orti familijs, tan-
 to tamen Religionis ardore Catholicam complectun-
 tur Ecclesiam, vt in ea nati educatiq. videantur. nec
 quicquam iniquiore animo ferunt, quam cum domũ
 à parentibus reuocantur, tam ægre diuelluntur à no-
 stris. Et tamen quidam ex ijs cum inuitus huc mitte-
 retur, multa dicitur questus esse cum Deo, quod sibi
 ad Iesuitas, homines scelestissimos proficiscendum
 esset, fore tamen vt omni prouisione animi ab eorum
 dolis fraudibusq. caueret. Ea de re admoniti nostri
 non pugnandum rati, nec de religione subito agen-
 dũ. quippe in animis obfirmatis plus sæpe valet dies
 ipsa quam pugna, Deo potius erudiendum tractan-
 dumq. permiserunt. Ecce tibi non longo spatio tem-
 poris interiecto, vltro Sacerdotem ipse compellat,
 peccataq. singillatim enumerat, & quidem orsus a
 prima ætate, tanta doloris pietatisq. significatione,
 facile vt intelligeres, quo tandem magistro vteretur
 ac duce. Idem cum in morbo paternis litteris admo-
 neretur, vt si se moriturum putaret, vel sub vtraque
 specie posceret supremum viaticum, vel id omnino
 contemneret: parentem suũ ipse derisit, Imo, inquit,
 vel sub vna tantum specie capiam, vel certe veneras
 abstinebo. Pari pertinacia adolescens alter accesse-
 rat, quem cum huc non tam sua, quam suorum volun-
 tas atque auctoritas compulisset, fugam initio medi-
 tari cœpit, sed partim pudore victus, partim fretus

firmitate ac robore patriæ disciplinæ, minus sibi
 existimauit impendere periculi si maneret. Is in Lu
 theri verba iurarat, nouoq. se sacramento religionis
 obstrinxerat cum discessit a suis. Sed vicit pertina
 cem animum religionis Catholicæ sanctitas, & plus
 potuit perspecta veritas, quam mendacium. ergo qui
 præclare aduersus eam sese munierat ne caperetur,
 vno eius captus aspectu, ita manus dedit, vt de suis
 quoque ad eandem religionem alliciendis magnope
 re sit sollicitus. Iam ad firmandam propagandamque
 Catholicam Religionem cæpta est de more summa
 Christianæ legis exponi, qua imbuatur multitudo ma
 xime puerilis. Constituit in ea re Gubernatoris nau
 itas ac diligentia, qui cum cognouisset, quanta esset
 vel in senili, & affecta iam ætate diuinæ legis insci
 tia, partim cohortandis Fuldensis agri pastoribus,
 partim imprimendis Catechismi codicibus totaq. vr
 be disseminandis, rem Christianæ doctrinæ valde pro
 mouit. Ab eo a notis quotidianisq. muneribus. Brun
 suichiam profectus est Sacerdos, Erici Ducis con
 iuge postulante, vt præclaram Dei Matris imaginē,
 infantem IESVM fouentis in gremio, vetustis nobi
 litatam prodigijs, ad Forliuiense Collegium, cuius par
 tem templi matrona illa construxit, transferendam
 curaret. Hanc imaginem annis ante sexcentis (nam
 digna res est, quæ à capite repetatur) eques nobi
 lis, dum syluestres agitat feras, inuenit: ea imposita
 erat trunco arboris peruetusto, eleganti specie, &
 ad incitandam pietatem spectantis idonea. Non tulit
 pius eques in occultis eam syluis sine honore latere,

abla-

ablatam ex ignobili ligno deportari iussit in ædes.
 Sed non diu illa à suis sedibus abesse voluit: postridie
 ad eūdem truncum arboris reperitur. Cumq; semel
 atque iterum vnde ablata fuerat, reuerisset, rei mi-
 raculo vir nobilis excitatus, virginum cœnobium in
 ijs locis, partim suis sumptibus partim allentis extru-
 xit. Fuerat ad hæc vsque tempora cœnobium illud sa-
 crarū virginū frequētia cœtuq; nobile, sed annū ante
 trigesimū, ad Lutheranū quendā eius administratio-
 ne trāsata, magnas scilicet accepit clades. homo im-
 probus omnium religionū contēptor, sub eo, quē dixi,
 trunco, vbi Dei Matris imago tot iam secula suum
 habuerat domicilium, cellam vinariam effodi iussit.
 Sed non impune hæc impietas abiit. tertio die horrea
 omnia & pecus vniuersum, et ædificia nonnulla ignis
 incendio conflagrarunt. ipse vero sceleris auctor cū
 magnos ad honores iam peruenisset, multorum faci-
 norum reus, in atrum coniectus est carcerem, vbi sce-
 lestam vitam inhonorato fine conclusit. Cœnobium,
 quia opulentum erat, manet illud quidem etiā num,
 sed à mulieroso eodemq; Lutherano concionatore
 curatur: & quantum à primo illo distat ortu, tantū
 ab auita religione discedit. Hoc nimirum impulit
 spectatissimam feminam, tanti Ducis coniugē, vt qui
 locus nullum pristinæ pietatis vestigium retinebat,
 eum hoc etiam antiquæ religionis pignore spoliaret.
 Difficiles sese præbebant mulieres, cum ad eas mis-
 sus Sacerdos noster cum litteris & mandatis, sacrā
 imaginem auebat: postea tamen Ducis auctori-
 tatem coniugisq; reueritæ, non sine lacrymis eam à

se diuelli passæ sunt, flagitantes etiam à Ducis coniuge per litteras summis precibus, ne se tanto præsidio diutius carere pateretur, quo sublato certissimam perniciem incurrerent.

H E I L I G E N S T A D I E N S E Collegium.

HIC quoque ager gratiam retulit impensis laboribusq. non imparem. Quatuordecim è dæmonum castris ad Catholicorum signa traducti sunt. Mulier in ijs, quam malus dæmon per familiarem aspectum mutuumq. congressum ad filiorum necem acriter instigabat, consilij inops, cum aliunde nulla se spes opis offerret, confugit ad nostros, quorum hortatu cum rite maculas eluisset, eo est aucta robore contra hostiles insidias, vt tela non requireret acriora. Minister iam ætate prouectus in varijs hæreticorum cathedris tempus omne contriuerat. is cum secum ipse & leuitatem reputaret suorum, & pugnantia inter se Lutheri dogmata contulisset, medicinam eo ipso veneno, vnde ictus fuerat, sibi fecit. agere cū Sacerdote nostro cœpit, eiusq. de sententia rite confessus, in Catholicorum fidem doctrinamq. iurauit. Vehementer pupugit amentes hæreticos, Calendarij promulgata correctio, cuius auctoritatem vt eleuent, ac, si fieri posset, prorsus antiquent, nihil non moliuntur homines improbissimi. Dies festos, quos nulla ante religione colebant, eos nunc è veteri Calendario, quod pertinaciter retinent, quanta maxima

ma possunt pompa apparatusq. concelebrant, assiduò campanarum strepitu concursuq. plebeio. Qui vero porcorum instar sublato dierum temporumq. discrimine, in omni se ciborum cæno ac libidine volutabant, omniq. epularum luxu teterrimū suum refarciebant abdōmen: hos tam repentina incessit temperantiæ cupiditas, ut cum dies festus è suis fastis inciderit, pridie carnes de more non vorēt, sed legem sibi peruigiliū & inuitæ cuiusdam indicant inediæ. Postridie vero fraudati abdominis damna resarciunt, gurgustia popinasq. velut religiosa templa frequētant. in ijs natalitios hymnos & pium carmen eructant, & ad pias lacrymas largo se potu laccessunt. In tanto hæreticorum odio non desunt, qui pari humanitate officijq. nos foueant. Moguntinus Princeps, ad reliquas spes quibus nostram solatur inopiam, adiunxit annuos sumptus in apparatus Bibliothecæ, & in ædes instaurandas impensam. Sed Heiligenstadienses hæretici, plurimum hoc anno de sua contumacia & spiritu remiserunt. Plerique potestatem suis liberis faciunt diuina apud nos capiendi mysteria, id quod a suis ipsi impetrare parentibus ne firma quidem iā ætate potuissent, & qui per summam licentiam indicta ab Ecclesia ieiunia vorandis carnibus escisq. præpinguibus violabant, nunc eas ferocia posita, nec vorant propalam, nec exponunt venales. Adiuumento sunt interdum, quæ diuinitus à Catholicis supra vim naturæ geruntur. Puellæ adeo erat siue morbo, siue carminibus implicita lingua, & ad summum retorta palatum, ut vocem finire

gere aut verba non posset: sed Sacerdotis nostri precibus expedita, ad officium continuo rediit. Feminae aliae duae territae manibus mortuorum, adhibitis, nostrorum consilio, tum lustralibus aquis, tum precibus pro vita functis, omni se molestia terroreque leuaverunt.

In MOLSHEIMENSI Collegio, quatuor facta est sociorum accessio. Gymnasii auditores ut anno proximo pestilentia, ita hoc partim foeda dysenteriae lues, partim terrores bellici distulerunt: non desunt tamen optima adolescentes indole, qui frequentent. Quatuor sese haeretici ad Catholicam religionem applicuerunt, unusq, qui non modo ab Ecclesia, sed a caenobio quoque adhaesim & scorta defecerat, post longos tandem errores nostrorum ope ad Ecclesiam sese caenobiumq. recepit. Complures ad euomendam animi saniem plagasq. nudandas, quadragesimo aut quinquagesimo post anno perducti sunt. dataeq. aures non ciuibus tantum, verum etiam paganis: tanto cum Catholicorum bono, ut quibusdam in oppidis ad caelestes epulas turmatim accederent.

CONFLVENTINVM COLLEGIVM & Paderbornensis Residentia.

NEC minore studio Confluentinum Collegium in conseruandis animis laborauit. Catechismi vsus domi forisq. vulgauit: ad sacramenta complures eliciuit, ad veritatem etiam Catholicae disciplinae

plina non paucos. Matrona in ijs nobilis Caluini propugnatrix acerrima, adeo sese sacris litterarum monumentis instruxerat, vt qui cum ea dimicationem susciperent, eorum artes & conatus facile refuteret. Ea ne nostrorū quidem impetum congressumque pertimuit. & vero primo certamine semel iterumque sustinuit: sed vbi rationum se premi ponderibus animaduertit, ad extremum manus dedit, hæresim ciurauit, & in Ecclesiæ sinum gremiumque. refugit. ac ne ficta videretur illa conuersio, suscipiendis publice sacramentis testatam fidem ac religionem suam omnibus esse voluit: ac pro tam eximio Dei munere, qui sibi lucem in tantis tenebris prætulisset, postidie in montem quendam Dominica nobilitatum cruce secessit. Quo in itinere vbicunque Christi reperit perpassi trophæa, ea non sine magna commeantium vltro citroque. hominum admiratione, positis genibus adorauit. Ac ne liberi, quos duos habebat in hæreticorum disciplina gratuita, deprauatæ doctrinæ virus pestemque conciperent, vel potius vt euomerent iam conceptam; statim ex impurissima illa schola in disciplinam nostram transtulit, moribus imbuendos & litteris. Redijt ad lucem hæreticus alius, qui ex vsu cōsuetudineque nostrorū, ita in Catholica pietate se confirmauit, vt quanto magis antea Catholicos ritus & sacramenta detestabatur, tanto nunc studiosius veneretur & obeat. Tulit a Deo suæ pietatis non exiguam mercedem, sed eam, quæ perfecta iam virtute viris in hac vita persoluitur. In itinere ponderosæ arboris casu ad terram afflictus, semur grauius

uiter ictus est. utriusq. femoris comminuta sunt ossa
 miserandum in modum; quod plagæ genus non tam
 ipsum est peracerbum in præsentia, quam quod quo-
 tidianis curationibus recrudescit, nec tractari se vel
 leuiter patitur sine ingenti doloris amplificatione. Il-
 le vero tanto accepto vulnere non prius chirurgi ma-
 nus admisit, quam Sacerdote de nostris accito con-
 fessionis atque Eucharistiæ mysterijs aduersus eum
 cruciatum animum confirmauit. Eucharistiæ ea vis
 fuit, ut in suam sedem repõta compulsaq. ossa, nul-
 los omnino cruciatus doloresq. cierent, Pari studio
 subuentum est Lutherano cuidam, capitis reo, qui
 cum in ea mori perfidia induxisset in animum, quam
 cum nutricis lacte suxisset, Prætor humanæ salutis
 in primis sitiens, Sacerdotem ea de re nostrum per
 internuncium admonuit. Pater dissimulato Sacer-
 dotis ornatu (reus enim ne Sacerdotalem quidem
 ferebat aspectum) vna congregitur, is ad omnem
 pertinaciam instructus non modo inductione animi,
 quæ vna vim omnem habet, verum etiam litteris do-
 ctrinaq. nonnulla, spes Patris elusit. Pater moram
 interponendam ratus, redit postridie cultu ornatuq.
 suo; homo tamen nulla spe data salutis in amentia
 perstabat, agendum quippe precationibus erat, & mi-
 tigandæ cælestes iræ, ne pro meritis noxissq. sequirēt,
 dat se Pater in preces, & ad id quoque reum ipsum
 hortatur, ut diuinæ clementiæ humanæ imbecillitatis
 paulisper oblita, errorum tenebras pellat, clarissi-
 mumq. suæ veritatis lumen ostendat. Non temere fu-
 sæ sunt preces; cæpit reus suam Patri animam pro-
 pedicem

pediem è corpore migraturam summo studio multisq. lacrymis commendare, expiatisq. rite noxis ad eum diem, qui erat ei supremus, ita animum comparauit, ut appareret viuere in morte capisse, qui mortuus in vita fuisset. Ac ne deprecationum vis, unius tantum rei declaretur euentu, eodem præsidio reditus est delirus ad mentem, qui ex inimicitiarum rabie, de potestate mentis exierat, eademq. opera ad æquitatem ac pacem reuocatus. nec vero ijs modo qui alieno tenebantur odio, sed ijs etiam qui in se ferum strinxerant, allata pax est. In his quidam è demonis, cui se deuouerat est ereptus insidijs, ac ne sui ipsius carnifex esset, id quod non semel Diabolo instigante tentarat, omni ope ac contentione prohibitus.

In capiendis tractandisq. sacris mysterijs, animorum utilitas celebritati nil cedit. nam & malefacta in confessione præterita vel consulto vel inscienter, longo tandem interuallo nudata, & sinceris confessionibus expiata sunt. Matrona studebat illa quidem, ut videbatur, assidue à quotidianis noxis animam per purgare, semper enim à sacro illo tribunali cum gemitibus recedebat, sed peccato grauiore suppresso, nihil misella minus assequebatur. repentinus morbus immissus, (haud dubie diuinitus) morbum animi pestemq. discussit. statim accito Sacerdote nostro, intestinum virus euomuit, sanatusq. animus, intra spatium non amplius horæ excessit è corpore: tanto hilarius deferens terras, quanto exploratius habebat se extra omnè aleam periculumq.

• *Victurum* . Hi sunt præcipui Confluentini Collegij fructus.

Non eadem est felicitas PADERBORNENSIS agri . maxima hic apud improbos, quorum ingens semper est numerus, laboramus inuidia, nec ea tamen declinari potest, quando semel cum hæresum vitiorumque monstribus bella suscepimus . Conciones nostræ eo potissimum referuntur, ut quæ de suggestibus impurissimi in nos Parochi Ministrique vomuerint, ea redarguant atque confutent . In plebe corrupta sunt omnia, nullus est legum metus, nulla imperij disciplina . Quidam sacris astrictus, siue ad stimulandum clerum, siue ad concitandam seditio- nem, sacrilegas cum ciue nuptias publice inijt, & quidem nullius pœnæ denunciatione deterritus; quippe sperabat, id quod euenit, fore se aduersus vim publicam populi furore satis instructum . nunc cum muliercula vinit, pessimoque publico, ab ara se abiicit ad thorum . In tanta morum corruptela non desunt, qui vel nostram frequentent adem, vel rem Catholicam suo sustentent exemplo . Ferunt decus Canonici quidam, alumni Collegij Germanici, qui tum stans precandi temporibus, tum reliquis Ecclesiæ ritibus sancte seruandis, mirum est, reliquum clerum quam vehementer inflamment . Sed, quod in ijs admirandum est magis, vel in rebus asperis constantiam retinent . nam cum malos mores ferre non possint, nec vulgus imitentur aequalium; multa nimium acerba atque indigna perpetiuntur.


Tu-

Tumulus ille Colonienſis, de quo ſuperiore anno dictum eſt, à Truchſeſio excitatus, hic quoque aduerſus clerum Veſtphalos incitauit. Ab his ſunt per ſummam contumeliam & impietatem, templa & templorum ornamenta deiecta atque direpta, ut ne tenniſſimæ quidem reliquæ ſacræ veſtis appareāt, ſigna afflicta ac comminuta, diuina omnia euerſa ac violata. Sed non omnibus id impune ceſſit. Opiſex quidam dum contra Catholicos glorioſe ſe iactat, mirifice ſe tundendis ſacræ menſæ calicibus oblectari, repentina peſtilentia correptus, & cum reliqua familia fæde conſumptus, docuit ceteros quantum in violatione ac direptione ſacrorum piaculum amiſiſſent, quando ipſa quoque maledicta tam eſſent acriter vindicata. Quanquam, quæ eſt improborum denſiſſima nox, ne hoc quidem diuinæ ſeueritatis exemplum ſacrilegas hæreticorum manus à polluenda religione compescuit: tractare impudentiſſime ſacroſancta altaris myſteria non horruerūt, contumelijs & probris appetere, ſacras arcuſas perſcrutari, euertere inſtrumētum omne diuinum, promere de cuſtodijs, quæ tanquam religionum ludibria inter ſe deriderent, denique per laſciuiam accenſis facibus factoque agmine, ſupplicationis Catholicæ pompam imitari, impietate non minore, quam luſu. Mitigauit hanc ſeritatem Bauarici Ducis fratris nequaquam ſatis laudata pietas. is ut in Truchſeſii ſuſſectus eſt locum, excubare in omnem gregem cœpit, & quoad fieri poteſt, mulieroſi quondam Archiepiſcopi petulantiam, eiufque ſimillimorum audaciam

ferociamque comprimere. Sed tamen in tanta adhuc
scelerum impunitate, tantaque hæreticorum licen-
tia, quoniam humanæ iam industriæ vires pervene-
runt ad summum, divinæ sunt implorandæ: ut
aut sui nominis hostes funditus perdat,
aut quod magis optandum est, pro
sua clementia ab ea pravi-
tate ad saniora consi-
lia conuer-
tat.

213

P R O V I N C I A
F R A N C I A E.



Septem sunt in Francia domicilia, in usq. fratres ducenti circiter ac triginta. In Professorum Domo Parisiensi viginti. In Collegio tres ac sexaginta. Musciponti quinque & quinquaginta. Viriduni vndequadraginta. Biturigibus septendecim. Augi quatuordecim. Niuerni totidem. Obiere nouem. Adiecti sunt ad Societatem vnus & viginti.

D O M V S P R O F E S S A
Parisiensis, & Parisiense Collegium.

*I*N Professorum Domo Parisiensi, inchoata est ciuium beneficentia, excelsioris templi constructio, vbi iam fructuum vbertas cum laborum crescit impendijs. Ad domesticos autem labores, qui nihil habent hoc anno præcipui, accesserunt externi non minus viles frugiferique quam illi. Apud Santonas Aquitaniæ populos, quò Episcopi rogatu missi sunt nostri, templum quod sibi hæreticorū impietas vsurparat, Catholicis vindicarunt. In finiuimo vero oppido primarias familias, quæ biennio iam, intestinis

odij ardebant, non sine multa opera ac labore placarunt.

PARISIENSE Collegium, ut nouis adibus, ita nouis amplificatum est socijs. Duodecim in nouitiorum disciplinam recepti sunt, cum bonæ indolis omnes, tum philosophia exculi non pauci. Nec tamen alijs religionum familijs suus numerus defuit: quippe ad eas quindecim discesserunt. De frequenti sacramentorum usu nihil est noui, frequentia porro respondet uilitas; interdumq. mysteriorum communi- catione non modo animorum pulsi sunt morbi, verum etiam corporum. Quidam valetudinis vitio furere adeo cepit, ut exerceri putaretur à dæmone; præsertim quod cum latine nesciret, mens tamen furibunda latina verba fundebat. sed cum effrænatus & præceps furor nullis posset opibus contineri, à suis arte constringitur. accersitur ad eum Sacerdos è nostris, is qui sodalitis præerat Dei Matris: cum eo confessionem peccatorum institutam persequi usque ad extremum per amentiam non licuit. paulo post, habitis ad eum de pietate ac religione sermonibus, cum paululum remisisset furoris impetus videretur, spopondit si conualesceret, nomen se sodalitati daturum. Cum iterum morbus vrgeret, ad B. Ildeberti uinctus effertur, ubi nouem ipsos dies pro eius incolumitate, tum huius, quem dixi Beati, tum Beatæ patrocinium Virginis imploratur. omnino magnam vim habent subsidia cælestium ad impetrandum. non prius supplicandi factus est finis, quam inflammatus furor ille resedit: itaque pristina valetudini restitutus,

tus, suisq. pedibus domum regressus, sodalitati vti
spondederat, se dicauit. Alius magnæ & apud Re-
gem, & apud omnes auctoritatis, in morbo dicitur si-
bi iudicem videre visus pro tribunali sedentem, oris
habitu ad seueritatem composito; à latere autem ve-
hemētē accusatorem, sua enumerantem ex scripto
peccata, eorumq. grauitatem & pondus exaggeran-
tem, ipsa quoque confessionum delicta carpentem,
& benefacta, quæ ad culpam redimendam afferri
possent, extenuantem: tum inter lacrymas æstumq.
defensionis expergefactus, continuo confessione ani-
mum expiasset. atque hunc esse fructum ex eo viso
perceptum. Hæreticus Ministri cuiusdam notissimi
filius, mortifera accepta plaga, cum de carnis resur-
rectione, quid statueret non haberet, institutus à Sa-
cerdote nostro Catholicorum moribus ac legibus, ad
obeundam cum laude mortem se comparauit. Vt au-
tem ad sacramenta capienda ventum est, placuit di-
uinæ bonitati, vitam iam morituro producere, vt qui
nudus atque inanis decessisset a benefactis, diutur-
niore lucis vsura merita meritis cumularēt.

Redierunt ad Ecclesiæ obediētiam ex hæresi mul-
ti. Ex his quidam philosophiæ spatijs medicinæq. de-
cursis, cum huc eo animo se contulisset, vt doctrinæ
facto periculo, speciosos Doctōris titulos auferret,
inuitatus à familiari quodā ad audiendum Doctōrē
nostrum, deinde etiam ad colloquium, facile addu-
ctus est, vt susciperet de religione certamen. itaque
decem dierum disputationibus habitis, luce quadam
diuinitus illustratus veritatem aspexit. in patriam

postea reuersus hæreticorum turba refertam, dum imperitissimum quemque Ministrum, disputatione laceffit, Catholicam religionem mirifice commendauit. Scholæ quanquam recenti pestilentia solitudinis adiere discrimen, nunquam tamen copioso auditorum numero caruerunt. mille quingentorum is fuit, aut non multo secus. Nostri vim morbi prorsus effugere non potuerunt. absumpti sunt tres, in iisque Sacerdos, qui venientem ad se confessionis causa Sacerdotem, ne lues illa permaneret ad plures, cum bona venia dimisit: quod diceret nulla se grauioris conscientia culpæ teneri, leues autem noxas facile suorum fratrum precibus deletum iri. egregia profecto viri charitas, qui Sacerdotis extremo solatio carere maluit, quam cum eius detrimento oblatum munus accipere.

M U S S I P O N T A N U M E T Virdunense Collegia.

E Mussipontano Collegio, Societatis vitam ingressi sunt sex, nec minor in eo sacramentorum usus, quam in alio quouis.

VIRDVNI autem, vbi eorum est sedes, qui ad Societatem recentissimi veniunt, non pauca in ijs, quos ad hanc vitam Dominus conuocauit, diuinitus acciderunt. Quidam terrestribus maritimisq. periculis non sine Dei Matris numine liberatus, eiusq. secundum quietem recreatus aspectu, ad Societatem animum appulit. Ne alteri quidem diuina bonitas defuit,

defuit, qui cum eiusdem vitæ studio teneretur, rem tamē, quod suis esset filius vnicus, desperaret, in somnis dicitur esse visus pietate præstanti matri, è cœnosi lacus undis emersus, in liquidissimum se fontē immergere, ex eoq. sordes ablueret. nocte insequenti, iterum esse visus inter vtrumq. parentem velut torris ambusus; eoq. viso parentes admoniri facile concessisse filio, vt nostras vitæ rationes institutumq. susceperet. Alijs tamen cum parentibus pugnandum fuit. Adolescens cum mentem suam patri non dubitasset exponere, pater cum in patriam abductum, varijsq. modis exercitum in hæreticorum oppidum amandauit. Sed tantum abest, vt Catholicum pectus labes vlla resperferit, vt eius hospes oratione & vitæ exemplo permotus, filium ad scholas nostras Viridunum, ex hæreticorum disciplina traduxerit. ipse vero cum tandem extorsisset à patre, sibi vt abire liceret studiorū causa Lutetiā, non longo temporis interuallo tacitus transfugit ad nostros. Sed quoniam Viridunensem ciuitatem deformauerat pestilentia, magna oblata est tum veteranis tum nouis facultas ac materia pietatis. missi sunt qui laborantibus opē ferrēt: qua in re acriora reperita sunt studia eorum qui poscerent, quam qui mitterent. Habitarunt nonnulli extra Collegij ædes in pago, vbi ferendis incommodis non minor patientiæ campus, quam charitati patebat. Et quanquam ad ianuam prope nostram contagio manarat; placuit tamen Diuinæ clementiæ socios ab ea nostros integros immunesque seruare.

B I T V R I C E N S E E T

reliqua Collegia.

BIturvigibus ad explanationem Catechismi, quæ duobus locis superiore anno instituta est, accesserunt in duobus templis curialibus aliæ duæ, tanta cum animorum utilitate, vt id putetur ad suscitandum antiquæ pietatis ardorem, omnium optimum fuisse præsidium. Scholæ quoq. nihil nec de numero nec de pietate remittunt, constantq. auditoribus fere quingentis, iisque pietati Catholicæ sic addictis, vt eorum opera ducenta minimum hæreticorum, aut impurorum hominum volumina sint exusta.

NIVERNÏ diuturna pestilentia, quæ biennio amplius ciuitatem afflixit, cum ad id tempus nostri fuissent incolumes, quatuor tandem ex eo numero perierunt. In his Sacerdos quidam, cui cum potestas facta esset in salubriores migrandi sedes, & à pestilentie contagione tutiores, satius duxit esse, manere cum suis, suorumq. fratrum periculis, si quæ inciderent deseruire, quam fratrum charitate neglecta vitæ spatia prorogare: isq. cum è vita concederet vehementer se letari dixit, quod id, quod diuturnis à Deo precibus contendisset, vt intra hæc septa extremum vitæ diem morte conficeret, impetraret. Huius Sacerdotis exemplum fratrem alium, qui vel ipsum pestilentie nomen horrebat, plurimum confirmavit,
sic vt

sic ut paucis post diebus luem illam velut à Deo immisam acceperit letus. Et in summis dolorum cruciatibus, biduum triduumue partim orando Deo, partim confessione animo expiando consumpserit. Sed ut à Deo hoc morbi genus immittitur, ita eos, quos inuasit tam alacres reddit ad mortem, ut in beneficii loco numerent, quos abstulerit. e nostris quidem nemo non migravit alacriter. Sacerdos pius in primis, ut pestilentie vulnus accepit, sacerdote altero aduocato, canere iucunde cepit Augustini Ambrosijq. canticum præ letitia. cum autem virium languore, fusus sine mente sensuq. iacuisset, ubi respirauit, admotoq. medicamine ad sese redijt, conuersus ad Patrem, me miserum, inquit, cur in beatorum cœtum tam suauiter properantem reuocasti? cui cum pater illacrymans respondisset, fore ut quod iustam haberet moram, minime tolleretur; adhuc enim eius operam vsui Societati futuram: Quid, inquit, te feliciores luges? alios sequi decet, qui in cœleste illud sunt cooptati collegium, meæ quidem dissolutionis imminet dies: Cumq. id habuisset in votis, pijsque precibus postulasset, ut quo die Christus egisset animam, eo ipse quoq; ageret suam, dignus fuit, cui in eum diem mors diuinitus extraheretur. Sed non mirum est, quatuor e nostris pestilentia fuisse sublato, quæ ad quatuor hominum millia ex externis absumpsit. Interim socij nostri dum suis fungi muneribus minus commode possunt, satis tamen in eo lucri putantur facere, si moderate ferant aduersa. Non tamen à gerendis rebus omnino vacant. missi sunt in hæreticorum loca

ca nonnulli, quorum concionibus, nec ex hæreticis ad Catholicos, nec è Catholicis ad vsurpanda diuina mysteria pauci perducti sunt. Fremunt hæretici, atque huc & illuc se versant: & vt ad ineundũ de religione certamen Catholicos gloriose laceſſunt: ita vbi serio res agitur, & ad pugnam ventum est, pugnam ipsam turpiter abnuunt.

AVGI qui falsis rumoribus de Societate minus commode sentiebant; ij postea exploratis perspectisque rebus, eius opera tam libenter vtuntur, quam ante alieni erant ab ea. atque hæc caussa fuit, cur hoc anno, præter consuetudinem, pœnitentiũ ac communicantium celebritas aucta sit. Veteres

porro inimicitia deposite sunt, adhibitaq. desperatis animis medicina,

& qui secum ipsi gerebant
inimicitias, animamq.

& corpus perdere iam

decreuerant, ab illa

insania furore

que retra-

eti.

221

P R O V I N C I A
A Q V I T A N I A .



*Verunt in Aquitania Prouincia
socij centum ac duodecim. In Col-
legio Tolosano vndequinquagin-
ta. In Burdegalensi septem & tri-
ginta. In Mauriacensi decem. In
Rhutenensi sexdecim. Vita sancti
sunt quatuor. Ad societatem sexdecim aggregati.*

T O L O S A N V M C O L L E G I V M .

*Q*ui sit laborum fructus in Tolosano Collegio
frequens sacramentorum vsus ostendit. Eo-
rum qui Eucharistiae mysteria tractant celeberrimis
quibusq. diebus octingentorum numerus est: idque
fit à multis ea significatione pietatis, vt pijs ipsorum
lacrymis ad idem studiũ, qui eos inspexerint, excitē-
tur. Puella quãdam cũ ex obeundis diuinis apud nos
mysterijs didicisset, se castam integramq. seruare;
ne sibi à petulante adolescente vis inferretur, ex
eduiore loco se precipitem egit, multo magis casum
animi, quam corporis reformidans: sed tamen diuina
tutela castitatem corpusq. seruauit. Magnum ad
tollenda vitia præsidium, confessionum ministri fue-
re.

re. Femina nobilis cum viri molestias asperosq. mo-
res diutius ferre non posset, statuit se in profluentem
præcipitem dare, sed ter id frustra conata, venenum
coniugi parat; quod cum vim nullam haberet, con-
siliū de eo prodendo Calvinianis grassatoribus ca-
pit. Interim diuino instinctu permota venit ad no-
stros, sacerdoteq. cui confessa est auctore, statuit
Dei causa omnes illas molestias turbasq. domesti-
cas libenti animo tolerare, Alius quamuis gereret
inimicitias, à frequentandis tamen templis consue-
tisq. precationibus non discedebat: sed vnam pre-
cationem Dominicam, cum ceteras posset, septē cir-
citer mensium spatio recitare non poterat, re cum
Sacerdote nostro communicata, de eius sententia
conuenit inimicum, ab eoq. non quidem ab offenso,
sed ab eo, vnde ipse offensus esset, veniam postulat:
factaq. reconciliatione gratiæ, ad eam quoq. preca-
tionem lingua soluta est. Aeris argentiq. vis ma-
gna, ad eos vnde fraus ademerat, rediit. ab insigni
quidem feneratorum librarum argenti quinque mil-
lia, hoc est aurei mille sexcenti ac sexaginta sex, ab
alio mille, & ab alijs alia complura. Ab hæresi di-
scessere permulti, & quod admirabile est, puella
quædam, quæ omnes hæreticorum argutias argu-
mentationesq. callebat. Effectum præterea est con-
fessionum concionumq. beneficio, ut virorum mulie-
rumq. licentia in cænobia virginum penetrantium
reprimeretur. Et quoniam magnus fuit Calviniano-
rum grassatorum numerus, quos pœna mortis affe-
cerat, curatum est etiam quoad fieri potuit, ut nemo

ex eo numero (quamvis id hominum genus sit in primis pertinax) cum hæresi plecteretur. Ex Gymnasio sua quoque utilitas rediit. Religiosam disciplinam sequuti sunt ex auditoribus quindecim, quinque autem se contulerunt ad nostram. ex his quidam ante septennium cum Societatis ineundæ voto se obligasset, idq. subodorati parentes essent, continuo eum à litterarum studiis abducunt, & de nuptiis vehementer agitant. confecta pene res erat, cum ecce tibi diuino consilio subita sese mora interponit, & quod grauius est, utriusq. parentis interitus. Itaque cum se cerneret adolescens quibusdam tanquam vinculis expeditum & permolestis conscientie scrupulis angeretur, mittit ad nos, ut in Societate sibi esse liceret insidijs domesticis liberato, admonitusque ut rem domesticam ante componeret, idq. fecisset, breui Societatis factus est particeps. Alium adolescentem cum Pater huc venisset ut auerteret à proposito, fracto itinere brachio, domum se retulit: præclare doctus, quæ ei diuina extimescenda sit ultio, qui à diuino famulatu suos liberos retrahit. Duo vero cum aduersos ite parentes haberent, similem præ se tulere constantiâ. Nam cum Senatui Patres ut sibi filij redderentur, libellos supplices obtulissent, Senatusque rem quibusdam Senatoribus commisisset; Senatores par illud adolescentium à Collegio nostro in quodam cænobitarum templum traduxerunt, eosq. suis questionibus diu ac vehementer exercitos, non prius dimiserunt, quam planum factum est, eam adolescentibus mentem non artibus humanis iniectam, sed à Deo fuisse donatam.

BVRDEGALENSE COLLEGIVM.

B Vrdegale, confitentium & communicantium magnus est in xde nostra concursus. Confessionis autem medicina multi animorum curati sunt morbi, multa vlcera perfanata. Vnus Sacerdotis nostri monitis est adductus, vt duo aureorum millia, quæ male pepererat restitueret. atq; id ipsum facilitatum ab alijs. Mulier, quæ trigessimum iam annum sui viri cadem, vigesimum autem celauerat adulterium, concionibus permota nostris, non modo suum in confessione dedecus ac scelus aperuit, verum etiã vltro promisit, se diuturnos sænoris fructus, quod multum temporis exercuerat, reddituram. Adolefcens cum ad discendas litteras minus valeret ingenio, sæpeq. d doctore vt auditor negligens vexaretur, ecce tibi anxio mœrentiq., humana specie dæmon nigro oris habitu, scientiã ei pollicetur eiusmodi quæ non modo condiscipulos (modo ei sese dedat) sed ipsum quoque magistrum longo superet intervallo. Adolefcens cum Sacerdote, qui ei erat d confessionibus rem communicat, eoq. præsidio facile artes dæmonis & conatus elusit. Alteri adolescenti cerpices se fracturum minitatus est dæmon, si aut Iesuitarum scholas adiret, aut suum eis pectus aperiret: is tamen rem vniuersam ad Sacerdotem nostrum cum detulisset, minantis vires debilitauit ac fregit. Idem humanæ salutis hostis, cum cuiusdam in Christi fide constantiam labefactare ac conuellere

cona-

conaretur, amplissima diuitiarum spe proposita (erat enim à fortunis inops ac nudus) ut Christum abnegaret vehementer urgebat. adfuit repente bonus Angelus, cuius recreatus aspectu, malum dæmonem salutaris crucis signo fugauit. Is cum venisset ad nostros & rem Patri, cui confitebatur aperuisset, in animum induxit, non modo fidem Christo seruare, sed etiam in perpetuum penuria ipsa contentus ei vni vacare. Alius item familiarem dæmonem, qui domi miscebat omnia (nam & deijciendis in terram hominibus, & crebris lapidationibus molestiæ plurimum exhibebat) de Sacerdotis nostri sententia, sacramentis confessionis communionisq. perceptis, à se suisq. adibus propulsauit. Gymnasium auditorum celebritate floret, ex eoque numero ad speciosum magistri gradum plurimi promouentur. Nec inter eos postremas obtinet pietas. Nobilis adolescens cum à parentibus urgeretur, ut nostrorum disciplina relicta, in aliud se Collegium disciplinamq. transferret, non modo flecti nulla ratione potuit, sed cum de fratris cognouisset aduentu, ne ab eo, ut ille decreuerat, abduceretur, apud Catholicum tantisper latuit, dum ille recederet: quadragesimæ vero diebus cum oua ei inter dapes apponerentur, in ministro- rum caput illa reiecit, fremente hospite ac stomachante. Alius item nobilis adolescens in conuiuio ut Societatis famam contra concionatoris hæretici probra ac maledicta defenderet, iras Senatoris auunculi propter quem accubuerat, subire non dubitauit, ab eodemq. acceptum contumeliose pugnum

aequissimo animo tulit. Adolescens vix quindecim natus annos, quoniam diebus Sabbati carnes tantum inferuntur in mensam, annum iam integrum & eo amplius, arido se pane sustentat. Alij etiam ad vniuersæ fere Quadragesimæ victum, panem duntaxat & aquam adhibuerunt. Omnino sunt auditores nostri, quamuis medios inter hæreticos positi, hæreticorum tamen hostes acerrimi. quicquid librorum ex eo genere in manus venerit, id concremandum suis præceptoribus tradunt. magister vnus paucis mensibus ducentos a suis, ac triginta libros, partim hæresi, partim impuditiæ labè notatos accepit, alter centum: quos ignibus tradidere. Cernitur etiã huius iuuentutis ardor in amplectendo cœnobio. nam cum multi modo ad hos modo ad illos se transferunt cœnobitas, ad Societatem recepere se septem, fueruntq. qui & nobis & parentibus inscijs, ad absentem Prouincialem pedibus irent. quod tamen cum animaduertissent parentes per expeditos equites ex itinere reuocarunt.

RHV TENENSE ET MAVRIACENSE.

Quod ad pœnitentium numerum pertinet, ne Rhuteni quidem est desiderata celebritas. Auditiæ vniuersæ vitæ confessiones fere trecentæ, & tum confessionum tum concionum opera aliquot ad religionem Catholicam ab hæretica prauitate conuersi. Nec pauci ad ius ab iniquitate iraducti. Fiduciaris quidã, quales iam multi visuntur audita

dita concione cum eum, qui Sacerdotij fructus colligebat adisset, Nolo inquit amplius tibi fiduciarius esse. cum ille ut res paululum differreitur rogaret, Certum est, inquit, cibum non prius capere, quam ut hoc conscientiae onere leuer. Mitto gratiarum reconciliationes, easq. multas & graues, eorū præsertim, qui postea testati sunt, mortem se milles oppeturos, quam reconciliatae pacis iura rupturos. Vētitant ad scholas nostras adolescentes circiter septingenti, qui cum sint ad pietatem valde propensi, in eorum gratiā institutū est Deiparæ Virginis sodalium. Tres nomina Societati dedere. nec desunt, qui ex alijs quoq. cœnobijs, nostris se meditationibus excolant, eaq. est inter nostram & aliorum familiam tum consuetudo tū amicitia, ut appareat eas quamuis non sub eodem signo, sub eodem tamen Imperatore Christo mereri.

MAVRICI interdū non minores corporibus curationes, quā animis admouētur. Nam cereæ agni cœlestis imagines, & muliebres pariendi labores, & alios morbos ac pericula propulsarunt. itaq. multis familiare iam est, ut agrotare cum cœperint, ad nos statim salutaris remedij causa confugiant. Foris inter dissidentes conciliata pax est. Exhibant de more nostri in proximum pagum, ut Catechismo rudes populos erudirent, cum eo ciues è duabus ciuitatibus capitali odio dissidētes conuenerant. res non sine magna cæde, non eorū modo, qui armis instructi iam erant, sed etiā spectatorū, qui religionis causa confluxerant, videbatur transigi posse. tym-

pano signum dabatur ad pugnam, & funesta prolu-
sionis loco, frequens utrinq. sclopus explodebatur.
non tulit Deus, qui eo nostros vel inscientes impule-
rat, ut tot animarū iactura fieret. sociorum studium
incendit, & charitatem illam alienæ salutis, quam in
eorum pectoribus ac medullis ingenerat, excitavit.
itaq. seditionem illi tollere aggressi tandem Deo du-
ce consecuti sunt, ut positis utrinque armis amici
abierint, qui accesserant inimici.

MISSIO VASCONICA & Agennenfis.

IN duobus Vasconie oppidis, ubi diu aliqui de
nostris hæserunt præter cetera, reuocata est ve-
tus illa consuetudo ter salutandæ quotidie cæli ter-
ræq. Reginae. Dataq. opera, ut multi, quibus
vel Sabbatho vel sexta feria vetitæ esæ religio-
ni non erant, ab ijs in posterum temperarent. Et ut
aqua benedicta, cuius vix ullus erat in templis vsus,
in priuatis quoque domibus & cubiculis appareret.
Xenodochium quoniam neglectum & desertū pro-
pemodum videbatur, effectum est, ut quo plures ac-
ciperet hospites, lectorum numero augeretur. Ini-
mici etiam reconciliati & catechismo institutus est
populus, & alia eiusdem generis facta permulta.

AGENNI, quæ Episcopalis est sedes, tres de
nostris toto ferme anno versati sunt. Agennensium
autem ea est in nostros homines familiamq. propen-
sio, ut pristinam illam de exstruendo nobis Collegio
volun-

voluntatem, non modo non abiecerint, verum etiam
 auxerint. profuit ei rei Regine Nauarræ tū cohor-
 ratio ad ipsos ciues, tum in Societatem nostram be-
 neficentia. nam & ad templum exædificandum non
 mediocrem pecuniæ summam dilargita est, & futu-
 ro Collegio annuum decreuit argentum: pia semina
 quandiu sacramenta apud nos obijt, obijt autem fre-
 quenter, magno fuit ad id ipsam ceteris ciuibus inci-
 tamento. Ex hæreticis non pauci dedere manus &
 parere cœperunt Ecclesiæ, cuius imperium detre-
 ctabant. Sublata inter Catholicos etiam est vescu-
 di carne libertas. Et quoniam multa superstitionum
 genera in plebē dæmon inuexerat, fuscæ de supersti-
 tionibus disputatū; tanto cum eius ecclesiæ compen-
 dio, vt Parochus rogarit Episcopum, vt ea de re con-
 cio sæpius haberetur à nostris. In hac vrbe statim ac
 Sacerdos noster diuinæ legis præcepta explanare
 publice cœpit, tantus factus est virorum mu-
 lierumq. concursus, vt Calvinianus Mi-
 nister, qui per idem tempus con-
 cionabatur, Catechismū no-
 strum, agrius se fer-
 re diceret, quā
 conciones.

P R O V I N C I A L V G D V N E N S I S.



Epitem in hac Prouincia sunt domi-
cilia: Socij centum & octoginta
quatuor. In Lugduensi Collegio
duo & viginti, in Turnonensi sex
& triginta. In Auenionensi qua-
tuor & quadraginta. In Billomenfi quinque & vi-
ginii. In Camberienfi duodecim. In Diuionensi vigin-
ti. Dole tres & viginti. Vita excessit vnus. Ad So-
cietatem accessere quatuor & viginti.

L V G D V N E N S E E T T V R N O N E N- se Collegia.

Lvgduni præter ea, quæ de more geruntur, quî-
dam Lutheranâ hæresim in omni vita secta-
tus, cum in morbo grauissimo à Sacerdote nostro in-
uiseretur, inductus eius monitis est, vt ad mortem ri-
tu se Catholico cõpararet. Quare non ita multo post
magna cū ciuitatis gratulatione, tū sua incredibili
voluptate decessit. Itum præterea frequenter ad
pagos. hæretici in eis ad Catholicam religionem vo-
cati nonnulli, Sacramentorum excitata frequentia,
solo æquata templa vel pene diruta; restituta: &
alia

alia de genere eodem cum utilitatis laude perfecti.
 TURNONI res litteraria visa est si non auditoribus, certe fautoribus augeri. Viri principes cum huc frequentes ad stata comitia conuenissent, crebris tum præmiorum ac dialogorum spectaculis, tunc alijs discipulorum exercitationibus delectati, eo in nos incensi sunt studio, ut alijs instituendis fundandisq. scholis annuos redditus attribuerint. Idem cum Domino Turnonio vehementer egerunt, ut hæreticorum quoque filijs, qui partim ne Catholici fierent a parentibus prohibebantur, partim nostris legibus arcebantur, liber pateret accessus. Ille vero etsi nullum dedit in præsentia responsum, nostris quippe nondum consultis, ubi tamen eos ea de re admonuit, veniendi potestatem fecit, modo nec ante decimum quintum annum Catholicorum legibus astringerentur, & tamen pædagogis Catholicis traderentur. Etenim edicto quoque Regio libertas datur, & usu didicere iam nostri, puerulos non modo ipsos veritatem studiosè complecti, sed suas quoque parentes ad eam solitos reuocare. Iam cum doctrinarum studio certauit pietatis ardor. Adolescētes octo egregijs animinaturæq. donis instructi, sese Societati nostræ per deuotionem addixerunt, ac nisi per adium staret angustias, multo plures recepti iam essent; tanta est eorum, qui id flagitant multitudo. Ex his unus dum de Societate sedulo cogitat, magnum suscepit cum patre certamen. nam dum nihil paternis minis precibusq. cæccedit, pater inuitum filium nuptiarum societate deuincit, solumq. in cubiculo cum futura

sponsa concludit. Sed cum omnia virtus iuuenis superaret, pater ut ad ultimum remedium, descendit ad verbera: ille vero tantum abest, ut aliquid cesseris de sententia, ut tanto in ea firmitus solidiusque perstiterit. Miles hæreticus cum ad nobilem quendam hæreticum pergeret, ut in eius comitatum admitteretur, a recto itinere Dei nutu digrediens, Turnonem appulit: cumque ad Collégium mox venisset, unam ex inferioribus scholis ingressus, ubi tum pueris rudimenta christianæ legis explanabantur, paulatim animo commutari se sensit, & studendi cupiditate quadam incendi: missis scholis rem cum magistro communicat, ab eoque multo excitatus ardentius, continuo ad litteras animum adiicit, expiatisque confessione peccatis, ad Catholicos sese aggregat; neque hac vulgari vita contentus, maius aliquid perfectiusque molitur. Pari cum utilitate lustrati sunt pagi. Vicus quidam adeo hæresi erat infectus, vix ut unus aut alter in eo Catholicus inueniretur, sedulus nostrorum labor obtinuit, ut vix quisquam reperiatur hæreticus. In alio pago cum Ministris hæreticis initum est de Religione certamen, editisque libellis sic eorum obstructa sunt ora, ut iam fracti ac debilitati quiescant. Sacerdos alius varijs concionatus in locis, novem circiter hæreticos ad lata domini pascua cavilasque reduxit; in ijs medicum non minus opibus quam litteris locupletem. Hic diu atheos, post Calvinista, ad extremum Catholicus per nostros factus, coram multis quos ipse deceperat, hæresim eiuravit, ab iisque, multitudine inspectante, veniam petere non dubita-

bitauit. In morbum cum incidisset, multis ad se uenientibus (erat enim de primarijs) verbo & exemplo non mediocriter profuit. cum Sacerdos noster discederet, velut ipse quoque discessurus esset è vita, domesticos conuocauit, eos etiam atque etiam obtestans, qui per hæresum saltus errarent, ad ouile se Christi referrent: statimq. ingrauescente morbo vocem amisit. Sed aliquo spatio temporis interiecto cū cum noster reuideret, loquendi facultate recuperata, Patrisq. prehensa manu, Te (inquit) vnum expectaui, qui mihi natus es ad salutem. tibi pro tuis in me officijs ac meritis ago gratias, Deumq. vt ipse referat obsecro, nec ita multo post, Deo se ipse commendans excessit è vita: Eiusdem Sacerdotis opera, sex mensium spatio homines sexaginta, qui nec Catholicis nec hæreticis adhærebant, ad Catholicorum numerū sunt adiuncti: qui vero minus in religione sibi constabant confirmati ducenti. Ciuitas quædam hæresibus notatissima, vbi conciones Pater habebat, indicta supplicatione multis passuum millibus, id quod ante quintum & vigesimum annum factum nunquam erat, longo virorum ac mulierum agmine processit ad pompam. Ac per eam occasionem graues sedatæ sunt rixæ. Mulieri nobili, filius magnam auri vim abstulerat, & ad materna furta aliorum domesticorum adiungebat iniurias. hunc ergo mater quoniam continere in officio non poterat, remis volebat addicere; sed noster ille, quem dixi, diuina fretus ope, hortatus omnes, vt solemnī quadam peccatorum confessione animos expiarent, perditio inueni-

ni, ut à matre ceterisque quos læserat veniam peteret, persuasit.

BILLOMENSE, CAMBERIENSE, & Dolanum.

Billomense gymnasium finitur auditoribus mille ducentis; nec defunt, qui ex eo numero ad nos se transferant: cumq. id multi percipiunt, tum consequuti sunt tres.

CAMBERIACI, erat vir Senatorij ordinis non procul à morte, sed ut est aulicorum consuetudo, admonere herum sui discriminis ausus est nemo. nostri ad agrum admissi, non modo ei quāto in discrimine versaretur ostendunt; sed ita & consilio & precibus præsto sunt, ut nemo ad mortem paratior accessisse videretur. Eucharistie viaticū cū deferretur, repēte è lecto profiliuit obuiāq. processit, adeoq. pie de religione Catholica ad eos, qui circumstabāt, disputare capit, lacrymas ut multis excusserit. Libros etiam è bibliotheca minus Catholicos, ne cui post obitum suum fraudi essent, asportandos curavit ad nos, ut comburerentur: denique venia à domesticis postulata, si qua in re quempiam offendisset, obdormiuit, ut speratur, in Domino. In eo quoque nostrorum videtur opera profuisse. Tanta nuper ex perpetuis imbris extitit inundatio, ut totius pene urbis viæ fluviorum instar decurrerent; cumq. diurnæ pluviæ nullam moram interponerent, ciuesq. in summis ædibus velut obsidione quadam tenerentur; iumenta vero, quæq. in tabernis merces, quæq.

in

in cellis erant cibaria, aquarum prope fluctibus interirent: tota ciuitate stupente; vnus è nostris con-
 scenso equa per inundantes aquas conuenit magi-
 stratus, hortaturque si ciuitatem velint incolumem
 ad placandum se numen cœleste conuertant: Magi-
 stratus quicquid ille vellet iubendi sciscendiq. pote-
 statem faciunt. Pater trium dierum supplicationes,
 ieiuniumq. ad auertendas diuinas iras instituit; nec
 ita multo post imbrum remitti vis cœpit. Curatum
 est publicis & priuatis cobortationibus, vt Sanctissi-
 mum Christi corpus, maiore tum luminum tum co-
 mitatus ornatu deferretur ad egros; quæ res vt Ca-
 tholicis voluptatem, ita inuidiam hæreticis peperit:
 quidam enim ex ijs frédens continere se non potuit,
 quin identidem scandalum exclamaret. Sed vt ipse-
 met Princeps, Sabaudie Dux, Catholicæ pietatis de-
 fensor egregius tam pium institutum sua interdum
 præsentia confirmaret, effectum est: & quidem ali-
 quando venit in templum, & vmbellam, sub qua de-
 ferebatur Eucharistia; à suis gestari ac sustineri vo-
 luit: ipseque venerabundus, Christi corpus totumque
 agmen euntium ac redeuntium Sacerdotum prose-
 quutus est. aurum etiam in eleemosynam contulit;
 vnde census aliquis comparetur, quo cereæ faces re-
 liquusq. in hunc vsu apparatus possit esse perpe-
 tuus. Atque hæc satis de Camberiensî Collegio, si ta-
 men illud addidero, annuum Collegij censum non me-
 diocriter auctū esse, nam Prioratum Abbas quidā
 nobis attribuit, & quandiu vita suppetit certā quot-
 annis pecuniam.

DOLÆ auctus est Collegij numerus, cæptæq.
conscientiæ explicari quæstiones. Qui nobis dant
operam, quingenti circiter numerantur: atque is nu-
merus quotidie crescit, præsertim quod exedræ re-
centes ædificatur. Et quo commodius sit iter ad scho-
las, ciuitas tum vias quasdam muniendas, tum lon-
gissimam porticum extruendam suis sumptibus cu-
rat. Plerique iam crebrius tractant diuina mysteria.

Sed quo minus sint plures, tum loci faciunt
angustiæ, tum Sacerdotum penuria. ve-
rum breui speramus exstructum

iri templum, ad eamq. rem

quatuor francorum

millia, hoc est

aureos

mille trecentos & triginta

sres, Rex liberali-

ter eroga-

uit.

237

P R O V I N C I A

B E L G I C A .



Bijt Belgicam hoc anno Prouinciã P. Oliuerius Manareus, eo consilio missus à P. N. Generali, vt represso iam hereticorum furore, Belgicisq. rebus ferme compositis, Collegia Societatis inspiceret. Itaque eius aduentu sustulisse videtur oculos hæc Prouincia, quæ iam dudum afflictæ bellis, amissisq. strenuis de Societate viris ipsa temporum iniquitate ita iacebat, vt ægre sese aliquando erigere ac respirare posse videretur. Ac præter ceteras calamitates, omnia ferme Collegia incredibili premebantur inopia, multiq. ob eã causam adolescentes rebus omnibus ornatissimi, qui Societatis studio flagrabant in nostrum numerum admitti non poterant. eo autem durior erat egestas, quod nulla se spes leuationis aperiebat. Feditum erat Carolo V. Imperatore, ab Ordinibus (ab his enim rerum summa pendet in toto Belgio) Senatus Consultum; quo cauebatur, ne vel ad Ecclesiasticos homines bonorum possessio perueniret, vel ulli Religiosorum ordini domum aut familiam in his regionibus obtinere Regio sine consensu liceret. ita nullus amicorum benignitati locus relinquebatur. Ergo in eo maxime sibi elaborandum esse

P. Vi.

P. Visitator existimauit, ut eo decreto ac lege, quæ tantopere nostris studiis conatibusq. refragabatur, nostra Societas solueretur. totaq. re Deo precibus commendata, cum Parmensi Principe, cui semper gratissimus fuit, agendum censuit. exposuit illi omnem instituti ac disciplinæ nostræ rationem, tantumq. suo labore industriaq. perfecit, ut rebus diligenter expensis de communi sententia Priuati Brabantiniq. Consilii, ceterorumq. Ordinum, in has denovo Prouincias sit admissa Societas. neque modo data est ea, quæ petebatur, exceptio, sed etiam libere utendi potestas suis iuribus ac facultatibus. Tum primū igitur respirare in Belgia visa Societas est. tum aggregati fratres amplius triginta idonei omnes & ad Societatem quodammodo facti: restituta præterea Brugis Societas ipsa, unde annos iā aliquot exulabat: constitutum recens Collegium Ipris: iacta fundamenta futuri Collegii Valencenis: suscepta Residentia Gandauī: multa Collegia & fratrum aucta numero & scholarum. Sunt enim quasi quædam ex nostris discipulis seminaria, Louanij quidem Theologorum, Audomari Rhetorum, Leodij eorum, qui conscientie cognoscendis rationibus operam dent, instituta: ex quibus idoneæ quotannis operæ in omnem Christi vineam dimittantur. Sed cū externæ rei diligens habita ratio est, tum interioris & diuinæ præcipua, Domi quidē nihil, quod ad perfectam virtutis officijq. rationem faceret, prætermissum est. Itaq. quod reliquam hoc anno Societatem fecisse diximus, ut se quisque nostrarum mediatio-

tationum exercitijs ad pietatem exacueret, & diuino spiritu quodammodo renouaret, id hic multo ardentius ab vno quoque nostrum (sic enim huius Prouinciæ status exigebat) susceptum est. Foris autem inducta ab eodem Visitatore Catechismi consuetudo eaq. tum vulgo ardentibus recepta studijs, tum a Magistratibus decreti auctoritate comprobata, grani proposita multa, si quis è Ludimagistris Catechismi explanationibus cum suis auditoribus non intersit. Diebus festis excursus ad animas in pagos est, habitaq. de more conciones magno paganorum concursu. Atq. hæc potissimum, quietis iam rebus, Visitatoris aduentu perfecta sunt. Numerantur in hac Prouincia Societatis Collegia septem, Louaniense, Dyacense, Audomarense, Traiectense, Brugense, Leodiense, & recens. Ipse. Domus Probationis vna Tornacensis. Residetiæ tres: Valencenis vna, altera Gandavi, tertia Cortraci: reliqua duo. Collegia Cameracense & Antuerpiense restituta nondum erant. Quos autem de nostris in quoque loco versentur, litteræ non significant, nam quæ ex hac Prouincia perlata sunt, ea temporum vitio adeo mutila & manca sunt, vt plenos fructus charissimorum fratrum gustare non liceat. Nos quæ accepimus, ea reddimus. quanquam si verum querimus plura reddimus. nec enim nobis ipsi desse potuimus, quo minus has inchoatas & dimittas litteras, ex ijs qui res aliunde norunt, & explorete norunt, quodammodo suppleremus.

COLLEGIVM LOVANIENSE
& alia quædam.

Louanij pauciores solito de Societate fuerunt. in tantis enim præliorum incommodis, tam turbulentis afflictisq. rebus, nostri sat habuerunt non modo suas tueri sedes, sed etiam vitas & corpora. Tamen in tantis calamitatibus animorum saluti non mediocriter profuerunt, partim sacramentorū administratione, partim suis obsequiis, lustrandisq. tum custodijs publicis tum xenodochijs. Nutrit enim hæc ciuitas valetudinarium per amplum, quo frequentissimi ex Regio exercitu inopes curationis causa concesserant, quibus nostri per emendicatas pecunias fuere subsidio. Cumq. domus hospitalis tantam ægrorum turbam capere nullo modo posset, non modo tectorum opportunitate apud pios homines prospexerunt, sed ipsi quoque non paucos suas in ædes acceperunt, quos paucorum curatione dierum, valentes atque incolumes dimiserunt. His officijs æquos pariter & iniquos valde sibi Societas obligauit. Itaque cum in maximis periculis, & omnium rerum inopia, ne Religiosorum quidem ædibus militum parceret insolentia, a nostris tamen sese foribus non sine ingenti ceterorum admiratione continuit.

A DVACENSI Collegio, altera quoque acceptæ sunt litteræ: nos ex virisque, quod visum fuerit seligemus. Triginta in hoc Collegio versantur. In nouem vrbis partibus Catechismus cæpius est explanari.

nari. res adeo noua atque inusitata ciuibus, ut viri etiam ætate prouecti, nunquam se quæ in ea explanatione traduntur, audisse confirmant. Gymnasij numerus etsi partim erat pestilentie periculis, partim bellicis tumultibus imminutus; sensim tamē Deo fauente redintegratur. Sexcenti numerantur auditores, in usq. eximiæ indolis adoleſcētes, & ad pietatem sua sponte propensi. Est ad inflituendos huius generis adoleſcentes, Dei Matris Sodalitas, in quam vniuersum fere Gymnasium nomen dedit. probro enim vitioq. vertitur, si quis in eam non sit adscriptus. Ex hac autem sodalitate tanquam ex vno fonte, duæ fluxerunt aliæ, altera in quam grauissimus quisque recipitur: altera seuerioribus astricta legibus, in quam nemini patet aditus, nisi vel religiosus Cænobitis, vel qui ad perfectam absolutamque virtutem animum adiecerint. atque horum partes sunt, veterum Monachorum disciplinam imitando referre, quantum & natura loci, & hominum conditio patiatur.

AVDOMARI, præter ceteros laborum fructus, hæretici tres ab errore pertinaci resipuerunt. Auditores Gymnasij sexcenti circiter numerantur: habetq. suos fructus Sodalitas Dei Matris: in eamq. adscribi Episcopus cum Canonici voluit, virisq. primarijs. Sodales autem ita suæ saluti student, ut cum sese offert occasio, non negligent alienam. itaque alius alium ad nos adducit, & ad æternæ vitæ studium inuitat.

BRVGENSE COLLEGIVM
& alia.

BRugas,expulsa ab hæreticis sexennio ante Societas, hoc deniq. anno, vt diximus, quo in ditionem Philippi Regis ciuitas redijt, ipsa quoque renocata est; idq. tum procerum postulatis, tum Regij Consilij Præsidis beneficio. Cum autem reuocati nostri & antiquarum ædium & rei familiaris angustias obijcerent, tributa ijs est à Summo Pontifice, Rege ipso petente, Abbatia quædam vrbi vicina, quo rerum gerendarum caussa Sacerdotes missi sunt aliqui. Ne hic quidem adolescentes desunt egregij, qui Societatis ineundæ studio teneantur. Adolescens paternorum bonorum vnicus hæres, pluris hereditatem ducens æternæ vitæ, quam fluxæ atq. mortalis, Societatem habere cœpit in votis. Is vix tredecim natus annos, & in ciuitatē susceptus hæretica, vt hæreticorum Ministro operam daret, nullis neque minis, neque blanditijs adduci potuit. Minister, patria accepta potestate, virgis eum verberibusq. compellere, grauiter obiurgare, nihil intentatum relinquere vt obsequentem suis dogmatibus faceret. sed quanto ille vehementius puerilem animum fatigabat, tanto puer magis contra Ministri obfirmabatur insaniam. Duæco vrbe proximis annis à Philippo Rege recepta, statim ad Societatis collegium eò se contulit: vbi eos habuit & in litteris & in pietate progressus, vt qui eum de facie norit,

nun-

nunquam tantum illi tribuat ætati. Puer in amplissima fortuna ab ijs omnibus abhorret, quibus non illa modo ætas, sed etiam corroborata capi solet. Pedagogum habebat vitæ ducem atque custodem: sed ab eo non tam ipse hausit viuendi præcepta, quàm dedit, magister enim præclaro discipuli inuitatus exemplo, Societati nostræ se addixit. Ad Conuiuuiū aliquando vocatus, cum ab immoderatis escis ac potationibus abstineret, nec imitaretur dissolutam conuiuarum licentiam, amici tantam non ferentes seueritatem, quid agis, inquiunt, Iesuita nobis hodie videris. Tum ille, quid tum postea, si quando futurus sim Iesuita? atqui scitote me propediem fore. admirabilis animi magnitudo, tali præsertim in vrbe, tali in ætate, tales apud amicos & propinquos, qui cum de religione male, tum de Iesuitis pessime sentiebāt.

IPRENSE, vt dixi, Collegium nouissimum est, eius constituendi vebemens auctor fuit Martinus Rictonius Iprensis Ciuitatis Episcopus. Is Patri Prouinciali ad aulam Regiam litteras dederat, quibus Catholicæ Maiestatis auxilium apud Summum Pont. postulabat, vt reditus quosdam duorū Cœnobiorum, quæ deserta iam erant, vna coniungeret assignaretq. Collegio. Sed quanquam Episcopi mors, eius consilia præuerit, non tamen inanis fuit viui conatus, nam in Regis potestatem Ciuitate redacta, destinati sunt Ipras duo Patres ad iacienda fundamenta Collegij. Qui tum trium circiter mensium spatio, in ædibus cuiusdam Parochi liberaliter haberentur, cum tamen extrema fame Ciuitatem diu-

turna vexasset obsidio, officiorum Societatis sedula exercitatione, ita omnium sibi animos adiunxerunt, ut quam primum inchoatum iam prope Collegium, promouendum cuncti decernerent. id quod ab ijs videmus re ipsa perfectum.

TRAIECTI quoque res Catholica prospero cursu procedit. Ex decem armatorum civium milibus hæreticorum, trecentos tantum (multis partim pestilentia partim ferro deletis) superesse Dominus voluit. Nec modo Catholicorum numerus, sed etiã religio ac pietas augetur. Senatus gravi sanxit edito, ut cum ad agros Sacrosancta Eucharistia deferretur, eam vicini (id quod antea ne cogitabatur quidem) instructi facibus comuentur. Edixit etiã, ne quis ludum aperiat, nisi Magistratu consentiente, & fidẽ ex usitata formula ante professus. Erant hic biennio ante, Grammaticæ scholæ duæ, ex manent ambæ, & ad illas accessit tertia poetices. Magistratus oppidi, ut suum in Societatem animum declararet, præter cetera dona, ad amplificandum laxandumq. Collegium ædes ei proximas assignavit. Discipuli, qui vel ex remotis etiam oppidis huc se conferunt, non minus ad pietatis quam ad litterarum studia propendent. Quotidianum est autem & cum omnibus pene commune, ceteros etiam Sacramentorum causa ad nos allicere, suos domesticos conscientia discutiendæ & observandi sese, Missæq. audiendæ rationem cum utilitate docere, iurisiurandi excrandiq. consuetudinem tollere, alios denique perniciosos mores ac vitia, suo exemplo atque oratione reci-

recidere. Ex his quidam ebrium militem, uxorem suam conuiuijs ac verberibus male mulctantem, adeoq. furijis agitatam, ut stricto pugione quem sores obuium obiulisset, inuaderet, blande primum aggressus, sensim suis colloquijs ad confessionem communionemq. perduxit. Catechesis festis diebus tanta auditorum frequentia traditur, ut bona pars aurem sacelli fenestris, ostioq. admouere cogatur. Ea tribus alijs explanatur in locis, tintinnabulo pueris populoq. coactis. atque hoc praesidio, spes est fore, ut haeresibus contaminata ciuitas, Deo adiuvante purgetur, praesertim collaborante Senatu & catechismi scholas obeunte; curanteq. ut quam plurimi semper perveniant.

LEODIENSE ET RELIQUA.

LEodij nostrorum vigilijs ac diligentia ab haeresi reuocati sunt aliquot: fueruntq. nostri tum Italis tum Hispanis, qui ex castris egeri confluerant, non ijs tantum rebus quae ad animi, sed ijs etiam quae ad corporis salutem facerent, adiumento. Templi res, & copia ornamentorum augetur & pretio. In residentia S. Seuerini, quae biennio ante huic est adiuncta Collegio, non exiguo cum fructu nostri versantur. Pagi incolae, quoniam domui pagus adiungitur, nostrisq. subijcitur, quotidie magis ad morum modestiam & pietatem adducuntur, E locis etiam

remotioribus rusticorum turba concurrat, cum audiendæ concionis, tum purgandæ conscientiæ causa. Sed potissimum bis in anno: Circumcisionis dominicæ ferijs, & Visitationis Beatissimæ virginis: proximis autem Circumcisionis ferijs, sexcentis amplius sacrosancta Eucharistia ministrata est: præter ingentem eorum multitudinem, qui promerendæ tantum apud nos indulgentiæ causa, alibi sacramenta percipiunt. Tenet eo die sacrosancta communio ad horam vsque primam pomeridianam. ad id tempus alacres complures, & ieiuni perdurant, quamvis ex longinquis venerint locis. Die vero Visitationi B. Virginis festo, quam plurimi item longo itineris intervallo conveniunt, voti tantum persolvendi causa, quod B. Eligio, quem in vno e templi altaribus venerantur, pie nuncuparint.

Admisit Probationis domus TORNACENSIS complures hoc anno novitios, sed in his Sacerdotes octo, quorum vnus Theologiæ Doctor, eam ipsam aliquandiu in Academia Duacensi Regio nomine professus est.

C O R T R A C E N S I S E T

Valencenensis sedes.

Cortracum, oppidum est in media Flādria peramœnum atque hilare, ut incolarum ingenia. Huc superiore anno de Societate missi sunt quinque virgen-

urgente & flagitante Senatu, qui nostrorum alle-
ctus officijs, ad Collegium animum vehementer
adiecit. Excepit igitur venientes tecto percom-
modo, cum instrumento omni domestico pecuniaq.
in usus vitæ permulta. Aedibus adiuncti sunt hor-
ti, ijque perampli & ab arbitris liberi. Obeunt no-
stri sua quisque munera magna civium tum volu-
ptate tum bono. Senatus ut copiosæ iuventuti pro-
spiciat, quæ culturam desiderat magistrorum, de
construendo nobis Gymnasio, si ita Prouinciali vi-
sum fuerit, sedulo cogitat. Clerus, humanitatem
in nos suam non obscuris ipse quoque declarat in-
dicijs. Copiam nostris sui templi fecit ad exsequen-
da Societatis münera. Traditur autem doctrina
Christiana pueris, ad eamq. illi ut etiam ad rem di-
uinam, quæ apud nos peragitur, ex omnibus scholis
Flandricis studiose conueniunt.

VALENCENAS ut nostri venirent, egerunt
per litteras apud Parmensem Principem, Magi-
stratus viriq. primarij. Tertium iam morantur
hic annum, eosque tum magistratus sua liberalita-
te sustentat, tum lautis eleemosynis populus. Is
quemadmodum ad humanitatem & urbanitatem
totus est factus, ita hæresi usquequaque notatus.
Nostrum cum suspicarentur initio, exceptum iri se
scommatis & maledictis, accidit longe secus. nam
& omnes sese faciles præbuerunt, & qui Catho-
lici inter eos erant, tanto impensius suam in nos stu-
dia contulerunt.

Hæc à restitutis Belgicis rebus, de Societate nun-

tiantur. Sed maiora ponuntur in spe, nunquam enim
 magis Christiana res crescit, quam cum cala-
 mitas antecessit. Interim pauca hæc,
 quæ sunt quasi specimen futuri
 temporis, ad agendas im-
 mortali Deo gratias
 missa existi-
 mentur.

PROVINCIA

TOLETANA.



Vit in hac Prouincia nostrorum numerus ad quingentos. Toleti septuaginta: in Professorum quidem Domo quinquaginta: in Collegio viginti. Madridi sexaginta. Centum amplius Compluti. Quatuor & quadraginta Murcia. In Conchenſi Collegio sex & triginta. In Placentino triginta. Totidem in Hucenſi. Duo minus in Belmontenſi. In Carauacenſi duo & viginti. In Talabricenſi viginti. In Ocanienſi fere totidem. In Securitano quindecim. In Naualcarnerenſi duodeuiginti. In Domo Probationis Villaregienſi amplius sexaginta. Duo migrarunt è vita. In Societatem viginti minimum sunt adſcripti.

TOLETANA PROFESSA

Domus.

E Toletana Domo euocatus eſt ad præmium, vt exacta cum laude vita ſperare iubet, P. Franciſcus Strata, notæ ſacundia concionator. Hic eſt ille
ado-

adolescens, quem è Casinate monte reuertens P. Ignatius, in itinere obuium habuit. qui cum fessus aulicæ vitæ tædio, militandi gratia Neapolim pergeret, reuocatus ab Ignatio, vno eius congressu atque colloquio, subito se ad meliora signa & stipendia conuertit. Reliquarum rerum idem fere cursus & status est. Quotidie contra vitiorum monstra dimicatur. Complures à persequendis iniurijs, complures item à diuturno pellicatu diuulsi sunt. Nobilis mulier, cui sexdecim ipsos annos cum propinquo res fuerat, à tam nefario incestu ac turpitudine liberata est: & ad expianda vniuersæ vitæ flagitia maculasq. perducta. Habetur autem ad eos mulierum cætus, quæ à vulgandi corporis ignominia, in certas honestatis sedes se receperunt, crebra de diuinis rebus oratio, præbenturq. interdum aures confitentibus perutiliter. Eadem in puerilem & iam adultam ætatem, dum eorum scholæ cætusq. lustrantur, constiterunt officia; eadem quoque in ægros & peregrinos egenos. Aeger autem quidā, cum pænitiæ sacramentum obstinato animo nec sine magna omnium offensione respueret, nostrorum persuasionibus est inductus, non modo vt ætatis certæ peccata, sed vniuersæ confiteretur. confessionem subita tranquillitas animi, hanc læta & minime formidolosa mors excepit. Sed inter expiandos animos, res contigit non vulgaris. Quidam cum multos iam annos grauiā in confessione scelera reticeret, per quietem se vidisse narrabat, ardentem in se distringi gladium ad aspectum horribilem: se autem perterrefactum sustulisse cla-

morē, Deoq. ut sibi ignosceret, supplicasse, quod sibi certum ac deliberatum esset, peccata quæ celandi, patefacere: tum gladiū in vagina reconditum, nec ossiam amplius apparuisse, visi fidem fecit accurata vitæ confessio, & è concepta formidine exanimatio tanta, ut tanquam mox expiraturo sacramenta nouissima sint adhibita: sed ut in confessione peccata vomuit, momento conualuit. Foris toto ferme anno Sacerdotes peregrinati sunt octo, magno huius diocesis bono: nec modo doctrinæ animis, verum etiam panis pabula corporibus ministrata sunt. Nā cum in summa caritate fuisset hic annus, egregia ac liberalis Cardinalis Toletani pietas, per nostrorum Sacerdotum manus, præsentis tritico atque pecunia multorum oppidorum fami consuluit. Nec parum ei rei attulit adiumenti, nobilis Francisci de Reynoso benignitas, & huius Domus quasi parentis, propter singularem eius in nos amorem ac liberalitatem, qui quanquam ipse quoq; annonæ sensit incommoda, per eosdem tamen Sacerdotes nostros solito seuit vberius:

MADRIDIANVM ET ALIA quædam Collegia.

MAdridi satis ex sententia succedunt omnia: Numerat gymnasiū auditores fere sexcentos, nobilesq; in ijs multos, quorum exercitationibus
viri

Viri principes delectati (placuit enim interesse nonnunquam) facile sibi persuadent, quantum ex disciplina nostra commodi capiatur. In templo cerniur frequens ex omni ætate sexuq. nobilitas, ac plurima proinde confessio, tractatioq. Sacramentorum. Feriis D. Catharinæ, non alienum duxit suæ dignitati Philippus Rex, pro ea qua est etiam in infimos facilitas, ædem nostram suo aduentu cohonestare & sacris adesse solemniss.

COMPLUTI præcipua quædam opera data est, ut nostræ Academiæ auditores, dum doctrinæ pectus excolunt, animum quoque pijs diuinarum rerum commentationibus perpolirent, subductaq. summa eorum, qui nostris se meditationibus exercuerunt, septuaginta amplius reperti sunt: in ijsque interdum ipsi Magistri ac Doctores: ut mirum non videatur si diligenti operarum culturæ, frugum proventus ubertasq. responderit. Dicarunt enim se Societati viginti, bonarum partium omnes, ijsque aut probe litteris instituti, aut iã rude donati, quatuor duntaxat exceptis, procurationi domesticæ destinatis.

PRÆCIPUÆ autem Toletani Collegij curæ sunt, ad humanitatem iuuenes erudire. Ingenia muneribus euocantur. ea interdum, adhibitis principibus Ecclesiæ Toletanæ iudicibus, tributa sunt. Specimen suæ facultatis auditores nostri, in aduentu principum virorum non semel dedere: ij Apostolicum Nuncium, ij Cardinalem Toletanum, ij Iaponicos legatos iucundis suæ facundiæ numeris exceperunt. Sed, quod laborum nostrorum optatissima mer-

ces est, vna cum doctrina, virtus quoque præferendis natura mentibus commendatur. Nam qui duriores videbantur inter initia domitūq. difficiles, nunc quotidie magis pijs Societatis exercitationibus conui-
 Etuq. mitescunt.

MVRCIÆ Mahometanus quidam morte ple-
 stendus, inuicta quadam animi pertinacia, mori in
 qua natus erat lege decreuerat: nostri tamen assi-
 duo labore perfecerrunt, vt perditæ animæ Deus pro
 sua clementia ac bonitate succurreret. Inter ipsas
 carnificis manus ac in ipso pene suspendio, Christia-
 num se mori velle dixit, & ante mortem è morte re-
 surgere, renatusq. ex aqua & Spiritu sancto, cele-
 ri morte sempiternam mercatus est vitam.

CONCHÆ pari obstinatione Christianus, qui ne
 suscepta in vicinos odia ponere cogeretur, confiteri
 peccata in morte nolebat: vrgente tamen Sacerdote
 nostro, se flexit, condonatisq. quibus insensus erat,
 iniurijs, aureos mille nummos, pios in vsus ex testa-
 mento legauit, vt eadem liberalitate & peccata re-
 dimeret, & iter sibi muniret in cælum.

E PLACENTINO Collegio, profecti sunt in
 oppidum Veiar, quo æstatis declinandæ causa Pla-
 centinus secedit Episcopus, quatuor hac æstate de
 nostris. hos eo consilio sedulus secum Pastor addu-
 xerat, vt finitimis etiam pagis suam operā imperii-
 rent: quod quidem ab eis ingenti cum fructu factum
 est.

BELMONTENSE ET HVETENSE Collegia.

IN Belmontensi Collegio, auctus est Auditorum in gymnasio numerus ad quingentos: & ex incrementis gymnassii crevit quoque Sodalitas Dei Martiris. Ferat semper Deus vberes annos, & celestis gratiæ imbribus, suum quotidie nouale respergat, ut quò operarum ardentiora sunt vota, eò omnia hilariora ac pinguiora proueniant.

In HVETENSI Collegio, quod ad pietatis cultum attinet, videtur hic annus vicisse superiores, & sacramentorum consuetudo multo magis increbuisse. Sublatæ sunt offensa cædesq. non parua. quidam cum inimicum haberet in potestate, & quinquenniū iam catena constrictum tenuisset, ad Sacerdotis nostri preces iracundiam vicit, eiq. veniam dedit, à quo nondum pœnas ultimas repetisset. Concurfandis vicinis oppidis, ad exitum perducta lis est duos inter viros, qui mutua rabie efferati perniciem sibi igne quærebant: alter enim alterius ædes, admotis iam facibus, cum omni familia parabat incendere, cumq. quotidie crescerent odia, placuit Deo, per nostros, id quod alij frustra tentarant, irata pectora mitigare. Latrones porro duo supremo addicti supplicio, cum monita salutis uoluntaria cæcitare respuerent, nec confessionis mentionem non modo ad animum, sed ne ad aures quidem admitterent, ad extremum nostrorum victi labore animum induxerunt, ut quando

do vim humani iudicij non euaderent, sibi certe su-
premiū illum uiuorum ac mortuorum iudi-
cem, suorum scelerum confessione pla-
carent: idque ea doloris significa-
tione, & lacrymarum copia
fecerunt, ut non du-
biam spem de-
derint,
quin eum sibi propitium
placatumque red-
diderint.

P R O V I N C I A

C A S T E L L A N A .



Astellana Prouincia decem de nostris continet et quingentos. In Valisoletana Professorū domo quatuor & triginta. In Vallisoletano Collegio undetriginta. Totidem in Palentino. In Medinensi Probationis domo quadraginta. In Domo Probationis Villagarsis quatuor & triginta. In Salmanticensi Collegio septē & sexaginta. In Abulensi duo & triginta: in Segobienensi totidem. In Locronienensi triginta: totidem in Burgenensi. In Collegio Montis Regalis quinque & triginta. In Quetenensi septendecim. In Legionensi septem & uiginti. In Compostellano unum & triginta. In Numantino uiginti. In Pompeiopolitano decem: totidem in Omnatensi. Tres denique in Residentia Bellimarensi. Admissi sunt in Societatem duodeuiginti. Amissi morte duodecim.

V A L L I S O L E T A N A D O-
mus, & alia quædam Collegia.

AD reliquos Vallisoletanæ domus fructus, accessit utilitas catechismi, qui præcipuo quo-

quodam studio non tam pueris, quam confirmata
 atate viris exponitur. cum Catechismo traditur vir-
 tus, & ad eam quisque peropportunis cohortationi-
 bus eruditur: explanatisq. legis Christianæ præce-
 ptis, ducitur auditorum agmen ad nosocomia, ut co-
 lendis charitatis officijs ad actionem doctrina reuo-
 cetur. Nec tenue utilitatis indicium est, frequens
 tum reconciliatio gratiarum; quo in genere gra-
 uissimis, quæ imminebant, periculis occursum est, tū
 æris alieni restitutio, cuius ingens numerus fuit.
 Et quanquam domi animorum commodis opera stu-
 diumque nauatur, habetur nihilominus ratio pago-
 rum. quindecim hoc anno institutæ sunt profectioes
 tanto cum animorum emolumento, ut quotidie ma-
 gis intelligamus, quantum in obeundis agris ad sub-
 leuandas animas sit momenti. Sed quantum homini-
 bus Sociorum prodest industria, ipsimet homines dum
 grati videri volunt, sua liberalitate testantur. collati
 sunt in inchoatam templi fabricam, eleemosynæ no-
 mine, aurei mille & quadringenti, auctumq. sacrum
 instrumentum tum nitida locupletiq. veste, tū duo-
 bus ex argento candelabris opere pereleganti. ut iā
 languere nostra non possit industria, tot beneuolen-
 tiæ significationibus excitata.

SALMANATICÆ aucti sumus fratribus
 quatuor, doctrina iam cultis & Theologiæ (vno ex-
 cepto) peritis. Hinc quoque ad animarum lucra sunt
 dimissi complures, insigni cum utilitate hominum,
 præsertim Cleri. Valuit nostrorum opera & ad tol-
 lendas in ciuitate discordias, quæ viros inter prima-

R rios

rios extiterant, & ad constituendum vefligal annuum, vnde multorum egestas perpetuo subleuetur. Sed quotidiana satius est reticere quam dicere, vt instituta breuitas teneatur. Suos hic quoque fauores Societas habet, præsertim è præcipuis Academiæ Collegijs, qui postea ad publica munera & honores euecti, Societati ipsi vbicunque terrarum fuerint mirifice fauent. Ciuitatensis Episcopus appropinquante morte, dimidium bonorum fortunarumq. suarum Omnatenfi Collegio legauit: postea euocato Sacerdote nostro, expiatisq. totius vitæ peccatis, moris suæ laudem hoc quasi cumulo præparationis auxit. Huic vero Collegio, Episcopus atque Archidiaconus prædium cum templo dedere.

Nec vero MEDINENSI Ciuitati minus Societas debet. multis sæpe documentis quanti nos faciat declarauit: sed proxime cum ad legendum Proinciæ Procuratorem ageretur de more conuentus, ne nouorum Patrum aduentus sumptui nobis esset, sumptus ipsa suppeditauit. Nostri vicissim consuetudine officiorum suorum, vt gratiam quam possint, referant, elaborant. Quippe animis semper consulunt, dum alios meditationibus nostris excolunt, alios dimittendis rite noxis ac sceleribus expiant, alios etiã ad concordiam æquitatemq. traducunt. Societatis meditationes obiere duodecim, quorum pleriq. sunt Sacerdotes, ijq. ceteros suo exemplo laceffunt, vt studijs item pietatis muneribusq. se dedant. itaq. complures ex huius vitæ periculis in Cænobiorum portum sinumq. confugiunt. Deterriti sunt & ab inferenda

da & referenda iniuria nonnulli: cumq. duo iam ad arma consurgerent, nostrorum industria perfectum est, ut iræ parcerent, mutuisq. cædibus temperarent. quod ab ijs tam ex animo factum est, ut eorum alter, ne in huiusmodi amplius pericula vocaretur, Cænobita repente sit factus. Adiuncta est etiam ad Christum femina Mahometana, & Christianis instructa præceptis, antequam prodiret ad fontem. Missi sunt foras, ex instituto nonnulli, quorum adeo opportuna quibusdā locis opera fuit, ut populi universi salutari confessione animos expiarint.

Sed hoc mittendi studium, in proximum agrum VILLAGARSIÆ solet esse præcipuum. Id enim oppidum cum pagis vndique cinctum sit, non sine ingenti utilitate, frequens ad eos operarum est missio, ut non tam loci vnius, quam plurimorum existiment nostri se esse cultores. Sed quoniam quæ in his locis geruntur sæpius inculcata iam sunt; ideo quæ de conquirendis per pagos animis dici solent, huc transferenda sunt omnia. & quod de hoc Collegio dicimus, idem de Palentino, idem de Lucroniensis alijsq. Collegijs, ne in singulis sit hærendum, intelligendum est.

In PALENTINO vero Collegio, fundamenta iacta sunt novi Templi, multis in eam rem ædibus, ut proximis litteris significatum est, partim Civitatis liberalitate coemptis, partim etiam privatorum: sed præcipue Francisci de Reynoso nobilissimi ac clarissimi viri, cuius paulo ante meminimus; qui pro egregia sua in nos benevolentia nullum unquam

prætermittit tempus bene merendi de nobis. Positus est primus lapis, publica tum ceremonia, tum gratulatione, sacris operante Decano, honestissimo virorum mulierumq. conuentu.

ABVLÆ autem, quam bene gerantur omnia, ipse hominum concursus ad conciones, & Sacramenta testatur. Sane dilatandum novis ædificationibus templum fuit; nec tamen multitudini densaque turba factum est satis. Alia amoris indicia non desunt, quo nos ciues prosequuntur ac foveant, quippe crebræ eleemosynæ & aliæ huius generis significationes. quod ipsum de Lucroniensi ciuitate confirmare possumus, quæ Collegio nostro mille aureis amplius subsidio venit.

POMPEIOPOLITANVM ceteraque Collegia,

Factum est Pompeiopoli initium noui gymnasii, non sine orationum apparatu pompaque religiosa. Cohonestarunt Oratorem, Prorex Regiique auditores, cunctique Magistratus, maxima beneuolentiæ significatione: cumq. peroratum esset, tū Proregi totius nomine ciuitatis à Magistratibus gratiæ sunt actæ, quod tantum commodi in suum regnum intulisset. Nobilitatur gymnasium non modo ciuium frequentia, sed etiam aduenarum Gallorumque potissimum. Episcopus Collegium nostrum pecunijs instruxit annuis. est autem is de nobis optime meritus, nostrosq. cum sæpe adhibet ad conciones in æde maxima,

xima, tum Calendis Ianuarijs, quæ IESV nomini sacræ sunt, Pontificio apud nos ritu sacrificauit, vespertinaq. preces publica item ceremonia cantuq. peregit. Eadem est Proregis humanitas, ac Reginarum Auditorum, apud quos habetur à nostris per Quadragesimam concio, cum vtilitate præcipua. Quod ad pagos attinet, ne hi quidem nostrorum operam desiderarunt. Præcipua huius regni lustrata ciuitas est, cui nomen Tudela, quæ magna nunc contentione Collegium flagitat: aliaq. præterea vrbs finitima Galliæ, quò per id tempus Galli confluxere complures, tum Sacramentorum caussa, tum vt nostros ad se allicerent, & in ea loca, præstandis periculis, inuiterent.

OMNATENSIBVS quotidie magis perspecti sunt nostri. iam adhibentur ad conciones in æde maxima contra omnem Cleri consuetudinem, qui ad eum suggestum nunquã nostros admisit. Ex oppidorum autem vtilitatibus prima fuit, placare pagos inter se tres, inter quos acerrimæ de agrorum finibus contentiones exarserant. compositæ sunt etiam inter priuatos discordiæ, & quidem nobiles ac primarios. Quodam in oppido, cum Clerus sese nostris non satis crederet, dum suggestum concionator noster ascendit, eum non sine dedecore reuocauit; sed Patris mansuetudo fecit, vt erratum illi suum agnoscerent, veniaq. postulatione, quem contumelia affecerant honorarent, & cui non satis fiderent, ei se postea sui que pectoris arcana, committeret: sexaginta amplius ex eo numero expiare se apud Patrẽ voluerunt, eosq. Pater ita sibi

deuinxit omnes, vt ex eo tempore Societatem plurimum ament, & Concionatorem ex ea semper accersant.

NUMANTIAE præter alia, quæ ex instituto geruntur, interdum mitigatæ sunt iræ. sat erit genus tantum attingere, ne in rebus similibus multi simus. Inciderat in morbum vir tum nobilitate, tum opibus clarus. is iras cum inimico gerebat, sed cum morbus vrgeret & salus vocaretur in dubium, accititur è Collegio Sacerdos, qui daret operam confitenti. dedit Pater operam strenuè: nã & vt offensas inimicorum impunitas esse permitteret, & vt quædã, quæ saluo officio retineri non posse videbantur, sua cuique redderet, persuasit. sed quoniam utrum alia quædam longe maiora deberet, nondum liquebat, ea tamdiu deposita apud aliquem esse voluit, dum liquidius de re tota iudicaretur. erat tum animo sic affectus, vt si restituenda multis partibus plura fuissent, restituisset vtique. itaque cum mors aduentaret, multa pios in vsus ex testamento reliquit, cumq. alia alijs Religiosis ordinibus distribueret, Societatis nostræ non immemor, annuum nobis vectigal aureorum quadringentorum, in sempiternum tempus assignauit; tantumq. affici erga nos cœpit extremo illo vitæ tempore, quantum in reliqua vita fuerat alienus: non die, non nocte, Sacerdotem abesse nostrum a suo latere voluit. Omnino plena laudis, pietatisque mors illa fuit.

In **LEGIONENSI** Collegio, per Sacerdotem nostrum ad leuandam multorum tenuitatem, institu

ta sodalitas est ex eo hominum genere, qui has partes curamq. suscipiant. Dedit in eam nomen, ut suo exemplo ceteros inuitaret, Episcopus ipse. hunc reliqua imitata nobilitas est. Est autem Episcopus, ut ex ipsis rebus cernimus, nostri Ordinis amantissimus. concionari in æde nostra voluit, & solemnibus operari sacris: crebro etiam concionibus interest, & pro nostris deferit suas: nec raro disputationibus, quæ de officijs publicæ habentur, interfuit: quas subinde perhumanis obiectionibus honestare, suæ dignitatis non alienum putauit.

In OVETENSI Collegio, ad eluendas animi labes ex omni hominum genere concursus fiunt. facit hoc ciuitatis emporium, crebræque nundinæ, ad quas undique turba concurrit. Nec in postremis vilitatibus est, in externa loca frequens excursio. multa in ijs animorum curatio, atque adeo multa, ut paganorum turba confessionis causa antelucanis sæpe temporibus præstoletur.

In MONTE Regali viri decem, iique minime obscuro, cum in omnium oculis secus viuerent, quam deceret, neque solum essent ipsi vitiosi, sed etiam suo exemplo vitia in ciuitatem infunderent, nostrorum opera ad frugem officiumque se receperunt, magna ceterorum tum approbatione, tum gaudio.

COMPOSTELLÆ quoque plurimi è proximis locis collecti sunt fructus. vno tantum in loco expiarunt confessione peccata, mille trecenti. Hæc autem in vicina loca profectio, magnæ curæ est Archiepiscopo, qui ne nostrorum aduentus cuiquam

oneri sumptuique sit, viaticum ipse præbet: nec in
viaticum modo, sed in egenos quoque dilargi-
tur argentum, quod ad arbitrium suum
nostri distribuunt. Atque hæc
hactenus de Castella-
na Provin-
cia:

PROVINCIA ARAGONENSIS.



*Continet Aragonia, sedes omnino no-
uem, socios autem ducentos ac vi-
ginti quinque. In Domo Professæ
Valentina tres & viginti. In Col-
legio vndequadraginta. Candiæ
tres & triginta. Barcinonæ totidē.
Cæsaraugustæ quinquaginta. Maioricæ tres & vi-
ginti. Gerundiæ septem. Tarraconæ sex. Octo Bil-
bili, ubi recens est erectum Collegium. Mortui sunt
quatuor: aggregati quatuordecim.*

DOMVS PROFESSA Valentina.

Valentia tres tantum, ut diximus, & viginti
in professorum ædibus habitant. Verum a-
lijs ædibus hoc anno coemptis, plures posthac spe-
ramus, qui hanc destitutam pene operis vineam vna
cum ceteris excolant atque exerceant: magna est
enim eorum, qui ad nos confluunt sacramentorum
causa, multitudo. Et quanquam ea fuit annonæ ca-
ritas, ut vitam vix diuites tolerarent, nedum tot
è nostris aliena misericordia victitarent; tamen
tum egregia liberalitate civium, tum diuina in suos
famul-

famulos providentia, nihil à nobis, quod ad cultū &
 victum pertinet, desideratum est. Itaque cum hæc
 ad Deum procuratio pertineat, omnis sociorum cu-
 ra in vna animarum causa versatur. Instituta ex-
 honestissimis viris sodalitas est, ijs sodalitatibus non
 absimilis, quæ & hic & alibi, Dei Matris cultui ho-
 noriq; dicantur. Ea igitur hoc anno tum Proregis
 gratia, tum Patriarchæ auctoritate inchoata, viros,
 vt dixi, nobiles & honestos adlegit. Præsides sode-
 litati Proregis gener, Comitissq; huius regni filius na-
 tu maximus, qui tanto studio quasi assignatum sibi a
 Deo munus administrat, vt eo duce ac præsede feli-
 ciora sperentur indies. Sodales à virtute & probi-
 tate leguntur, nam de multitudine numeroq; postre-
 ma cura est. horum partes sunt non modo suæ ac do-
 mesticorum saluti consulere, verum etiam alienæ:
 dissidia de ciuitate tollere, paces cōciliare, custodias
 publicas interuifere; ægris non modo suæ cuiq; domi,
 verum etiam in V aleiudinario præssto esse. E tem-
 plo insignis quoque efflorescit vilitas. pœnitentium
 ea est multitudo, vt singuli interdum sacerdotes, plu-
 rimis qui ab ineunte ætate expiare peccata velint,
 aures præbeant. Errantes & qui diaboli arte delusi,
 vel mente abducebantur à sensibus, vel edebant inu-
 sitata prodigia, ab his fraudibus fallacijsq; deducti:
 reliquis præterea vitijs, quoad fieri potuit, sua cuiq;
 adhibita temperatio est. Mulier, quæ liberos ex alie-
 no suscepit, quæq; ob eam causam discedere à viro,
 vt vim eius effugeret cogitabat, nostrorum ope per-
 fectum est, vt ad viri pedes abiectæ vir ipse peper-
 cerit.

cerit. Alius qui annos iam quindecim quadrupedum more, in libidinum cœno volutabatur, sensim frequenti peccatorum confessione se recepit ad frugem. Mulier, quæ & castimoniam voto neglecto, corpus suum, nulla habita ratione loci siue sacri siue prophani, ad omnium libidines diuulgabat, quæque tot inquinata vitijs, cælestem panem, eum qui pascitur inter lilia, sumere ore suo impurissimo non verebatur, cum ad extremum veniam tantorum scelerum desperaret; nostri sacerdotis opera, ad spem diuinæ misericordiæ erecta, inueterata vulnera, quæ diu occultauerat, indicauit: nunc autem ad sanitatē mentemq. perducta, tanto in sacramentorum usurpatione versatur ardentius, quanto antea admiserat ea cupidius, quæ pœnitentiæ sacramento detergenda essent. Puella, quæ se Deo castitatis voto sacrauerat, cum pudicitia discrimen adiret, nostrorū consilio, ex suis ædibus alio translata, & a periculo se subduxit, & sacramentorū sese armis præsidijq. communiit. Taceo compositas controuersias, taceo restincta nostrorū monitis odia, quo de genere illud fuit sane preclarum: quod cum quidam vulneribus male acceptus, percussorem de medio tollere decreuisset, post confessionem autem iniuriam Christo concessisset: tantum ea liberalitate progressus est ad virtutem, ut quo rebus humanis remitteret nunciū, sponsione voti sese obligauerit Deo. Ex ijs porro qui nobis operam dant, cum alij sese Deo in varijs Religiosorum consecrauerē cœnobijs, tum in Societate sex. Nec vero inter v̄sitata vitæ nostræ munera, eo-

rum


BELMONTENSE ET HVETENSE
Collegia.

IN Belmontensi Collegio, auctus est Auditorum in gymnasio numerus ad quingentos: & ex incrementis gymnassii crevit quoque sodalitas Dei Matris. Ferat semper Deus vberes annos, & celestis gratiæ imbribus, suum quotidie nouale respergat, ut quod operarum ardentiora sunt vota, eò omnia hilariora ac pinguiora proveniant.

In HVETENSI Collegio, quod ad pietatis cultum attinet, videtur hic annus vicisse superiores, & sacramentorum consuetudo multo magis increbuisse. Sublatæ sunt offensa cædesq. non parvæ. quidam cum inimicum haberet in potestate, & quinquennium iam catena constrictum tenuisset, ad Sacerdotis nostri preces iracundiam viciis, eiq. veniam dedit, a quo nondum pœnas ultimas repetisset. Concurſandis vicinis oppidis, ad exitum perducta lis est duos inter viros, qui mutua rabie efferati perniciem sibi igne quærebant: alter enim alterius ædes, admonis iam facibus, cum omni familia parabat incendere, cumq. quotidie crescerent odia, placuit Deo, per nostros, id quod alij frustra tentarant, irata pectora mitigare. Latrones porro duo supremo addicti supplicio, cum monita salutis uoluntaria cæcitate respuerent, nec confessionis mentionem non modo ad animum, sed ne ad aures quidem admitterent, ad extremum nostrorum victi labore animum induxerunt, ut quan-
do

do vim humani iudicij non euaderent, sibi certe su-
premiū illū uiuorum ac mortuorum iudi-
cem, suorum scelerum confessione pla-
carent: idque ea doloris significa-
tione, & lacrymarum copia
fecerunt, ut non du-
biam spem de-
derint,
quin eum sibi propitium
placatumque red-
diderint.

PROVINCIA CASTELLANA.



Castellana Prouincia decem de nostris continet et quingentos. In Vallisoletana Professorũ domo quatuor & triginta. In Vallisoletano Collegio undetriginta. Totidem in Palentino. In Medinensi Probationis domo quadraginta. In Domo Probationis Villagarsiæ quatuor & triginta. In Salmanticensi Collegio septẽ & sexaginta. In Abulensi duo & triginta: in Segobiensi totidem. In Locroniensi triginta: totidem in Burgenſi. In Collegio Montis Regalis quinque & triginta. In Quetensi septendecim. In Legionensi septem & uiginti. In Composſtellano unum & triginta. In Numantino uiginti. In Pompeiopolitano decem: totidem in Omnatensi. Tres denique in Residentia Bellimarensi. Admissi sunt in Societatem duodeuiginti. Amissi morte duodecim.

VALLISOLETANA DOMUS,
& alia quædam Collegia,

AD reliquos Vallisoletanæ domus fructus, accessit utilitas catechismi, qui præcipuo quo-

quodam studio non tam pueris, quam confirmata
 etate viris exponitur. cum Catechismo traditur vir-
 tus, & ad eam quisque peropportunitis cohortationi-
 bus eruditur: explanatisq. legis Christianæ præce-
 ptis, ducitur auditorum agmen ad nosocomia, ut co-
 lendis charitatis officijs ad actionem doctrina reuo-
 cetur. Nec tenue utilitatis indicium est, frequens
 tum reconciliatio gratiarum, quo in genere gra-
 uissimis, quæ imminebant, periculis occursum est, tū
 æris alieni restitutio, cuius ingens numerus fuit.
 Et quanquam domi animorum commodis opera stu-
 diumque nauatur, habetur nihilominus ratio pago-
 rum. quindecim hoc anno institutæ sunt profectiones
 tanto cum animorum emolumento, ut quotidie ma-
 gis intelligamus, quantum in obeundis agris ad sub-
 leuandas animas sit momenti. Sed quantum homini-
 bus Sociorum prosit industria, ipsimet homines dum
 grati videri volunt, sua liberalitate testantur. collati
 sunt in inchoatam templi fabricam, elemosynæ no-
 mine, aurei mille & quadringenti, auctumq. sacrum
 instrumentum cum nitida locupletiq. veste, tū duo-
 bus ex argento candelabris opere pereleganti. ut iā
 languere nostra non possit industria, tot beneuolen-
 tiæ significationibus excitata.

SALMANFICAE aucti sumus fratribus
 quatuor, doctrina iam cultis & Theologiæ (vno ex-
 cepto) peritis. Hinc quoque ad animarum lucra sunt
 dimissi complures, insigni cum utilitate hominum,
 præsertim Cleri. Valuit nostrorum opera & ad tol-
 lendas in ciuitate discordias, quæ viros inter prima-

rios extiterant, & ad constituendum vectigal annuum, unde multorum egestas perpetuo subleuetur. Sed quotidiana satius est reticere quam dicere, ut instituta breuitas teneatur. Suos hic quoque fautores Societas habet, præsertim è præcipuis Academiæ Collegiis, qui postea ad publica munera & honores euecti, Societati ipsi ubicunque terrarum fuerint mirifice fauent. Ciuitatensis Episcopus appropinquante morte, dimidium bonorum fortunarumq. suarum Omnatensi Collegio legauit: postea euocato Sacerdote nostro, expiatisq. totius vitæ peccatis, mortis suæ laudem hoc quasi cumulo præparationis auxit. Huic vero Collegio, Episcopus atque Archidiaconus prædium cum templo dedere.

Nec vero MEDINENSI Ciuitati minus Societas debet, multis sepe documentis quanti nos faciat declarauit: sed proxime cum ad legendum Præuincie Procuratorem ageretur de more conuentus, ne nouorum Patrum aduentus sumptui nobis esset, sumptus ipsa suppeditauit. Nostri vicissim consuetudine officiorum suorum, ut gratiam quam possint, referant, elaborant. Quippe animis semper consulunt, dum alios meditationibus nostris excolunt, alios dimittendis rite noxis ac sceleribus expiant, alios etiã ad concordiam æquitatemq. traducunt. Societatis meditationes obiere duodecim, quorum pleriq. sunt Sacerdotes, ij. ceteros suo exemplo lacessunt, ut studiis item pietatis muneribusq. se dedant. itaq. complures ex huius vitæ periculis in Cænobiorum portum sinumq. confugiunt. Deterriti sunt & ab inferenda

da & referenda iniuria nonnulli: cumq. duo iam ad arma consurgerent, nostrorum industria perfectum est, ut iræ parcerent, mutuisq. cædibus temperarent. quod ab ijs tam ex animo factum est, ut eorum alter, ne in huiusmodi amplius pericula vocaretur, Cæ nobita repente sit factus. Adiuncta est etiam ad Christum femina Mahometana, & Christianis instructa præceptis, antequam prodiret ad sentem. Missi sunt foras, ex instituto nonnulli, quorum adeo opportuna quibusdā locis opera fuit, ut populi universi salutari confessione animos expiarent.

Sed hoc mittendi studium, in proximum agrum VILLAGARSIAE solet esse præcipuum. Id enim oppidum cum pagis vndique cinctum sit, non sine ingenti utilitate, frequens ad eos operarum est missio, ut non tam loci vnius, quam plurimorum exstiment nostri se esse cultores. Sed quoniam quæ in his locis geruntur sæpius inculcata iam sunt; ideo quæ de conquirendis per pagos animis dici solent, huc transferenda sunt omnia. & quod de hoc Collegio dicimus, idem de Palentino, idem de Lucroniensibus alijsq. Collegijs, ne in singulis sit hærendum, intelligendum est.

In PALENTINO vero Collegio, fundamenta iacta sunt novi Templi, multis in eam rem ædibus, ut proximis litteris significatum est, partim Civitatis liberalitate coemptis, partim etiam privatorum; sed præcipue Francisci de Reynoso nobilissimi ac clarissimi viri, cuius paulo ante meminimus; qui pro egregia sua in nos benivolentia nullum unquam

xima, tum Calendis Ianuarijs, quæ IESV nomini sacræ sunt, Pontificio apud nos ritu sacrificauit, vespertinasq. preces publica item ceremonia cantuq. peregit. Eadem est Proregis humanitas, ac Regiorum Auditorum, apud quos habetur à nostris per Quadragesimam concio, cum vtilitate præcipua. Quod ad pagos attinet, ne hi quidem nostrorum operam desiderarunt. Præcipua huius regni lustrata ciuitas est, cui nomen Tudela, quæ magna nunc contentione Collegium flagitat: aliaq. præterea vrbs finitima Gallia, quò per id tempus Galli confluxere complures, tum Sacramentorum causa, tum vt nostros ad se allicerent, & in ea loca, præstandis periculis, inuiterent.

OMNATENSIBVS quotidie magis perspecti sunt nostri. iam adhibentur ad conciones in eadem maxima contra omnem Cleri consuetudinem, qui ad eum suggestum nunquam nostros admisit. Ex oppidorum autem vtilitatibus prima fuit, placare pagos inter se tres, inter quos acerrimæ de agrorum finibus contentiones exarserant. compositæ sunt etiam inter priuatos discordia, & quidem nobiles ac primarios. Quodam in oppido, cum Clerus sese nostris non satis crederet, dum suggestum concionator noster ascendit, eum non sine dedecore reuocauit; sed Patris mansuetudo fecit, vt erratum illi suum agnoscerent, veniaq. postulatione, quem contumelia affecerant honorarent, & cui non satis fiderent, ei se postea sui que pectoris arcana, committerent: sexaginta amplius ex eo numero expiare se apud Patrem voluerunt, eosq. Pater ita sibi

deuinxit omnes, vt ex eo tempore Societatem plurimum ament, & Concionatorem ex ea semper accersant.

NVMANTIAE prater alia, quæ ex instituto geruntur, interdum mitigatæ sunt iræ. sat erit genus tantum attingere, ne in rebus similibus multi simus. Inciderat in morbum vir tum nobilitate, tum opibus clarus. is iras cum inimico gerebat, sed cum morbus vrgeret & salus vocaretur in dubium, accitur è Collegio Sacerdos, qui daret operam confitenti. dedit Pater operam strenuè: nã & vt offensas inimicorum impunitas esse permetteret, & vt quædã, quæ saluo officio retineri non posse videbantur, sua cuique redderet, persuasit. sed quoniam vtrum alia quædam longe maiora deberet, nondum liquebat, ea tamdiu deposita apud aliquem esse voluit, dum liquidius de re tota iudicaretur. erat tum animo sic affectus, vt si restituenda multis partibus plura fuissent, restituisset vtique. itaque cum mors aduenteret, multa pios in vsus ex testamento reliquit, cumq. alia alijs Religiosis ordinibus distribueret, Societatis nostræ non immemor, annum nobis vectigal aureorum quadringentorum, in sempiternum tempus assignauit; tantumq. affici erga nos cœpit extremo illo vitæ tempore, quantum in reliqua vita fuerat alienus: non die, non nocte, Sacerdotem abesse nostrum a suo latere voluit. Omnino plena laudis, pietatisque mors illa fuit.

In **LEGIONENSI** Collegio, per Sacerdotem nostrum ad leuandam multorum tenuitatem, institu

ta sodalitas est ex eo hominum genere, qui has partes curamq. suscipiant. Dedit in eam nomen, ut suo exemplo ceteros inuitaret, Episcopus ipse. hunc reliqua imitata nobilitas est. Est autem Episcopus, ut ex ipsis rebus cernimus, nostri Ordinis amantissimus. concionari in ade nostra voluit, & solemnibus operari sacris: crebro etiam concionibus interest, & pro nostris deferit suas: nec raro disputationibus, quæ de officijs publicæ habentur, interfuit: quas subinde perhumanis obiectionibus honestare, suæ dignitatis non alienum putauit.

In OVETENSI Collegio, ad eluendas animi lahes ex omni hominum genere concursus fiunt. facit hoc ciuitatis emporium, crebraque nundina, ad quas undique turba concurrit. Nec in postremis utilitatibus est, in externa loca frequens excursio. multa in ijs animorum curatio, atque adeo multa, ut paganorum turba confessionis causa antelucanis sæpe temporibus præstoletur.

In MONTE Regali viri decem, ijque minime obscuri, cum in omnium oculis secus viuerent, quam deceret, neque solum essent ipsi vitiosi, sed etiam suo exemplo vitia in ciuitatem infunderent, nostrorum opera ad frugem officiumque se receperunt, magna ceterorum tum approbatione, tum gaudio.

COMPOSTELLÆ quoque plurimi è proximis locis collecti sunt fructus. vno tantum in loco expiarunt confessione peccata, mille trecenti. Hæc autem in vicina loca profectio, magnæ curæ est Archiepiscopo, qui ne nostrorum aduentus cuiquam

oneri sumptuique sit, viaticum ipse præbet: nec in
viaticum modo, sed in egenos quoque dilargi-
tur argentum, quod ad arbitrium suum
nostri distribuunt. Atque hæc
hactenus de Castella-
na Provin-
cia:

PROVINCIA ARAGONENSIS.



Continet Aragonia, sedes omnino no-
uem, socios autem ducentos ac vi-
ginti quinque. In Domo Professæ
Valentina tres & viginti. In Col-
legio vndequadraginta. Gandiæ
tres & triginta. Barcinonæ totidē.
Cæsaraugustæ quinquaginta. Maioricæ tres & vi-
ginti. Gerundiæ septem. Tarracona sex. Octo Bil-
bili, vbi recens est erectum Collegium. Mortui sunt
quatuor: aggregati quatuordecim.

DOMVS PROFESSA Valentina.

Valentia tres tantum, vt diximus, & viginti
in professorum ædibus habitant. Verum a-
lijs ædibus hoc anno coemptis, plures posthac spe-
ramus, qui banc destitutam pene operis vineam vna
cum ceteris excolant atque exerceant: magna est
enim eorum, qui ad nos confluunt sacramentorum
causa, multitudo. Et quanquam ea fuit annonæ ca-
ritas, vt vitam vix diuites tolerarent, nedum tot
è nostris aliena misericordia victitarent; tamen
tum egregia liberalitate ciuium, tum diuina in suos
famu-

famulos providentia, nihil d nobis, quod ad cultū &
 victum pertinet, desideratum est. Itaque cum hæc
 ad Deum procuratio pertineat, omnis sociorum cu-
 ra in vna animarum causa versatur. Instituta ex-
 honestissimis viris sodalitas est, ijs sodalitatibus non
 absimilis, quæ & hic & alibi, Dei Matris cultui ho-
 noriq, dicantur. Ea igitur hoc anno tum Proregis
 gratia, tum Patriarchæ auctoritate inchoata, viros,
 vt dixi, nobiles & honestos adlegit. Præsides sode-
 litati Proregis gener, Comitissq. huius regni filius na-
 tu maximus. qui tanto studio quasi assignatum sibi a
 Deo munus administrat, vt eo duce ac præside feli-
 ciora sperentur indies. Sodales d virtute & probi-
 tate leguntur, nam de multitudine numeroq. postre-
 ma cura est. horum partes sunt non modo suæ ac do-
 mesticorum saluti consulere, verum etiam alienæ:
 dissidia de ciuitate tollere, paces cõciliare, custodias
 publicas interuifere; ægris non modo suæ cuiq. domi,
 verum etiam in Valetudinario præsto esse. E tem-
 plo insignis quoque efflorescit utilitas. pœnitentium
 ea est multitudo, vt singuli interdum sacerdotes, plu-
 rimis qui ab ineunte ætate expiare peccata velint,
 aures præbeant. Errantes & qui diaboli arte delusi,
 vel mente abducebantur à sensibus, vel edebant inu-
 sitata prodigia, ab his fraudibus fallacijsq. deducti:
 reliquis præterea vitijs, quoad fieri potuit, sua cuiq.
 adhibita temperatio est. Mulier, quæ liberos ex alie-
 no suscepit, quæq. ob eam causam discedere d viro,
 vt vim eius effugeret cogitabat, nostrorum ope per-
 fectum est, vt ad viri pedes abiectæ vir ipse peper-
 cerit.

cerit. Alius qui annos iam quindecim quadrupedum more, in libidinum cœno volutabatur, sensim frequenti peccatorum confessione se recepit ad frugem. Mulier, quæ & castimoniam voto neglecto, corpus suum, nulla habita ratione loci siue sacri siue prophani, ad omnium libidines diuulgabat, quæque tot inquinata vitijs, caelestem panem, eum qui pascitur inter lilia, sumere ore suo impurissimo non verebatur, cum ad extremum veniam tantorum scelerum desperaret; nostri sacerdotis opera, ad spem diuinæ misericordiæ erecta, inueterata vulnera, quæ diu occultauerat, indicauit: nunc autem ad sanitatē mentemq. perducta, tanto in sacramentorum usurpatione versatur ardentius, quanto antea admiserat ea cupidius, quæ pœnitentiæ sacramento detergenda essent. Puella, quæ se Deo castitatis voto sacrauerat, cum pudicitiae discrimen adiret, nostrorū consilio, ex suis ædibus alio translata, & a periculo se subduxit, & sacramentorū sese armis præsidijsq. communiit. Taceo compositas controuersias, taceo restincta nostrorū monitis odia, quo de genere illud fuit sane preclarum: quod cum quidam vulneribus male acceptus, percussorem de medio tollere decreuisset, post confessionem autem iniuriam Christo concessisset: tantum ea liberalitate progressus est ad virtutem, ut quo rebus humanis remitteret nunciū, sponsione voti sese obligauerit Deo. Ex ijs porro qui nobis operam dant, cum alij sese Deo in varijs Religiosorum consecrauerit cœnobijs, tum in Societate sex. Nec vero inter vsitata vitæ nostræ munera, eorum

rum est causa deserta, qui supremo erant afficiendi supplicio. In his vnus, qui se recens ad Christū adiunxerat, cum ad Mahometanas postea superstitiones impie reuolueretur, sacerdotis nostri oratione, tum vero spiritus sancti afflatu, ereptam sibi facinoribus lucem aspexit iterum, in eaq. extremum vitæ diem morte confecit. Superiore Quadragesima, in celeberrimum quodque oppidum nostri dimissi, tantum ijs locis, quo venerant profuerunt, vt multi iam octauo quoque die abstersis confessione peccatis, cælesti pabulo recreentur. Exceptæ sunt etiam in cœnobijs mulierum confessiones, ad easq. habitæ conciones tanto cum fructu, vt non modo mulieres ipsæ meliores quotidie fierent; sed earum exemplo puellæ aliæ claris ortæ natalibus, ad eas se aggregare non dubitarint. Hæc & id genus alia, in obeunda vicinitate sunt acta.

V A L E N T I N V M E T B A R - cinonense Collegia.

IN Collegio Valentino, habitus est ad pueros catechismus in locis quinque, peragratiq. pagi cum utilitate: restinctæ Archiepiscopo auctore, in cœnobio quodam virginum disensiones, in eaq. pietatis studia tum cohortationibus habendis, tum excipientis confessionibus excitata.

Nec minor agri B A R C I N O N E N S I S est seges. locis quatuor explanatus est Catechismus: nec pauci ad spem à desperatione traducti. Quendam cum graua puderet scelera confiteri, ea vis
tristi.

tristitiæ ac desperationis inuaserat, ut ad sui necem venena pararet: sed à Sacerdote nostro excitatus ad indulgentiæ spem, tranquillitati redditus est. Quidam cum quadragesimum iam annum bestiarum ritu viueret (nam nec sacris vnquam aderat, nec Deum diuosq. nouerat, & quotidie scelera sceleribus cumulans ad sempiternum ruebat interitum) tandè diuina exoriente luce, suas sordes aspexit, confessusq. ætatis vniuersæ peccata, tanto honestiorem ingressus est vitam, quanto egressus erat è fadiore. Sed huius generis plura sunt, quam ut necesse habeam singula persequi. Publicus huius oræ grassator, frequenti nostrorum congressu eo sensim deductus est, ut vniuersæ vitæ maculas sacramento confessionis eluerit: atq. his iam positis fundamentis tutioris vitæ caussa, artissimo se postea cœnobio concluserit. Explicatæ præter consuetudines sunt conscientiæ quæstiones. nam cum tres Theologos constituisset Episcopus, qui tribus in templis ea de re scholas haberent, sacerdos noster ædi maximæ designatus, has ipsas Scholas Episcopo ipso præsentè Canonicisq. & Paræciarum Vicarijs cum alijs nobilibus explicauit. In pagos etiam est frequenter excursus: semel atque iterum Episcopi Barcinonensis rogatu, semel etiam in diœcesim Vicensis Episcopi, vbi Prioratum à Gregorio xij. Societas habet Diœcesis hæc syluestris & montosa, syluestres quoq. & rudes incolas educat. Sane maxima est inter eos rerum diuinarum inscitia, & quod dolendum est magis, tam densis sunt assueti tenebris, ut scientiæ lucem

tem splendoremq. non ferant, doctorum monita negligant, fidei rudimenta contemnant. itaq. nostri cū ad eos iter haberent, reuocabantur a vicinis, quod dicerent, frustra apud eos operam consumptum iri. Verum tolerantia ac magnitudine animi, Deo duce, perfectum est, ut populi illi immanitate exuti ferarum, quotidie magis ad humanitatem ac religionem mansuefiant. Itaq. & animis expiati sunt omnes, & concionibus perlibenter interfunt, & pulsus inscitiae tenebris, lucem iam aliquā veritatis aspiciūt.

C A E S A R A V G V S T A N V M Gerundense & Bilbilitanum.

IN Caesaraugustano Collegio, pleraque huiusmodi gesta sunt, & in alias huius regni vrbes socij quatuor concionis causa dimissi, quorū frugifer fuit vbiq. labor. Data est opera mitigandis odijs, interdumq. daemonis fraudibus patefaciendis. Mulier erat in Caesaraugustana Diœcesi, admirabili sanctimonie fama apud omnes, hæc in precibus aberrabat a sensibus, sæuiebat in suū ipsa corpus acerbis verberationibus, in edias, vigilias, & ceteras pœnarum acerbitates tam facile suscipiebat, quam hæc non inuite simulata quoque virtus admittit. multos auocabat a vitijs, multos etiam ad virtutem incitabat: miserorum subleuabat inopiam: enunciabat occulta commissæ, caput cruore sudabat. plagis etiam no-
tisq.

tisq. redemptionis, ut de B. Francisco dicitur, palmae plantaeq. distinguebantur. itaque ad eam undique ut ad aliquam de caelo lapsam concurrebatur: aderat ad fores consultor frequens: opem miseri, preces religiosi poscebant: ciues grauissima quaeque deferebant negotia. denique inter mortales numerabatur ut Sancta. Sed prudens Archiepiscopus, non ignarus quantum insidiarum insit in vita, & quam versutus sit hostis humani generis, mulierem Sacerdoti nostro committit, eiq. negotium dat, ut feminae sanctitatem diligenter exploret, & si quid in ea corrigendum sanandumq. sit, afferat medicinam. Pater sumpto ad rem spatio, agere cum muliere coepit, tentare atq. exquirere vniuersa, ut aliquid expiscaretur. ubi eam satis exercuit, dies ipsa mulierem prodidit; comperit enim post aliquot mensium spatium & quidem ex ipsius ore, quam ficta essent omnia, quam simulata religio. Tum demum patefactus est Daemon, qui ut animis tendat insidias, in lucis Angelum se conuertit. Sed plus diuina bonitas, quam hostis calliditas potuit. cui & ouis est erepta de faucibus, & ne plus praedarum faceret contagione ouis, quam corruerat, admonitus populus, factus est cautior.

GERVNDENSE Collegium, quanquam exiguum sociorum numerum alit, non tamen exiguas colligit utilitates. Sacerdos noster rerum contrahendarum officia cum explicasset, eam mercatoribus religionem iniecit, ut nefarias pactiões plerique resciderint: alij fraude sublatum retulerint aurum: nonnulli mercaturam facile deseruerint.

Tar-

TARRACONÆ in ædes nouas nostri migrarunt, propediemque speratur fore, vt exædificatæ, socios capiant viginti quinque. Interim obeundis Societatibus muneribus, augetur cum externis commodis, etiam vtilitas animorum.

Collegium BILBILITANUM recentissimū est: V. Kal. Nouemb. ingenti ciuiū gaudio, qui Societatem pridem optauerant, institutum. Est hæc vrbs, si Cæsaraugustam excipias, ex omnibus huius regni vrbibus in primis clara, salubri cælo, vbertate frugum opima, crebris hortis amœna, & latis oppidis vndique cincta, vt ipsamet commodæ regionis ad animarum salutem inuitent. Ad fundandas firmandasq. Collegij fortunas, tributum est vectigal idoneum, adiunctaq. tum domestica tum sacra supellex, & satis instructa libris Bibliotheca: quæ omnia vna ciuiū liberalitas, nullo condicionū onere, dono dedit.

S A R D I N I A.

IN Sardinia, quæ Prouinciæ Aragonensis est membrum, tria duntaxat sunt domicilia. nam Bussachense Collegium iussu nominibus relictum est. Socij in ijs nonaginta circiter commorantur. Sassari tres & quadraginta. Calari triginta duo: reliqui in Ecclesiensi Collegio. Mortui sunt ex eo numero tres. In Societatem cooptati sex.

SASSARITANVM
Collegium.

Fuit hic annus Sassaritano Collegio minus corporibus salutaris, complures enim acerbissimis diuturnisq. morbis tentati sunt, sed Dei præclara clementia omnes incolumes emerferunt. Domi Hispanicæ Sardicæq. sunt habitæ conciones, magno auditorum tum conuentu tum fructu. Foris autem patri cum utilitate versati sunt sex, à quibus cum alia præclare gesta, more institutoq. Societatis, tum vitiosæ consuetudines emendatæ sunt. Erant, qui cum iustis de causis à Sacerdote sine absolutione dimitterentur, religioni tamen sibi non ducerent Christi corpus accipere. Alij autem in propinquorum amorumq. obitu, ijs se angoribus, lacrymisq. dedebat, ut multos menses intra domesticos parietes abditusque in templis quidem sacrorum causa comparerent. quæ omnia ut è ciuitate funditus tollerentur, nostri sedulo elaborarunt. Multi etiam de primarijs, qui inimicorum sanguinem expetiuerant, dædæ odioq. retracti. Quidam ad inimici necem aureos sicario dederat quinquaginta: alius pugionem, quo uxorem nocte confoderet, seruabat intra cervical: vnus vero ne remittere inimico cogeretur iniuriam, diu confessionis sacramento carebat: alij denique ad vlciscendam filiorum necem odijs acerbissimis agebantur, qui omnes Deo iuuante, nostro suasu monituq. cum suo quisque inimico reconciliati

ciliati sunt. Sed reconciliationes gratiarum commutationesq. animorum quotidianas, singulas enumerare non est necesse. Mitto etiam qui à plurimis flagitijs ad frugem, nostrorum ope, se receperunt, et qui scelera nefaria cum indicare sacerdotibus erubescerent, ea tandem longo intervallo detexerunt. Alcarensis ciuitas cum pestilentia proxime laborasset, ubi ea penitus abiit, missi sunt eo de nostris, qui eas animas confirmarent, simulq. vt nonnulla, quæ Societati nostræ testamento legata essent inspicerent, vt amotis litibus, quid ad eam pertineret, li- quido constaret.

Ne CALARITANUM quidem Collegium à morborum incommodis immune fuit. nam & deplorata iam salute decubuerunt nonnulli, & Sacerdotes extincti sunt tres, quos veluti communibus orbata parentibus, ciuitas vniuersa defleuit. ad eorumq. funus ex Metropolitano templo Canonici, cænobitæq. Franciscanæ familiæ, vt nobiscum vna parentarent adesse voluerunt. Fructus autē, qui è Calaritana vinea legitur, est vberrius. Multas quotidie Sacerdotes nostri confessiones. vitæ totius, easq. satis implicatas & impeditas excipiunt, eorum præsertim, qui à trigesimo, quadragesimo, quinquagesimoue anno, hoc se sacramento non expiarant. Aëgris præterea publicisq. custodijs, vitæ subsidia suppeditantur: viduarum solitudini, inopiæq. succurritur: in matrimonio filiæ, quæ suis sunt orbata parentibus, ne quod honoris discrimen adeant, corrogatis elemosynis collocantur. In tradenda vero rudibus Ca-

teche-

techesi plus solito curæ laborisq. consumitur: ducunturq. de more pueri diuinam legem per vrbis compita canitantes. Maurus quadraginta natus annos, libertatis spe cum Christum se sequi velle dixisset, nec tamen libertatem vllam à suis dominis impetraret, postea morbo oppressus, sensit non tam sibi à corpore, quod relinqueret; quam ab animo, qui nunquam interit, repellendum esse seruitutis iugum. baptismum sine cunctatione poposcit. adeptusq. biduo post salutare IESV nomen inclamans extremum spiritum edidit.

Huius ciuitatis in Societatem amor, acres nostris & ad animarum studium, & ad tuendam collectam virtutis opinionem stimulos addit. Testatur hanc benevolentiam atque exsultationem munerum largitas. Bartholomæus Foresius Calaritanus ciuis, cū in omni vita Societatis nostræ studiosissimus, tum in extremo spiritu sui simillimus, Societate ipsam suorum bonorum scripsit heredem. is cum e vita discederet magna contentione Patrem nostrum implorabat Ignatium, & prima illa nostri Ordinis fundamenta, quæ beatorum loco ducebat. Aliæ præterea illustres semine nonnulla alia testamento legarunt, cuiusq. in suburbio frequentiore, domo sane comoda nos donauit.

ECCLESIENTSIS ager, ne is quidem suis fructibus vacuus est. Multi qui infestis tenebatur odijs ad inimicorum charitatem benevolentiamque translati sunt. In eoq. numero mulier fuit, quæ filij charissimi cade, totos viginii menses nullis precibus placari

poterat. & alia, cui cum necatus esset vir, suadentibus nostris ut ab actione desisteret, quam iam intendat inimico, destitit sane, naturam vincens Deoq. omnem donauit iniuriam. Vidua coniugis obitum ita lugebat, ut multos iam menses nec lugubrem vestitum poneret, nec ad templum accederet; imo ne familiarium quidem congressus & sermones admitteret. sed cum sensim ad ædem nostram venire cœpisset & diuinis sese expiare mysterijs, totam se Dei nutui voluntatiq. permisit. Catechismus traditur pueris ferme ducentis. Pauperes & quos vel coeret carcer, vel à stipe quærenda nobilitatis pudor deterret, conquisitis eleemosynis sustentantur. cumq. permulti sine panis frustulo dies aliquot sæpe transigant, impetratum est ab oppidi Præsfecto, ut eius rei causa constituentur, qui è finitimis pagis stipem corrogent, idq. fieri magno inopum bono iam cœptum est. Obeundis vero vicinis oppidis complures inimicorum iræ ferroq. subtracti sunt: corrupti præterea mores emendati: Sacerdotibus tradita de sacramentorum administratione doctrina: confessiones plurimæ plurimo cum fructu auditæ: multorum præsertim, qui multos annos ab expiandis animis abstinebant.

P R O V I N C I A

B O E T I C A .



Boetica Prouincia in vndecim diuisa sedes, quadringentos de Societate complectitur. Fuere tum in Hispalensi Professorum Domo, tū in eiusdem ciuitatis Collegio, in singulis sexageni. In Cordubensi circiter octoginta. Quatuor & quinquaginta Granatæ. In Montelano quinquaginta. In Zerenſi duodecim. Tredecim in Marcenſi. In Gaditano quindecim. Vno plus in Malacenſi. In Triguerenſi ſeptemdecim. In Væzanano denique duodeuiginti. Morte erepti ſunt octo. Adiuncti vnus & viginti.

H I S P A L E N S I S P R O F E S S A

Domus, & alia quædam Collegia.

IN Hispalenſi ciuitate varietas ipſa nationum, quæ negotiationis cauſa frequentes conſtuunt, peramplum ſocijs noſtris explicat campum, vbi eorum excurrat induſtria. teſtatur hominum celebritas ad uſurpanda ſacramenta, quæ in Profeſſo-

rum æde tanta est præcipuis præsertim diebus festis, ut celebritatem Iubilæi quodammodo referat.

In HISPALÆSI Collegio ad Humanitatis Scholas adiecta recens est disciplina Theologiæ, & quo plus Gymnasio dignitatis accederet, ab honorificis disputationibus, quibus Archiepiscopus Cardinalis interfuit, scholarum sunt ducta primordia. Auxit celebritatem Gymnasij exædificatio recens, crevitq. Auditorum numerus ad nongentos: & quod caput est, cum multitudinis incremento crevit etiam ipsa religio. Quinquaginta se ad religiosos hominum cœtus aggregarunt, ex eoq. numero ad Societatem sex. Ad fouendam autem tuendamq. pietatem adhibita sunt vrsitata sodalitatum præsidia, quæ cum Dei Matrem præcipuo quodam religionis studio venerentur, latiores indies progressus ad omne officij decus experiuntur.

C O R D V B ÆE floret etiam disciplina Gymnasij. Prælectiones de rebus Theologicis habentur quatuor, ventitantq. discipuli circiter octingenti. Ad augendum autem Collegij numerum ac fortunas, præclara, Deo fauente, iacta sunt fundamenta. Gregorius enim xij. pro sua in nos indulgentia plus quam patria, tria & ea quidem non exigua sacerdotia nobis attribuit. Ad hanc Pontificiam liberalitatem accessit tanquam cumulus, priuatorum benignitas, cuius subducta summa est scutatorum fere bis mille, itaque diuino munere atque concessu strenue vergetur inchoata templi constructio, propediemq. perducetur ad

exitum. Hæc tam eximia Dei beneficentia, cui accepta referenda sunt omnia, defides nos esse non patitur. conatur unusquisque pro opibus, ut quærendis animarum lucris tantæ Dei benignitati respondeat. destinatiq̃ue sunt eius rei causa diuersa in oppida Sacerdotes, præcipueq̃ue Lorenam. Est autem Lorena quingentorum & quinquaginta caput oppidorum. erant huius loci incolæ, male in nostros affecti, nec deerant, qui suis concionibus impedire nostrum conarentur aduentum. interposuit suum ipse nutum atq̃ue auctoritatem Gubernator, qui cum nostros inuitis omnibus recepisset, reuehementer ab vniuerso populo reclamatum est. nemo eos congressu, aut colloquio dignos iudicabat, vitabat eos unusquisq̃ue ut aliqua dedecora ac probra: nec prius hæc de nobis opinio ex hominum mentibus est euulsa, quam à religionis Quæsitorebus singulari studio ac beneuolentia causâ nostra suscepta est. Tum demum ad eos ciues liber aditus patuit, quos conciliare nostri dum student, & ad æternam salutem partim concionibus, partim exemplo vitæ perducere, mirum est, quam subito omnium animos mentesq̃ue conuerterint. itaq̃ue qui rem putabant indignam, nostros ciuitate recipere, ij postea receptos tanto sunt amore complexi, ut de exstruendo Societatis Collegio mentem cogitationemq̃ue susceperint: & in eam rem aureos mille nummos, in annuos fructus sponponderint.

G R A N A T E N S E

Collegium.

Granatæ communis quædam vis morbi, quæ longe lateque peruagata est, nulli fere pepercit è nostris. cecidere Sacerdotes duo, quorum utilis opera cum probitate certabat: reliqui deuictio morbo ad suum quisque munus alacres surrexere: & quidem tanto ardentiore studio, quanto præclarior sese dabat occasio. Quandiu lues illa occupatam ciuitatem tenuit, nostri externis ægris nullo habito personarum discrimine, non secus ac domesticis affuerunt. nec ægris modo, sed eorum etiam, qui in publicis custodijs habentur, & animis & corporibus prospexerunt. Institutum est inter eos in honorem IESV nominis sodalitiū, cuius sodales mensis cuiusque primordijs confessione purgati, cælestibus primum Eucharistiæ epulis, deinde etiam terrestribus saturantur; excipiuntur enim munifica Archiepiscopi liberalitate conuiuio, qui certam in eam rem pecuniam vnoquoque mense suppeditat. ita effrænata hominum licentiâ, quæ in his locis debacchari solet, facile coercetur. Ea re Regij Senatus Præses admonitus, idem ipse quoque in custodia alia superiore non sine approbatione ciuitatis instituit. Ex ijs autem, qui è carcere ad patibulum rapiuntur, Mabometanus quidam rogo damnatus, etsi nullis antea colloctionibus adduci poterat, ut prius quam vita excederet, spretis superstitionibus

patrijs, Christum Deum, Deique filium agnosce-
ret. tamen auræ cælestis afflatu simul atque acces-
sit ad mortem, sententiam repente mutavit, er-
rorem depulit, edoctusque à nostris elementa Chri-
stianæ religionis, ita firmanit animum in sententia,
ut tam atroci supplicio suum ultro corpus obijceret.
id quod spe salutis minime dubia, fortiter & constan-
ter excepit.

Inter pagos cum vilitate lustratos, lustrata est
etiam Archiepiscopi diœcesis, eo scilicet postulante,
ac rogante. Quadam in vrbe, Clerus erat pernicio-
sæ factionibus odijque distractus, quem cum
Archiepiscopus ne per idoneos quidem viros con-
ciliare potuisset, sensit ad extremum eius compo-
sitionis summam imbecillis esse hominibus reserva-
tam: indicto sacerdotum conuentu & Societate Sa-
cerdos, habitaque concione ad placandas iras accom-
modata, eorum animos conciliauit rursus atque
coniunxit.

Ex ijs, qui se Spiritualibus Exercitijs excoluerunt,
antiquissimus fuit Regij Senatus Auditor, qui Tri-
bunali id tēporis præsidebat. Is eâ hebdomada, quæ
propter mysteriorum, quæ tunc celebrantur, sancti-
tatem, Maior merito nominatur, curis ceteris in-
termissis, apud nostros se paulisper collegit, apud
eosque repetitis superioris vitæ peccatis rite ani-
mum expiauit. Hunc imitatus est alius Consi-
liarius Regis, qui ad regium tribunal ipse quo-
que recens vocatus, non prius munus illud at-
tigit, quam à rebus humanis se tantisper abdu-
cent,

cens, eidem rerum diuinarum studio eidemque animi expiationi vacauit.

COLLEGIVM MONTELANVM & reliqua.

Montelano Collegio Nouitiorum adiunctæ sunt ædes, in easque socij vnus & viginti recepti. in his viduæ matris vnicus, qui cum ea in scia ad nos discessisset, mater mente pene emota, distractionem illam ægerrime ferens, longum iter ingreditur, vt solatiũ solitudinis suæ, carissimumq. pignus recuperaret. Vt urbem attigit facta que est filij alloquendi potestas, Quas lacrymas precesq. non fudit? quos amoris stimulos non admouit, vt pectus tenerum emolliret? sed aduersus ea pectora, quæ cælestis amor obarmat, irrita est omnis ars, & plus habet roboris diuina charitas, quam materna. itaque diu illa iironem oppugnare potuit, expugnare nunquã potuit. Iam alienæ salutis procuratio, eadem, quæ semper: nec tamen in animorum cura suscipienda corporum est neglecta salus. In summa annonæ difficultate, quæ durior facta erat indies, inita est eiusmodi ratio, vt & publicæ calamitati & infimæ multitudini, quæ per id tempus extrema premitur egestate, consulere tur: corrogatæ sunt singulis hebdomadis a nobilitate pecuniæ, nec vlla fuit hebdomas, quæ non ad aureos minimum quinquaginta pe-

cuniarum summa pertingeret: ita miserorum est leuata mendicitas. Aluit autem hanc ciuium inchoata beneficentiam singularis pietas Marchionis, cuius auia optima femina collegium nobis à fundamentis extruxit, opibusq. ditauit.

In Collegio *MARCINENSI* Ducis Archobrigensis rogatu, eorum patrum, qui ad instituendum Procuratorem Prouincialem venerant, coactus est cœtus. quamdiu autem dimissus non est, semper ab eo omnia ad omnes vitæ vsus suppeditata sunt, dataque vestis in templum textili auro argentoque depicta, quæ septingentis aureis indicatur.

GADIBVS nostrorum opera in animorum salutem sane quam vtiliter impenditur. portus enim Gaditanus cum inuehendis euehendisque mercibus maxime celebretur, mercatores in negotiatione gerenda, arctas impeditasque conscientie rationes apud nostros expediunt: ita ab iniquis fœnerationibus quæstibusque nefarijs plurimi reuocantur. Sunt etiam à nostris Turca & Saracenus Christianis legibus, priusquam baptismo lustrarentur, imbuti. Ciuium autem quæ sit religio vel è templi cultu conijcitur: plurima id liberalitate splendet, in itaque pecuniæ summa in vsus templi collata, reperti sunt aurei nummi ferè quingenti.

TRIGVERENSI Collegio, Dux Metinensis pro singulari eius in nos amore, aliquot agri iugera cum Collegij prædio continentis attribuit.

In *MALACENSI* Collegio diuturna pestilentia, quæ Ciuitatem perpetuis fere funeribus exhaussit,

hausit, gymnasii numerum non mediocriter immi-
nuit. Aucta tamen facultas est de hominibus bene
merendi, alijs in studijs atque muneribus. miseris,
quoad fieri potest, benigne succurritur. adhibentur
affectis morbo solatia, omnibusque opibus, qui mor-
ti proximi sunt, confirmantur.

In VAEZANO Collegio, graues ciuium con-
tentiones, vnde magni motus metuebantur, sopitæ
sunt: effectumque, vt quorum vel vita, uel fortuna,
uel fama denique uiolata essent, ij suas iniurias vo-
luntaria obliuione contererent. ex eo numero qui-
dam brachio uulneratus, non modo iniuriam suam
ipse contempsit, sed percussorem è publica custodia,
quo supplicij caussa coniectus erat, mittendum cu-
rauit.

In XEREZANO Collegio, quanquam pesti-
lencia ciuitatem uehementer afflixit, tamen singula-
ri Dei patrocinio è nostris neminem laesit: & tamen
tantum abest vt pericula declinarèt, vt ne quis æger
suam operam præsentiamque requireret; uitas suas
animarum saluti posteriores ducerent. Itaque quis-
quis Sacramenti caussa presbyterum euocasset, ad eum
sine recusatione ac sine discrimine mittebatur. Respu-
blica quæ factionibus ante diuisa, hostiliter secum ip-
sa certabat, odia sua publicæ incolumitati concessit.
Foris autem ciuitas quædam, cuius disciplina omnis
effractis legum iurisque repagulis interierat, cæle-
sti primum ope, deinde etiam nostrorum diligentia
seipsa correxit, ijsque se institutis astrinxit, vt quæ
ab omni pietatis genere aliena erat, postea ad acci-
pien-


pienda pia quædam minuscûla , quæ ad acuen-
 dum pietatis studium dissipiebantur à
 nostris , certatim vniuer-
 sa concurreret .



[Faint, mostly illegible text in a single column, likely bleed-through from the reverse side of the page.]

P R O V I N C I A

P E R V A N A .



Vnt in Peruana Prouincia centum amplius ac triginta de nostris. In Limensi Collegio, quod omnium maximum est, septem & sexaginta. In Cuscbensi vnde viginti. In Potosino quatuordecim. In Arequipensi decem. Totidem in Pacensi, In Iulienſi ſede duodecim, In Reſidentia S. Iacobi, quæ paſſuum circiter duo millia Lima diſtat, non plus duo. In Societatem adſcripti ſunt octo. Obijt vnus,

Conſtat hæc Prouincia triplici hominum genere, Hispanis, Indis, atque Aethiopibus: quorum numerus duplo maior quam Hispanorum eſt, omnium ſaluti pro virili ſuccurritur, ac præter conciones templorum, habentur ab omnibus fere Collegijs conciones in foro, non modo pari cum vtilitate, ſed ſæpe etiam ſuperiore. Aethiopum præcipua ratio ducitur, præſertim Limæ. Nullum genus hominum, Sacerdotum opera magis eget, adeo inanes ſcientiæ hebetesq. reperiuntur, & , quod inſcitiam plerumque conſequitur, moribus corruptiſſimis. excoluntur verbo Dei, & Chriſtianis præceptis aſſidue. Excunt noſtri medios in vicos, publicasq. vias, eoſq. blanda oratione

tione vel in forum, vel in Paræcias ad audienda salutis verba perducunt. ita ab impuris ludis, & ebrietatibus, ubi se frequenter occidunt, facile reuocantur. Ex hoc hominum genere, duodecim millia amplius Limæ versantur, ut necessario varia urbis ob-eunda sit regio, nec vno tantum loco diuini verbi semina iacienda. Ad Indos festo quoque die pij sermones habentur, idq. in omnibus ferme Collegijs. Sunt & sodalitates ubiq; ad sanandos tum Aethiopum tum Indorum mores, in quas nulli prius aditus patet, quam eius perspecta & explorata sit virtus. atque hæc ad reprimenda vitia non mediocris est ars. vitat enim ea quisque omni animi provisione, quæ sibi sodalitatis aditum intercludant. Iam sacramentorum plurimus ubique vsus. auxit tam salutarem consuetudinem, præsertim inter Hispanos per-frequens Iubilæum, quod qui consequi volunt (volunt autem semper innumeri) necesse est Sacramenta percipiant: ita fit, ut à præbenda contentibus aure nulla sit quies, præsertim quod nescio qua hominum religione, vel de Societate nostra iudicio, confessionis causa ad nos plerunque concurritur. Testabatur quidam non sine lacrymis, cum annum iam vigesimum ad Sacerdotis genua non accidisset, per quietem sibi, visum esse eximia forma puerum toga purpurea, qui negligentiam salutis accusans moneret, ut admissa dedecora confiteretur, statimq. se è lecto surrexisse, pueroq. duce ad Limensem venisse Collegiū; ab eoq. commonstratis Collégij foribus iussum esse in eo expiare peccata: ibi enim veram medicinam
 animi

animi repertum iri. Huius visi species in eius anima sic insedit, ut nulla interposita mora concesserit ad Collegium, Rectorisque pedibus aduolutus peccata sua multis cum lacrymis sit confessus. Si id visum diuinitus est oblatum, est quod ille diuinis monitis gratiam habeat, quibus se recepit ad frugem: sin autem fortuitum fuit, & ut pleraq. somnia, casu accidit; tamen ex eo ipso facile est iudicare, quemadmodum affecti sint homines erga nos, quibus etiam occurrimus quiescentibus. Atque ut qualis sit non Hispanorum modo, verum etiam Indorum Aethiopumq. in nos beneuolentia perspicias, illud sileri non patiar. Mulier quæ ad verum Dei cultum nostrorum opera se conuertit, appropinquante morte, beneficii memor, cum sibi nihil esse intelligeret, quo tantum munus remunerari posset (erat enim inops) maritum accersit, eiq. significauit hanc esse suam supremam voluntatem, ut cum in seruitutem traderet Patribus, antequam decederet: allatisq. testamenti tabulis, fecit quod dixerat, viro non modo non repugnante, verum etiam lubente. qui cum suum se non esse perspexit, sed in nostrum transisse ius, ad Rectorem alacer adijt, & quantum in ipso fuit, eius se nutui potestatiq. permisit.

Nec vero domi tantum nostrorum se charitas tenuit. multiplex enim ac varium animarum causa susceptum est iter. Vt pauca de multis. ab Arequipensi Collegio in remotas partes, & Hispanis vix antea cognitum est, quanto cum labore non facile dixerim. superandi fuerunt prærupti atque asperi montes, & superan-

superandi pedibus, non iumentis; adeo in arduos eriguntur ascensus. est præterea regio infesta viperis ac cyniphibus, cœlum graue, calores immoderati, ut nihil te præter animarum lucrum alliciat. Complures ibi baptizati sunt Indi, complures ad baptismum eruditi, multi item à suis expiati peccatis, & quoniã ita charitas ac necessitas imperabat, mortuorum interdum corpora sepulturæ mandata.

A CVSCHENSI Collegio varij etiam in varia loca dimissi sunt socii. Patres duo vno adiuncto laico, in quorundam militum comitatu ad exquirendas infidelium Indorum regiones per mediterranea huius provinciæ loca profecti, quos labores ærumnasque pertulerint, longum esset enumerare. Cum aquis in itinere luctandum fuit non sine præsentis mortis periculo, & trabibus credenda corpora ad iras fluminum euitandas. interdum per auia montium, & iuga aspera transeundum, victu pene nullo, & cultu corporis valde tenui, insequente præterea à tergo cyniphum examine. molestissimo. itaque, quod necesse fuit, nonnulli è militibus fame, alij fluitibus perierunt. nostri Deo miserante, cuius caussa laboriosum illud iter erant ingressi, ex ipsis mortis faucibus euasere. Nec vero his laboribus territi acres Christi milites, de repetendis suis sedibus cogitarunt. nimis dulcis est animarum salus, quæ te semper ad pericula vocat, nouos semper ad labores inuitat. In aliam regionem cum iisdem militibus perrexerunt, & ad certa discrimina calamitate squo antecedentibus grauiore. Itaque ex tot itineris in-

commodis ac molestijs domum reuerti sunt ægri. Cui non miserationem commouissent exangues illi pallidique vultus? summa erat oris macies, summa tenuitas, deformitas vero corporis tanta ex crebris vlceribus peregrinando contractis, vt reuerti ad pristinum habitum sedula ac diuturna curatione vix possent. Non temere sed consilio ea instituta profectio est. spes enim erat, fore vt multæ barbaræ nationes Christi legi sua colla subijcerent, nec ea quidem crepta est, sed dies videlicet expectatur.

Ad Indos Carauayas destinatus est alter, qui ne ipse quidem suæ fuit expers coronæ, nam vbi molestias multas in erudiendis cælesti doctrina barbaris deuorasset, dum aliam ex alia profectionem cogitat, equi lapsu præcipitatus in terram, domum reuehitur semiuiuus. sed diu post recreatus è morbo, tanto ardentius has optauit expeditiones, quanto sibi exploratius fuit, hæc ijs potissimum reseruari, quos in amoribus Deus habet.

A POTOSINO Collegio missa sunt etiam in exterarum gentes summa cum vtilitate subsidia. Pater quidam ex ijs, qui nouissimi ex Hispania venerant, nactus duas de præcipuis Indorum linguis, ad barbaros quosdam Superiorum iussu se contulit; ibi magnam vim hominum sacro fonte lustrauit, in ijsq. centum amplius ex vtroque sexu iam senes, quorum nonnulli eo ipso, quo renati sunt die, tanquam iam cælo tempestini ac maturi de vita migrarunt. Duplici peregrinatione, semestri non amplius spatio, trecentos viros & feminas baptizauit. familias integras nō pau-
cas

cas catechesi & concionibus iuuat, plurimos à vaga & turpi copula ad honestum & constans matrimonium reuocauit. Scelera multorum præbendis rite auribus expiauit. non illum frequens imber, non vastæ atque horridæ solitudines, non asperitas niuium ac frigor, non iniuriæ nocturni cæli, sub quo pluuijs madefactus aquis, pernoctabat interdum, ab animarum causa retardauit. hæc enim sæpe ferant, hæc subeant necesse est, qui per hos Indiæ tractus conquirere iubentur animas. sed laborum tristitiam dulcedo temperat cælestium voluptatum, facitque ut alacriter inuicunda, difficilia facile suscipiantur.

In sede IVLIENSI perpetuis item se laboribus fratres exercent, siue externis siue domesticis. domi duodecim hominum millibus quotidianum diuini verbi ac Sacramentorum pabulum subministrant. Foris diuinis præceptis imbuuntur agrestes. itumq. eius rei causa varia in loca, præcipue ad syluestre genus hominum, quod in montibus vitam degit, nec vno tantum loco consistit, sed huc atque illuc venationis causa pererrat. Nostri dum pari studio venantes venantur, non paucos ex eo numero Catechesi diligenter excultos, ad baptismum adduxerunt: & à vaga illa syluestriq. vita ad elegantiam societatis humanæ traductis, domos apud se annonâq. de suo singulis mensibus assignarunt. Multa consulto prætereuntur, quæ geruntur ab ijs, qui ad externos dimittuntur. Ne omnes quidem protectiones omnium, quæ in vniuersa Prouincia quatuor & viginti numeratæ sunt, commemorari possunt. Satis est

ex vnaquaque re delibasse præcipua, quæ & eorum virtutem, quorum narrantur acta, declarent, & ceteris proponant exemplum ad imitandum. Nec vero nostri tantum ad cogendas errantes oues, sed hæ quoque ipsæ ad alienos pastores vel ex disiunctissimis locis venire nonnunquam. Limam cum à Chilen si Prouincia naues appulissent, vnus è vectoribus ad pietatem sua sponte propensus; cum multa in ea regione de nostris hominibus cognouisset, incensus tum videndi cupiditate, tum expiandi animi, passuum milia quingenta venit. Sane plurimum habet momenti ad animarum salutem vitæ integritas ac sanctimonia, cuius fama ipsa, vel ex vltimis terris homines excitantur.

Habitu est hoc anno Prouinciale Concilium, cui noster etiam Prouincialis interfuit, multa quæ in eo de nostrorum sententia, in Hispanorum atque Indorum commodum sunt decreta. Sanxit Synodus ipsa, præcipue vt catechismus & liber aliquis ad instituendos animarum custodes, tum Hispanica lingua tum duabus Indicis scriberetur, cautumque ne quis in posterum Indis traderet, vt fiebat, suo arbitratu Christianæ rudimenta doctrinæ. Data est hæc prouincia nostris hominibus, à quibus magno labore & vigilijs perfectum est opus. Idq. tum vulgo probatum, tum ipsi Concilio, cuius per edictum nemini licet inter Indos alia vti formula catechismi. Res fuit plane salutaris. nam cum antea siue inscitia, siue incuria interpretum, plurimi orirentur errores, nouæq. opinionum causæ semper existerent, nunc huius catechismi

chismi beneficio facile impetratum est, ut quid ab Indis sentiendum quidue reijciendum in fide sit, intelligatur.

Litteræ suos quoque progressus habent. Est Limæ discipulorum centubernium e tribus & viginti collegis, cuiusmodi sunt Collegia Salmanticæ vel Compluti. ij nostras frequentant scholas: nec parum ex eorum accessione gymnasio nostro allatum est ornamenti. quanquam autem suum ipsi Rectorē probatis moribus habeāt; Nostri tamen hoc susceperūt, urgente Prorege, ut eos ad pietatem religionemque dirigerent. ex eoq. numero ut è reliqua disciplina nostra, ad cænobium multi se conferunt.

Iam vero commoda quoque augentur externa. Vir nobilis nostræ vitæ familiæq. percupidus, dum in hac mente ac cogitatione versatur, mors interuenit. Sed quando nobis tradere se ipse non potuit, sua certe quin traderet, facere non potuit. hæredem Limæ Societatem instituit ex asse, totaque hæreditas pluris decem scutatorū millibus æstimatur. Nostri ei & tanquam fratri, & tanquam benefico parentarunt, eandem illi precati sedem & locum in cælo, qui nostris, ut speramus fratribus reseruatur. Inda præterea mulier, tria aureorum millia testamento reliquit, & ab alijs alia Limæ sunt data. Par ac fortasse superior Potosi liberalitas cernitur. nec mirum, sunt enim hic argenti fodinæ, vnde in Hispaniam diuitiarum plurimum asportatur. ita quicquid nostri vellent, à ciuibus vel nutu consequi possent. Sed tamen sibi temperant, ne pluris aurum quam animas

facere videantur. Templum ibi pereleganter exstruitur. qua in re maxime Indorū declaratus est amor. singulis diebus mille, ubi opus erat confluebant ad fabricā. Senatores vero Regiæ Curia, aureos quotannis mille eleemosynæ nomine decreverunt. eorum autem rogatu, traditur d nostris publice Indica lingua, magno tum Indorum, tum

Parochorum bono: plurima enim ex eius ignorantia sacrile-

gia ac facinorosa ad-
mittebantur,

quæ

nunc tandem eius scho-

la beneficio tol-

luntur om-

nia.

P R O V I N C I A

M E X I C A N A.



Etsi ab hac Prouincia annum nobis litterarum munus persolutum non est; tamen ex priuatorum litteris nonnulla, quæ ad exemplum communemque lætitiā facere videbantur, excerpimus. Ea sere ad Pascuarense Collegium spectāt omnia. cuius Rector cum animaduertetet superioribus annis hīs de rebus valde ieiune exiliterq. perscriptum esse, & ingentes præteriri fructus, qui ex Indis quos Naturales appellant (id quod in his locis spectatur in primis) percipiuntur; summam ipse rerum omnium ad nos perscripsit, quæ & mores gentis, & eius ad Christum conuersionis initia ac progressionē, & ea denique, quæ ex Societatis in eas regiones ingressu sunt consecuta persequitur. Ea nos hoc loco subiiciemus. Nostrorum autem in hac Prouincia numerus solet esse minimum centum ac viginti. Quot autem Prouincia ipsa sit vel aucta tironibus, vel diminuta mortuis, sciri litterarum intermissione non potuit.

COLLEGIVM PASCVARENSE:

Quoniam hic Hispanorum magna vis est, multique loci propinqui, ea natione referti; cogimur & eorum, & Naturalium Indorum animis opitulari. Itaq. tanta est nostrorum occupatio, ut si plures essent operæ, eæ quoque plurimum negotij haberent, si vel vnus tantum Hispanorum commodis deseruirent. Quæ tamen occupatio, si cum ea, quæ cum Indis suscipitur comparetur, nulla prope modum videatur. De vtroque hominum genere dicendum erit, prius de Hispanis, postea de Indis. Habentur ad Hispanos tum in nostro, tum in curiali templo, statis temporibus conciones, quarum longe lateq. patuit utilitas: sed ea præcipue in componendis iratorum animis versata est. Ineunte quadragesima, cum primarij ciues disiuncti distractiq. essent inter sese, & diuturna iam lite mutux quotidie offensiones existerent, ut tantum non ad arma cædesq. veniretur, placuit Deo, Sacerdote nostro de ijs Euangelij verbis concionante, Diligite inimicos vestros &c. ita omnes ad æquitatem flectere, ut simul ac concionandi factus est finis, antequam templo pedem efferrent, violatam amicitiam mutuis amplexibus redintegrarint. Egregium spectaculum & lacrymas vel extorquens inuito, ciues nobiles in celeberrimo templo, atque in luce totius ciuitatis, supplices sibi esse vicissim pacis & veniæ causa; omniaq. Patris arbitrio ac moderatione transigenda ac

con-

constituenda permittere. Publica fuit ciuitatis vni-
 uersæ lætitia, eoq. maior, quo maior fuerat despe-
 ratio concordia. Per quadragesimam habetur ad
 rudes, & seruitia domestica Catechismus. Domi
 Hispanorum ciuiumq. liberis prima litterarumele-
 menta traduntur, vt ea non modo probe norint
 atque expedite legant. sed etiam vt calamo scite fin-
 gant, & exprimant atramento. horum magnus est
 numerus, nec mediocris ex ijs capitur fructus, cu-
 rantur enim eorum animi pro ætatis capiti sedulo
 ac diligenter, vnusq. è nostris in eam rem totus in-
 cumbit, egregia cum laude & commendatione So-
 cietatis. Hispani suam in nos vicissim beneuolentiã
 studiumq. declarant, dum suis non amplis opibus
 nostram leuant inopiam. nam cum huic domui nulli
 sint redditus, neq. aliunde sint prompta quotidiana vi-
 tæ subsidia, accedantq. sumptus domestica fabricæ;
 tamen quod ad victum & cultum pertinet, sola ho-
 minum liberalitate cuique fit satis, eaq. tam volun-
 taria, tam nullis euocata nutibus, vt nostri petendi
 cura, aut contrahendi æris alieni sollicitudine libe-
 rentur. Quid? quod ad templum quoq. cumulus be-
 nignitatis ascendit. nam cum paucis ante diebus ad
 sacrificia vix necessaria vestis ornatusq. suppeteret,
 propterea quod ad Vallisoletanum Collegiũ, vt mox
 dicetur, omnia pene translata essent; nunc de neces-
 sario apparatu nihil ferme desideratur. Atque vt
 hoc studium subleuãde tenuitatis nostræ cum omni
 amoris significatione coniunctum, planius intelliga-
 tur, proximo Augusto nostris adibus de cælo ta-
 tis

His (sūt enim in his regionibus crebri fulminū ictus)
 subito concepit ignē sacelli maximi contignatio, quæ
 aridis cōstabat ex paleis: cūq. serpere momēto flāma
 cōpisset, & iam in templū titiones crebri deciderēt,
 suspicati sunt homines, in cineres redactū iri omnia,
 erat enim, vt dixi, domus tū arida materie, tū gemi
 na contignatione contecta, nulla re intermedia, quæ
 aut prohibere, aut morari posset incēdiū. Vt ignis ap
 paruit, certatim aduolant vniuersi ad ferendā, quā
 possent opem: antiquissimum fuit, ignem pabulo
 prohibere, & quæ alicuius essent pretij a flamma
 defendere. erat tum sœdum imbribus cœlum, & ta
 men nobiles ac primarij viri, nullas cœli veriti iniu
 rias, res nostras igni subtraetas in suas ades custo
 diæ causa suis humeris comportabant. nihil relique
 runt, quod non cum diligentia domi suæ conditum
 asseruarent. ipsas quoque imagines tabulasq. templi
 vna cum cratibus, & quicquid tolli & commoueri
 loco poterat, abstulerunt. Diuini muneris fuit, vt
 ades nostræ, quanquam deletæ iam igne putaban
 tur, propterea quod aduersus incendiij vires vis om
 nino nulla valebat, incolumes tamen conseruariētur.
 Tantum ille animi tribus Indis iniecit, vt ædium su
 periora conscenderint, obuolutiq. suis ipsi pallijs,
 stragulisq. tecti, medios sese in ignes horribilesque
 flammās immiserint. ea ratione, vt vna omnium
 vox fuit, diuinitus stetit ignis. Quid enim causæ fuit,
 cur pallijs stragulisq. parceret, aptissimo tamen
 flammarum pabulo, parietibus vero, ceterisq. rebus
 non parceret? adde quod in ea vrbis parte nostra
 sunt

sunt ædes, quæ his maxime cladibus est obnoxia, ut nemo dubitet, quin ab eodem restinctus sit ignis, à quo de cælo vibratus, ut vel hoc ipso videatur voluisse vibrare, ut & quo nos tueatur amore; & quæ sit civium in nos charitas declararet. Illustriorem fecit diuini numinis providentiam, quod cum fulmē accidit, omnes fere domo aberant, erat enim is Ioanni Baptistæ neci festus ac sacer dies, quo die septem de nostris ab Urbe discesserant, duo longe aberant à discrimine: tres, qui proximi erant, subito exanimati metū, atque intermortui, mox etiam robur atque animam receperunt. quod si reliqui domi mansissent, quis præstare posset omnibus hanc eundem euentum? cum præsertim ille ipse locus, quo plerumq. colligendi sui causa sese nostri recipiebant, sit de cælo percussus. Inanis reperta est eo die domus nostra ab omni supellectili; nec ubi querenda esset meminerat quispiam, erant enim omnium animi pene attoniti, & ut ij, qui cum vim tempestatis effugerint, nihil fortunarum ceterarumq. rerum meminērunt, salui tantum capitis memores & euitati periculi. Hoc superato discrimine, quicquid plij homines è nostris ædibus custodiendum abstulerant, id omne biduo fideliter retulerunt. nihil omnino desideratū est, nihil non repertum. Quod admirandum sane fuit, tum quia plurima supellex erat, tum quia multa in ea perexigua atque minuta, quæ sine scelere retinere quis poterat; nemine explorante præsertim, quid quisque surriperei, vel autheret. Hanc fidelitatem excepit cum Hispanorum, tum Indorum noua benignitas.

gnitas. Illi pecuniam, hi operam in resarciendas ignis iniurias muniendamque paulo firmitus domum contra fulminis impetus contulerunt.

Suscepta sunt ad Hispanorum regiones plena vtilitatis itinera, præcipue in oppidum quod Zamorã vocant, multis precibus incolarum. Sed eo Sacerdos noster et venit, ita impedita ac perturbata offendit omnia, ut iam de reditu cogitaret. Incitati erant animi omnium contra Parochum, odiaque spectabant ad certam cadem, & quoniam pater ciuilis commotionis ignarus, diuerterat ad Parochum, iccirco qui illum æquis oculis aspicere, aut affari vellet, inuentus est nemo. Sed dum ad colloquium singulares homines Pater elicit, & ad congressum inuitat, ubi plures semper difficultates animaduertit, hospitij commutandi consilium capit. Obrepserat iam Quadragesimæ solemne ieiunium, aptissimum anni tempus ad animorum curationem. per hanc igitur opportunitatem, statuit pater sibi habendam esse die cinerum concionem. populus nihilominus perseuerabat in odio, & in Parochum sic erat incensus, ut ne eius quidem manu aspergi sibi cineres pateretur. minus ergo secundis auribus auditus est pater. redit tamen ad concionandum perendie, quo die quoniam ex euangelio inimicorum charitas commendatur, visus est nonnihil iras hominum mitigasse. Sed inimicus homo, qui ad animarum perniciem semper incumbit, eo ipso die iterum turbauit omnia. Iam ventum erat ad manus, eductique micantes gladij, ac nisi peropportune interuenirent, qui digladiantium congressum

pugnamq. dirimerent, alij mortui, alij grauibus con-
fossi vulneribus efferrentur. Summum tum pericu-
lum Parochus adiit, cuius, causa omnis illa excitata
tēpestas erat. Interim res desertur ad Patrem, qui
pro virili parte animis vtcumque sedatis, postridie
ad Sacrificium populum vocat, nulla concionis facta
mentionē, ne vt plerumque fit, multi nondum sani
suique compotes, quæ sibi salutaria esse possent, audi-
re nollent. Peracto sacro, sermonem ex æquo fami-
liariter instituit ad conciliandos animos accommo-
datum. Sed ei orationi tantas vires attulit Deus, vt
priusquam perorandi factus est finis, discordiarum
principes valde permouerit. hic fundamenta iacta
sunt pæcis, mutuiq. complexus dati, summæ indices
charitatis. Postea ad eos Pater, qui tum abfue-
rant, adiit, cum ijsq. Deo duce sic egit, vt nullæ am-
plius resederint simultatum reliquiæ. Postero die
promulgatum est à Patre Summi Pontificis Iubi-
leum, nondum enim eo vsque peruenerat. ac per
eam occasionem tanti facti sunt ad sacram Confes-
sionem Communionemq. concursus, vt quanquam
ille diluculo ad audiendos in templo pœnitentes cui
gilaret, multi tamen anteuertent præstolantes.
increbrescebat deinceps numerus eo vsque, vt ad in-
clinatum iam in pomeridianum tempus diem, de sel-
la surgere, quo se mane reclinauerat, non liceret.
Secundum cibum eodem redibat, ibiq. ad quartam
noctis, absolueudis reis operam dabat. ita debitum
psalmodiæ tempus, ceterarumq. ex instituto precū,
commentandiq. ea, quæ pro concione dicenda es-
sent,

sent, id totum somno, qui parcissimus erat, eripien-
dum fuit. Pœnitentium animis nihil paratius, nihil
eorum confessionibus explicatius, magna ut esset Sa-
cerdotis nostri leuatio. Confessionem ab ipsis pene
incunabulis ordiebantur omnes: sed quoniam per tē-
poris breuitatem (quindecim enim modo dies Pon-
tificis Iubileum tenuit) eius generis confessiones tam
multas excipere non licebat, complures ex his Pa-
ter præsertim eorum, quorum studia non ita incen-
sa cognouerat, in aliud tempus reiiciendas putauit.
Exacto Iubileo, ijs tantum confessionibus, quæ plu-
rimæ fuerunt & magni ponderis data opera est, ita
tamen, ut eodem tempore Indorum famulis atque
mancipijs, quorum magna multitudo erat, consule-
retur. Sub idem tempus eius rei causa è finitimis
quoque locis, conferta pœnitentium turba confluit.
Ex quibus nonnulli multos iam annos animos non
curarant, qui tamen confessionis medicina, quam ve-
hementer egerent, testes sunt Patris aures, quæ ad
eorum confessiones horrebant. Qui per Iubilei dies
se se expiauerant, ijs denuo ad confessionem paucis
ante Pascha diebus, tanto cum progressu suiq. mu-
tatione redierunt, ut non sine magna tum admir-
atione tum voluptate, multa sibi sacerdos de eorum
constantia ac salute polliceretur. Nec vero in tanta
confessionum ac concionum occupatione prætermis-
sa est Christiana doctrina, hanc Pater provinciam
cum obire ipse non posset, homini dedit externo, fa-
miliari ac probato. attulerat ipse Catechismi libel-
los duos, alterum Indicè, alterum Hispanicè con-
scri-

scriptum, quibus utrumque genus hominum facile per unum aliquem de populo posset institui. habebatur ea de re conuentus statis locis atq; temporibus, eoq; nonnunquam Pater cum per occupationes licebat, inspiciendi causa se conferebat. Non tacebo unum, quod dum hic versatus est pater insigne contigit ad docendum, quanti Deus fieri velit Ecclesiæ Catholicæ ritus ac cerimonias. Erat morti proximus æger quidam, nec aderat Parochus, qui sacramenta nouissima ministraret. Vocatus est ad eam rem Pater, qui hominem ut aspexit cum mortis angoribus conflantem, desperatissimum iudicauit. dedit operam strenuam, ut ægrotus expiare se vellet, sed nunquam ex eius ore verbum vllum expressit, imo ne vlla quidem sensus deprehendit indicia. Interposita non longa mora, reuocatur à familiaribus Pater, quod diceret obsideri ægrum à malo demone, videri enim Crucis signum sacrasque reliquias admotas corpori gestu ipso repellere. redit Sacerdos noster sine cunctatione quo vocabatur, ægrumq; magis anxium et fatigatum offendit, tanto vndique sudore manantem, ut ex fluuiio aliquo, tum primū videretur emergere. Apparebat tumor in gutture ac distortio quædam, ut si quis fauces arcte comprimeret. Pater cum uim Dæmonis non leui coniectura ac suspicionibus coargueret, ad exorcismos precesque descendit: ita pacatiorem illum quidem, sed mortui similem reddidit, fusum ac stratum toto cubili sine vlllo motu, sine voce: Postridie rediit iterum angor ille, et reliqua æstuantis ægri deformitas non
sine

sine magna Patris admiratione, qui dum rei causam secum ipse perquirat, venit in mentem, quod de Thobia coniuge sacræ narrat historia, placuitq. de agro querere, uxoremne haberet, & quod illi vitæ genus & institutum esset. responsum est, non multis ante diebus uxorem ab eo ductam, versariq. vna ambos, nondum tamen factum esse sacrum, nec adhibitas ceremonias ex Concilij Tridentini præscripto. Pater tanto magis ingressus in causam, suspicatus est pœnâ illam immissam esse diuinitus, quod neglecta viderentur Tridentini Concilij decreta. Peractis iterum exorcismis, conquieuit iterum ager, multoque factus est melior. sed quo facilius reliquam curationem admitteret, dedit operam Pater, ut vniuersæ vitæ peccata confiteri vellet. Igitur generalem illâ confessionē orsus, quam ex instituta formula Confessionis Hispanicæ, ante peccatorum enumerationem præfari solent; ubi ad ea verba peruenit, quibus Diabolo remitti nuntium significatur, illico substitit, nec progredi verbum potuit. Urgebat tamen nihilominus Pater, & ut verba illa proloqueretur, instabat. sed cum illuc ventum erat, aut ea præteribat silentio, aut ad initia & præterita recurrebat. Quod cum Pater attente perpenderet, statuit planam illi suspicionem suam facere: qua edita atque exposita, iussit obtemperari Concilio, atque interim coniuges separari. Quid multa? reddidit Deus firmitatem ac valetudinem agro, ut dubitare iam de causâ non possit, qui sublatam cum causâ viderit pœnam. Tum denique ad expianda anteactæ vitæ peccata, & ea enuncian-

da,

da, quæ antea nō poterat, adductus est: ex eoq. tēpore
 solutione semper animo fuit. His Pater officijs vs-
 que eo omnium animos sibi deuinxit, vt eius postea
 discessum moderate ferre non possent. Sed suade-
 bant redditum domesticiæ curæ: & sua quoque subsi-
 dia, relicta ciuitas requirebat. Zamorani vt omni
 comitate atq. officio manentem Patrem complexi
 sunt, sic abeuntem omni officio prosequi voluerunt.
 Sed de Hispanis satis. Venio ad Indos Naturales,
 vt primum quæ sit regionis natura, quiq. hominum
 mores; deinde quæ fuerint horum conuersionis ini-
 tia, & quæ pietas: tum quæ per Societatis homines
 diuina bonitas gesserit doceamus. Est Mexicana re-
 gio, maxime temperata: vbi nulli sunt immoderati
 calores, nulla frigora duriora: cælum omni flatu no-
 xio caret, idq. perpetuo fere anni tempore. tempe-
 rat nimios calores vespertinus præsertim imber, qui
 à Sextili ad Septembrem quotidianus est. Nam ma-
 tutina tempora sunt plerumq. nitidiora, noctes etiā
 puræ ac serenæ, nulla cæli perturbatione vel caligi-
 ne fœdæ, atque hoc demum regionem & si ea torri-
 dæ Zonæ subijcitur, celebrem facit. Pomorum ma-
 gna tum varietas, tum copia: frumento & pecore
 abundat. Vaccina caro adeo vilis est, vt duodetri-
 ginta libræ ad denarium ferme redierint, cum tamē
 hic denarius, quam alibi sit dimidio minor. Stat
 veruex duobus duntaxat tribusue denarijs. vix au-
 tem vno gallina, quò si pretium ascendat, summum
 putatur. Ceterarum item rerum tanta vilitas est,
 vt in quotidianum victum nulli pene sint sumptus.

Mechoaca nouæ Hispaniæ prouincia, distat ab Vrbe Mexico, leucas circiter quadraginta, ab altitudine poli, gradus vndeuginti. Prouincia vero ipsa Mechoacana leucas colligit per ambitum octoginta, totaq. Urbibus oppidisq. distinguitur. abundat suauitate & multitudine piscium, herbis etiam atq. arboribus ad morborum remedia ac vulnera plusquā reliqua regio. Multi in ea senes, valentes omnes, hominum corpora procera atq. optime constituta. ingenia mitia atque erecta. verbo vix edito alienam mentem assequuntur, verbo item explicant suam, idq. periti imperitiq. linguæ, cum tamen in nostrorū lingua sint pene surdi. Lingua autem vna & eadem est fere vbiq., quam Tarascam vulgus appellat, & Mechoacana dicitur, quæ non magno illa quidem studio ac labore perdiscitur, sed est tamen vsque adeo artificiosa, & tam admirabili compositione atq. contextu, ut linguarum periti, negent vllō pacto sibi videri cum ea conferendā esse, siue Græcam siue Latinam. adeo autem locuples est, ut nihil sit, quod pluribus vocabulis, vsque maxime proprijs efferre non possit. orationis particulis abundat, unde omnis difficultas oritur si qua est: nam quanquā sine ijs linguæ constat intelligentia, oratio tamen efficitur inquinatior. est Latine simillima, ut sæpe altera pro altera vtaris imprudens. atque hæc nimirum causa est, cur facilius cum sit, probe tamen teneatur à paucis; suppetunt librorum auxilia multa, vnde eius disciplina petatur, qui & loquuntur castissime, & sunt de rebus quæ lectorem alliciant.

Com-

Commendant præterea artes ingenia. ab his varia illa opera ex auium pinnulis elaborata, ab his incisæ in arundinem peruenustæ picturæ, ab his alia multa præclara ad aspectû, plena artis, plena ingenij prodierunt. Quicquid operis faciundum loces, id illi quamuis oculis nouum & nunquam antea conspectum, modo exemplar offeras, recte ac perite, nihil vt desiderare possis, efficient. Sunt ad virtutem ac pietatem, vt hoc ipsum mox planius, natura ipsa propensi, externoq. templorum cultui dediti, quam qui maxime, atq; ideo optimi inter eos sacrorû symphoniaci reperiuntur, qui missarum solennia non minore cum apparatu celebrant, quàm in suis templis Hispani: adhibentq. tibias tubasq., lituos, & id genus alia permulta, quæ sua arte ingenioq. perficiunt. Gentis origo incerta, apparet tamẽ non omnis fuisse veritatis expertem. Nã & mundû diuinitus conditum ab aliquo temporis principatu, & fictum dici hominem ex argilla, & vniuersam terram ab imbribus inundatam. Sed fabulis mista sunt omnia. Perstringam nonnulla breuiter, vt quantis ex tenebris hanc Deus gentẽ eruerit, magis appareat. Aiebant a Dijs fictos homines ex cinereis orbibus octo, sanguine iuibutis, expresso ex aure cœlestis nuntij, quẽ ad id superi destinassent. Eum autẽ nuntium appellatum esse Curiti Caleri, hoc est Sacerdotem magnum, qui cum eas, quas dixi, pilas in pollubro dies aliquot habuisset, ex earum quatuor sua sponte mares, è reliquis feminas prodiisse, inconditos tamen sine vlla coagmentatione membrorum, vt ne ad seden-

dum quidē, cubandumue reclinare se possent. Cumq. in eis coagmentandis dissoluendisue semel, iterum ac tertio, frustra nuntius ille sudasset, tum Deos re-
 seratis omnium fontium ac fluminum ostijs, impro-
 bata opera, perpetuis quinque dierum inundationi-
 bus deleuisse. iisdemq. imbris deletas res vniuer-
 sas, & hunc terrarum ornatum, quem ternimus: cu-
 ius habebatur effectrix inferorum Dea. Cœlestes
 enim aiebant Deos, inferorum mandasse Deo, vt in-
 fera omnia gignenda curaret. ita eius coniugem cum
 imperata faceret, primum montes infœcundos ac ste-
 riles genuisse, quippe nudos ab arboribus, nudos ab
 herbis: eodemq. tempore ipsam quoq. genuisse tellu-
 rem fructu carentem. Sed cum cœlesti Deæ, quæ
 Deorum omnium mater habebatur, res incommoda
 videretur, filios suos terram obambulare occulte
 non posse; sed quacumque ingrederentur, omnium ocu-
 lis esse subiectos; imo ne sibi ipsi quidem licere ad
 eos se demittere, cum liberet, propterea quod luce
 proxima proderetur; iccirco inferorum imperasse
 Deo, vt ei incommodo mederetur. ita ab eius postea
 coniuge & arbores esse genitas & animantes, &
 quæcunq. oriuntur è terra. In eo vero cataclysmo,
 quoniam vniuersa Dii superi destruxerunt, nec ulla
 restabat hominibus gignendi ratio, fugæ eos cepisse
 consilium: sed quia nulla patebant effugia, per aspe-
 ras reptasse rupes, atque inde præcipitados misere
 peruisse, duobus dumtaxat exceptis, viro simul ac
 femina, qui montis editissimi beneficio seruati sunt,
 in eoq. monte tam diu dicuntur hæsisse, dum de flu-
 xissent

xissent aquæ: postea de monte impatientem descendisse planiciem, animantium cadaueribus stratam. Et quoniam rebus omnibus eluione deletis cibariorum nihil erat, collecta lignorum strue, excitatoq. igne, torrere carnes illas cæpisse. quarum nidor cum ad nares Deorum matris peruenisset, quæsiuisse Deam, quid rei esset, num quis adhuc in terris ex hominibus superesset? cum duos adhuc superstites cognouisset, tum summo Sacerdoti mandasse, ut in terras lapsus eos quoq. perderet ac deleret. fecisseq. summū Sacerdotē imperata, & summis homines capitibus cucurbita cæsos, in canes subito conuertisse. Tum à Dijs summum Sacerdotem iterum destinatum, qui quarto conderet homines, ab eoq. sphaeras similiter octo cinereas in pollubro habitas ut fecerat primus, ex quibus feminae quatuor, totidemq. mares exstiterint: quorū Dijs conditio cum probata demū esset, nouæ eos benedixisse proli, atque exinde quotidie prolē ipsam auctā, aliosq. atq. alios deinceps genitos. Sed ut reliquus terræ renouaretur ornatus, Dijs inferis negotium à superis esse datum, ut quæ dilapsa occiderant, instaurarent. ita ab uxore Dei qui Inferis præest, arbores, plantasq. prognatas, ceteraq. omnia, quæ sub aspectum cadunt. Rebus omnibus constitutis atque perfectis, solem iterum apparuisse nutu imperioq. cælestium, quem simul cum rebus superis coudidissent. Nam infera ab inferis, supera à superis facta Dijs opinabantur: portentum Manicheorū deliramentis ac fabulis non dissimile.

Iam de immortalitate animi, & sedibus quo con-

dum quidē, cubandumue reclinare se possent. Cumq. in eis coagmentandis dissoluendisue semel, iterum ac tertio, frustra nuntius ille sudasset, tum Deos re-
 feratis omnium fontium ac fluminum ostijs, impro-
 bata opera, perpetuis quinque dierum inundationi-
 bus deleuisse. iisdemq. imbris deletas res vniuer-
 sas, & hunc terrarum ornatum, quem cernimus: cu-
 ius habebatur effectrix inferorum Dea. Cœlestes
 enim aiebant Deos, inferorum mandasse Deo, vt in-
 fera omnia gignenda curaret. ita eius coniugem cum
 imperata faceret, primum montes infœcundos ac ste-
 riles genuisse, quippe nudos ab arboribus, nudos ab
 herbis: eodemq. tempore ipsam quoq. genuisse tellu-
 rem fructu carentem. Sed cum cœlesti Deæ, quæ
 Deorum omnium mater habebatur, res incommoda
 videretur, filios suos terram obambulare occulte
 non posse; sed quacumque ingrederentur, omnium ocu-
 lis esse subiectos; imo ne sibi ipsi quidem licere ad
 eos se demittere, cum liberet, propterea quod luce
 proxima proderetur; iccirco inferorum imperasse
 Deo, vt ei incommodo mederetur. ita ab eius postea
 coniuge & arbores esse genitas & animantes, &
 quacumq. oriuntur è terra. In eo vero cataclysmo,
 quoniam vniuersa Dii superi destruxerunt, nec vlla
 restabat hominibus gignendi ratio, fugæ eos cepisse
 consilium: sed quia nulla patebant effugia, per aspe-
 ras reptasse rupes, atque inde præcipitados misere
 peruisse, duobus dumtaxat exceptis, viro simul ac
 femina, qui montis editissimi beneficio seruati sunt,
 in eoq. monte tam diu dicuntur hæsisse, dum de flu-
 xissent

xissent aquæ: postea de monte in patentem descendisse planiciem, animantium cadaueribus stratam. Et quoniam rebus omnibus eluione deletis cibariorum nihil erat, collecta lignorum strue, excitatoq. igne, torrere carnes illas cepisse. quarum nidor cum ad nares Deorum matris peruenisset, quaesivisse Deam, quid rei esset, num quis adhuc in terris ex hominibus superesset? cum duos adhuc superstites cognovisset, tum summo Sacerdoti mandasse, ut in terras lapsus eos quoq. perderet ac deleret. fecisseq. summū Sacerdotē imperata, & summis homines capitibus cucurbita cæsos, in canes subito conuertisse. Tum à Dīs summum Sacerdotem iterum destinatum, qui quarto conderet homines, ab eoq. sphaeras similiter octo cinereas in pollubro habitas ut fecerat primus, ex quibus feminae quatuor, totidemq. mares exstiterint: quorū Dīs conditio cum probata demū esset, novæ eos benedixisse proli, atque exinde quotidie prole ipsam auctā, aliosq. atq. alios deinceps genitos. Sed ut reliquus terræ renouaretur ornatus, Dīs inferis negotium à superis esse datum, ut quæ dilapsa occiderant, instaurarent. ita ab uxore Dei qui Inferis præest, arbores, plantasq. prognatas, ceteraq. omnia, quæ sub aspectum cadunt. Rebus omnibus constitutis atque perfectis, solem iterum apparuisse nutu imperioq. cælestium, quem simul cum rebus superis condidissent. Nam infera ab inferis, supera à superis facta Dīs opinabantur: portentum Manichæorū deliramenti ac fabulis non dissimile.

Iam de immortalitate animi, & sedibus quo con-

cedit, cum de uita migrat, magna impunitas garriendi. Cælum quidem bonorum virorum sedem esse volebant, sceleratorum inferos: sed tamen in eis regionibus similem atque in his vitam agi. eamq. ob causam multa sibi singuli compirabunt, quæ hinc abeuntes non modo vitæ, verum etiam operæ causa secum ipsi deferrent. Principesq. viri multos, quos sibi post mortem comites adiungerent, occidebant, ne videlicet in comitati in ea loca discederent. Sacrificia plurima erant, colebant enim magnum Deorum numerum, qui quidem homines fuisse putantur rebus gestis nobiles ac virtute præstantes. hos vita functos, quoniam varias induti formas, sese viuis non sine fraude Demonis exhibebant, reponebant in Deos. Suus cuiq. artificio ac muneri Deus erat, singulisq. Dijs sua sedes in montibus, vbi sacrificijs & hostijs placabantur, cuius etiam rei multa extant hodie vestigia. Festos dies immolandis hominibus funestabant, eique rei destinabantur aut captiuorum corpora, quos cepissent in bellis, aut eorum in quos lex iuberet animaduerti. Sacrificium sequebatur epulum, ex humanis hostijs ac sanguine: potabatur ad ebrietatem; caneantur ad epulas, Dei laudes, cui sacra fiebant: nec deerant Sacerdotes, qui pro concione, quid esset agendum in honorem eius Dei, & quanta ab eo accepta essent beneficia, commemorarent. Sacrificio peracto ut plurimum se dabat diabolus in conspectum, varijs formis atque personis. declarabat se præcipue Sacerdotibus primarijs, eisq. humanas hostias quam plurimas imperabat,
hodie-

hodieque nonnulli ex ijs, quibus se spectandum obiecit, superstites adhuc sunt. Sed tanta hostis immanitas nihil illi profuit. nam dum plurimam quotidie eadem imperat, sentiebat enim modicum sibi tempus esse, conflauit sibi ita hominum odia, ut ubi euangelij lumen apparuit, cultores eum sui non inuiti desererent. Accedebat vaticinium maximi Sacerdotis ex ipsorum numero atque gente, qui diuino haud dubie afflatu cecinerat, veritatem patefactum iri quāprimū, idemq., ut ex ijs qui eum norunt accepimus, præcipueq. ex ipsius Sacerdotis ministro, qui etiamnum superat, ea sæpe docebat, quæ cum Christiana religione congruerent. Dies etiam festos Christianorum ritu colebat, Natalem in his Domini, & gloriosam Anastasim. quos ille dies quo maiore religione ac pietate recoleret, solitus est multo ante sese à turba negotijsq. seiungere. Quo circa tantū sibi auctoritatis peperit apud omnes, ut quicquid ille iuberet, oraculi vim obtineret. Hoc itaque præsidio, Deus pro eximia eius in humanum genus clementia, populum illum, qui iacebat in tenebris, sensim traducebat ad lucem. ita ut complures, cum euangelij lumen in has regiones illatum est, negarent sibi videri noua, quæ ab Euangelij præconibus afferrentur. Postea vero quam de Hispanorum aduentu cognitum est, contulit se Mechoacanæ Prouinciæ Rex, cum familiaribus ad Marchionem de Valle, ut eius nutui Catholicicq. Regis imperio potestatiq. se dederet, modo ipse cū suis eā religione, quam suscepturi essent, imbueretur. Urbē etiam suam liberaliter obtulit, ba-

ptizatusq. cum alijs nonnullis est à cœnobitis quibusdam, qui se illuc cum Marchione contulerant. Regem postea imitati sunt reliqui. sed cū sacramentorum administri perpauci, Indorum vero gens pene esset innumera. plerique Christianis moribus atque doctrina non satis exculti; quamuis administraretur illis baptismus, quid tamen susciperent, non videbant. Consuetudine tantum duce ad baptismum concurrebant, & mutuo potius exemplo permoti, quam consilio & sapientia. quæ res magnum in hunc vsq. diem dubitandi locum reliquit, an baptismò lustrati sint omnes. lustrabantur enim propter multitudinem vniuersi, nec satis constare poterat, an aqua singulos aspersisset. Postea anno huius sæculi duodequadragesimo præpositus nouis hisce Christianis est Episcopus Vascus de Quiroga, primus & vere parens huius Ecclesiæ. is annos duodeviginti Mexicanā rexit Ecclesiā. Ab hoc omnis salutis initium & instituta adeo salutaria, vt in his locis flet hodie Christiana religio, huius tantum legibus institutisq. seruandis. cuius gratissima memoria in omnium animis ita viget, vt etiam num viuere videatur. Is Deorum inanum simulacra deleuit, vt ne vestigium quidem tam nefarij cultus appareat. Is vxorum multitudinem sustulit, & matrimonium duorum tantum coniunctione definijt. Is reliquos, qui baptismum nondum acceperant, Catechesi instituendos baptizandosq. curauit. Is templis sacrisq. ædibus magnam habendam esse venerationē, non ita docuit oratione, quā re; curabat enim edificanda no-

na templa, ornanda, instruenda rebus omnibus ad
sacrorum cultum necessarijs. quod exemplum
translatum ad posteros, cernimus etiam hodie, vt po-
stea planius perspici poterit. Studuit simul ac de So-
cietatis ortu institutoque cognouit, aliquot è nostris
huc euocare. intelligebat enim, quod Societati nostræ
propositum esset, id mirifice cum suis institutis stu-
dijsq. congruere. Nam qui de nostris vicissim eius di-
sciplinæ & instituta nouerunt, affirmant, nihil disci-
plinæ nostræ fieri posse similis, vt Ignatijs discipulū
possis agnoscere. Itaque cum in Hispaniam ad gra-
uia negocia Episcopi nomine, Canonicus ille, qui Cho-
ro præest & Cantor inter suos dicitur proficiscere-
tur, dedit ei in mandatis, vt aliquos de nostris addu-
ceret, cauereq. ne inanis rediret. Quod cum ille om-
ni studio ac diligentia curasset, nec tamen varijs de
caussis impetrare potuisset, vt quenquam secū aue-
beret, idq. Episcopo retulisset, Episcopum respondis-
se ferunt (pro ea qua erat animi moderatione) non
dum ipsos fuisse dignos nouis illis Ecclesiæ præsidijs:
fore tamen aliquando tempus, cum eò nostri veniret,
magno ciuium bono & animarum compendio. Hæc
sanctissimum virum cecinisse, Cantor is, quem dixi,
testatur, & quidem nostro nuper, cum inspiciendæ
Societatis causâ eò diuenteret, Prouinciali. Videtur
Deus tanti viri vaticinium comprobare exitu voluis-
se: paucis enim post diebus, quâ in Mexicanam Pro-
uinciam Societas penetrauit, Episcopo iâ extincto,
Canonici de nostris aliquos acciuerunt, eisq. has pri-
mum dedere sedes, annuis cum reditibus aureorum
cir-

circiter quingentorum. excepti sunt nostri inusitatae
 charitatis officijs, traditaq. illis eius templi possessio,
 quod in his locis primum dicitur fuisse constructum,
 quodq. defuncti Episcopi cinis corpusq. nobilitat: ut
 diuinitus factum putes, ut is, qui eodem instituto vi-
 ta tenebatur, ac nos, eodem quoque nobiscum tem-
 plo ac sepultura coniungeretur. Canonici cum suam
 nobis assignassent adem, ipsi in aliam inchoatam, sed
 nondum perfectam immigrarunt. aedes vero, quam
 nobis reliquerunt, satis est ampla & bene materia-
 ta, eamq. cum suis aedibus extruxisse fertur, nutu ad-
 monituq. diuino B. V. ascus. optimo loco ea sita est, ubi
 Regiam aiunt fuisse domum, sedemq. sacrorum: ut
 videatur voluisse Deus, suos sibi honores gloriamq.
 restitui, ubi tot nefarijs sacrificijs erepti essent. Lo-
 cus est amplus & peramans, quæ pulchriorē efficit
 aquæ fons manu factus, tam copiosus ac largus, ut to-
 ta hinc ciuitas hauriat. Ad hoc soli spatium quan-
 tumuis amplum, magni quidam adiecti sunt horti, no-
 stris aedibus continentes. qui antiquorum Regum fuis-
 se dicuntur, feraces in primis & qui multis partibus
 plus reddant, quam acceperunt. Ut igitur hanc Urbē
 Societas attigit, magna ciuium cum approbatione va-
 care suis studijs ac muneribus cœpit. Prima cura
 fuit sermonem gentis addiscere. sic enim Indorum
 necessitas suadebat. Et quanquam magna tum
 erat nostrorum paucitas, tamen non minimo fuis-
 se vsui videntur Ecclesiæ. paucis enim ab ipsorum
 ingressu diebus, grauissima inuecta pestilentia mi-
 serabiles edidit strages. In ea nostri pro neces-
 sitate

sitate præsto cuique fuerunt. Multis in pagis è tre-
 centis, quadringentisue familijs, decem vix supersti-
 tes remanebant, in alijs ne vnus quidem. totaque no-
 ua in Hispania summum erat effugium, si è tribus
 incolarum partibus, vna dumtaxat euaderet. Nostri
 egenorum miseratione commoti, quos iam vltima
 premebat necessitas, stipem cogere ostiatim, ditiores
 adire, corrogata subsidia passim iurimq. diuidere.
 Enituit tum maxime eius, qui nunc est, Episcopi cha-
 ritas, viri de Societate nostra tā meriti, quam si esset
 parens. is per nostrorum manus copiosis elemosynis
 miserorum occurrit inopia. Erāt Indorum ædes mæ-
 stæ sæpe vel funeribus, vel gemitibus morientium.
 alij cibi desiderio, nemine succurrente, peribant: alij
 iam mortui iacebant inhumati, quoniam qui curaret
 funus, omnino non erat. referta erant agrorum mul-
 titudine Nosocomia, vix vt erectis ac stantibus, ne
 dum prostratis ac iacentibus locus esset. Duplicaban-
 tur agrorum domus & valetudinaria. quanquam
 vrbs vniuersa valetudinarium quoddam dici pote-
 rat. Viuis, quibus adhuc esset anima, opportunus à
 nostris cibus subministrabatur, nec paucos hæc cura
 restituit. Mortuis funus procurabatur, & primo
 quoque tempore ne cæteri noxio cadauerum afflatu
 inficerentur, efferebantur. Sed quod caput est, daba-
 tur opera, vt moribundi rite expiati inunctique mi-
 grarent. Atque hæc nostrorum officia non modo ci-
 uitas, sed finitima quoque oppida sunt experta, idq.
 agnoscunt hodie, & eorum in nos amor putatur hinc
 ortus. Biennio aut triennio post, vbi pestilentia vis

remisit, cum Ecclesiæ Metropolitanae peropportu-
 num videretur (id quod bonis nominibus iam pridē
 agitauerat) Vallisoletum commigrare, passuū mil-
 lia fere viginti ab hac vrbe disiunctum, placuit illuc
 suas transferre sedes, vt quadriennio ante publicis
 mandatum est litteris. Canonici tantum cum Socie-
 tate migrarunt. sic enim R. P. Nostro Generali vi-
 sum est, vt nostri cum reliqua migrarēt Ecclesia, re-
 lictis tamen Pascuarij sedibus ad Collegij vsus ani-
 miq̃ue relaxationem. Erant adhuc ægri complures,
 pestilentia nondum deleta, n̄q. cunctis destituti præ-
 sidijs, vt ne Sacerdos quidem, qui eorum confessio-
 nes exciperet, superesset. Quare commoti Nostri
 pro viribus laborarunt, vt ægrorum saluti consule-
 rent. plurimi quotidie audiebantur, plurimi item ca-
 tholico ritu appropinquante morte inungebantur.
 Visebantur quotidie incredibili cum ipsorum sola-
 tio, eamq. ob causam deferebantur ægri longinquis
 etiam è locis nostrorum fama permoti. Non sileri
 patiar hoc loco, quanta sint Indorū aduersus ægros
 officia: præcipua enim huius gentis laus ea nimirum
 est, quæ in eius elucebat Episcopo, charitas singula-
 ris aduersus inopes & ægrotos. Itaque nunc valetu-
 dinarij, & hospitalium ædium summa cura est. Nul-
 lum est oppidulum, vbi præter xenodochiū, quò sum-
 ma humanitate cum peregrini omnes, tum maxime
 Sacerdotes ac Cœnobitæ recipiuntur, Nosocomium
 aliquod promptum paratumq. non sit, ex ædificijs
 omnibus nobilissimum, sæpeq. sua amplitudine su-
 perans oppidum. Nullos hæc valetudinaria reditus

habent, & tamen melius, quam multa ex optimis Hispaniæ Nosocomijs administrantur. Eius rei causa instituta sunt sodalitates quædam ex ijs hominibus, qui suam operam nauent ægrotis. His pro vicis oppidi, in singulas hebdomadas ægrorum ministerium cura q. diuiditur. Vbi sua cuiq. vico recurrit hebdomas, exeunt è suis ædibus omnes viri feminaq. cum liberis ac domesticis, obseratisq. foribus, ea secū ipsi deferunt, quibus per hebdomadam pascant ægros, nihil vt in eos, præter id, quod sodalium charitas domo attulit, impendatur. Est suus cuique Vico præpositus quidam, apud quem sua quisque deponit, quæ parauerit ægris, non ex esculentis modo, sed ex mappis etiam toralibus, mantilibus ceteroq. cultu mensarum, quæ omnia ab eiusdem Vici sodalibus in comune collata, custodit ac dispensat postea dux ille, quem dixi. Sed antequam suam quisque vicus hebdomadam ineat, præmonetur ab eo, qui præest septē ante diebus. quod illi tempus in conuehenda lignorum strue atque ignium materia consumunt. Et quamuis prope oppidum sylvæ non desint, tamē quo sint ignis pabula meliora, sex octoue millia passuum, materiæ causa contendunt. Feminae in quærendo frumento, farina, & rebus similibus occupantur. Tum ad Nosocomium quæ apparauerint, deferunt, eaq. certo in loco condita, nitide ac diligenter asseruant. Qui vero suæ hebdomadæ munus expleuerint, ceteris locum cedunt, alteriusq. vici fœminæ cura suscepta, conficiendis ægrorum dapibus coquendisq. se dedunt, easq. quam mundissimè præparant. Viri aut cedunt
syl-

syluam, quam superioribus diebus apud se quisque congefferit, aut ægra corpora, quæ in oppido, vel extra oppidum deprehenderint, in Nosocomium conuehant. Cum enim quisspiam ægrotat, vel rutili sodales admoniti momento conuolant, et quaterni senie impositum lecticæ vel sellæ ægrum, ad Nosocomium deferunt: sed confessionis & Eucharistiæ causa ad nos prius deportant. expiatus Sacramentis collocatur in lecto, eiq. rebus omnibus opportune consulitur. In Nosocomio dies noctesq. fax plurima. viri per noctem vigilantes assident, ut ægrorum necessitatibus quam celerrime pareant. feminae latent, & quieti se dant. si quis ab extremo periculo non procul absit, exeuntium Sacramento curant ungendum, eiusq. exitum & p̃is precibus adiuvant, & oratione confirmant. Ut hominem mors extinxit, coguntur omnes, ac si mortuus inops fuit, suis ipsi opibus curant funus non sine pompa. In morbis vel leuissimis antiquissima cura est, mederi animis Sacramentis, priusquam admoneatur corpori medicina. durum enim putant ac formidolosum, accedente morbo, medicinam animi non præcipere. quod si quem prius opprimat mors, quam aut cõfiteri peccata aut ritè iungi potuerit, nihil æque commiserantur, atq; huiusmodi casum. Hæc omnia hodie quoque tam sancte studioseq. seruantur, quam si nunc primum instituta essent: tanta vis fuit tum exempli, tum doctrinæ primi pastoris. Itaq. non mirum, si ita se declararet his hominibus Deus, ut verissime sermocinari cū simplicibus videatur. Quo in genere ea nostri viderunt

runt & acceperunt, ut nisi tam firmis testibus niterentur, uix ea crederent sapientes. agris solitam esse cœli reginam, solatiij & auxiliij causa sese spectandam offerre, nimirum ut eorum erga se pietatē (semper enim in suis calamitatibus hac confugiunt) hac quasi mercede compēset. Inda in Valetudinario graui affecta morbo, omni humana ope destituta, amissa omni cupiditate cibi, uidisse dicitur admirabili splendore mulierem, quæ cibos præberet agris, duabus comitatam eximia venustate virginibus, quæ lances prandiumq. suis manibus sustinebant. cumq. ea propius accessisset, tum vehementius mulieris pulchritudinem admirata: indignumq. sibi esse visum, tali dignitate feminam tali in loco versari, monitaq. à duabus esse virginibus, ne quid timeret, eam enim esse cœli Reginam, quæ suos agros inuiseret. se autem eius esse comites & ancillas, alteram Catharinam, alterā Magdalenam. quæ cum eius animum confirmassent, postea mundissimam prætendisse mappam velut ad mensam, accessisseq. *MARIAM* Virginē, & cibū in os inseruisse, quo illa mirabiliter recreata ad sanitatem est repente perducta. Hæc eadem visa tā multis euenisse cognouimus, ut ob hanc causam magna sit Nosocomij religio, est enim hæc ubique fama, sedē in eo suam Beatam sibi Virginem delegisse. Sed quā sit ad pietatem horum hominum natura propensa, quanquam ex his, quæ diximus liquido constat, tamen illa quoque valde declarant: studium sacrarum rerum, mysteriorum creber vsus, ceremoniarum ac religionum cultus. nam quod ad sacrarum ac templo

rum

rum procuracionem pertinet, si tota ciuitas dilaberetur, omniaq. diriperentur, vastarentur, incēderentur, et multis in oppidis pestilentia vastatis nuper apparuit, sacra tamen ædes, & Sacerdotis adiuncta domus ab omni incommodo prohibenda est. Et quamuis in reliqua ciuitate vnus duntaxat superesset Indus, eius tamē omnis cura in ijs defendēdis tutādīsque collocari debet. Si quid his hominibus pretij est, id in hāc vnā rē conferunt, et diuinus in templo cultus, & tabularum pulchritudine niteat, & pretiosæ vestis ornatu. Dies festos, præcipueq. diem illum, qui templi Patrono sacer est, magno apparatu, ac cerimonia celebrant: quamplurimos ad templum inuitant, ut quam refertissimum & frequentissimum sit. quotidieq. aliqui de nostris sacrificandi causa in pagos proximos euocantur, in quibus vix interdum tres quatuorue incolæ numerantur, nec tamen sumptui laboriue parcant, quo apparatione & splendidiora sint omnia. subductis postea rationibus, deprehenditur apparatus impensa, aureorum sæpe triginta & quadraginta, cum tamen tāta sit Indorum tenuitas, vix ut eis aureus nummus suppetat ad tributum: sæpeq. annuus familiæ sumptus ad aureos vix quater-nos ascendat. Quod si ad domesticum victum omnia desint, nihil tamen deesse debet ad templum. ac si quam in rem suos labores libenter impendunt, in templorum instauracionem impendant oportet, aut certē in conferendos agros, vnde pecuniam ad ornanda templa conficiant. Ita fit ut nullus tam tenuis pagus oppidumue sit, vbi non ea suppetant vniuersa, quæ
ad

ad peragenda sacra sint opus. Quod ad celebranda sacramenta pertinet, quanti sint Indorum cum ad confessionem accesserint, apparatus, non facile dixerim, sanè Sacerdotes nostri confirmant, minus sibi graue esse decem Indis, quam vni de reliquis operâ dare. sunt Indorum confessiones explicatæ, simplices & apertæ, vt nullum faceßant Sacerdoti negotium, peccata singillatim excutiunt, eorumq. numerum in vnoquoque genere quam diligentissime notatum habent. qua in re non tam pietas quam ingenium, contra quam vulgus opinatur, elucet. Dolor pœnitentiæ comes, tantus est, vt sæpe eius Sacramenti ministrum tacito pudore perfundat. nec vero inferius est, quod ministris ipsis diuinitus impartitur, vt nemo non libenter Indorum sordibus ac squallo, vbi cœlestes dulcedines delitescunt, nitida ac pretiosa nobilium vestimenta postponat. Obsequuntur præterea Sacerdotibus quocumq. ducant, facileq. patiuntur persuaderi sibi, quicquid illi suadeant. si quid alteri debeât, admoniti continuo reddunt: si nihil sit vnde debitum vel ablata dissoluant, omnem quærunt soluendi viâ, vel cum incommodo & detrimento familiæ. Si, quæ restituenda sunt, ad eum spectent, qui iam vita excesserit, multa relinquunt vel in sacrificia funebria solemnesq. pro mortui anima preces, vel eius nomine pios alios in vsus. In persuadenda inimicorum charitate eadem facilitas: quin priusquam ad Sacerdotem accidant, intelligunt sibi cum inimicis redeundum in gratiâ, si sibi Deum velint confessione placare. quod si quis forte petenti veniam neget, flagitiij

instar habetur. Pauca dumtaxat huius generis subi-
cientur. Quidam graui accepto vulnere, cum inter
peccatorum expiationem de condonanda admonere-
tur iniuria, libenter inquit, parcam, & percussorem
quem complectar accersam. eam curam cum Pater
ipse susciperet, nec auderet inimicus inimico se cre-
dere, non ignarus quā commoti parentes essent, qui-
bus cum videbat sibi rem fore; Pater hominem se se-
qui iussit, cōsestimq. agrum parentesq. conuenit.
cum eis de pace sic egit, vt nihil tam facile impetra-
rit: tantum apud eos nostrorum auctoritas & innata
quædam bonitas valet. responderunt parentes, mo-
do filio Deus peccata remitteret, se quidem esse pa-
ratos ad omnia. cum pro Deo pater spopōdisset, per-
cussorem aduocat ad amplexū, atque ita demum re-
stituta pax est. Ac ne tanta facilitas suspicionem si-
mulationis afferre possit; Nosocomium, in quo cura-
batur æger, Gubernator ingressus, cum ex agro quid
ei mali accidisset, sciscitaretur, rem æger silentio dis-
simulabat, cum tamen Gubernator vrgeret, ex cete-
ris tandem quid actum esset, agnouit. mittit igitur,
qui percussorem comprehendant, vt in eum pro suo
iure ac potestate animaduertat. quod vbi à parenti-
bus rescitum est, affuere illico, negantes se ius posce-
re, cum composita iam essent omnia: quod enim con-
stitutum esset à Patre, id nihil immutari se velle, ro-
gareq. etiam atque etiam ne reus conquireretur
ad pœnam. Atque hac facilitate Indorum leniun-
tur iræ. Nec minor in placanda Inda facilitas. quæ
cum in mulierum rixa male accepta esset, (auulsi
sunt

sunt enim illi crines per summā iniuriā ac contumeliā, & præ mœrore ne partum elideret, metuebat) iniuriā iure persequi statuit, sed dum in ea cogitatione versatur, venit in mentem ad nostros ante diuertere, ut Patrem quendam de re tota doceret. Is in templo dabat operam pœnitentibus, sed venientem ad se feminam tristem atque anxiam, euulsosq. crines in manibus ostentantem, iussit Pater in Crucifixi signum, quod ibi propositum erat, oculos mentemq. conijcere, ab eo enim fore, ut quemadmodum in ea re se gereret doceretur. cum illa paruisset, oculosq. fixisset in Christū: subito ad æquitatem delapsa est, domumq. rediens donauit iniurias. Sed quoniā de hominum erga suos moderatores obsequio diximus, illustre eius rei exemplum prætereundum non est. Mons quidam ab oppido non procul abest, arboribus ad opacandum locum ita frequentibus, ut nihil pene solis admittant. est omnino locus relaxandis animis opportunus, atque huc sæpe se recipiebat Episcopus Vascus, qui ut Collegis, quitum aderāt, curarum requiem & aberrationem quandam à molestiis pararet, vetuit hoc nemus suo spoliari decore. Obijt ille postea, abieruntq. collegæ Vallisoletū, nec tamen ausus est quisquam viginti amplius annorum spatio, vel sudem ex eo nemore decerpere. Intactum adhuc à ferro est, cum tamen & propter loci vicinitatem, & propter genus ipsum & copiam arborū, nullis alijs vsibus à natura datum videatur, nisi ad domesticos focos. Iam reliquarum religionum, quanta sit cura quid attinet dicere? Piacularia grana per

*studiose quærent, eaque Rosarijs & Coronis inserta
 de ceruice suspendunt. Quam Deus pietatem alit in-
 terdum fouetque prodigijs. Petebat Indus à Patre
 vnum aliquod ex his granis, cumq. ex eo quæreret
 Pater, quid factum esset ei, quod nuper dedisset, re-
 spondit apud agrum se reliquisse: nam cum morti
 proximus esset, admoto ad corpus grano subito me-
 lius habere cœpisse, sed veritum ne in eundem recide-
 ret morbu, acceptu granu noluisse reddere. Quadra-
 gesima ineunte ad asperzione cineris tam multi con-
 fluunt, vt quanquam ad primam vsque noctis huic
 religioni pateat templum, alij tamen atque alij noui
 semper accedant. De Lustrali aqua quid dicam? cu-
 ius beneficio veneficarũ sceleri occursum est, quæ cū
 egros infantes curare non possent, peritus enecabāt.
 nostri autem deferre hos pueros iubent in templum,
 dataque in potum aqua benedicta, recitatoq. sacro-
 sancto Euangelio, multis quotidie subueniunt. neque
 dies ullus est, quo non eius rei causa complures in
 templo nostro versentur. itaque quicquid lustralis
 est aquæ, exhauritur ab Indis, quotidieq. vasa re-
 plentur. Multa in hanc sententiam afferri possent,
 sed ne longum faciam, vnum dumtaxat attingam. Fi-
 lius erat Indo, morbo vehementer obnoxius, ab eoq.
 sic accipiebatur interdum, vt fusus diu sine voce ac
 sine sensu iaceret. Parens eius morbi culpam se su-
 stinere dicebat, qui multa peccasset, non puerum,
 quem cognosceret innocentem: sublatumque in hu-
 meros ad Sacerdotem nostrum detulit, qui eum de
 more curaret. Vbi puerum Sacerdos aspexit, mor-
 tuum*

tuum credidit, idemq. sacrificij minister, qui de nostris erat. qui cum iuberetur à Patre exhibere puero aquam, Nihil est, inquit, opus: puer, ut uidetur, excessit. Pater tamen aquam iussit afferri, & ad os admo- ueri, ea ut labrum attingit, redire continuo ad sese puer, & quodammodo uisus est reuiscere, nec prius elatus è templo est, quam omnino conualuit. De filiorum baptismo quam ualde laborent, præsertim ubi in lucem editi periclitari cœperint, uix dici potest. quibus ut uitam prorogent ad baptismum, experiuntur omnia. Inda cum parum feliciter peperisset, ubi præter spem atque opinionem spirans, adhuc excussus est fœtus, familiares subito illum ad nos deferunt, alta iam nocte. fores feriunt frequenti pulsus. cœnam ad id tempus propter occupationes extraxerat is, qui vocabatur, Sacerdos. ianitor sermonis ignarus quid quæreretur renunciare uix poterat: Pater tamen impulsu diuino (rem enim dominus gubernabat, ne puerilis animæ iactura fieret) sine ulla mora ad ianuam properat. uidet cuius causa tantopere festinetur. & ad baptismum adduci puerum agentem animam, paratamq. afferri aquam, ne qua sit mora. mirum dictu: baptizatur illico puer & moritur. Si paululum in percunctando moræ uocatus pater interposuisset, si prompta non fuisset aqua, si reliqua non expedita, amissa esset anima pueri: sed nimirum fugientis spiritus reliquias fouebat is, qui eum sibi delegerat Deus.

Iam Sanctorum Cinerum reliquias summa quadam ueneratione colunt. Quod tum maxime decla-

varunt, cum Metropolitana Ecclesiæ placuit, sui Pastoris corpus, in ea, quam diximus, migratione repositum. ea enim conditione dederat, ut cum repeteret, redderetur. Verum Indorum non ignara pietatis, id quam occultissime transferendum curabat. Res agi tam occulte non potuit, ut sentire fraudem vigiles Indi non possent; cum tamen nostris, apud quos illi ipsi, qui ad exportandum corpus venerant, pernoctarunt, res esset occulta. Itaque festini Indi nostras in ædes, omnia subodorari ac peruestigare, ne qua fraude illius Beati cineres tollerentur. egerunt apud nos vigilias mille circiter Indi, duabus tribusve noctibus continenter, tanto silentio, ut ne consulto quidem deditaque opera à nostris exaudiri possent. cumque per tenebras aliquandò, qui furtim corpus tollerent, accessissent, Indorum lapidibus territi, nusquam amplius comparuerunt. Indi ut sine cura essent, ingenti saxo, quod sua sine opera moveri loco non posset, corpus sibi defendendum putarunt, factaque manu, tanto silentio miræ magnitudinis molem conuehant, ut vectores ducenti cum essent, neminem tamen exaudires: & tamen pridie in ea commouenda, quoniam alia res agebatur, rueret omnia præ clamoribus videbantur. Venerunt ad Patrem ardentes, summis precibus postulantes, ut per eum sibi liceret, Episcopi corpus saxo illo contegere. Pater ex fenestra placide eos à se dimisit, quod diceret ad insequentem usque lucem, rem integram reseruari, nocte illi per vigiliam exacta, ubi illuxit, redeunt certatim omnes, ut scrutentur & rimentur omnia

omnia, an extractum corpus esset, an ad id acti cuniculi, an fraus denique dolusque subesset. Et quoniam reficiendus erat in templo paries, vetustate collapsus: iccirco per hanc occasionem taciti coeuntes, suum quisque lapidem congesserunt, maximoque aggere cinxere locum, & in summum aggerem ingens illud imposuere saxum. ita se omni metu ac sollicitudine liberarunt. Quid dicam de domandi corporis studio? quid de pœnis, quas Indi tam alacriter subeunt; ut nulli hominum gerceri primas deserant. Cum illis pœnæ nomine imperatur inedia, intelligunt etiam ad inediam adiungendam esse verberationem. Ac Quadragesimæ quidem diebus frequenter ad ædem nostram de nocte prodeunt, expediti flagellis, quibus ita se lacerant, ut spectantibus miserationem simul & horrorem incutiant. Sexta quaque feria, per idem Quadragesimæ tempus ædes nostra verberantium turba completur. brevis ad eos habetur oratio tempori accommodata. qua absoluta, quinquagesimus Regij Vatis psalmus canitur ad hydraulicon: sunt enim Indi musicæ peritissimi. atque ad eum cantum secum ipsi flagris verberibusque decertant, tanto cum ardore, ut id eis spatium, quamvis plerumque sit longius, perbreue videatur. Mulier cui donauit hanc Deus mentem, ut virginitatem perpetuo colat, quæque hucusque ita ab omni se libidinis contagione liberam seruat, ut si modo nata esset: ea igitur quamvis sit manu altera diminuta, & præterea morbo inopiaque prematur, totum tamen Quadragesimæ tempus, tanta epula-

rum exigit abſtinentia, vt vel panis illi ſit in delicijs. nec tamen verberandi conſuetudinem intermiſſit, quin etiam propter debilitatem dextræ, læua ſe cædit. In tanta hominum innocentia effert ſeſe tamē interdum magnitudo imbecillitatis humanæ, vt habeat Deus, vbi diuitias ſuæ bonitatis oſtendat. In eā rem plurima poſſent afferri, quæ noſtris Sacerdotibus dum luſtrandis animis occupantur, quotidie accidunt. ſed erit ex paucis coniectura facilis ceterorum. Senex erat iam ætate conſectus, vitis omnibus nobiliſſimus, qui quo liberius ad omne flagitium peccatiq̃ue genus accederet, aditum ſibi cæde coniugis ante munivit. Verum cum deſerbuit ætas, & ſenile frigus acceſſit, tanquam ex alto excitatus veterno, caput extulit, & anteaſſæ vitæ recordatione percuſus ingemuit. cœpit ſibimet diſplicere cū ſe aſpexit, & quæ diaboli fraude commiſerat, Deo opitulante damnare. Sed ne prædam vaſer hoſtis amitteret, augebat ad deſperationem uſque dolorem, propoſitaque ſclerum tum magnitudine tum multitudine, omne miſericordiæ perſugium tollere conabatur. terrebat etiam impeditiſſima conſcientia, & labor propemodum infinitus. ſi ea vellet confeſſione retexere, quæ iā inde ab incunabulis tot annorū anfraſtibus amiſiſſet. Iniecit Deus hanc illi mentem, ut cum abſens de noſtrorum in iuuandis animis diligentia cognouiſſet, confeſſim ad nos non ſine magno ſenectutis incommodo ſe conferret. Cum fere diē integrū expectaſſet, dum pœnitentium multitudo deſlueret, ſub veſperam ad Sacerdotis noſtri pedes, multis cū
la-

lacrymis se se abiicit, ostendit quanto versetur animus in discrimine, medicinam si qua sit rogat, se quidem dicto audientem fore, nihilque quod præscriptum esset, quamvis difficile prætermisurum. Monuit Pater peccatorum confessionem instituentem, repetitis ab eo tempore vitæ noxis, quo eas reticere in confessionibus cœpit. Erat id tempus, quo primum Sacramentum usurpauerat pœnitentiæ: simulque rationem ei facilem tradidit ordiendæ confessionis, redigendique sibi in memoriam, quæcumque peccasset. Cum ad eam ille accurate se comparasset, & peccata in scriptum ex ordine retulisset, tã exacte persequutus est vniuersa, vt Sacerdos quid præterea quæreret, vix haberet. Pœnitentiis dolor is fuit, vt lacrymarum copia vocem includeret. Post confessionem ea est oborta lætitia, vt auctus sibi senex nouis viribus videretur. Pater iussit hominem annuo spatio interdum ad se redire, diesque præstituit certos. paruit ille tam prompte, vt ex præscriptis diebus nullum quin venerit, intermiserit. quoties redibat, semper noui aliquid, quod exciderat afferbat: vt totum illud tempus in excutiendam præteritorum memoriã contulisse videretur. is etiã nũ perma-
net in sententia, tanta morum commutatione, vt à pio ac religioso cœnobita nil differat, obeundis præsertim sua voluntate pœnis, in quo paucos habet superiores.

Erat Indus alius, cum ceteris vitijs atq. omni dedecore infamis tum ebrietate potissimum. hunc bene morata vxor egregiaq. Christiana monebat assidue, cauere diuinas iras: sed vbi sensit nullum admo-

nitio-

nitionibus relinqui locum, precata a Deo est, et cu-
 ram coniugis ipse susceperet, cœcamq. mentem pro
 ea qua solet benignitate, nullis etiam laceffit meri-
 tis illustraret. Non spreuit diuina bonitas aquas mu-
 lieris preces. Vir cum maxime iaceret in luto, no-
 ctuq. ambulare in publico, ecce tibi satanas, cui il-
 le se non semel addixerat, horribili molossi specie,
 vasto oris hiatu ad deuorandum expeditus. ac nisi
 candidi quidam, ut ipse testabatur, adolescentes, exi-
 miæ pulchritudinis accurrissent, immanemq. belluâ
 ab eius corpore cōtinuissent, confecta res esset. Hoc
 ille viso perterritus, et penè alienatus à sensibus, si-
 mul ac commodum fuit, semianimus venit ad no-
 stros, adeo prauus, ut quoties gradum faceret, sibi
 in enormes illis fauces videretur incidere. Posuit
 peccata cum detestatione fletuq. plurimo, vix ut fa-
 ri præ singulibus posset. expiatione autem animi fa-
 cta, abiit illa formido et ille pauor: eamque ingressus
 est vitam, ut nemini dubium esse possit quin id ei vi-
 sum diuinitus sit obiectum. Non dissimilis cuidam
 alijs adhibita est a Imonio. Is cum quinquennium
 viueret cum amica, et ad hanc Dei iniuriam alias
 quotidie multas adiungeret, dum diluculo facit iter
 cum onerarijs iumentis, obuiam fit illi vir aspectu
 tam formidoloso, ut et iumenta perterrita metu dif-
 fugerint, et ipse præ formidine relictis impedimen-
 tis, ad nos sine pallio, pileoque transfugerit. recens
 hominis tremor, pallor, anhelitus, fidē rei quam vi-
 derat, faciebat. Nostri cum ad confessionem detesta-
 tionemq. vitæ præteritæ cohortantur. quæ cum ille
 rite

rite dolenterq. fecisset, sensit se sibi quodammodo redditum, metuq. omni solutum. ita & amicas abegit, & vitam orsus est longe dissimilem antea & .

Pellicem fouebat alius complures annos, magna cum coniugis offensione: is cum ad confitenda peccata venisset, faciendum sibi putauit Sacerdos noster, quoniam non satis ad id paratū offenderat, ut eum sine absolutione dimitteret. iussit ad certum tempus extrudi pellicem si vellet absolui, eoq. exacto ad absolutionem redire: addiditq. per id spatium inedia in singulas hebdomadas tridui, et cum inedia verberationes & preces, ad placandum cœleste numen suis sceleribus violatū. fecit imperata perstudiose, subiitq. quam diuturnas pœnas præscripserat pater. ea fuere semestres, quibus a quo constantique animo superatis, quo eum magis in instituto Dominus confirmaret, visum illi obtulit latum simul ac formidolosum. Aiunt Indum cum nocturnæ quieti se daret, præcipuo quodam studio Deo Deiq. matri se commisisse: tum in somnis visum ei esse fratrem paruulum iam vita functum, admirabili specie atq; fulgore, albis amictum vestibibus magni pretij, qui fratris vitam grauitè accusans moneret, si illuc vellet, quo ipse peruenerat, peruenire, aliam vitam viueret, studeretq. quæ tam licenter peccasset, idonea pœnitentia delere. Tum ex fratre quæsisse Indum, ubi tandem ageret, respondisseq. fratrem, in regione peramœna, plena voluptatis, cum latis puerorum agminibus, quorum dux & signifer esset S. Michael: voluisseq. fratrem fratri, puerorum gloriam spectandam

dam offerre. tum Christum apparuisse velut actum in Crucem minaci vultu, qui sic hominem obiurgaret. Huc olim tua causa conscendi, sed huc iterum tua me scelera & improbitas agit. qui speres veniam miser? & hanc sedem & locum beatorum, si vitam ducis istiusmodi? Exin accessisse præstanti forma mulierem Dei parentis similem, plenam splendoris, Apostolorum principibus comitatam, quæ supplex filio pro Indo meliora promitteret: addidissetq. Petrum admonitionem suam, minitantem ni se ipse corrigeret, nunquam se ei cœli aditum aperturum. Indus enim cum reprehenderetur à coniuge, hoc iactare solitus erat, quando Cœli iamitor Petrus esset, sibi nihil esse timendum, qui Petri nomen referret. quocirca monuisse Apostolum aiunt, vanum illi futurum Apostoli nomen, si cum nomine vita pugnaret: fore autem si præterita castigaret, ut B. Mariæ deprecatione veniam facillimam impetraret. Sed ut sciret, qui locus ipsum obita morte maneret, paulisper expectare iussisse: Petroq. cum ceteris abeunte, subito adolescētem affuisse per pulchrum, angelico ore, candidoq. vestitu. ab hoc Indum præhensa manu, cacas esse per regiones ad lacū deductū horribilē, ubi dira ijs animis tormenta, qui sine pœnitentia ex humanis corporibus excessissent, admuebantur. in itinere autem quendā occurrisse dæmonē, qui Indū comprehensum, suū diceret, iure mancipij, ac famulatus. qua iniecta formidine Indum cœpisse flere, eosq. beatos, quos antea viderat, implorare: sed esse ab Archangelo Michaele illius cohortis Impera-


peratore, quam frater ostenderat, subleuatum. Exin factum iter in amœnam iucundamq. regionem, puerorum cœtu refertam, & in alias deinceps pulchrior, quas splendidissima iuuenum virginumq. cohors incoheret. datq. optione, ut ex ijs locis, quem mallet, eligeret, tum demum ducem itinervis auolasse.

Hoc visum Indum diu sollicitum habuit, præsertim quod extremo illo tempore, quod definierat Pater, occurrerat. Continuo igitur ad Patrem aduolat, & vniuersa, quæ vidisset exponit. Expiat confessione à sceleribus animum, tanto cum dolore ut lingua præ lacrymis obmutesceret. Sed is dolor magnæ illi fuit lætitiæ seges atque materia, ut iam tum gaudia illa, quæ pœnitentibus sunt parata, præciperet. Postea religionis nomine quatruidui inter hebdomadam sibi ieiunium indixit, cum tamen Indis propter viriû imbecillitatem, perpetuosq. labores, vel vnius diei sit satis. quare & per Pontificia diplomata, nunquam nisi Paschatis Natalisq. Domini peruigilijs, & sexta quaque Quadragesimæ feria, ieiunij lege tenentur. Hic igitur quanquam diuturnis se laboribus atterit, eam tamen, quam dixi, perfert inedia, cumq. aliquando alio illi operæ causâ migrandum esset, ubi per æstum sine valetudinis incommodo ferri non potest inedia, postulauit à coniuge, ut ieiunia illa subiret ipsa pro se: quod ab uxore perlibenter est factum. est enim hoc Indis familiare, ut uirorum pœnas, coniuges sponte subeant, cum eas subire uiri ipsi non possunt, uicissimq. uiri cum illa nequeunt. idque maxime cerni licet in morbis obituq.

tuq. coniugum, ut alter subeat, quod persoluumdum alteri fuerat. quin si prius morbus aut ipsa mors occupet, quam alter irrogatas sibi a Sacerdote pœnas expleat, explet ille qui superest. eademq. inter filios & parentes est charitas. Sed ut eo reuertatur, unde aberrauit oratio, mores suos sic exiit Indus, ut & singulari animi summissione, & præcipuo studio virtutis satis ostendat, visa illa fuisse diuina. Indus alius omni vitiorum genere affluens, nihil de salute sollicitus, cum aduersis sæpe rebus admonitus, nunquam tamen ad officium ac iustitiam remigraret, dum cædendæ materiæ causa, in summo iugo conscendit arborem, duos inter silices præcipitatur incautus, tã infesto casu, ut contritum putarent omnes, ac sine controuersia iam mortuum. Iacuit exanimatus integrum diem. quo tempore se vidisse narrabat, suppliciorum acerbicatem ac multitudinem, quæ tum in sceleratorum regione apud inferos, tum in igne purgante ab humanis animis perferuntur. negabatq. quicquam in hac vita cum ijs cruciatibus conferendum esse, vinciq. officium linguæ suppliciorum magnitudine. Ut sibi redditus est, deduci se iussit ad nostros, ubi sigillatim peccata omnia cum dolore confessus, castigatoq. vetere luxu, nouum induit hominem. Confirmata iam valetudine, præcipuo studio colit innocentiam, pœnisque voluntarijs delere studet vitæ præteritæ turpitudinem. Constantem facit hominẽ memoria eorũ, quæ apud inferos vidit. ea semper versantur ante oculos, eaq. de causa, est plerumque pauidus atque attonito similis, ut vel

eo tacente vultus ipsi testentur, quam vera fuerint illa, quæ vidit. Atqui hi sunt præcipui (nam singulos colligere esset propemodum infinitum) animarum fructus, qui in his locis è nostrorum laboribus capiuntur. Qui quo sint vberiores sine ulla hominum arrogantia, diuina comparatum est sapientia, ut toto quadriennio, quo hic nostri fuerunt sæpe rebus exerceantur aduersis. Sed Indorum pietas est solatio, & singularis in nostrum Ordinem obseruantia. Concessum est illis, ut templum nostrum, id quod vehementer optabant, instaurarent. id ipsi à fundamentis propemodum refecerunt. nunc ædes quasdam ad nostrorum habitationem adiungunt, tanta cum beneuolentia ac voluntate, ut operæ vix ullis persuasionibus induci possint, ut aliquid loco mercedis accipiant. Interdumque homines ferre quingenti, cæduam materiam ferunt ad fabricam: è feminis virisque promiscue, intextis è flore coronis, ut indicent quam hilares suam nobis operam nauent: nec abjunt tubæ vexillaque & id genus alia gratulationis indicia, ut plane nulla re alia duci videantur, nisi ut hanc nobis domum quamprimum extruant. Accedit Gubernatoris humanitas, qui cum sit Indus, nec primarijs concedat Hispanis, siue re gerenda siue virtute; fautorem se nobis præbet in primis, multo magis de nostra causa commodisq; sollicitus, quam nos ipsi. Is palam prædicat, natiuos incolas tum demum viuere Christiane cæpisse, cum hac Societas penetrauit. id si quid est, quoniam Dei totum est, tum ei gra-

gratias agimus, tum nihil nostræ laudi assumptum arbitramur. Sed de Mexicana Provincia satis. Nunc quoniam in Aegyptum à Pontifice Max. aliqui de Societate sunt missi: reliquum est, ut ea quoque de re his extremis litteris nonnulla dicamus.



A E G Y P T I A C A E X P E D I T I O.



Emphis, quam Alcayrum vulgus appellat, vltis est Aegyptiaca Turcicis subiecta Regibus: amplitudine nobilis, frequentia celebris. sunt in ea Christiani complures, qui & Cophii & Christiani Præcincturæ vulgo dicuntur. quàmuis enim per lauacrum regenerationis renati sint, Iudæorum tamen ritu præputia ponunt, & veteri quodam errore circumcisionem usurpant, ut hinc maxime appellatio illa iocosa fluxisse videatur, quod præcinctura cinguloq. tenus Christiani sint, cætera siue Turcæ, siue Iudæi. His Alexandrinus Patriarcha præest, cui diuinis in rebus omnis quoque subiicitur Aethiopia, quam & per Memphiticos administrat Episcopos. Numerat Aegyptus quinquaginta circiter Cophitorum millia. Sed fere innumeros Aethiopia. Anno huius sæculi tertio ac sexagesimo Pio iiij. Pont. Max. per Societatis homines Memphitica primo tentata est

est expeditio, sed ea ferme otiosa atque irrita fuit, & si annuo spatium (tamdiu enim ibi nostri fuerunt) laboratum est. Proxime autem nobilis Memphi negotiator magna auctoritate vir, & regionis lingue bene peritus, qui postea Gallicæ nationis factus est Consul (habent enim hic tum Veneta, tum Gallorum natio Consules suos, qui iuris dictionem in ipsas habent) agere cum Patriarcha cepit, ut ea iterum expeditio per eosdem homines tentaretur, sperabat enim, & auctoritate iam parata, & Christianorum erga se obseruantia atque amicitia fore, ut ea gens ad Ecclesiæ communionem, à qua iam esset annos propemodum mille seiuncta, reduceretur. Et quoniam apud Maronitas versari aliquos de Societate cognouerat, cuius amantissimus semper fuit, Patriarchæ facile persuasit, ut eos Memphim per litteras euocaret. Interim Romæ Summus Pont. de re tota fit certior. nihil tam insistendum Pontifici visum, nihil è re Catholica magis, urgente præsertim Cardinale S. Seuerinæ, cuius fidei & iutelæ Egyptiaca commissa gens est. Itaq. litteræ ad nostros dantur in Montem Libanum, ut ex ijs Sacerdos vnus se Romam referret; alter Memphim (duo enim sacerdotes erant) cum ministro comiteq. discederet, qui ut inchoatas ibi res & institutas offenderet, ita Romam significaret; inde enim remissum iri, vel qui in urbem redierat Sacerdotem, vel aliud eiusmodi supplementum. Quinto nonas Octob. anno MDLXXXII. Sacerdos ille è Monte Libano profectus est Memphim, exceptusque inusitatis officijs à viro clarissimo Paulo Mariano, quem po-

*A*lea consulem factum esse diximus: deduxit illum
 Consul ad Patriarcham, d quo ingens quoque facta
 est gratulatio, laudatq. Summi Pontificis egregia
 voluntas, qui se per homines certos tam disiunctis
 locorum interuallis vtro compellendum existimas-
 set, vicissimq. par significata voluntas, vt cum suis
 secumque de religione ageretur. Nec sibi defuit
 Pater, quominus aliorum quoque animos explora-
 ret, eosq. non longe abesse sensit à Regno Dei. sed
 quoniam deerant Pontificiæ litteræ ad Patriar-
 cham, agi cum eo tanquam ex Apostolici Visitato-
 ris auctoritate non poterat, neque cogi licebat syn-
 dos, vt postea licuit. Interim ille Romam de Pa-
 triarchæ mente, statuque rerum omnium accurate
 perscribit. cumq. in ea esset sententia, vt suscipien-
 da prouincia videretur, Sacerdos ad eum destina-
 tus est alter, cum Pontificijs tum ad Patriarcham
 litteris, tum ad nostros, quos ad instituta perse-
 quenda Pontifex hortabatur. Nostri Pontificium
 diploma, Patriarchæ vna cum Consule reddiderūt,
 quod ille osculo veneratus, verticique de more gen-
 tis imponens, eius sententiam requisit. cum ex no-
 stris totam mentem Pontificis cognouisset, noua illa
 Sanctissimi Patris humanitate delectatus, in animo
 sibi esse dixit ex Episcopis virisque principibus co-
 gere frequentem synodū, quò constantius ac firmitus,
 disputationibus agitata veritas, teneretur. Nec ali-
 ter fecit, ac dixit. In mensem Decembrem, qui ab
 aduentu nostrorum erat octauus, indicta synodus
 est. cumq. ad dictam diem conuenissent Episcopi,
 principesq. viri, instituta synodus est apud nostros.

No-

Nostri, potestate dicendi facta, docent initio, se à Summo Pont. eo consilio missos, ut opinionum varietate sublata, errorumq. depulsa caligine, una omnium fides, una omnium esset de religione sententia. dolere autem se vehementer, quod ea natio, quam Beatus olim Marcus Christo genuerat, ab Romana recessisset Ecclesia. Eius disinctionis occasio fuit, Cœcilium alterum Ephesinum, quod Dioscorus coegit Episcopus. quod ipsum nostri docere conati sunt nec fuisse legitimum, nec dignum nomine & appellatione Concilij. In eo enim receptam esse Eutichetis insaniam, duas negantis in Christo naturas. quā heresim Calcedonense Concilium è sexcentis ac triginta Patribus, Leone primo Pon. Max. summa consensione dānasset. quō facto eorum maiores, homines minime malos aut certe non doctissimos, idē esse ratos duas naturas in unā verbi coniunctas hypostasim, ac duas cum Nestorio hypostases copulare, id quod antea Ephesinū legimus explosisse Cœcilium: idcirco eos sese à cætu Catholico seiunxisse. atque inde consequentium errorum fontem ac seminariū exiisse. Quod ut tollatur inplorato primum diuino numine, & sacrarum litterarū monumentis & Conciliorum decretis, & firmissimis sanctorum Patrum testimonijs facite probatum iri; duas copulare in Christo naturas in unam verbi coeantes hypostasim, sine ulla tamen diuisione vel confusione: non modo Nestorianū non esse, ut suspicabantur indocti, sed nihil esse magis Nestorio ipsi contrariū. Hic illi in nostrorum vultus atque ora defixi, tanquam ea primū ad aures acciderent, vehementer admirabantur. quippe crassissimis

circumfusi tenebris & omni magistrorum doctorumq. præsidio destituti. Patriarcha enim a teneris annis in solitudine vitam egerat, in ea ipsa, quā olim dicitur coluisse Macharius, atque ob hanc causam ne ille quidem litteram sciebat ullam. Episcoporum autem multorum par erat inscitia. vix apud eos sanctorum Patrum liber, vix litterarū monumenta erāt, vnde praecepta peterent Christiane viuendi. volumendumtaxat nescio quod latebat in angulis, squalore oblitum, exesum vetustate, quod illi Patrum confessiones appellabant, indoctis fabulis somnūsque permistum: ex quo ipso, ut ex nonnullis alijs Arabicis libris, Nostri, quicquid ad stabilienda firmādaq. Ecclesiae Catholicae dogmata faceret, decerpserunt. rationumq. summam atque argumentorum pluribus codicibus describendam, quam passim mox diuiderent, & sapientissimo cuique ederent, curauerunt. Quare sic inopes a scientia doctrinaeq. præsidijs, cū ad ea, quae obicerentur a nostris, non haberēt quod responderent, moram aliquam postularunt, dum in suis ipsi rebus hospites, quid ipsorum maiores sensissent, quidue haberent in scriptis peruestigarent. Ita primo die missa synodus est. Interim illi in indaganda veritate solliciti, saepe nostros conuenire, saepe rogare, quid cum Ecclesia Catholica sentiendū, quid loquendum esset. Nostri ex altera parte docere, quam vehementer Romana semper Ecclesia omnē detestata sit haeresim, tantumq. abesse, ut stultitij Nestorianis indulgeat, ut in eum potius & in eius sectatores grauissimis anathematis animaduertat. contra vero Alexandrinum amplecti Cyrillum,

vna cum Ephesino Concilio primo, cæterisq. concilijs tum superioribus tum consequentibus, quæ modo sana & legitima numerentur. nec quia duplicem Ecclesia nostra fateatur in Christo naturam, in vnâ verbi coeuntem sine vlla permissione personam, iccirco duas quoque hypostases ac personas inducere. nec enim vt in augustissima Trinitate liquido cernitur, idem valere naturam atque personam, quippe in ea vnâ simplicem suiq. simillimam esse naturâ, & tamen tres inter se distinctas & seiugatas hypostases: sic in Christo vnâ quidem hypostasim esse diuini verbi, geminam tamen reperiri naturam, alteram, quam iam inde ab æternitate habet à Patre, alteram, quam in plenitudine temporis sumpsit ex matre. His alijsq. rationibus; quas referre non est necesse, priusquam denuo synodus cogeretur, veritas Catholica firmabatur. Vt autē coacta denuo synodus est, affuitq. Patriarcha & Episcopi quinque, Abbatesq. cœnobiorum, aliq. ex vniuersa natione primarij viri triginta, quæsitum ex ijs est, quid aduersus ea, quæ superiore conuentu obiecta essent, afferrent: responderunt suos se libros annales peruolutasse, atque ex eorum fide doctrinaue sibi certum esse, religionem quam à maioribus acceperant, nihil immutare; imo quiduis potius perpeti, quam vel transuersum vnguem à patria religione discedere. Tam inopinata responsio mæroris illa quidem multum attulit nostris, desperationem vero nullam perficiendæ rei. excitauit nostrorum animos. Deus, vt acerrime pro veritate pugnarent. Itaque pro re nata dicere exorsi, Si vestrae inquit, historiæ ve-

striq. libri ea continent, quæ cum sanctissimis Concilijs Nicæno, Constantinopolitano, Ephesinoq. primo consentiunt, nihil immutetis licet de patris institutis atque sententijs sint ea vobis oraculorum instar, nec enim ab ijs Romana dissensit. Ecclesia nunc quoniam proximo conuentu, & sacris litteris & sanctorum Patrum auctoritate effectum est, ea à Patrum & Conciliorum abhorrere doctrina, cum duas Christo naturas denegare, nihil sit aliud, nisi miscere ac perturbare vniuersa, & eodem simul negare mendacio, diuinum verbum humanam induisse naturam, id quod nec vestrae nec catholice ferunt aures: animaduertendum vobis est, virum malitis in errore sempiterno perseuerare, & committere vt indocta vestrorum maiorum pertinacia, fraudi vobis & exitio sit, an eniti pro viribus, vt in omni semper re veritas exquiratur, eaq. reperta, cura omnistudioq. teneatur. Ita in alterum mensem reiecta synodus est. Tertius postea habitus est Patrum Episcoporumq. conuentus, in quo primum, rem Domino gubernante, Circumcisionis abrogata lex est. Deinde post longam sex horarum disputationem de duabus Christi naturis, tandem synodus vniuersa instinctu afflatuq. diuino, concordissime sanxit, quod ad rem ipsam attinet, vna cum Catholicis sentiendum, anathematis poena proposita, si quis Christum naturaq. altera spoliaret: qui cum idem Deus, idem sit verus homo, & diuinam habet à Patre iam inde ab omni æternitate naturam, & humanam sumpsit ex Matre definitis temporum spatijs. Coptos autem, quanquam duarum abstineant naturarum appel-

latio-

latione, non tamen ab ijs, Deum & hominem Christum esse, negari: sed ab ea loquendi ratione iccirco refugere, ne consuetudo ipsa loquendi duas inducere videatur hypostases. Hic vix dici potest quantis gaudijs cumulati sint nostri, cum viderent errorem illum, qui tot sæcula iam viguerat, tanta maiorum & posterorum consensione retentum, tanta semper obstinatione defensum, tantarum porro turbarum originem ac seminarium, tandem hoc anno Kal. Februarij è cæcis mentibus diuinitus esse depulsum. Nam quanquam duas illi Christo naturas aperte non dabant, nec ullis rationibus adduci poterant, ut nobiscum etiam verbo, quemadmodum re consentirent, tamen veritatem ipsam attigerunt, & suum agnouerunt errorem, ut nihil iam restare videretur aliud, nisi ut eam suo quisque chirographo confirmaret. Sed tranquillæ propemodum res, incumben-
tibus ad concordiam animis, vnus hominis cupiditas perturbauit. Is fuit Patriarchæ Vicarius, qui cum eius dignitatis hereditatem spe et cupiditate iam deuorasset, intelligebat suis nefarijs obstare consilijs, integritatem Catholicæ religionis, quæ tum fraudes omnes detestatur ac vindicat, tum Patriarcham non ferret alium, nisi quem aut Pontifex Max. aut leges institutaque iussissent. Itaq. dogma illud de gemina Christi natura scripto primum excipisspatiumque ad cogitandum dari voluit: deinde si ita videretur, suam ab vnoquoque adscribi sententiam. Dimisso conuentu, homo veterator ac callidus turbauit omnia, ac ne quis suam sententiam adscriberet, imperauit. Paucis intermissis diebus, instinctu impulsuque Satbanæ

persuasum est etiam Patriarchæ; ut posthabito synodi vniuersæ decreto, neglectisq. ouium periculis; præceptum in vnius perditæ hominis voluntatem sententiamque ferretur. Itaque cum Patriarcham nostris suis in ædibus conuenissent, ut quæ in publica synodo definita essent, fixa rataque haberi vellet; is primo minus sibi constare visus est, tum comperendinare ac reuocare nostros in aliud tempus: ad extremum rebus infectis abdere sese in solitudinem suam, ac lustrandæ Ecclesiæ nomine ab hominum conspectu oculisque subducere. Nostros, quoniam Quadragesimæ iam tempus obrepserat, Patriarchaque tam subito euanuerat, faciendum visum est, ut eum potius ad ferias Paschales Memphi manerent, quam ut fugientem ac nolentem persequi viderentur. Inter hanc moram, ecce tibi aduersus Cophthos sæua calamitas. Duo de primarijs abripiuntur in vincula. Alius qui & auctoritate, & diuitiarum copia ceteris anteibat, bonis omnibus spoliatus in discrimen capitis venit. Alij quoque suæ quisque vitæ partim fuga, partim domesticis latebris consulebant. Quibus rebus Patriarcha cognitis, in interiorem solitudinem aufugit: ea fuit fuga trimestris & ab ipsis quoque familiaribus ignorata. Ut autem motus ille resedit, pacatæque videbantur esse iam res, tum demum patefactum est, ubi Patriarcha lateret. Nostri opportunitatem temporis nacti, litteras ad illum dant, magno se eius desiderio teneri, grauiterque ferre tantam animarum ouiumque iacturam. testari autem se Christum IESUM vniuersorum iudicem, nihil à se prætermisum esse, quominus hæreses & schismata tollerentur,

vnam

vnam eius desiderari præsentiam atque auctorita-
 tem, ut quæ in publico synodi conuentu magno labo-
 re decreta iam essent, perpetuis sanctionibus firma-
 rentur. Rescripsit ad eas litteras Patriarcha, se quã
 libentissime rediturum, orareque ut quoniam Ale-
 xandrinam diæcesim capisset inspicere, tantisper
 Memphi subsisterent. ea lustrata tum demum suo
 aduentu confectum iri omnia. Sed cum futura vitæ
 spatia nulli homini homo, sed multo minus senibus
 præstare possit, moritur in reditu Patriarcha. quod
 quidem in diuinam providentiam referendum fuis-
 se videbatur, alius enim ex eo numero Patriar-
 cha, qui sese nobis adiunxerant, sperabatur; ac pro-
 inde nouus aliquis Vicarius, qui concordiae con-
 firmaret initia. Verum cum inter extincti Patriar-
 chæ obitum, & creationem noui, interiectum ex le-
 ge debeat esse annui ferme temporis intervallum
 (aiunt enim suam decere Ecclesiam tamdiu, spon-
 si interitum deplorare) ideo nostri Italiæ repe-
 tendæ consilium capiunt, ut quo loco eius Ecclesiæ
 res essent Romam nunciarent, parati simul ad redi-
 tum, si qua inclinatio fieret ad concordiam. Copti
 Primarij vbi de Patrum habitu cognouerunt, de com-
 muni sententia ad summum Pontificem litteras dant,
 quibus ei partim gratias agebant, quod homines &
 quibus veritatem Catholicam docerentur, ad se mi-
 sisset, partim dolere se significabant, quod suæ Eccle-
 siæ cum Romana sede coniunctio, quæ Ecclesiarum
 omnium caput est & magistra, nulla fuisset. Eas lit-
 teras nostri cum perferendas accepissent, pararentq;
 iam reditum, ipso profectionis die, qui dies B. Mat-

theo Apostolo sacer ac festus erat, albente caelo; ecce tibi in ipsorum adibus, Turcarum turba ferro ac telis instructa, cum personato duce ac signifero, qui quid agendum, cuius inijcienda essent vincula, demonstraret. Ea re peruulgata, ad tam novum atque inopinatum spectaculum magna repente multitudo confluit. Capivi ducebantur omnino quinque, multo cum saeculite ad Proregem Turcam, quem Bassam nominant, in conspectu luceque totius civitatis, passum millia fere quatuor; est enim, ut diximus, urbs ipsa perampla. Tres erant ex Societate: duo ex Franciscana familia, qui quoniam ad nostros diuenterant, & in eisdem simul adibus habitabant, in partem quoque laboris periculique venerunt. Quartus de Societate restabat, qui dum sociorum profectiorem adornat, praecurrit in Alexandriam, ubi cum de sodalium vinculis cognovisset, praemore febre correptus interijt. Latuit tum hostile consilium, latuit causa vinculorum: postea communis fama sermoque fuit, totius calumniae structorem atque architectum fuisse Consulis aemulum, qui dum Consulatu spe atque animo incubat, ut Consulcm de suo gradu deiceret, detulit ad Proregem, populos ab eo contra Turcarum Regem sollicitatos, habereque a Philippo Rege mandata, redigendi in eius potestatem Christianorum millia sexaginta, ad eamque rem praesto esse Memphi presbyteros: qui suam Regi operam Consuliq. navarent. Ita ipse quoque Gallicae nationis interceptus est Consul, litteraeq. simul domesticae ad inquirendum inuestigandumque proditiionis crimen. Postridie Praesidi sistuntur omnes,

nes, iſq. cuius ſe eſſe dicerent, quidue in ea regione gererent, & quamdudum, & quibuſcum verſarentur, interrogati; reſponderūt ſe viros eſſe Religioſos habereq. iter in Palaſtinam, vt ea loca Chriſti veſtigijs nobilitata conuiſerent. quo cum penetrare cuiſam Chriſtianorū, Summi Pont. iniuſſu non liceat, facta ab eo poteſtate, ſibi mandatū, vt in Aegyptum excurrerent, & Chriſtianos illos qui ibi eſſent inſpicerēt, deq. religionis Chriſtianæ rebus cum iſſis agerent. Acquieuit tum quidē Prorex, ſed cum litteræ ac ſcripta noſtrorum perquirerentur, prolatae ſunt Principum Cophthorum litteræ ad Summū Pont. quibus fidem faciebant, noſtros fuiſſe Memphi, eoſq. varijs in ſynodis ſuo cum Patriarcha de rebus agitauiſſe Chriſtianis. ſed nimirum clauſula fraudi fuit, erat enim in extremis, optare Cophthos vehementer, vt tandem vnum ouile fieret & vnus paſtor. Quæ verba ſecus interpretatus Prorex, ſubita ſuſpicionē incenſus. repente conſtitit, ac colore mutato; Nonne, inquit, prædiximus noſtrorum videlicet notabat inſidias, qui in eas regiones eo animo conceſſiſſent, vt Cophthos, totamq. mox Aegyptum à Turcarum dominatione diſiungerent, eoſq. vni Regi Philippo vel Pontifici Romano ſubijcerent. Ergo tanquam manifeſtis indicijs expoſitis atque editis, quærēdum præterea aliquid non putauit. Affuit tum Mahometicæ vanitatis Antifteſ, quem illi Muphtim dicunt. is vt Patres aſpexit, & ea quæ agebantur accepit, ſublata voce, Digni ſunt, inquit, iſti, qui viui crementur. Prorex aſſeruatis Cophthorum litteris, Patres in anguſtiū ac tenebricoſum carcerem condi iubet,

bet, pedore horridum, odore teterimum. Ibi nostri in summa rerum omnium inopia humi cubantes, diē quartum & vigesimum animas prope obnoxias carnis arbitrio ducebant: nihil enim tum morte certius, nihil securi præsentius, si humanitas rem perpendas. augebat periculum, quod ne Veneto quidem Consuli fas fuit, innocentium mortem ac sanguinem deprecari: conatum enim nostrorum causam salutemq. suscipere, Prærex omni sermone adituq. prohibuit. Cumq. ad eum Consul idem supplices dedisset libellos, acerbius responsum tulit, cauere, ne se vlla in re, si sciret, interponeret: sensurū postea, quanta caputū abscissio foret, quanta sectio collarū. Consul hoc imperio deterritus non vrsit amplius, sed de periculo se proripuit. Amici vero studiosiq. Societatis, habito inter se consilio, statuūt calumniæ periculum pecuniæ magnitudine posse redimi, si ita Patribus videretur. Patres quoniam videbant suā perniciem cum magna Coptiorū calamitate coniunctam esse, metuebant enim, ne si quid eis mali sua causa accideret, abhorrerent in posterum ab omni non modo Catholicorum consuetudine, verum etiam voluntate studioq. Catholicæ veritatis: iccirco ne tot animas in discrimen vocarent, non recusarunt, quominus liberatio illa, pecuniæ magnitudine tentaretur. Itaque die quarto & vigesimo ab inclusione teterriimi carceris, vadimonio intra tertium mensem constituto, quinque circiter aureorū millibus transacta res est. Quam in re mirifice Coptiorum in nos declaratus est amor. certatim enim negotiatores illi, quod persoluendum fuerat, erogarunt; alij aliud

pro

pro cuiusque opibus ac fortunis nullo fœnore nulla mercede. quæ vero ob eandem causam de suo Gallicæ nationis Consul impendit, decem millium aureorum summam excedunt, nec modo rei familiaris, vir egregius, verum etiam honoris iacturam fecit, dignitate Consulatus amissa. Missi è custodia nostri, agere per amicos instituunt, ut Sacerdos alter, salvo tamē vadimonio, Romam quamprimum redeat, cum ad ea, quæ acciderant, nuntianda, tum ad maturandum redemptionis argentum. Facta abeundi potestate, redit in urbem Sacerdos alter, totaq. de re certiores Pontificem facit. Pontifex confirmatis nostrorū animis, ac persoluto redemptionis argento, alterum ad eum, qui remanserat sacerdotem diploma dedit, ut pacatis rebus, Memphi subsisteret, expeditionemq. conficeret. adiunxit ad diploma litteras ad insequentem Patriarcham, quibus fidem faciebat, nostros à se vere missos, eosq. ut se ipsum audiendos. Sed quoniam ab extincto Patriarcha mensis iam decimus agebatur, nec tamen de novis comitijs ullus erat sermo, successeratq. novus Prorex, qui significauerat se iterum causam velle cognoscere: esse enim proximi Proregis avaritia labefactatum corruptumq. iudicium; ideo Pater veritus, ne cum è pristinis laqueis se exuisset, in alias sibi iterum plagas magno cum Christianorum periculo incidendum esset; inchoatis adhuc rebus consilium reditus capit, ut quo loco res essent, et quæ se spes utilitatis ostenderet, Summum Pont. admoneret. Atq. hic Ægyptiacæ expeditionis exitus fuit, non satis ille quidem votis optatisq. respondens, sed tamen non omnis ex-

pers


pers viilitatis. quæ si non alia, hæc certe consecuta est, quod nostri præter diuturnæ peregrinationis incommodum, squallorem carceris & vincula experti sunt, & ea denique quæ suis tantum reseruat Dominus. Manent præterea præclari ipsorum conatus, qui quavis interdum sint irriti atque inanes, tamen ne tum quidem eos sua Deus mercede defraudat. non enim tam res ipsas remuneratur, quam voluntates. quin his sæpe maiora debentur præmia, quod rerum fructu voluptateque frustrantur. Nam præclarum facinus, ipsum sibi præmium & merces est, omnibus autem conuiui viribus, ut ad exitum rem perducas, si non succedit euentus, quasi merces laboris amittitur. Verum si non is fuit, ut diximus, huius profectionis, qui optabatur, euentus; tamen ne mediocre rem actam arbitremur, iacta sunt fundamenta futuræ concordie, quam spectabat vigilans Ecclesiæ Pastor Gregorius. conciliati sunt Catholicis summoque Pontifici Copti complures: & quidem sapientissimus quisque Coptorum. Episcopi etiam aliquot principesque viri ab Eutichetis hæresi, ad Catholicorum sensum mentemque conuersi. Iacta denique per libellos in vulgus editos passimque diuisos diuini verbi semina, quæ suo tempore non exiguos editura sint fructus. Multa præterea seruitia, Damonis ac Turcarum seruitute liberata. Nam & animis per sacramenta consultum est, & ex Pontificio viatico, tum corporum necessitati subuentum, tum è vinculis exempti sunt sexdecim, qui ipsi postea Romam adducti, liberali item à pio Pontifice donati sunt stipe. Patres vero summa fratrum gratulatione longo dierum intervallo recepti sunt.

sunt. eorumq. reditus tanto nobis visus est dulcior, quanto antea carcer acerbior; quin hoc ipso iucundior, quod cum ijs esse & colloqui liceret, qui in animarum caussa tenebras & ærumnas carceris pertulissent. Atque hunc Aegyptiaca expeditio, ceteraque huius anni res gestæ terminum habeant.

Videor mihi Patres Fratresque Carissimi persoluisse, quod debui. Vestros vobis attuli fructus: vobis quidem, & ijs, qui sitiunt animas periucundos: sed multo iucundiores gratioresq. cælestibus. qui si super vno peccatore pænitentiam agente tantis gaudijs cumulantur, quantis tandem persundantur oportet, cum tot animas ad sanctitatem genitas, sed scelere perditas, ad pænitentiam per vos viderint reuocatas? Faxit Deus, ut hæc illis gaudia perpetua sint. quanquam id in illorum potius suffragationibus, quam in nostris nervis positum est: illi implorandi sunt nobis: non possunt nostris non suffragari laboribus, qui & gratia valent apud Deum, & charitate ardent in genus humanum. Romæ ex Collegio Romano. Sexto Kal. Martij. M D LXXXVI.

Omnium in CHRISTO seruus.

Nicolaus Orlandinus.



401. 519

ERRATA AVT OMNIVM
aut quorundam exemplarium.

fol.9 septimo Kal.Octob.	septimo Kal. Decemb.
fol.81.spe questus	spe quæstus
fol.211.tenuissimæ	tenuissimæ
fol.218.hæretitorum	hæreticorum
fol.223.adolescensum	adolefcentem
fol.305.domestica	domestica





